

...Nafsning kelajagi — zulmdir, zulmning kelajagi esa — xorlikdir. Biz ana shu oddiy haqiqatni bayon qilmoqchimiz. Badan pokligi badanga, ruh pokligi ruhga hayot bagʻishlar...

Bismillahir Rohmanir Rohiym

«...Ana o'shalar hidoyatga zalolatni sotib olgandirlar. Va tijoratlari foyda keltirmadi hamda hidoyat topganlardan bo'lmadilar. Ular misoli bir o't (mash'ala) yoquvchiga o'xshaydilar. Olov endi atrofini yoritganida Olloh yorug'likni ketkazib, ularni hech narsani ko'rmaydigan holda zulmatlarda qoldiradi. Ular kar, soqov va ko'rdirlar. Bas, ular hidoyatga qaytmaslar...»

(Bagara surasi, 16—18-oyatlar)

MUALLIFDAN

Butun olamlar Parvardigori Ollohga behad hamd boʻlsin va paygʻambarlarning oxirgisi — sayyidimiz Muhammad alayhissalomga salovot va salomlar boʻlsin.

Albatta, hamd Ollohga xosdir. Biz unga hamd aytamiz, Undan yordam soʻraymiz. Va Ollohdan nafsimizning yomonliklaridan panoh berishini soʻrab iltijo qilurmiz. Kimni Olloh hidoyat qilsa, uni adashtiruvchi yoʻq. Kimni Olloh adashtirsa, uni hidoyat qilguvchi yoʻqdur.

Eng ulug' so'zlaru eng bilimli suhbatlar ham shubhasiz, Tangri taologa shukrimizni keragicha ifoda eta olmaydi.

Yaratgan Robbimizga shukrlar boʻlsinkim, siz — aziz nafis adabiyot muhiblari bilan yana dillashish nasib etyapti. Bu safar ham adashgan bandalar hayotidan ayanchli lavhani bayon etishni niyat qildim. Chunki bu sinovli dunyoda adashgan bandalar koʻp. Ulugʻ va qudratli Robbimiz marhamat qilib derki: «Odamlarga ayollardan, bolalardan, toʻp-toʻp tillo va kumushdan, goʻzal otlardan, chorvadan, ekin-tikindan iborat shahvatlarning muhabbati ziynatlandi. Ular dunyo hayotining matohidir. Ollohning huzurida esa husnli qaytar joy bor». (Oli Imron surasi, 14-oyat).

Tafsirchi ulamolarning fikricha, «shahvat» soʻzi urfda jinsga oid ma'noda ishlatilsa-da, aslida oʻzagi «ishtaha» soʻzidan olingan boʻlib, koʻngil tusashi, xohlashini bildirar ekan. Shunga koʻra, oyati karimada insonning ayollarga, farzandlarga, boylikka **ishtahasi** mavjudligi, ya'ni shu narsalarga muhabbati chiroyli tarzda **ziynatlangani** ta'kid etilmoqda. «Demak, bu muhabbat insonning asl tabiatida bor ekan. Bunday holatning boʻlishi tabiiy bir hol ekan. Modomiki, ushbu ragʻbatlar inson tabiatida bor ekan, Ollohning oʻzi insonni shunday yaratgan ekan, bu narsalar inson hayotini muhofaza qilishda, uning goʻzal va zavqli kechishida xizmat qilmogʻi lozim. Shuning uchun Islom

dini mazkur narsalarni harom qilgan emas, balki **muboh** qilgan. Bu narsalarni man qilishni emas, **tartibga solishni** yoʻlga qoʻygan. Islom kishilarni tarbiya qilib, **shahvat daryosida halok boʻlmaslikka** chaqiradi. Inson mazkur shahvatlarning quli boʻlib qolmasligi kerak. Balki **ularning hojasi** boʻlib, oʻz tasarrufiga olishi darkor.»¹ Oyati karima «Ollohning huzurida esa husnli qaytar joy bor», deb yakunlanadi. Bu joy — jannati naimdir!

Moziyda o'tgan valilardan biri «Dunyo — o'tkinchi mehmonxonadir. Dunyodagi eng ulug' boylik — **dunyoga berilmaslikdir.** Dunyoni afzal bilgan kishi zillatga, xorlikka hukm etilib, halok bo'lur», degan ekan. Yana roviylar derlarki: dunyo yasatilgan kelinchakka o'xshaydir. Ko'zlar unga termulgan, qalblar unga mushtoq, nafslar esa unga oshiqdur. U makkor esa, barcha oshiqlarni shafqatsiz holda birma-bir halok qiladir. Hayotdagi tiriklar o'lganlardan, keyingilar oldingilardan **ibrat olmaslar**...

Hisob-kitob qilinmasdan burun **nafsini tiygan** kishi **yutadi.** Nafsi bilan gʻaflatda qolgan esa, zararga uchraydi.

G'aflatda qolib nadomat chekkanlar qancha?

Qabriston bizga sukunat olami boʻlib koʻrinadi. Aslida ohu faryodlar oʻlkasidir! Biz bu faryodlarni eshitmaymiz, bilmaymiz. Shu bois biz mayyitlarning kechmishidan ibrat olmaymiz. Agar tinglay olganimizda edi...

«Murdalar gapirmaydilar», deymiz. Bizga shunday tuyular? Balki ular gapirarlar, biz eshitmasmiz? Eshitsakmi edi...

MUQADDIMA

Nafisani qarg'adilar:

- O'ynashi bilan yotgan ekan, sharmanda!
- ...sharmanda... sharmanda...
- Soʻyib oʻldiribdi. Xudoning oʻzi jazolabdi!
- ...o'zi jazolabdi... jazolabdi...

Nafisaga achindilar:

- Tirnoqqa zor o'tdi, bechora...
- ...bechora... bechora...

Sanjarni la'natladilar:

- Suyuqoyoqqa ilakishib yurgan ekan, yigit oʻlgur!
- ...yigit o'lgur... yigit o'lgur...
- To'rt bolasi ko'ziga ko'rinmabdi-da, haromxo'rga!
- ... haromxo'rga... haromxo'rga...

Sanjarga achindilar:

- Qo'y og'zidan cho'p olmagan bola edi, bechora!
- ...bechora... bechora...
- O'zi pokiza edi, shayton yo'ldan urgan!
- ...pokiza edi... shayton yoʻldan urmagan... urmagan...

Ikki murda o'likxonada tekshiruvchilarning o'tkir tig'ini kutib yotibdi. Hademay o'tkir tig' ularning qorni, ko'kragi, boshini yoradi. O'lik hujayralarda yashiringan haqiqatni o'qimoqchi bo'lganday titkilashadi. So'ng, yorilgan yerlarini tikib, murdalarni egalariga beradilar.

Nima uchun o'lim topganlaridan bexabar qolgan ikki odam esa, qiyomatni kutib yotmog'i uchun qorong'u lahadga qo'yiladi.

_

¹ «Tafsiri hilol»dan.

So'ng pichir-pichirlar:

- «Xotinlarga aralashadigan odati yoʻq edi-ku?..»
- «G'arko'z edi bu juvon...»
- «Kim o'ldirgan ekan?»

«Eri avval ham bir-ikki ushlab, kechirgan ekan. Lalaygan bir erkak-da! Bu safar chidolmabdi, boyaqish...»

Birinchi bayon: yashash huquqi

ARRALANGAN DARAXT

O'zini osmon tirgovichi, deb faraz qiluvchi kekkaygan daraxt jazosini arra berdi: u o'zidan oldingi og'ochlar qismatiga yetdi — jon tomiri uzilib, yerga uzala tushdi.

Tursunali bu manzarani dastlab koʻrganida oʻzining kechmishini shu daraxt qismatiga oʻxshatgan edi. Uning qaddi ham shu ogʻoch kabi adl edi. U makon topgan daraxtzor, nazarida dahlsiz edi. Bu daraxtzorda istaganicha quyoshdan nur emishi, huzurlanib chayqalishi mumkin edi. Tomirlari toboro kuchliroq qudrat kasb etib borardi. Ammo kutilmaganda uning daraxtzoriga bolta oraladi: bir chekkadan chopa boshladi. Navbat oʻziga yetganida unutilayotgan rivoyatni esladi. Emishki, bir oʻrmonda bolta paydo boʻlib, daraxtlarga qirgʻin keltiribdi. Ogʻochlar unga qarshi chora topolmay, qari Emandan maslahat soʻrashibdi. «Bolta deganlaring nima oʻzi? U nimadan ishlangan?» deb soʻrabdi Eman. «Bolta — temirdan yasalgan bir matohdir», deb javob beribdilar. «Oʻzi-ku, temir ekan, dastasi-chi? Dastasi ham temirdanmi?» deb soʻrabdi Eman. «Yoʻq,— debdilar, — dastasi — ogʻochdan, oʻzimizdan». «Dastasi oʻzimizdan boʻlsa, unga chora yoʻq», degan ekan Eman.

Tursunali makon topgan «daraxtzorda» «bolta» paydo boʻlishi bilan unga dasta boʻlishga oshiquvchilar koʻpaydi. Oqibatda Tursunalining ildizlari chopildi-yu, sovxoz direktorligidan raykom sarkotibligiga oʻtaman, deb niyat qilib turgan odam egniga mahbuslarning paxtalik kalta choponini kiyib, uzoq sovuq oʻlkadagi daraxt kesuvchilar safida oʻzini koʻrdi. Uyqusiz kechalarda bu baloga mubtalo boʻlish sabablarini koʻp oʻyladi. Tuzini yeb tuzligʻiga tupurganlarni la'natladi. Doʻst libosidagi ilonlar boshini birma-bir yanchishni diliga tuqdi.

Xudoning qarg'ishi tekkan bu joylarga kelgunicha bo'lgan o'tmish kunlarini eslasa, ko'z oldini zulumot pardasi qoplayveradi. Bu zulumotni gohi-gohida faqatgina bir nur yoritardi. Bu nur Nafisaning chehrasidan taralardi. Shunday paytda Nafisaning dimog'idan taralgan iliq nafas unga tiriklik shuurini berardi. Azobli kechalarda ham farzandlarining onasi, halol juftiga nisbatan shu Nafisani ko'proq o'ylardi, uni qo'msardi. Bunga ba'zan o'zi ham ajablanardi. «Nima bu? Shunchalik qattiq sevarmidim?» deb o'ylardi. Tursunali shahvoniy hirs bilan sevgi farqini ajrata oluvchi aqlga ega emasdi. Buni sinamoq uchun Nafisaga nisbatan yoshroq, go'zalroq, ishvalari shirinroq qiz ro'para qilinsa, bas. U «sevgi» deb o'ylab yurgan tuyg'u o'lardi-qolardi. Hozircha, Nafisaning birinchi tunda shivirlab aytgan «Munchalar yaxshi ekansiz», degan gapi qulog'i ostida turibdi. O'zga iliq nafas bilan aytilishi mumkin bo'lgan shunday so'z o'tmish totli kechalar yuziga qora parda tortmog'i ta-yin. «Ahmoq bo'lib shu juvonga ilakishib yurgan ekanman. Dunyoning lazzati bu yoqda ekan-ku?» demog'i ham aniq edi...

Ammo hozir, u bularni o'ylamaydi, orzu qilmaydi. Uning dardi ham, niyati ham bir — tezroq bu o'laksazordan qutulish! Qachon, qanday qutuladi, — bandasiga qorong'i.

Yurtida uning uchun kuyib-eladigan, pul sarf qilib ozodlikka chiqarish uchun tashvish chekadigan odami yoʻq. Demak, yana oʻn toʻrt yil mahbuslik libosida yurmogʻi rostga oʻxshab turibdi.

Tursunali ana shu og'ir dard tog'ini yelkasiga ortgan holda o'ringa cho'ziladi, sahar chog'i shu yuk bilan qaddini rostlaydi. Ba'zi erkaklar yig'laydilar. Ba'zilari dardlarini aytib, hasrat qiladilar. Tursun-ali dardini kimga aytsin, kimga yig'lasin, kimga hasrat dasturxonini ochsin?!.

Bir yigit kelib edi. Istarali bu yigitning pokiza odam ekanini yuzidan yogʻilib turgan nur oshkor etib turardi. Tursunali «Bu yigitni menga Yaratganning oʻzi yetkazdi», deb quvongan edi. Bugun bu quvonch ham balchiqqa qorishadiganga oʻxshab turibdi. Tursunali shu havotirda daryo tomonga qarab-qarab qoʻyadi. Yigitni sohildagi qoʻlbola chayla tomonga boshlab ketganlar. Bu yerga kelgan kunining yo uchinchi, yo toʻrtinchi kuni Tursunali ham shu chayladagi suhbatga chorlangan edi. Oʻshanda qoʻliga bolta olib, arralab yiqitilgan daraxt shoxlarini endi butay boshlagan edi. Pachoqburun bir mahbus yaqinlashib, he yoʻq, be yoʻq:

Ey, chuchmek, yur bu yoqqa! — deb buyurdi.

Tursunali u damda osiyoliklarning «chuchmek» deb atalishini bilmas edi. Shu sababli murojaat kimga qaratilganini anglamay:

— Menga aytyapsizmi? — deb so`radi.

Pachoqburun hech bir takallufsiz Tursunali tomon chirt etib tupurdi-da, labini kafti bilan artdi:

Senga aytyapman! — deb toʻngʻilladi.

Chakalak orasidagi yolg'izoyoq yo'ldan borayotganida Tursunalining yuragiga vahm oraladi. U qamoq lagerlaridagi odam o'ldirishlar haqida eshitgan edi. Bu Pachoqburunning so'xtasi bunchalar sovuq bo'lmasa! Onasidan tug'iliboq odamxo'rlikni kasb qilib olganini basharasining o'ziyoq aytib turibdi. Ana shu bashara Tursunalini qo'rquvga soldi. Agar hozir unga «bu odam qotil emas, qulfbuzarlarning ustasi», deb haq gap aytilsa ham ishonmagan bo'lardi.

«Oʻldirgani olib ketyaptimi?» deb oʻyladi Tursunali. Soʻng «Nimaga oʻldiradi? Endigina kelgan boʻlsam?..» deb oʻziga oʻzi tasalli berdi. Qamalganidan beri mutelik jandasini egniga ilib, soqchi «yur» deb buyurganda yurib, «oʻtir!» desa oʻtirib, «qoʻlingni orqaga qil», desa qoʻlni orqaga bogʻlab turishga koʻnikib qolgan Tursunali bu safar ham yuvvosh qoʻy kabi «qassob» — Pachoqburunning yetovida yurib borardi. Tursunalidan qoʻy ham tuzuk. Qoʻy qassobni koʻrganida ma'rab qoʻyadi. Tursunali esa, aqalli bir ogʻiz gap aytishga ojiz.

Chakalakzordan o'tib, daryo sohiliga chiqishdi. Shoxshabbalardan yasalgan qo'lbola chaylaga yaqinlashganda Pachoqburun orqasiga o'girilib:

Shu yerda to'xta! — deb buyurdi.

«Yuvvosh soqov qo'y» amrga itoat etdi.

Hali quyosh ko'tarilib, borliqni ilita olmagan bo'lsa-da, chayla xojalaridan ikki kishi yarim yalang'och holda o'tirib tamaddi qilishardi. Pachoqburun ularga yaqin borib, buyruq ado etilganini ma'lum qilgach, hojalardan biri Tursunali tomon qarab qo'ydi-yu indamay lunjidagi taomni chaynayverdi. Pachoqburun u yerda, Tursunali esa yigirma qadam berida xoda yutganday tik turib, ularning taomdan bo'shashlarini kutdilar. Nihoyat, qorin to'yib, nafs orom olgach, yaqinlashmoqqa ijozat bo'ldi.

Tursunali ulardan birini tanidi: u ichki qo'shinlar mayori kiyimida yuradigan, oshxonadagi tartibni kuzatuvchi odam edi. Rezina tayog'ini ko'z-ko'z qilib, o'ynatib yuruvchi bu mayor tartib buzuvchining gardaniga ayamay urib qolardi. Qo'li qichib turgan bo'lsa-yu, tartib buzilmasa, sho'rvasini xo'rillatib ichayotgan odamning ham

gardaniga tushirib qolishdan toymasdi. Mayor oshxonada kimning yoniga yaqinlashsa, o'sha odam iloji bo'lsa, ovqatni chaynamayoq yutishga harakat qilardi. Chaynalmagan ovqatni oshqozon hazm qilib yuborar, ammo gardanning rezina tayoq zarbini hazm qilishi qiyinroq edi.

Tursunali yaqinlashgach, mayor oʻrnidan turib, ikki qadam naridagi koʻkatlar ustiga tashlangan kiyimlar yonidan tayogʻini olib, chap kaftiga urib qoʻydi-da, uning orqasiga oʻtdi.

«Uradi shekilli?» deb o'yladi Tursunali. Orqadan zarb kutgani uchun u beixtiyor bukchaydi. O'tirgan odam uning bu holatini ko'rib kuldi-da:

Qoʻrqma, urmaydi, — deb ovutdi.

Bu odamning kulishi oʻziga yarashardi. Timqora koʻzlari Pachoqburunniki yoki orqada turgan malla ma-yorniki kabi yovuzlik bilan boqmasdi. Qaldirgʻoch moʻy-labi ham oʻziga yarashgan edi. Shu sababli Tursunali uni mahbus emas, shu yerning kattalaridan deb oʻyladi.

Men — Tengizman, o'tir, bugun sen menga qo'noqsan.

Bu ismni eshitib, Tursunali ajablandi. Chunki u kelgan kuniyoq yotoqdagi qoʻshinisidan «Bu yerning asl xoʻjayini polkovnik emas, ashaddiy oʻgʻriboshi Tengiz boʻladi», degan gapni eshitgandi. «Tengiz» deganlari umri qamoqda oʻtgan, Pachoqburun kabi xunukbashara keksa odam deb oʻylagan edi. Oʻzidan yoshroq bir yigitning «Men — Tengizman», deyishi shu sababli ham uni ajablantirdi.

— Gapimni eshitdingmi? Kel, o'tir.

Tursunali itoat bilan, huddi qaynonasinikiga birinchi marta kelgan uyatchan kuyov kabi oʻtirdi. «Ol, ye», degan taklifni oʻrinlatib bajarolmadi. Bir-ikki tishlam non yeb, maydalangan goʻshtga qoʻl uzatmadi. Yegisi kelib turgan boʻlsa ham, koʻngli tortmadi. Qamalguniga qadar ovqatlarning sarasini yeb oʻrgangan odam das-turxon ustidagilarni sarqit deb bilib, irgandi. Mehmonga kechikibroq borsa, darhol dasturxon yangilanardi... Endi oʻsha kunlarning sadagʻasi ketsa arziydi...

Har bir harakatini diqqat bilan kuzatib oʻtirgan Tengiz nafsni yengishga nima sabab boʻlayotganini sezdi:

- Hazar qilyapsanmi? Nega yemayapsan?
- Hazar qilayotganim yoʻq. Qornim toʻq.
- Hozircha yangisan. Yana uch-to'rt oy o'tsin, birov chaynab tashlagan chandirni ham ko'zingga surtib yeydigan bo'lib qolasan. Sen menga qo'noqsan. Ol, ye! Meni ranjitma!

Avvalgi taklif endi buyruqqa aylangach, Tursun-ali beixtiyor goʻshtga qoʻl uzatdi. Bu buyruqdan soʻng «qorni toʻq odam» dasturxonni yamlab yutayozdi. U ov-qatlanib boʻlgach, Tengiz dasturxonning bir uchini qa-yirib yopdi-da, Pachoqburunga qaradi. Buyruqqa mahtal turgan mulozim bu qarashning ma'nosini uqib, dasturxonni yigʻib oldiyu, nari ketdi. Tengiz ma-yorga ham bir qarash qilgan edi, u kiyimlarini qoʻltiqlab, chayla ortiga oʻtdi.

Toʻxtaev, gap bunday, — dedi Tengiz xoli qolishgach.

«Mening familiyamni qaerdan bila qoldi?» — deb ajablandi Tursunali. Soʻng «qamoq lageri boshligʻidan ustunroq mavqedagi odamga shuni bilish qiyin ekanmi?» deb qoʻydi.

— Sen albatta tuhmat bilan qamalgan bo'lishing kerak, a?

Qora bulut choki soʻkilib, birdan quyosh charaqlaganday boʻldi: Tengiz Tursunalining koʻnglidagi gapni topib aytgan edi.

— Ha, tuhmat bilan qamashdi, — dedi Tursunali yutinib.

- Bu yerdagilarning hammasi oʻzini passajir² deb hisoblaydi. Seni bu yerga tuhmat boshlab kelmagan. Hasislik qilgansan. Pupkarlarni vaqtida moylash kerak edi.
 - Kimni?
 - Milisani! Nima, bunaga so'zlarga tushunmaysanmi?
 - Ularni... rosa moylaganman. Bekorga yeb ketishdi.
- Yetarli moylamagansan. Molning chanqog'ini tomizg'ichdagi tomchi suvlar bilan qondirib bo'ladimi?
 - Bizning ish Maskovning qoʻlida edi. Ularni chelaklab ham sugʻorib boʻlmas ekan.
- Boʻlmaydigan ish yoʻq bu dunyoda, Toʻxtaev! Nima uchun Moskva senlarga yopishdi, bilasanmi?
 - Yoʻq, bilmayman.
- Otam rahmatli aytib berardilar. Urush mahalida ikkita oʻzbekka bitta miltiq berisharkan. «Bittang oʻlsang, ikkinching olib otaverasan», deyisharkan. Otalaring shunga ham koʻnishavergan. Senlar ham otalaringga oʻxshagan laqmasanlar. Ahil emassanlar. Bir-birlaringni sotishni yaxshi koʻrasanlar. Kozyol³ ham koʻproq senlardan chiqadi. Senga oʻxshagan sovxoz direktori boshqa yerda yoʻqmi? Muttaham, poraxoʻr hamma yerda toʻlib yotibdi. Bunaqalar Armanistonda yoʻqmi? Be, senlardan koʻra koʻproq u yerda. Lekin Gobelyan u yoqqa bormaydi. Oʻzinikiga tegmaydi. Senlarning yarmingni qirib tashlasa ham gʻing demaysan-da. Qani, Gorbach armanilarga tegib koʻrsin-chi! Mos- kvangning oyogʻini osmondan qilib yuborishadi. Senlar esa... Tengiz hafsalasi pir boʻlib qoʻl siltadi. Senlar mishiqlaringni oqizib, «tuhmatdan qamaldim», deb yigʻlab yuraverasanlar. Endi gap shu, bilmasang bilib ol: men oʻgʻriman! Ochiqda yurganingda mendaqalardan nafratlanarding, a?
 - Yo'q... nega?
- Talmovsirama. Biz oʻgʻrilar, senlarning nazarlaringda eng pastkash odamlarmiz. Aslida esa, senlar pastkashsanlar. Biz oʻgʻrimiz, bu bilan faxrlanamiz. Bilib qoʻy: eng halol odamlar bizlarmiz. Shuning uchun ham odamlar taqdirini hal qilish huquqiga faqatgina bizlar egamiz. «Chestnyaga» degan soʻzni eshitganmisan? Ana oʻshalar bizlarmiz. Bizda halollikdan bir enlik ham nari-beri chekinilmaydi. Doʻstga xiyonat yoʻq. Kim bunga jur'at etsa boshi ketadi. Senlarda halollik bormi? Sadoqat bormi? Yoʻq! Hech narsa yoʻq! Oldingda ikki yoʻl bor: agar tirik qolsang, oʻn toʻrt yildan keyin uyingga borasan. Umring qisqa boʻlsa, shu yerda oʻlib ketasan. Bilib qoʻy, bu yerlarda ilonlar koʻp. Bir chaqishda oʻldiradi. Agar xizmatimizni bekamu koʻst qilsang, seni ilonlardan oʻzimiz qoʻriqlaymiz.
 - Nima xizmat buyursangiz... tayyorman!
- Nima balo, pionermisan, doim tayyorman, deysan? Sen o'ylab, shoshilmay javob ber.
 - Shoshilsam-shoshilmasam, menga suyanadigan bir togʻ kerak-ku?
- Togʻ, dedingmi? Yaxshi aytding. Sen suyanadigan togʻ bor. Ammo... Tengiz jilmaydi. Bu jilmayish avvalgiday begʻubor emas, balki ayyorlik yeli bor edi unda. Ammo, suyanish uchun togʻ haqini toʻlashing kerak. Ochiqlikda har oy maosh olardingmi? Ha, olarding. Xuddi shunga oʻxshab, suyanadigan togʻ haqini har oyda toʻlab turasan. Sen bugun biksa⁴ngga bir malyava⁵ yozasan. Har oyda pul yuborib turadi.

² Passajir — tasodifan qamalgan odam.

³ Kozyol — qamoqxona ma'muriyatiga faol yordamchi.

E s l a t m a: qamoqxonadagilar, xususan oʻgʻrilar tiliga xos ayrim iboralarni tarjima qilmay, aslicha yozishni ma'qul koʻrdik. (*Muallif.*)

⁴ *Biksa* — xotin.

⁵ Malyava — xat.

- Pul? Qanchadan?
- Buni xat olib borgan odam aytadi.
- Pulni bu yoqqa yuboradimi?
- Bu sening ishing emas. Pulni bizga tegishli odam borib oladi. Agar shartimizni bajarmasang, avvaliga tramvayga qoʻyamiz. Keyin bespredelshik⁶ning ermagiga topshiramiz.

Ertalabki mehmondorchilik ana shunday «shartnomani imzolash» bilan yakunlandi. Shart bajarilmagan taqdirda Tursunali oʻzini qanday jazo kutishini kech yotar mahalida bildi. Yotoq qoʻshnisidan «tramvayga qoʻyish» nima ekanini soʻrab, «seni hammomga olib kirib, yigirma-oʻttiztasi galma-gal «gaplashib» chiqsa — tramvay boʻladi», degan javobni olganida badani muzlab ketdi.

Hozir, chayla tomonga qarab turgan choqda ham shu tadbir esiga tushib, bir seskandi.

Kecha lagerga olib kelingan yigit Tursunaliga xush yoqib, «mening haloskorim shu», deb oʻylagan edi. Yoshi yigirma beshni qoralagan bu yigit oʻzini Nuriddin deb tanishtirdi. Besh yil muqaddam qamoqqa solingan Nuriddin uchun bu yer uchinchi lager edi. Bu yerga kelguniga qadar avval Ukraina, soʻng Turkmaniston qumliklarida pishgan bu yigit yana oʻn yil umrini shunday sarsonlikda oʻtkazmoqqa mahkum edi.

Nuriddinning darhol Tengiz suhbatiga chorlanishi qamoqxona olami qonunlaridan uzoq boʻlgan Tursunali uchun tushunarsiz edi.

Tengiz Nuriddinni dasturxonga taklif etmadi — togʻliklar odatiga sodiq qolmay, mehmonni izzat qilmadi. Bir necha daqiqa tik turgan holda gaplashishgach, chayladan baquvvat yigit chiqdi-yu, olishuv boshlanib ketdi. Tepadan kuzatib turgan Tursunali yigitga achindi. Boltani koʻtarib yugurgisi, uni himoya qilgisi keldi. Ammo bu xohish chaqmoq umri kabi qisqa edi. Xohish chaqmogʻi soʻnib, joni koʻziga koʻringach, oʻzini tiydi.

— Hay Chuchmek! Sen uchun men ishlaymanmi?

Bu ovoz Tursunalini hushiga keltirdi. Chayla tomonga boshqa qaramay, daraxt shoxlarini butay ketdi.

Pastda nima voqea yuz berganini oʻng qoshi yorilgan, chap bilagi tilingan, badani musht va tepki zarblaridan moʻmataloq boʻlgan Nuriddin yotar mahalida aytib berdi.

«IMOM HAMZAT»

Bunday suhbatga chorlanish Nuriddin uchun yangilik emasdi.

Chakalakzordan o'tib, sohilga yaqinlashganida chayladan Tengiz chiqdi. Pachoqburunning amri bilan Nuriddin beriroqda to'xtadi. Tengiz uning ro'parasida turib olib, boshdan-oyoq tikildi. So'ng u tomon uch-to'rt qadam qo'ydi.

— Senga «esh-shak» deb laqab qoʻyishibdi. Nima uchun aynan «esh-shak»?

Nuriddin Tengiz tikilganida koʻzlarini olib qochmadi. «Sendan qoʻrqadigan odam emasman», deganday tik boqqanicha turaverdi.

- Gapimga javob ber: nima uchun seni «esh-shak» deyishdi?
- Oʻzlariga oʻxshatishmoqchi boʻlishgandir.
- Shunaqami? Tengiz istehzoli jilmaydi. Sen qaysar emishsanmi?
- Beayb Parvardigor.
- Shunaqami? Tengiz unga yanada yaqinlashdi. Sherigingni nima uchun otib tashlagan eding?
 - Ablahligi uchun.

www.ziyouz.com kutubxonasi

⁶ Sadizmni xush koʻruvchi, «qonundagi»larning odatini tan olmovchi, vahshiysifat odam.

- Kofirligi uchun emasmi?
- Kofirning ham insoflisi, vijdonlisi bor. Kofirning ham oʻziga yarasha e'tiqodi boʻladi. U kofir emas, ablah edi.
 - Bublikni taniysan, a?

Tanimay-chi?! Nuriddin Turkmanistondagi lagerga kelganidan to ketgunicha u bilan itmushuk bo'lib yashadi. Qoshlarigacha qirib yuruvchi bu odamni hamma «Bublik» der, ko'pchilik undan hayiqib yurardi. Nuriddin esa, unga «maymun» deb laqab berib, bo'ysunishni istamagan edi.

- Bublikni taniysan, dedi Tengiz undan javob kutmay. Bublik sendan xafa. Xizmatidan boʻyin tovlabsan. Nega xizmatini qilmading?
 - Men uning quli emasman.
- Qiziq... qiziq... sen yanglishma, esh... bola, kimdir kimgadir qul boʻlishi kerak. Bu dunyo oʻzi shunaqa. Sening qullikdan oʻzga chorang yoʻq. Yo qul boʻlib yashaysan, yoki oʻlasan!
- Odamning qulligi toʻgʻri. Lekin siz ham yanglishmang. Odam faqat Yaratgangagina quldir. Banda bandaga qul boʻlmaydi. Ayniqsa, musulmon kofirga qul boʻlmaydi.
 - Men Tengizman! Mening xizmatimni qilasanmi?
 - Yo'a.
 - O'ylab javob ber.
 - Bublikka nima javob qilsam, sizga ham javobim shu.
 - Mendan qo'rqmaysanmi?
- Nega qoʻrqishim kerak? Nuriddin unga tik qaraganicha jilmaydi. Siz meni urarsiz, nari borsa oʻldirarsiz. Odamlar oʻlimdan qoʻrqadilar. Ularning nodonligi ham shunda. Qoʻrqsa-qoʻrqmasa baribir oʻladi-ku? Men oʻlimdan qoʻrqmayman. Demak, sizdan ham qoʻrqmayman. Men faqat Ollohdan qoʻrqaman.
- Durustsan, bola! Ammo oʻlimning har xili boʻladi. Yoshlikda oʻlib ketaverish alam qiladi. Men, masalan, hozir oʻlishni istamayman. Hali koʻp yashashim kerak. Koʻp odamlar bilan hisob-kitobim bor.
- Bu siz bilan mening istagimga qarab boʻladigan ish emas. Bu yogʻi taqdir yozugʻimizga bogʻliq. Lekin Xudo sizga uzoq umr berishi mumkin.
 - Nega? Tengiz Nuriddinning gapidan chindan ham ajablandi.
- Ollohning va'dasi bor: ba'zi odamlar yanada ko'proq gunoh qilib olishi uchun umrini uzoq qilar ekan.

Bu gap Tengizga yoqmadi:

- O'chir ovozingni! deb jerkib berdi.
- Bu mening gaplarim emas...
- O'chir, deyapman! Menga qara, qaysarliging uchun senga «esh-shak» deb laqab berishgan. Xo'sh, esh-shakligingcha qolasanmi yo biz aytgan yo'lga yurasanmi?
 - Siz aytgan yoʻlga yurmayman, ovora boʻlmang.
 - Unda o'lasan.
 - Buni Xudo biladi.
- Yaxshi, mardliging ham bor ekan. Mayli, seni itday xorlatib oʻldirmayman, erkakday oʻlishing uchun imkoniyat yaratib beraman. Mening odamim bilan yakkama-yakka olishasan. Tanla: musht bilanmi yo tigʻ bilanmi?
- Tanlash huquqini sizlarga berdim. Odamingizning chogʻi nimaga kelsa, shunday olishsin.
 - Katta ketma bola! Demak, bunday: avval musht bilan, keyin tigʻ bilan!

Raqibini pichoq bilan nobud qilguday boʻlsa, boshiga balolar orttirishi mumkinligini bilgan Nuriddin tigʻni rad etdi:

- Ikkala imkoniyatni odamingizga berdim. Men mushtimga ishonaman.
- Katta ketyapsan, bola! Bilib qo'y: bu olishuvda faqat bitta odam tirik qoladi.

Tengiz shunday deb uch qadam chekindi-da:

Bifshteks! — deb chaqirdi.

Mushaklari oʻynab turgan baland boʻyli yigit hayallamadi. Harqanday raqibini qiymalab tashlashga qodir boʻlgani uchun «Bifshteks» laqabini olgan bu yigit Tengizning birgina imosidan maqsadini anglab, jang-ga hozirlandi. Tengiz hali jang maydonini boʻshatmay turib, keskin tarzda bir aylandi-da, raqibining jagʻini moʻljallab tepmoqchi boʻldi. Nuriddin garchi bu qadar tez hamlani kutmagan boʻlsa-da, jangga shay edi. Shu bois jagʻini tepki zarbiga roʻpara qilib qoʻymadi. Keskin engashib, shu asnoda mushtini ishga solishga ulgurdi. Bifshteks kuchli zarbaga moʻljallab havolatilgan oyogʻini idora qilishga ulgurmay nozik yeridan musht yeb, bukchayib qoldi. Nafasi qaytib, ing-rab yubordi. Nuriddin uning oʻziga kelib olishini kutib, chekindi.

- Payti kelganda urib qol! dedi Tengiz.
- Men nomard emasman, dedi Nuriddin raqibidan koʻz uzmay.
- Unda o'zingdan ko'r. U senga mehribonlik qilib o'tirmaydi.
- Mehribonligiga zor emasman.
- Rostdan ham esh-shak ekansan! Tengiz shunday deb sigaret tutatdi. Soʻng oʻzini hanuz oʻnglay olmayotgan mulozimining ketiga tepdi. Bir mushtlik holing bormi, bundan koʻra oʻlganing yaxshimasmi? Boʻldimi, ketaversinmi?
- Yo'-o'q! Bu yerdan bitta odam ketadi. Men hozir uni qiymalab tashlayman. Bifshteks shunday deb cho'ntagidan buklama pichoq chiqarib, tugmachasini bosdi; dudama tig' oftobda yaltillab ketdi.

Nuriddin uchun bu birinchi olishuv emasdi. Shu sababli dovdirab qolmadi. Yengil harakat qilganicha Bifshteksni chalgʻitib, birin-sirin zarbalar bera boshladi. Faqat bir marta tigʻ uning chap bilagini tilib oʻtdi. Tilingan yerdan sizib chiqqan qonni koʻrib, Bifshteks mamnun jilmaydi. Buni jon olgʻuvchi asosiy zarbaning debochasi deb oʻyladi. Ha, chindan ham bu asosiy zarbalarning boshlanmasi edi. Ammo zarbalarni u emas, Nuriddin berdi. Ketma-ket tepki zarbalari uning hayot-mamotini hal qildi: avval jagʻi sinib, iyagi uzilib, uchib ketay dedi. Keyingi tepki boʻgʻzini pachoqladi. Nafasi boʻgʻildi. Koʻziga qon toʻlgan Nuriddin uning bu holini koʻrmadi. Chaqqon sakradi-da, ikkala oyogʻi bilan uning koʻkragini moʻljallab tepdi. Tepish asnosida oʻzi ham chalqancha yiqilib, bir necha nafas hushini yoʻqotdi. Hushiga kelgach, tepasida pichoq sanchishga tayyor turgan Bifshteks paydo boʻlishini kutdi. Sakrab turmoqchi edi, badani oʻziga boʻysunmadi. Yana ikki-uch nafas behol yotib, soʻng qaddini asta koʻtardi. Toʻrt-besh qadam narida uzala tushgan Bifshteksni, tiz choʻkanicha uning bilagini ushlab koʻrayotgan Pachoqburunni, uning tepasida sigaret tutatib turgan Tengizni koʻrib, olishuv yakunlanganini fahmladi.

— O'libdimi? — dedi Tengiz, sigaret qoldig'ini nari uloqtirib. — O'libdimi?! Nega baqaqa o'xshab angrayasan?

Pachoqburun tasdiq ishorasini qilib oʻrnidan turdi. Tengiz orqasiga oʻgirilib, Nuriddin tomon yurdi.

— Koʻrdingmi? Oʻlibdi. Eng yaxshi odamimni oʻldirding. Xoʻsh, endi nima qilamiz? Qolgan oʻn yilingni yigirma beshga aylantiramizmi? Yo menga qoʻshilasanmi?

Nuriddin oʻrnidan turib, labidagi qonni artdi.

- Sizga qo'shilsam, urishib o'tirmas edim.
- Sen oliftagarchilik qilma, baribir sinasan.
- Sinishdan oldin o'zimni o'ldiraman.

Tengiz bir so'kindi-da, o'girilib, Pachogburunga bagirdi:

— Nimaga lallayasan?! Ko'tar, daryoga tashla. Kum⁷ga borib, Bifshteks qochdi, deb ayt. Keyin lepila⁸ni boshlab kel.

Qamoq lagerining tabibi muolija qilib ketgach, Tengiz Nuriddinni chaylaga boshladi. Eski gazetalardan iborat «dasturxon» usti betartib edi. Pachoqburun kirib, chala yeyilgan non-goʻshtlarni yigʻishtirib chiqib ketgach, Tengiz alyumin krujkaga toʻlatib aroq quydida, mehmonga uzatdi. Nuriddin uni olish uchun qoʻl ham uzatmadi.

- Ha, dedi Tengiz, qoshlarini chimirib. Hazar qilyapsanmi?
- Ichmayman, dedi Nuriddin. Soʻng tarang vaziyatni yumshatish maqsadida qoʻshib qoʻydi: Shu paytgacha ichmaganman.
 - Namoz o'qiysanmi?
 - Yo'a.
- Unda menga oʻxshagan chala musulmon ekansan. Ichmaydigan odamlarni hurmat qilaman. Ichishni anavi toʻngʻizlarga chiqargan. Bu nima, bilasanmi?
 - Aroqni aytyapsizmi?
- Ha, sen bilan men buni aroq deymiz. Aslida bu bizning millatimizni qirib tashlovchi atom bomba. Bu enagʻarlar bizlarni qanday quritishni bilishgan. Sen bilan biz buning fahmiga bormay ichaveramiz, ichaveramiz. Ichib olib bolalarni tugʻdiraveramiz. Boribborib millat qirilib ketganini bilmay qolamiz. Senlar koʻpsanlar, uncha bilinmas balki. Ammo biz kammiz. Hademay qirilib bitamiz.
 - Siz... gruzinmisiz?
- Yoʻq... Tengiz miyigʻida kuldi: Men avarman! Tengiz bu gapni iftixor bilan aytdi. Avar degan xalq bor bu dunyoda, eshitganmisan?

Nuriddin eshitmagan edi. Bir oz xijolat bo'lgani holda bu haqiqatni tan oldi.

- Sen meni gurjiga oʻxshatma. Ular Qofqazni sotishgan. Mening bobolarim esa qofqazimizni bu kofir toʻngʻizlardan himoya qilgan. Imom Hamzat, imom Shomil, Hojimurodlarni eshitganmisan? Ha, eshitmagansan.
- Men... oʻqimaganman. Sakkizinchini bitirib, dalaga chiqib ketganman. Keyin harbiyga chaqirishib, Afgʻonga tashlashdi. Keyin bu yerlar... Qoʻlimga bitta kitob olib oʻqimaganman sira.
- Unda seni «esh-shak» deganlari to'g'ri ekan. Qaysarliging uchun emas, o'qimaganing sababli esh-shaksan. O'qimagan odamning esh-shakdan nima farqi bor? Sen mening tariximni bilmaysan. O'zingnikini bilasanmi? Sening hamzatlaring, shomillaring bormi? Bilmaysan! Esh-shak ham o'zining ota-bobolarini bilmaydi. Gaplarimga hayron bo'lyapsanmi? «O'g'ridan ham shunaga gaplar chiqadimi?» deyapsanmi? Men o'g'ri bo'lib tug'ilmagan edim. Ota-bobom ham o'g'ri emasdi. Men o'zimnikilarning ushog'iga ham xiyonat qilmaganman. Men yerimga o'g'ri bo'lib bosib kirganlarning mol-joniga qiron keltiraman. Men o'g'ri emas, qasoskor, xunxo'rman! Ammo o'g'ri degan unvonni olganman. Men uchun qasosning o'zgacha yo'li yo'q. Bilasanmi, men salkam oliy ma'lumotli faylasufman. Ha... meni to'rtinchi kursdaligimda haydashgan. Leningradda oʻqirdim. Bir professor bor edi, — Tengiz shunday deb istehzoli jilmaydi. — Nikolay Aleksandrovich Sagoev degan. Qiziq, a? Ismi oʻrischa, nasabi togʻliklarniki. Keyin bilsam asli Nazir Alievich Sagoev ekan. Tilimni tiyolmay o'shanga bir kuni aytdim: «Muhtaram professor, mayli, o'zingizning ismingizni o'rischa qilibsiz, otangizning shunday chiroyli ismini nega o'zgartirasiz? Sizda tog'liklar nomusidan zarracha bormi?» dedim. U enag'ar meni komsomol majlisiga qo'ydi. Mening qaysarligim tutib, majlisda avarcha gapirdim. O'sha professorning o'zi tarjima qilib turdi.

_

⁷ Lager boshlig'i.

⁸ Do'xtir

O'ris deganlarning jazavalari tutganini ko'rsang edi. Qo'llaridan kelgani — meni komsomollaridan haydashdi. Shartta turib: «Men avarman! Avarligimcha o'laman! Tupurdim senlarga!» dedim. Shu bahona bo'lib o'gishdan haydashdi. Keyin men bu «oʻqishga» kirdim. Birinchi qilgan ishim — Sagoevning uyini bosdim. Avar knyazlari ham unchalik boy bo'lishmagandir. Tog'lik yigitlarni o'qishga kiritib qo'yaman, deb tozza shilar edi u enag'ar. Uyini shilib, qolgan-qutganini yoqib yubordim. O'n yil badalida ikki marta qo'lga tushib, pishdim. O'n birinchi yili «qonundagi o'g'ri» martabasini berib, menga toj kiydirishdi. Endi bildingmi, kimligimni? Bu to'ng'izlar meni gul gilish uchun yerimga bostirib kirishgan edi. Endi ularning o'zlari mening gulim. Bifshteksni o'ldirganing uchun zarracha afsuslanmadim. Bu enag'arlar qancha ko'p o'lsa, shuncha yaxshi. Sen esa... yashashing kerak! Men senga «Hamzat» deb nom beraman. Shomil bilan Hojimurod ham bizning gahramonlarimiz. Lekin men ularni uncha yaxshi ko'rmayman. Ular oxiri sinishgan. O'risga taslim bo'lishgan. Hamzat esa, sinish u yoqda tursin, hatto salgina egilmadi. Joynamozning ustida boshi uzildi. Senda ham shunga yagin fazilat ko'rdim. Shuning uchun senga mehrim tushdi. Shuning uchun bu gaplarni senga aytyapman. Ammo sen bola, qaysarligingni arzon bahoga sotar ekansan. Sen mayda-chuyda qaplardan ustun tur. Sen millat uchun sobit bo'lishni o'rgan. Shunga agling yetadimi? Yo'q, yetmaydi... Afsus, afsus, yetmaydi. Men o'zbeklar orasida senga o'xshagan mardini kam ko'rganman. Senlarning sinishlaring oson. Sen bu yerlardan sinmaydigan odam bo'lib chiq. Ko'zlaringni ochib, odam bo'lib chiq! Hamzat, bir kuni kelib gaplarimni eslaysan. Ana shunda bu o'g'ri unchalik ahmag emas ekan, deb tan olasan.

Hayot-mamot olishuvi Nuriddin, endilikda Hamzat uchun kutilmagan hodisa edi. Qahrli oʻgʻrining bu gaplari esa, mutlaq kutilmagan hol boʻldi. Bu gaplarning magʻzini chaqishga harakat qildi. Keyingi uchrashuvlarda yana shu haqda gap ochilarmikin, deb kutdi. Biroq, Tengiz qahrli oʻgʻriboshi libosini yechib, ochilib gaplashmadi. Faqat ancha keyin, nohush voqealar soʻngida, ajralar mahallarida «Sen mening himoyamdasan. Men oʻlsam, odamlarim himoya qiladilar. Sen oʻsha kungi gaplarimni unutmasang boʻldi: aslo sina koʻrma!» deb ta'kidladi.

«MURIK»

Qamoq olamining ikki tartib-intizomi bor. Birinchisiga huquq idoralari tartib berganlar. Bunisi qogʻozga tushgan, muhrlangan. Unga koʻp holda amal qilinmaydi. Ikkinchisi qogʻozga yozilmagan, muhrlanmagan. Ammo unga bexato tarzda boʻysuniladi. Qonundagi oʻgʻrilar tomonidan joriy etilgan tartib-qoidalarning buzilishi ulugʻ bir fojia sanalib, buzgʻunchi kechirilmaydi.

Qamoqxonalar, lagerlar garchi simto'siqlar bilan o'ralib, qurolli soqchilar bilan qo'riqlansa-da, o'g'rilar turli o'lkalarga sochib yuborilgan bo'lsa-da, ularni bir-birlariga bog'lab turuvchi botiniy robita g'oyat mustahkam edi. Belorussiyadagi lagerda bo'layotgan gaplarni Moskvadagi generallardan avval Vorkutadagi mahbuslar eshitishardi. «Lager teletaypi» deb nomlanuvchi xabar xizmati bexato ishlardi. Generallar botiniy zanjir mavjudligini, uning har bir hal-qasini bilishsa-da, o'zlarini bilmaganga olishardi. Halqalarni uzib tashlash qo'llaridan kelsa-da, botina olishmas edi. Zero, ta'bir joiz bo'lsa, o'zlari ham shu zanjirning bir halqasi edilar.

Tartib etilgan qoidalarga koʻra, «lager teletaypi» Murikning bu tomonlarga kelishini oʻn besh kun avval ma'lum qilgan edi.

Daraxt kesiladigan joy o'zgarib, daryo sohilidagi chayla ham ko'chirilgan edi. Quyosh yoz fasliga xiyonat qilib, kuzning zaharli nafasi hukmini o'tkaza boshlagani uchun

chaylaga joylashgan «politbyuro»ning «shtab-kvartira»si barakka koʻchirilgan edi. Bu yerlarning betayin havosi oʻzini namoyish etgan — ezib yoqqan yomgʻirdan soʻng oz fursat yuz ochuvchi oftob badanga harorat berishga ulgura olmas ham edi. Mahbuslarni qiyratib tashlagan chivinlar kelgusi yozda uchrashish umidida issiq uyalariga kirib ketganlar. Chivinlar azobidan qutulgan mahbuslar uchun shu shilta ayozli mavsum a'loroq tuyular edi.

Egniga paxtali kalta toʻn, boshiga telpakni qiyshaytirib kiyib olgan Tengiz nam tortgan xashak ustida uzala tushib yotganicha pinakka ketgan edi. Pachoqburun kirib, uning oromini buzdi.

- Nima deysan? Tengiz esnab, qaddini ko`tardi.
- Naxodkadan ksiva bor.
- O'qi, kimdan ekan?
- Garbuzdan.
- Garbuz? Tengiz «kim ekan u?» deb oʻyladi. Har qancha tirishsa ham Garbuzning kim ekanini eslay olmadi. Uning xotirasi yaxshi edi. Bir ko'rgan odamini, bir marta eshitgan ismni o'n yildan keyin ham qiynalmay eslardi. Leningradda o'qib yurgan kezlari u boshqa talabalar kabi daftar tutmas edi, mual-limlarning ma'ruzalarini yozmas edi, xotirasida saglab golardi. «Mening darsimni mensimaysan», deb da'vo gilgan muallimga Leninning «Falsafa daftari»dan bir necha sahifani yoddan aytib bergach, do'stlari uni «tirik kompyuter» deb atay boshlagan edilar. Ana shunday mukammal xotira egasi Garbuzni eslay olmadi. Pachoqburun xatni o'qiy boshlagach, masala oydinlashdi. Pachogburunning fagat burni emas, bilimi ham pachoggina edi. Beshinchi sinfda ikki yil sabot bilan o'gigach, oltinchi sinfga bormay go'ya golgandi. Rus alifbosidagi o'ttiz uch harfning teng yarmidan ko'prog'ini, ya'ni naq o'n yetti harfni erkin o'qiy olish martabasiga yetgan bu «donish»ning oʻziga oʻxshash bir oʻgʻri qoʻli bilan yozilgan maktubni hijjalab o'qishini tasavvur qiling-u, Tengizning chidamiga qoyil qolavering. Ammo Tengiz ham temirdan emas. Uch-to'rt jumla o'qilguncha chidadi, so'ng xatni Pachoqburunning qo'lidan yulqib oldi. Katak daftar sahifasining bir burchi yirtilib, Pachogburunning barmoglari orasida goldi. Xatga ko'z yugurtirgan Tengizning yuragi battar siqildi. Bu odam qo'li bilan yozilgan xatmi yoki siyohga botirib qog'oz ustiqa qo'yib yuborilgan o'rmon chumolisining izlarimi, buni eskpert aniqlab bermasa, oddiy odamning farqlashi qiyin edi. Tengiz unda-bunda harfni eslatuvchi belgilarni qo'shib, bir amallab o'giy boshladi:

«O'g'rilar omon bo'lsin!

Salom, Tengiz, salom qorindoshim! Senga yetib ma'lum boʻlsinkim, bu men — Oleg «Garbuz»man. Senga va Irkutsk tsentralidagi barcha oʻgʻrilarga, «politbyuro» a'zolariga, sizlarning yelkadoshlaringizga birodarlik salomlarim boʻlsin! Qimmatbaho salomatliklar qalay? Xudo barchalaringizga uzoq yillar omonlik bersin.

Qorindoshlar, jondosh oʻgʻrilar, bizning Naxodkada mendan tashqari Valdemar «Olov», Boris «Shimol» ham bor. Biz uch oʻgʻrimiz, ammo haligacha birontamiz toj kiyish baxtiga muyassar boʻlmaganmiz. Malyavamning dastlabki satrlaridayoq oʻz murodu maqsadimni bayon qila qolay: men siz mehribon oʻgʻrilarning biringizga uka, biringizga doʻst, ulugʻlarga esa oʻgʻil yoki jiyan boʻlib, moʻrtabar oʻgʻrilar oilasining teng a'zosi sifatida qatorlaringizga kirmoqlikni orzu qilyapman. Men bundan buyongi hayotimni oʻgʻrilik mehrobiga atadim. Bundan buyon siz mehribon zotlar bilan yelkama yelka turib, barcha dardu alamlarni birga totmoqqa, teng baham koʻrmoqqa qaror qildim.

Qadrdonim Tengiz! Men qamoqda hali ko'p o'tiraman. O'g'rilarning muqaddas oilasiga a'zo bo'lsam, «qonundagi o'g'ri» tojiga lozim ko'rilsam, balki qolgan umrimni ham

qamoqda o'tkazarman. Bu masalada sizlar nima iroda qilsangiz, shu bo'ladi. Men ozodlikda yurganimda sizlar haqingizda ko'p eshitganman. Sizlar tomonga intilganman. Biroq, sizlar bilan yuzma-yuz uchrashish baxti menga nasib etmadi. Xatimni o'qib bo'lgach, barcha kamchiligu gunohlarimni yozib yuborarsizlar. ko'rsatmalaringizga amal qilib, bundan keyingi hayotim masalalarini o'g'rilar qoidasiga xilof qilmagan holda yechib borayin. Men qanday og'ir kunlarda sizlarni bezovta qilayotganimni bilib turibman. Iltimosim qabul qilingan taqdirda ro'paramda qanday mashaqqatlar turqanini ham his etyapman. Bu satrlarni yozish ham menga oson bo'lmadi. Bu xat o'zimning hayotim xususidagi bir hukmdir. So'nggi nafasimga gadar o'g'rilarning ulug' oilasiga sodiq qul bo'lib xizmat qilaman. Agar u dunyoda ham o'g'rilik hayotini davom ettirish lozim bo'lsa, u dunyoda ham faqat o'q'rilar oilasiga qulman.

Aziz va qondosh oʻgʻrilar! Endi oʻzim haqimdagi ma'lumotni yozay: men tulalikman. Birinchi marta 1978 yil 2 mart kuni mashina oʻgʻirlash paytida qoʻlga tushib, olti yilga qamaldim. Bir yildan soʻng oʻsmirlar qamoq lageridan kattalarnikiga oʻtdim. Ikki yil Yaroslavlda oʻtirdim. Soʻng «Etap» bilan Lvovga yuborildim. Zekvagonda Seryoja «Oqqush» bilan tanishdim. U menga koʻp narsalarni oʻrgatdi. Lvovda ekanimda oʻgʻrilar qurultoyi boʻldi. Sakson toʻrtinchi yilda ozodlikka chiqdim. Oʻn besh kundan soʻng 212-moddaning uchinchi bandi bilan yana besh yil berishdi. Hali Tuladagi qamoqda ekanimda oʻgʻrilarning qurultoyi boʻldi. Vitya «Kalina», Sulton Chechen bilan shunda tanishdim. (Sultonni Xudo rahmat qilsin, yotgan yeri momiq boʻlsin!) Sulton meni lagerdagi tartibga boshliq qilib ketdi. Koʻp oʻtmay promzona komendanti oʻldirilib, hamma yoq agʻdartoʻntar boʻldi. Komendant zonada qanjiq-musorlarning qurultoyini oʻtkazmoqchi edi. Mening boʻynimga hech nima ilisha olmadi. Ammo Tverga borgach, yana bir yarim yilni boʻynimga ilishdi. Bu yerda boshqa oʻgʻrilar boʻlmagani sababli sizlarinng birodaringiz Ostap «Janjal» bu yerdagi tartib-intizomni boshqarishni menga topshirdi. Bu ishonch men uchun katta baxt edi!

Uchinchi marta bankka hujum qilganimda qoʻlga tushib, mana shu yerda oʻtiribman. Iltimosimga javobni sabrsizlik bilan kutaman.

Siz — eng mehribon, eng halol oʻgʻrilarga mustahkam sogʻliq va ozodlik tilayman.

Siz ulugʻ zotlarni gʻoyibona bir-bir bagʻriga bosuvchi tulalik Oleg «Garbuz». 26.08.1988. Naxodka.»

Tengiz xatni oʻqib boʻlgunicha koʻzlari tinib, gardanida ogʻriq paydo boʻldi. Avval mijjalarini yengil uqalab, soʻng gardanini siladi. «Bitxat boʻlsa ham gaplarni topib yozarkan. Agar oʻzining kallasidan chiqarib yozgan boʻlsa, ahmoqqa oʻxshamaydi, — deb oʻyladi Tengiz. — Lekin... Nima uchun shu paytgacha u haqda eshitmagan ekanman?» Tengiz shu xayol bilan Pachoqburunga qaradi. U buyruqqa mahtal holda somelik ila turardi.

— «Politbyuro»ni toʻpla.

E'tiborli o'g'rilarni yarim soat ichida to'plab kelish uchun Pachoqburunga shu qisqa buyruqning o'zi kifoya qildi.

«Politbyuro» deganlari tojdor oʻgʻrilardan iborat kengash edi. Garchi Tengizning obroʻyi qamoq lageri boshligʻidan ham balandroq boʻlsa-da, ayrim masalalarda bu kengash hukmiga xilof ish koʻrishga huquqi yoʻq edi.

Bifshteks oʻldirilganidan beri «politbyuro» yigʻilmagan edi. Ha, oʻshanda Tengiz bir adashdi. U aslida Nuriddinning adabini berib qoʻymoqchi edi, soʻng oʻzi tomon ogʻdirmoqchi edi. Hirsday Bifshteksning bir tepki bilan oʻlib qolishi xayoliga ham kelmagan edi.

Lagerda Bifshteksning «qochgani» haqida xabar tar-qalishi bilan Valera «Qo'tos» deb laqab olgan «politbyuro oqsoqoli» Tengizni chaqirtirdi. Qo'tos qolgan umrini qamoq

lageriga bagʻishlagan oʻgʻrilardan edi. U ozodlikka chiqishni istamasdi. Qamoq muddati nihoyasiga yetay deganda bir qiliq chiqarardi-yu, oʻzining ta'biri bilan aytilganda, «kurort mavsumi choʻzilardi». Uning asosiy vazifasi — kelajakda ulugʻ oʻgʻri boʻlib yetishishi mumkin boʻlgan yigitlarni aniqlab, tarbiyalash edi. Shu jihatdan qaralganda Nuriddinning tarbiyasi bilan avval «Qoʻtos» shugʻullanishi lozim edi.

Qoʻtosning yoʻqlovi Tengiz uchun kutilmagan boʻlmadi. Bugunmi-ertami baribir roʻpara boʻlishini bilib, javoblarni tayyorlab qoʻygan edi. Ammo Qoʻtosning belgilangan barakda yakka oʻzi emas, «politbyuro» a'zolari bilan birgalikda kutib olgani Tengiz uchun kutilmagan hol boʻldi. Xayoliga «nima bu, toʻntarishmi?» degan fikr chaqmoq nuriday urildi-yu, oʻsha zahoti soʻndi. Chunki Tengiz shunday boʻlgan taqdirda ham ogʻir ahvolda qolmasligini bilardi. Bunga oʻxshash isyonlarning hisob-kitobini qilib qoʻygani uchun xotirjamligini yoʻqotmadi.

Qofqazlik tojdor oʻgʻrilar bilan hazillashib boʻl-masligini bilgan «politbyuro» a'zolarida Tengizga qarshi bir ish yuritish fikri yoʻq edi. Ular faqat Bifshteks taqdirini oydinlashtirib olmoqchi edilar.

Tengiz ostona hatlashi bilan Qo'tos o'rnidan turdi-da, unga peshvoz chiqdi.

 Knyaz, sen xafa bo'lma, favqulodda hol bizni to'planishga majbur etdi, — dedi u, Tengizga qo'l uzatib.

Qofqazlik tojdor oʻgʻrilar oʻzlarining kelib chiqishlarini mashhur knyazlarga bogʻlaganliklari uchun asosiy laqablari qolib, hurmat yuzasidan ularga «knyaz» deb murojaat qilish oʻgʻrilar olamida odat tusiga kirgan edi. Bu odat barcha «knyaz»lar qatorida Tengizga ham yoqar edi. Yetti pushti oliymaqom xonadonga yoʻlamasa ham u oʻzini chinakam knyaz his qilardi. Qoʻtosning «knyaz» deb murojaat qilishi esa vaziyatning aytarli keskin emasligiga dalolat edi.

Tengiz yigʻilganlar bilan birma-bir koʻrishgach, toʻrga oʻtdi. Qoʻtos uning yoniga oʻtirdi. Tengiz sigaret tutatgach, Qoʻtosga yuzlandi:

- Nima bo'ldi?
- Bizni Bifshteks qiziqtiryapti. U hamisha sening yoningda bo'lardi?
- Ha, bo'lardi, dedi Tengiz xotirjam ravishda. So'ng xuddi oddiy bir xabarni eslaganday qo'shib qo'ydi: — O'lmasidan ilgari...
- Oʻldimi? Qoʻtos ajablanib, toʻplanganlarga qarab oldi. Ular ham hayratlarini yashirmay Tengizga tikilishdi. Lager hayotida birovni oʻldirish, yoki itday oʻlib ketish aytarli ajablanarli hol emas. Tojdor oʻgʻrilarni hayratga solgan narsa yaqin odamlarining oʻlimi tafsilotidan vaqtida xabar topmaganlarida edi. Agar sheriklariga bu olamga begona kimsa qasd qilgan boʻlsa, kechiktirmay jazolashlari shart. Tengiz ularning bu fikrini ham uqsa-da, javobga shoshilmadi. Sigaretni yana ikki-uch, chuqur-chuqur tortib, nafsini orom toptirgandan keyingina javob berdi:
- Ha, oʻldi. Bir mishiqini eplay olmadi. Adabini berib qoʻy, devdim, bir tepkini koʻtara olmay oʻldi. Bola balo ekan.
 - Kim? Sen uni oʻldirdingmi? Bu safar Qoʻtosning ovozida tahdid sezildi.
 - Ayb u bolada emas.
 - Kimligini ayt bizga!
 - Bilishga qiziqayotgan bo'lsalaring aytaman: «Eshshak», Bublikka egilmagan bola.
 - Uni menga go'vib berishing kerak edi?
- Boʻlar ish boʻldi endi. Men sinab qoʻrdim mard bola ekan. Yaxshilab tarbiya qilsang zoʻr oʻgʻri chiqadi undan. Ammo u endi u «esh-shak» emas, nomi «Hamzat» boʻladi.
 - Nega?
 - Men shuni xohladim.

— Knyaz, sen haddingdan oshma! — Ukraina tomonlarda «Koshak» nomi bilan mashhur boʻlgan oʻgʻri Tengizning soʻzini dagʻallik bilan uzdi: — Sen musulmoningni himoya qilib, zoʻr yiqitni oʻldirtirib yubording!

Tengiz sigaretini tutatib, unga tutun orasidan koʻzini sal qisibroq qaradi:

- Koshak, bilmasang bilib qoʻy: mening dinim ham, millatim ham oʻgʻri! Qoʻtos, sen bunga tushuntirib qoʻy. Tengiz shunday deb oʻrnidan turdi. Ostonaga yetganida toʻxtab, orqasiga oʻgirildi. Koshak, bilib qoʻy, bu olamda faqat bittagina oʻgʻri degan millat bor. Bu millat oldida boshqalari sariq chaqa. Agar shunga aqling yetmasa, sen oʻgʻri emassan, mujiksan! Tengiz eshikni bir tepib ochdi-da, tashqariga chiqdi. Uchtoʻrt qadam yurib, toʻxtadi. Uning fikricha, hozir ortidan Qoʻtos chiqib kelishi lozim edi yanglishmadi.
- Knyaz, sen xafa boʻlma. Koshakka yetadigan ahmoq bu dunyoda kam topiladi. Ahmoqona gaplarni koʻp gapiradi-yu, ammo yuragi toza bola. Koʻnglida kiri yoʻq. Sening nima uchun achchiqlanganingni tushunmay oʻtiribdi, u ahmoq! Tushunganidan soʻng oʻzi kelib sendan kechirim soʻraydi.
- Xafa emasman,— Tengiz shunday deb jilmaydi,— oilamizga bir-ikkita shunaqa dovdir ham kerak. Boʻlmasa, yashashning qizigʻi qolmaydi.
- Toʻgʻri aytasan. Unga shu yerlarda chidash mumkin. Ozodlikda bunga sherik boʻlganning shoʻri quriydi.

Qo'tos to'g'ri aytgan edi — Koshak ikki kundan so'ng Tengizdan uzr so'radi. O'zining ham dunyoda yagona O'G'RI millatidan ekanini bayon qildi.

Ana oʻsha voqeadan beri «politbyuro» endi rasmiy kengashga chorlangan edi. Oleg «Garbuz»ning iltimosnomasini oʻqishdan avvalroq Tengiz, «politbyuro»ni chaqirishni reja qilib qoʻygan edi. Kecha oqshomda qoʻliga yetib kelgan bir xabar uni «politbyuro» bilan maslahatlashishga undagan edi.

«Politbyuro» to'plangach, Tengiz o'tirgan yerida ularga bir-bir qarab chiqdi.

Knyazlarim, — garchi qofqazliklardan boshqalar bu nomga da'vo qilmasalar-da,
 Tengiz ularga bo'lgan hurmatining baland ekanini bildirib qo'yish uchun gapini shunday boshladi, — knyazlarim, bugun biz ikki muhim masalada yagona qarorga kelishimiz kerak.

Tengiz birinchi masala deb Oleg «Garbuz» iltimosini bayon qildi. U gapini tugatmayoq Koshak e'tiroz bildirdi:

- Onasi oʻn marta qayta tugʻsa ham undan oʻgʻri chiqmaydi, dedi u stolga kafti bilan urib-urib qoʻyib. Kozel u! Boshqa gap yoʻq! Tulada nima uchun suvdan quruq chiqqan? Kozel edi! Promzona komendanti bizning odam edi. Hech qanaqangi qanjiqmusorlarga aloqasi yoʻq edi.
 - Aniq bilasanmi? deb so'radi Qo'tos.
 - O'shanda men Kurskda edim. Aniq bilaman.
- Men «Garbuz» deganini endi eshityapman. Kozel boʻlsa nima uchun shu paytgacha jazosiz yuribdi?
 - Tutqich bermayotgandirda. Agar unga toj kiydirsak, hammamiz rasvo bo'lamiz.
- Agar kozel boʻlsa... agar ayyor boʻlsa... Tengiz oʻylanib qoldi. Boshqa lagerlarga ham shunaqa xat yozgandir? Tezda aniqlash kerak. Qoʻtos, oʻzing shugʻullan bu ish bilan. Agar shunday qilgan boʻlsa, boshiga toj oʻrniga sirtmoq ilish kerak. Ilganda ham pinhona emas, shov-shuv bilan osib oʻldirish kerak. Boshqa kozellar oʻzlarini nima kutayotganini bilib qoʻyishsin. Birinchi masala tamom! Endi ikkinchisi biz tomonlarga «Murik» kelayotgan emish, Tengiz shunday deb oʻtirganlarga savol nazari bilan boqdi.
 - Murik? Kim u? deb so'radi Qo'tos.

— Bilmaysizlarmi? — Tengiz istehzoli jilma-yib, yon choʻntagidan bir varaq qogʻoz oldi.— «Choʻmich»— Slava Galiulin. MUR⁹ga xizmat qila boshlagani uchun laqabini oʻzgartirib, «Murik» deb qoʻyishibdi. Ma, oʻqi, — u shunday deb, xatni Qoʻtosga uzatdi.

Qo'tos maktubga ko'z yugurtirib, bosh chayqadi-da, so'ng ovoz chiqarib o'qiy boshladi:

— «Irkutsk tsentralidagi halol birodarlarimizga salomlar boʻlsin. Salom yoʻllovchilar — Pskov lageridagi oʻgʻrilar — sizlarga omonlik tilaydilar. Qadrdon oʻgʻrilar, bu shoshqich xatimiz bilan sizlarni ogoh etamiz: biz bilan «Choʻmich» — Galiulin birga boʻldi. Bilib qoʻyinglarki, u bizning pok va muqaddas nomimiz — oʻgʻri nomi bilan yashirinib yurgan bir qanjiqdir. Ha, bilib qoʻying, u OʻGʻRI emas, u qanjiqdir! Oʻgʻri nomiga isnod keltirgani uchun uni faqat qanjiq yoki ABLAH deb atash mumkin. Oʻzini hurmat qiluvchi har bir oʻgʻri, har bir mahbus u bilan shu nomiga yarasha muomalada boʻlishi kerak. Shu bilan birga barcha qanjiqliklari uchun jazosini olishi shart! Yana bilib qoʻyinglarki, Moskvada oʻgʻrilar qurultoyi boʻlib oʻtdi va Choʻmichga nisbatan qaror qabul qilindi. Qarorga binoan, u QANJIQ deb eʻlon qilindi. Moskva pupkarlariga xizmat qilgani uchun unga «MURIK» deb nom berildi. Uni qabul qilganlaringda shu qaror yoddan koʻtarilmasin.

Pskovda biz olti oʻgʻrimiz: Kato, Kuyov, Yoʻlbars, Sibir, Avliyo va Olov barchalaringizga ozodlik tilab qoladilar».

Qo'tos o'qishni yakunlamay, Koshak stol ustiga musht urib, to'ng'illadi:

— Cho'mich kelishi bilan menga berasanlar. U bilan ozgina hisob-kitobim bor.

Bu gapni eshitib, Tengiz unga tikilib qoldi.Soʻng kengash a'zolariga savol nazari bilan bir-bir qaradi:

- Xoʻsh, Murikni Koshakka beramizmi? Tengiz shu savolni oʻrtaga tashlab, sukut qildi.Oʻtirganlardan sado chiqmagach, davom qildi: Biz oʻgʻrilarning bir ahmaqligimiz bor. Faqat oʻzimizning hisob-kitobimiz bilan qiziqamiz. Oʻgʻrilarning muqaddas olami bilan esa, ishimiz yoʻq. Oilamiz qanjiqlar bilan toʻlib ketyaptimi, irib ketyaptimi, sasib ketyaptimi ishimiz yoʻq. Xoʻsh, Koshak, Murik seniki. Nima qilasan, oʻldirasanmi?
 - Qiynab oʻldiraman.
- Ana shu-da! Nima uchun qanjiqlik qilgan, nima uchun qamalib bu yoqlarga yuborildi? Bilish kerakmi? Gap shu: Murik kelaversin. Yuraversin. Biz esa, goʻyo hech nima bilmaymiz. Biladiganimizni bilib olaylik, ana undan keyin u Koshakniki. Istasa homicha yesin, istasa pishirib yesin. Boshqa gap yoʻq. Takliflaring boʻlsa aytlaring.
- Taklif bor, dedi Koshak tirjayib. U majlis qaroridan mamnun edi, shu bois bir hazil qilgisi keldi. Soʻzlashga ijozat berilgach, oʻrnidan turib, yoqasini tuzatgan boʻldi: Oʻrtoq kommunistlar, majlisimiz nomidan KPSS bosh kotibi Gorbachga tabrik telegrammasi yuborsak.

Bu hazil toʻmtoq bolta bilan oʻtin yorishni eslatsada, oʻtirganlar Koshakka qarab jilmayib qoʻyishdi. Tengiz ham kulimsirab, uning bu haziliga yakun yasadi:

— Yaxshi taklif. Telegramma yoz-da, yumaloq muhr oʻrniga nozik yeringni bosa qol.

«Politbyuro» majlisi shu tarzda kulgu bilan yakunlandi. Oradan toʻrt kun oʻtib, Murik tashrif buyurdi. Unga qadar «lager teletaypi» orqali Tengiz muhim ma'lumotlar oldi.

XIYONAT

Matluba eridan xat olib kelgan yigitga boshdan-oyoq razm soldi. Avvaliga «qamoqda birga o'tirganmikin?» deb o'yladi. Ammo xushro'y yigitning jilmayib qarashida, rangiro'yida qamoqning sovuq nafasidan asorat yo'q edi. Yigit «ichkariga kiring», degan taklifdan so'ng tarang qilmay, juvonga ergashdi. Tursunali qamalishidan ilgari, amal

-

⁹ MUR — (Moskovskiy ugolovnыy rozыsk) — Moskva jiinoyatga oid qidiruv boʻlimi.

otini surib javlon urayotgan mahallarda bu uyni koʻrgan odam oradan bir yil oʻtib-oʻtmay yana ostona hatlab ichkari qadam qoʻyguday boʻlsa, «yopiray, kecha oʻgʻri urib shipshiydam qilgan shekilli», deb yoqa ushlashi tayin edi. Koʻzni qamashtiruvchi gilamlar, qandillaru javonlar endi yoʻq. Matluba eri qamoqqa olinib, mol-mulki xatga tushguniga qadar yashirishga ulgurganini yashirdi. Qolgani esa, musodara qilindi. Uy xoʻjalik ixtiyorida boʻlgani, Matlubaning oʻzi shu xoʻjalikda ishlayotgani uchun tortib olinmadi. Yangi direktor insof qilib, ularga «uyni boʻshat», deb tiqilinch qilmay, yangisiga joylasha qoldi.

Matluba dardini kimga aytishni bilmay, to'rt devor orasida to'rt bolasi bilan kun kechirib yurgan edi. Davlat boylikni tortib olgani bilan Xudo bolalarning rizqini qiymas ekan. Gilamsiz, billur qandilsiz uyda ham yashash mumkin ekan. Dunyoda tirik beva faqat u emas ekan. Tirik yetimlar ham ko'p ekan. Eri qamalgan xotinning joni chiqib keta qolmas ekan. Otasi qamalgan bolalar taqdirga tan berib yashayverar ekan, ulg'ayaverar ekan...

Qamoq — jinoyatchi uchun jazo. Bu dunyoda jinoyatga dahli yoʻq odamlar uchun ham jazo bor ekan. Balki harom luqmaga sherik boʻlgani uchun bunday jazo joizdir? Matluba buni bilmaydi. Bu haqda oʻylab ham koʻrmagan. Bunga keyinroq aqli yetadi. Hozir bilgani — qoʻlidagi xatda yozilgan gaplar... Ya'ni har oyda «soliq» toʻlab turish.

Matluba xatni to'rt marta o'qib chiqsa ham tushunmadi. Yigitga savol nazari bilan tikilib qoldi.

- Cheksam maylimi? deb soʻradi yigit hotirjam ravishda. U juvonning hayrat iskanjasida ekanini bilib tursa-da, parvo qilmadi. Uy bekasi bosh irgʻab «chekavering» degach, labiga sigaret qistirdi. Ammo oʻt oldirmay turib soʻradi: Tinchlikmi? Nima deb yozibdilar?
 - Nima deb yozilganni... bilmaysizmi?
 - Men birovning xatini oʻqimayman, yigit shunday deb sigaretini tutatdi.
 - Xatni o'z qo'llari bilan yozib sizga berdilarmi?
- Yoʻq. Menga birodarlarim keltirishdi. Men eringizni tanimayman. Mening vazifam xolis xizmat.
 - Soligni... sizga to`laymanmi?
- Ha, soliqnimi? Yigit jilmaydi. Hozircha menga. Men kelolmasam boshqa odamni yuborishadi.
 - Yuborishadi? Kim yuboradi?
 - Buni bilishingiz shart emas.
 - Men... tushunolmayapman?
- Tushunolmayapman? Mayli, yaxshi xotinga oʻxshaysiz, sizga tushuntirib bera qolay: sizga er kerakmi? Ha, albatta kerak. Sizga er kerak boʻlmasa ham bolalaringizga ota kerak. Demak, u qamoqdan sogʻ-salomat qaytishi shart. Qamoqda esa, opaginam, koʻp odamlar bekordan bekorga oʻlib ketadi. Birovlar bitta kichkinagina toshga qoqilib ham oʻlib ketar ekan. Baxtsiz hodisalar koʻp-da. Qamoqdagi birodarlarimiz eringizni himoya qilishadi. Uning bitta tuki ham bekorga toʻkilmaydi. Siz «soliq» deyapsiz-u, aslida unday emas. Bu xizmat haqi. Hukumat qorovullarga ham maosh toʻlaydiku, toʻgʻrimi? Ana, siz ham shunaqa toʻlaysiz-da.
 - Oanchadan to`layman?

Yigit darrov javob bermadi. Tutatib boʻlgach, kuldon oʻrniga qoʻyilgan likopchaga sigaret qoldigʻini bosib ezdi-da, toʻlanajak xizmat haqi miqdorini aytdi. Buni eshitib, Matluba bir seskandi. «Xato eshitmadimmi?» deb, soʻradi:

— Bir yilgami?

- Eringizning jonini hurmat qilmas ekansiz, opaginam. Har oyda toʻlaysiz. Balki uch oyligini, balki yarim yilligini qoʻshib oldindan toʻlarsiz. Oldindan toʻlasangiz, bir oz kamaytiramiz, buni oʻzaro kelishib olamiz.
 - Menda buncha pul yoʻq... Topganim bolalarim...
- Opaginam, siz topgan pulingizni bolalaringizga ishlatavering. Siz bizga eringizdan qolganidan choʻtal berib tursangiz yetadi.
- Erimdan... hech narsa qolmagan... Bori shu koʻrib turganingiz. Davlat hammasini tortib oldi.
- Davlatga tuhmat qilmang. Bizning davlat, opaginam, odil davlat! Bilmasangiz bilib oling. Hech qachon hammasini tortib olmaydi. U-buni yashirib olishga imkon beradi. Toʻrtta bolangiz bor, a?
- Ha... Matlubaning koʻngliga yomon fikr kelib, qoʻrqib ketdi: Nimaga soʻrayapsiz?
- Shunchaki qiziqdim. Ular ham otalari qaytgunicha sog`-salomat yurishlari shart. Ota qamoqdan qayt-sa-yu...
- Bolalarimga tegmang! Matluba beixtiyor shunday deb baqirib yubordi. Mushtlari oʻz-oʻzidan tugildi.
- Opaginam, oʻzingizni bosing. Bizlar odamxoʻr emasmiz. Biz siz bergan xizmat haqi evaziga oʻzingizni ham, bolalaringizni ham himoya qilamiz. Pul ketsa ketsin, jon ketmasin. Mening yana yarim soat vaqtim bor. Birinchi xizmat haqini bugun olib ketishim kerak.
 - Hozir yoʻq menda bunaga pul.
- Sizdan hoziroq talab qilayotganim yoʻq. Yarim soat vaqtim bor, deyapman-ku? Boʻla qoling, qimirlang.

Bu gapdan keyin ham Matluba bir necha daqiqa harakatsiz turdi. Yigit esa, boshqa gapga hojat yoʻq, deganday indamasdan oʻtiraverdi. Matluba «Yarim soat vaqti boʻlsa koʻchaga chiqib, mashinasida oʻtira qolmaydimi?» degan fikrda unga qarab-qarab qoʻydi.

U «uyda pulim yoʻq» deb yolgʻon soʻzlagan edi. Aslida esa, «biror kunimga asqotar» degan umidda yashirib qoʻygani bor edi. Ammo bu yigit shunday yalpayib oʻtiraversa, u qanday qilib oladi? Undan tashqari bu yigitning aytganlari shunchaki poʻpisami yo jiddiymi — hali toʻla farqiga borolgani yoʻq. Dastlab bu yigit koʻziga hushroʻy koʻrinib edi. Endigi oʻtirishi esa... «He, goʻlaymay oʻl!» deb ichida qargʻadi.

- Yarim soat... Birovdan soʻrab topgunimcha... Bir-ikki kundan keyin kelsangiz... topib qoʻyardim.
- Kelib-ketish oson ekanmi? Men ammangizning qishlogʻidan kelganim yoʻq. Xoʻp, mayli, bir-ikki kundan keyin men kelmayman. Oʻzingiz borasiz.
 - O'zim boraman? Qayoqqa?
 - Bahonada adangizni ko'rib kelarsiz?
 - Adamni... bilasizmi?

Yigit istehzo bilan kuldi.

— Laqma xotin ekansiz. Uyingizni toʻgʻri topib kelgan odam adangizning ikki yildan beri palaj boʻlib yotganini bilmaydimi? Xullas, ikki kundan ke-yin adangiznikida koʻrishamiz. Ismim Xursanali, siz ishlayotgan sovxozning hisobchisiman. Tushundingizmi? Bizning siz bilan boʻladigan hisob-kitobimizni birov bilmasa faqat oʻzingizga foyda. Milisadan umid qilmang. Milisa sizga emas, bizga xizmat qiladi. Biz sizga oʻxshaganlardan xizmat haqi toʻplab, hatto oʻsha Maskovdagi generallargacha boqamiz. Shuni unutmasangiz boʻlgani. Siz bilan biz endi begona emasmiz. Ha, aytmoqchi, bizda «bir-ikki kun sabr qiling», degan gap boʻlmaydi. Bir safar mayli, kechiraman. Bundan keyin har bir kun uchun yuz qoʻshiladi. Aql bilan ish yuritsangiz

hamyoningiz zarar koʻrmaydi. Eringiz unda tinch, siz bunda bola-chaqalaringiz bilan tinchsiz. Xudo beraman, desa shu-da!

Yigit o'rnidan turib, eshik sari yurdi. Ostonaga yetgach, orqasiga o'girildi:

 Mehmondo'st emas ekansiz. Mayli, xafa bo'lmayman. Osh-choyga qarzdorsiz, unutmang, — o'zini Xursanali deb atagan yigit bir jilmayib qo'ygach, tashqariga chiqdi.

Matluba unga xayr ham demadi, kuzatish uchun ostona ham hatlamadi.

Yigitning huddi balo chaqiniday kelib-ketishi uning xushini oldi. «Tursunali akamdan xat olib keldim», deb jilmayganida istaraligina boʻlib koʻringan edi. «Osh-choyga qarzdorsiz», deb chiqayotganida koʻziga isqirt bir sulloh boʻlib koʻrindi. «Kim oʻzi bu? — deb oʻyladi Matluba. — Oʻgʻri desam, oʻgʻriga oʻxshamaydi. Basharasi bip-binoyi. Balki choʻntakkesardir yo kallakesarmikin? Unaqaga ham oʻxshamaydi. Yo adasi meni sinab koʻrmoqchi boʻlib biror tanishini ishga soldimikan? E, yoʻq. Shunaqasiga sinaydimi? Sinagisi kelsa, «menga vafo qiladimi-yoʻqmi?» deb sinar. Oʻziga oʻxshagan bironta shilqimni yuborar. Menga ilmoq tashlatib koʻrar... E yoʻq... Qorang oʻchgur Nafisasi bilan sharmandasi chiqqanidan keyin mendan vafo talab qilib qoʻrga borsinmi?..»

Nafisaning nomi esiga tushib, battar tutoqib ketdi. Stol ustida turgan piyolani olib devorga qarata otdi. Piyola devorga tegib ham, taxta ustiga tushib ham sinmadi.

— Hu ko'zlaring go'rda chirisin!

Bu qarg'ishni ovoz chiqarib aytdi. Nazarida Nafisa ishvali ko'zlarini suzib qarab turganday bo'ldi. Bir qarg'ish bilan yuragidagi dard ko'tarilmay, ikkinchisini aytdi:

— Aft-basharang goʻrda ilon-chiyonlarga yem boʻlmasa, rozi emasman!

O, ayol qalbi! Dunyoda mavjud barcha fojialar sel boʻlib yopirilsa chidar-u, ammo erining xiyonatiga sira-sira chiday olmas! Ayniqsa, bu xiyonat oʻz uyida, oʻz toʻshagida sodir etilsa, yurakda yona boshlagan olovni hech nima oʻchira olmas.

Erining xiyonatkor buzuq ekani Matlubaga koʻpdan ma'lum edi. Hali bu «qorang oʻchgur Nafisa» paydo boʻlmayoq, bir unga, bir bunga shoʻngʻib yurishidan gumon qilardi. Gumoni isbot topganida janjal koʻtaraman, dedi-yu, eplay olmadi. «Chidasang shu, — dedi eri. — Men senga yalinib uylanmaganman, oʻzing xushtor boʻlib tekkansan. Men bitta xotinga qanoat qiladigan erkaklardan emasman. Koʻngling sovugan boʻlsa, ana, orani ochiq qilginu otangnikiga joʻnayver. raykomga dodvoy deb borasanmi, undan narigami, menga baribir. Mendan olsa amalini oladi. Sen esa, erdan ayrilasan. Ikkita bola bilan seni birov olarmikan? Menga tegishda otangning roziligini olmagansan. Ketsang, otangnikiga ham sigʻmaysan. Undan koʻra nafasingni chiqarmay yashayver... Sen xotinimsan. Ular bir oʻynash. Sen bilan ular orasida katta farq bor. Shuni tushunsang boʻldi».

Eri haq qapni aytgan edi.

Matlubaning Tursunaliga oshiq boʻlgani rost. Xatlar yozgani, she'rlar toʻqigani ham rost. Kelishgan, chiroyli yigitni undan boshqalar ham yaxshi koʻrishar edi. Yigit chiroyli boʻlsa, ustiga ustak amaldor otasi choʻntagidagi pulni aritmay tursa, xushtorlar sanogʻiga yetish mushkul. Ammo Matlubaning yuragidagi olov hammanikidan kuchliroq edi. Keyinkeyin Matluba oʻsha damlarni eslaganidan «yuragim yonmay, chiribgina ketsa boʻlmasmidi, uni yaxshi koʻrmay oʻlib qoʻya qolsam ming marta yaxshi edi-ya!» deydigan boʻldi.

Taqdir qalami yozug'ini yozib bo'lganidan keyin bunday nadomatlardan ne foyda? O'sha kezlari Odam ato bilan Momo Havoning nima sababdan jannatdan haydalganlarini bilsami edi, es-hushini sal yig'ishtirib olarmidi...

Oldingilari, eri aytganiday, nafs balosini qondiruvchi vaqtinchalik o'ynashlar ekan. Eri ularga qattiq bog'lanmagan edi. «G'arko'zing go'rda chirigur Nafisa» yomon chiqdi. Erini o'ziga tamomila qaram qilib oldi. Eri avvallari o'ynashga borgani bilan uni unutmasdi,

koʻnglini ovlab turardi. Erining xiyonatkorligi oshkor boʻlganidan keyin ham Matluba ikki farzand koʻrdi. Ammo «juvonmarg boʻlgur Nafisa»ga ilakishgach, er ekani tamoman esidan chiqdi. Matlubaning oʻrindagi noz-karashmalariga ham e'tibor bermay qoʻydi. Bir kuni «yoshingga qarab qiliq qil», deb oʻrnidan turib ketgach, Matluba tirik beva boʻlib qolganini angladi.

«Yoshingga qarab qiliq qil...» Oʻshanda Matluba hali oʻttiz uchga kirmagan edi... Hozir qirqning ostonasida. Oʻshandan beri er nimaligini unutayozgan.

Dardi zo'r... Ammo dardkashi yo'q... Dardi ichida.

Fagat bir marta «portladi». Portlamasa bo'lmas edi...

Shaharga borishi lozim edi. Biroq oyog'i tortmay ko'ngli xijil bo'lib rayon markazidanoq iziga qaytdi. Qarasa-ki, kuppa-kunduzi eri «qon qusgur Nafisa» bilan bi-ir ahvolda... bolalar maktabdan kelib qoladi, deb xavotir ham olishmabdi...

Matluba hali-hali tushunmaydi: sovxozning nomi «mehmonxona», aslida esa fohishaxona vazifasini bajaruvchi joyi bor. Eri nima noma'qul narsa yesa, o'sha yerda yerdi. Uyga olib kelgani nimasi u yuviqsizni?! Eri janjallashib o'tirmadi. Nafisani yuldirishga ham qo'ymadi. «Uningni o'chir», dediyu o'ynashini olib chiqib ketdi.

Matluba esa... o'ylay-o'ylay, axiyri ular yotgan o'rin-to'shakni hovli o'rtasiga uyib, yoqdi. Bu bilan ham hovuri bosilmagach, karavotni ham yoqdi.

Bolalar koʻrquvda jovdirashadi.

Qo'shnilar hayron...

Faqat Tursunali hayron boʻlmadi. Ertasiga yugurdaklari yuk mashinasida yap-yangi karavot tashlab ketishdi.

Haromdan qaytmaydigan ana shu er qamalib, peshonasi devorga tekkach, koʻzi ochilganmikin? Oiladan koʻra oʻynashning karashmasini afzal bilgan er «xotinim menga vafo qilyaptimi?» deb oʻylayaptimikin? Shunday deb oʻylashga haqqi bormi?

Vafo qilmaydigan xotin erining qamalib ketishini kutib oʻtirar ekanmi? Erining buzuqlik daryosiga shoʻngʻiganini bilgani hamon bu daryoga oʻzini otmasmidi?

Xatida «vafodorim» debdi...

Vafodorim?

Matlubaning xayoliga bir fikr urilib, changalida g'ijimlanib turgan qog'ozni shoshib tekisladi:

«Ha, «vafodorim» debdi. Qiziq, ismimni yozmabdi. Menga hech bunday demagan. Yaxshi kunlarda ham demagan. Anavi yer yetkurni aytgan boʻlishi mumkin. Toʻxta, toʻxta... Balki bu xat oʻshanga yozilgandir. U haromi esa, menga joʻnatgan boʻlsa-chi? Boyagi turqi sovuq uning xushtoridir balki?..»

Shunga oʻxshash fikrlar quyilib kelaverib, Matlubaning boshi ogʻriqdan zirillay boshladi. Soʻng shu ogʻriq bahona boʻlib, hoʻngrab yigʻlab yubordi. U erini hibsga olishganda ham, sud hukmi oʻqilganda ham yigʻlamagan edi. Toʻgʻri, yuragi yomon uvishib edi. Ammo doʻst-dushman uning koʻzlarida nam koʻrmagan edi. Birov «dushmanlar oldida past ketmadi, yigʻlamagani yaxshi boʻldi», desa, boshqalar «buncha bez ekan bu xotin? Hech boʻlmasa kiprigini tupugi bilan hoʻllasa-chi, endi erini yana koʻradimi yoʻqmi?» deyishgan edi.

Yuragi faryod chekmasa, koʻzlariga yosh kelmasa, nima qilsin? Yigʻining fursati shu kunga belgilangan ekan, astoydil yigʻlash uchun erning qamalishi bahona boʻlolmas ekan, xotin kishi oʻzining xorlanganini his qilsa, bas ekan. Ayni damda Matluba xorlanish kuyining avj pardaga koʻtarilganini fahmladi. Daqiqalar oʻtgani sayin u «maktub» koʻzginang teshilgur Nafisa»ga yoʻllangan-u, u juvonmarg makr ishlatib, xushtorini bu yoqqa joʻnatgan», degan fikriga astoydil ishona boshladi. Bu fikr tez orada mutlaq hokimlik shoh-supasini egallab, qolgan barcha xayollarni quva ket-di.

Yagona fikrga mahkum boʻlgach, bu zugʻumdan qutulish, qutulishgina emas, qarshi hujumga oʻtib, gʻanimini yakson qilish choralarini izlay boshladi. Donishmand ahlining «johilga hilm ila munosabatda boʻl», degan nasihatlariga erkaklar amal qilarlar-u, biroq oʻch olish qasdida yonayotgan ayol ikki dunyoda quloq solmas. Bu sohada ayollarning yagona shiori — «makrga makr qilichi bilan hamla qilmoq kerak!»

Alam oʻtida yonayotgan Matluba makr bobida kundoshidan orqada ekanini tan oldi. Birovning erini oʻziga rom qilgan makkoraga pul undirib olish qiyin ish ekanmi? Matluba «uying kuygur Nafisa» ishlatgan yoki reja qilayotgan xiylalar haqida oʻylay boshladi.

Qamoqda erining Tengiz ismli oʻgʻriboshiga yoʻliqqanini u bechora qaydan bilsin? Yaxshiki u kundoshining koʻz ochib koʻrganini sogʻinib Sibirga otlanayotganini, erini laqillatib ketish uchun bahona axtarayotganini bilmaydi. Bilsami, hozirgi ahvolini tutash desak, gurillab yona boshlashning qanday boʻlishini tasavvur qilavering. Yaxshiki, Tangri bandalarini koʻp narsalardan bexabar qilib yaratgan. Aksi boʻlgandamidi edi, dunyo xotinlarning gʻalvasidan boʻshamay qolarmidi, vallohi a'lam!

Matluba ogʻriq zoʻridanmi yo qorongʻu xaltakoʻchada milt etgan nur topolmay gangib ezilganidanmi, boshini changallab oʻtirdi. Maktabdan qaytgan katta qizi bu ahvoldagi onasini choʻchitib yubormaslik uchun past ovozda salom berdi. Onasi alik olmagach, yelkasidan quchoqladi. Matluba uni quchib, endi unsiz faryod chekdi. Erining xurmacha qiliqlaridan bezgan damlarida ba'zan «bu dunyoda yashab nima qildim?» degan xayolga ham borardi. Ana shu badbinlik koʻchasida ivirsib qolganida Xudoning oʻzi yomon yoʻldan qaytarardi — koʻziga bolalari koʻrinardi. Uch yil muqaddam oʻngida qilolmagan ishi tushida sodir boʻldi — oʻzini yoqdi! Ana shunda boʻzlayotgan bolalarini koʻrib, oʻzi ham baqirib yubordi. Bor ovozi bilan baqirgani uchun oʻzining ovozidan qoʻrqib uygʻonib ketdi. Oʻshanda toʻngʻich qizi ham uygʻonib, onasini quchoqlab olgan edi. Bu dunyoda uni ushlab turgan zanjir shu farzandlari. Shu topgacha otalik mehrini bermagan «zormanda er» kasriga endi bular ham azob chekishlari kerakmi?

Qizini quchoqlab oʻtirgan Matluba shuni oʻylab, yuragi ezilib «bundan koʻra otib tashlashganlari ming marta yaxshi edi», deb oʻyladi. Qizi esa, onasi ma'yuslanib qolganida «adamlarni oʻylab siqilyaptilar» deb oʻylab, xafalik sababini sira soʻramasdi. Oʻn oltiga yetib qolgan qizi Matlubaning baxtiga gʻoyat aqlli edi. U hatto koʻchada otasi haqida mish-mishlarni eshitganida ham dardini ichiga yutardi-yu, onasiga bildirmasdi. Koʻrpa-toʻshaklar nima sababdan yoqilganiga fahmi yetgani uchun ham bu xonadonda yashash onasi uchun gʻoyat azobli ekanini bilardi. Bilgani uchun ham onasiga suyanchiq boʻlishga intilardi. Lekin onasiga qanday suyanchiq boʻla olishiga bolalarcha aqli yetmasdi. Hozir ham onasini quchgan holda nimadir deb uni yupatgisi keldi. Ammo oʻsha «nimadir»ni topolmasdi, aytolmasdi.

Qizining shu tarzda quchoqlashi ham Matluba uchun zoʻr dalda edi. U chuqur nafas olib, xoʻrsiniqni nari haydadi. Qizining peshonasidan oʻpdi-da:

- Nasiba, jon qizim, Zilolani boqchadan vaqtliroq olib kela qol. Maydonga qarab o't: Shohruh to'p tepgani chiqib ketuvdi. Hammayog'ini rasvo qilmasin, Farruh qani, nima uchun birgalashib kelmadilaring?— dedi.
 - Farruh o'rtog'idan kitob olishi kerak ekan, hozir keladi.

Nasiba shunday deb onasi buyurgan vazifani bajarish uchun chiqdi. Qizi chiqishi bilan Matluba avvalgi holatiga qaytdi. Oradan besh-olti daqiqa oʻtmay, oʻgʻli eshikdan asta moʻraladi. Kitob-daftarini qoʻyib, koʻchani moʻljallaganida Matluba uni chaqirib, «Vali akangni chaqirib kel», deb buyurdi.

Valijon — besh uy narida turuvchi yigit. Bilganlar uni «Tursunalining mulozimi», deydi, bilmaganlar esa «direktorning shopuri» deyishadi. Kim nima desa desin, ammo Valijon xojasiga bag'oyat sodiq edi. Tursunaliga qo'shib uch kun qamab qo'yishganda

ham xojasining sirlarini ochmadi. Suddan keyin esa xotini bilan birgalikda chiqib, Matluba yangasiga dalda bergan, «nima xizmat boʻlsa, tortinmay aytavering. Akam qaytgunlaricha sizga ukaman», degan edi.

Matlubaning unga buyuradigan xizmati yoʻq edi. Shu bois koʻchada roʻpara kelganida salomlashardi-yu, ortiqcha gap aytmas edi. Shu sababli yangasining yoʻqlovi Valijonni shoshirib qoʻydi. Tomorqadagi ishini yigʻishtirib, qoʻl-betini chala-yarim yuvgach, xojasining uyiga shoshildi. Ichkari kirib hol-ahvol soʻrashga ulgurmay, yangasidan kutilmagan savolni eshitib dovdirab qoldi.

— Akang boyliklarini qaerga yashirgan?

Bunday savolni tergovchi qayta-qayta soʻragan, har safar «bilmayman» degan javobni eshitavergach, axiyri tutaqib, rosa doʻpposlagan edi. Endi esa, yangasi xuddi oʻsha tergovchiga oʻxshab soʻrayapti. Yolgʻon poʻpisa qilyaptimikin desa, ohangi ancha jiddiy.

- Siz bilmasangiz... men bilmayman, opa.
- Sen go'rni ham bilasan, ayt.
- Axir opa, men oddiy bir shopur bo'lsam...
- Sen shopur emas, qo'shmachisan! Akangga qo'shib seni ham qo'shmazor qilish kerak edi.
 - Unaqa demang, opa, bolalarim bor.
 - Senda bor bola, boshqalarda yoʻqmi? Ma, oʻqi! Ammo birovga gʻing deya koʻrma.

Matluba shunday deb xatni uzatdi. Valijon o'qib chiqqach, «men nima qilay?!» degan savol nazari bilan qaradi.

- Men har oyda pulni qaerdan olaman? Sen qoʻshmachi hamma baloni bilasan. Akang topganining yuzdan birini uyga olib kelardi. Qolgani qaerda? Yo topasan, yo bolalaringni garovga qoʻydiraman. Qamoqdan bitta kallakesar kelgan. Unga seni roʻpara qilamanu holingni koʻrib turaveraman.
- Xudo xayringizni bersin, jon opa! Unday qilmang, opajon! Menda nima gunoh?
 To'g'ri, maishatlarini bilardim. Ammo pulga ko'zim tushmagan sira. Aldayotgan bo'lsam
 Xudo ursin! Valijon shunday deb yig'lamsiray boshladi.
 - Piqillama, erkak ham yigʻlaydimi? Menga anavi buzuqning qaerdaligini ayt hozir.
 - Qaysi... buzuq?
 - O'zingni go'likka solma! Juvonmarg Nafisani aytyapman!
 - U shaharda yashaydi-da.
- Shahardaligini bilaman. Qaysi koʻchada, qaysi uyda? Tirik boʻlsa uyini ayt, oʻlgan boʻlsa qoʻrini ayt.
- Koʻchasining nomini bilmayman, opa. Metroning oxiriga yetgandan keyin ozgina yurilsa mehmonxona keladi. Keyin oʻngga. Toʻrt gavatli imorat.
 - Meni boshlab borasan o'sha ishratxonaga.
 - Xo'p, opajon, ertaga, ishdan so'rab kelaman.
 - Hozir jo'naymiz.
 - Ie, axir…
 - Senga «hozir joʻnaymiz», dedim. Bor, chorak soatda tayyor boʻlib chiq.

Valijonni chaqirtirishidan asl maqsadi ham shu edi. «Akangning boyligi qaerda?» deb soʻroqqa tutishi yigitni egib olish uchungina edi. Shunday qilmasa, u yo Nafisaning turar joyini yashirardi, yo olib borib koʻrsatishni paysalga solardi. Yoki «akasining sevimli yosh xotinini» ogohlantirib qoʻyishi ham mumkin edi. Shularni nazarda tutib, Matluba u bilan oʻziga xos boʻlmagan dagʻal ohangda gaplashdi. Yangasidan bunday muomalani kutmagan Valijon chindan ham qoʻrqdi. Ayniqsa, «bolalaringni garovga qoʻydiraman», degan gapiga ishonib, esi teskari boʻlib ketay dedi. Yigʻisi ham yolgʻon emas, rost edi. Bir tomonda qama-qama avjiga chiqqan, yana bir tomonda mashina oʻgʻirlash tish

kavagini kavlashday oson boʻlib qolgan, odamlar esa, toʻppa-toʻsatdan yoʻqolayotgan zamonda oddiy poʻpisa ham haqiqat koʻrinishini oladi. U xojasining ba'zi sirlarini biladi. Biroq pul bor-yoʻqligi, yashirilgan-yashirilmaganidan bexabar edi. Bilganida hozirgi poʻpisadan soʻng shart aytvorardi. Toʻgʻri, u kaltafahm emas, xojasining ayrim harakatlaridan bir narsani sezganday boʻlardi. Ayniqsa, qama-qamalar dovuli boshlangan, biroq, ularning viloyatlariga yetmay turiboq, xojasi gʻimirlab qolgan edi. Uch-toʻrt marta zargarlik doʻkonlariga kirib chiqqanida «oʻy-nashlarga sovgʻa-salom olyaptilar, akaginam», deb oʻylagan edi. Idorada oʻtirgan «akaginasi»ning qoʻllariga kishan solib olib chiqishgandan soʻng sovgʻa-salom olinmagani, qogʻoz pullar tillaga aylantirilganini anglab yetdi.

KUNDOSHLAR

Dunyo ham ajoyibotlarga boy. «Yaxshi buzoq ikki onani emadi», deganlaridek, ayrim mamlakatlarning bir emas, ikkita rahbari boʻladi. Birini «qonuniy prezident», deydilar. Halolmi, gʻirrom yoʻl bilan- mi — harholda saylanadi. Bu rahbarni yoqtirmaganlar oʻzlarini «muxolifot», deb e'lon qiladilaru bironta xorij yurtga borib, oʻzlariga yoqqan odamni «muvaqqat taxtga» oʻtqazadilar. Bu endi «norasmiy prezident» boʻladi. Bu holat kichikroq doiraga keltirilsa, ya'ni oila deb atalmish oʻziga xos «mamlakat»ga qiyoslansa, kundoshlarni eslatadi. Shunga koʻra, Matluba «qonuniy prezident» deyilsa, Nafisani «norasmiy boshliq» deb atash mumkin boʻlar? Ba'zan xolis bir kuch ularni murosaga keltirishga urinadi. Oʻrtada taxt masalasi turganda ularning murosaga kelmoqlari it ila mushukning ittifoqini eslatadi, xalos.

Matluba bilan Nafisa orasida taxt muammosi yoʻq. Biroq, orada taxtdan ham muhimroq masala, talashsa arzigulik narsa bor. Odamga nisbatan «narsa» soʻzini ishlatish nooʻrin, lekin ikki ayol — biri «qonuniy», ikkinchisi «norasmiy» xotin bir erkakni xuddi «narsa» kabi talashadilar. Agar xolis bir kuch — jallod oʻrtaga chiqib, «unga ham boʻlmasin, senga ham boʻlmasin, kallasini uzib tashlay qolay», desa ikkala xotinning bu taklifga koʻnishi tayin. Er oʻlsa-oʻlib ketaversin, birovi egalik qilib olmasa, bas. Er birovning toʻshagidan koʻra lahadda yotsa ming karra a'lo! «Mayli, shu erim kundoshimga boʻla qolsin», deydigan xotin topilgudek boʻlsa, dunyodagi qahramon ayollardan biri boʻladi. Shoirlar unga bagʻishlab qasidalar yozadilar. Bunaqa xotin shoir zotiga ham yoqadi-da...

Matluba «xolis kuch» — Valijon hamrohligida kundoshi bilan ittifoq tuzish uchun emas, yuzma-yuz «jang»ga kirish uchun borar edi. Viloyat markaziga yetganlarida boshkentga boruvchi soʻnggi avtobus ham joʻnab ketgan ekan. Ortga qaytishni ma'qul koʻrmay, chiqim sal koʻproq boʻlsa ham, yoʻlovchi mashinaga oʻtirdilar. Yoʻl-yoʻlakay churq etmasdan ketdilar. Ikkovi ham gaplashadigan ahvolda emas edi. Matlubaning xayoli boʻlajak «olishuv» rejalari bilan band edi. Valijon esa kutilmagan bu ofatdan qutulish choralarini izlardi.

Nafisaning uyiga yetib borishganda shahar qorong'ulik chodirida orom olishga hozir edi. To'rt qavatli bino yaqinida to'xtagan Valijon:

- Uxlab qolishmaganmikin? deb Matlubaga yuzlandi.
- Uxlasa uxlar, oʻlib qolishmagandir? dedi Matluba zarda bilan.

Valijon «gapim yoqmadi shekilli», deb oʻyladi. Aslida esa, Matluba boʻlajak uchrashuvni oʻylab, asabiylashib turgan edi. Valijon bu savoli bilan qizib, choʻqqa aylangan temir ustiga suv sachratgandek boʻldi.

Eshikni Nafisaning eri Samandar ochdi. Matlubani koʻrib, avvaliga ajablandi. Bir necha soniyalik taradduddan soʻng esa, orziqib kutgan mehmoniga yetishgan baxtiyor mezbon qiyofasiqa kirib, jilmaydi.

— O, Matlubaxonim! Salomlar, salomlarim boʻlsin! Qarang, niyatning xolisligini, bugun oʻylab turuvdim. Aslida bizlar odam emas, bemehr dinozavrlarmiz. Sizni bi-ir yoʻqlab qoʻyishga arzimadik. Lekin siz hamisha biz bilan birgasiz.

Matluba qoshu-kipriklarigacha malla boʻlgan Samandarning gaplariga e'tibor bermay, beliga bogʻlab olgan guldor peshbandga ajablanib qarab oldi. Samandar bu qarashning ma'nosini anglab, xijolatlik bilan izoh berdi:

- Oshxonada... ozgina xizmat bor ekan.
- Xotiningiz... yoʻqmi uyda? dedi Matluba, ichkariga oʻgʻrincha nazar tashlab.
- Bor. Uyda... Ie, nega ostonada turibsizlar? Qani, Matlubaxonim, ichkariga marhamat, Samandar shunday degach orqasiga chekinib, yoʻl boʻshatdi-da, boshini burib, xotinini chaqirdi:
 - Nafis, jonim, bu yoqqa qarang. Aziz mehmonlar kelishdi.

Matluba dahlizga o'tib, poyafzalini yechishga shoshilmadi. Dovdiragan Valijon esa, kirishni ham, orqasiga qaytib ketishni ham bilmay ostona ortida turaverdi. U vazifasini ado etib bo'lgan edi. Ammo «bolalarini garovga qo'yishga» qodir bu xotindan ijozatsiz keta olmasdi.

Erining hayajonli ovozini eshitgan Nafisa hayallamadi. Ichkari xonaga olib kiruvchi eshikni ochdi-yu, dahlizda turgan kundoshini koʻrib toshdek qotdi. Ular uydagi oʻsha sharmandali toʻqnashuvdan soʻng yuzma-yuz uchrashishmagan edi. Nafisa oʻynashi qamalganidan soʻng kundoshi bilan bu holda, oʻz uyida uchrashishi mumkinligini oʻylab ham koʻrmagan edi. «Nimaga keldi ekan, bu xotin», degan savolga javob izlab, ostonada shumshayib turgan Valijonga qarab oldi. Valijon bu qarashning ma'nosini uqib «Xudo ursin, bilmayman», deganday yelka qisdi.

Matluba ularning bu ishoralarini sezib, kundoshidan ko'z uzmagan holda:

Vali, sen ketaver, — dedi.

Bu ijozat Valijonning yuziga urilgan tarsakiday boʻldi. Oh, shu paytda xojasining qadri oʻtdi-ya! Xojasi bunaqa paytda hotamtoy boʻlib, ichkariga olib kirardi, qornini toʻygʻizardi-da, «falon paytgacha boʻshsan», derdi. Ana shunda Valijon ham ayshini surib olardi. Xoʻjayinning oʻynashiday boʻlmasa-da, unda ham oʻziga yarashuqli erkalaguvchilari bor edi... E, u dorulamon zamonlar beqaror shamoldayin oʻtdi-yu ketdi. Endi xoʻjayin qamoqda, u esa, ostonada egasiz qolgan itday shumshayib turibdi.

«Ketaver», deydi. «Bu begona shaharda qorongʻuda qayga ham boradi», deymaydi» Valijon shu alamli fikr bilan burilganda «norasmiy yangasi» joniga aro kirdi:

- Valijon aka, kiring, ovqat tayyor-a...
- Vali, boraver, bolalaring kutib qoldi.

Avvalgisi taklif edi, bunisi esa buyruq. Buyruqdan esa qoʻrqqulik. Valijon turgan yerida «norasmiy yangasi»ga yengil ta'zim qildi-da, orqasiga oʻgirildi.

Valijon aka, kiring...

Kirish u yoqda tursin, endi toʻxtasa, orqasiga oʻgirilsa, baloga qolishi tayin, shu sababli taklifni eshitmaganday zinapoya tomon shoshildi.

Samandar bularning kundosh ekanini bilsa-da, dardini ichiga yutib, oʻzini goʻyo hech nimadan xabari yoʻq odamday koʻrsatishga intilardi. Oshnasining marhamat qilib, oʻz oʻynashiga uylantirib qoʻyganini toʻydan keyin fahmlagan, oʻshanda Nafisani tashlab ketay ham degan, ammo «Endi menga kim ham tegardi», deb taqdirga tan bergan edi. Ayniqsa, bu uyning in'om etilishi uning koʻp muammolarini hal etgan edi. U ilmiy

safarlarda koʻp boʻlardi. Ba'zan ikki-uch haftalab qolib ketardi. Uyda yoʻqligida oshnasining ser-qatnov boʻlishini sezib bir qaynardi-yu, soʻng sovurdi.

Hozir Matlubaning tashrifi zamirida noxushlik yotganini sezdi. Kundoshlarning birbirlariga tikilib qolishganini vulqon arafasidagi sukunat deb bilib, portlash yuz bermasidan oʻzini chetga olishni ma'qul koʻrdi. Qaysi erkak ikki xotinning (ayniqsa kundoshlarning) orasiga tushib, baraka topibdi-ki, Samandar topsin? Bir kuni yuragi siqilib ketgan Nafisa «Siz ilmdan boshqa narsani ham bilasizmi?» deb zorlanganida Samandar «Men hayotni ham bilaman», deb javob qaytargan edi. Mana ayni damda oʻzi bilgan hayot qoidasiga amal qilib, suzishmoqqa shaylanayotgan ikki kundoshdan nari boʻlishni istadi:

 Ha, Nafis, siz mehmonga qarang, men ishlarimni tugata qolay, — deb oshxonaga kirdi.

Shu onda Nafisaning ortida otasi koʻrindi. Mana shunisi Matluba uchun kutilmagan, ayni choqda noxush hol boʻldi. Asli ismi Toshbolta boʻlgan bu odam sov-xoz direktoriga oshpazlik qilgani uchun koʻpchilik uni «Oshbolta» der edi. Matluba esa «fohishaxona iti» deb undan nafratlanardi. Ayniqsa, qizining nomusini ham xojasiga in'om etgach, Matluba u bilan salomlashmay ham qoʻygan edi.

— Ha, kim kelibdi? — dedi Toshbolta mensimagan bir ohang bilan. Soʻng esa piching qildi: — Ie, aziz mehmonmi? Ha, keling, kelin poshsha?

Uning «ha, keling...» degani zamirida «Nega kelding, ket!» degan ma'noni o'qib, Matluba ichida «Turqing qursin sening!» deb qarg'adi.

- Ha, gapir, ish-pish bilan keldingmi yo eringni qidirib keldingmi? Ering yoʻq bu yerda. U hov... Sibirda ayshini surib yurgandir.
 - Dada! Nafisa shunday deb otasiga oʻgirildi.
- Nima «dada!» deb oʻshqirdi Toshbolta. Nima bor unga bu uyda? Gaplashib oʻzingni pastga urma. Uyga ham qoʻyma. Bu uy eridan qolgan matoh emas.

Matluba bu uy ostonasini bosib o'tishi bilan «hujum»ga tashlanishni reja qilib, aytadigan gaplarini yo'l-yo'lakay pishitib olgan edi. Matlubaning xom xayoli bo'yicha eshikni «itdan tarqagan Nafisa» ochardiyu uni ko'rib qo'rqib ketardi, orqasiga tisarilib, titray boshlardi... Ana shunda Matluba hujumga o'tardi. Yulmas edi-yu, ammo undan battar qilardi... o'ylaganlari amalga oshmadi. Ustiga ustak «fohishaxona iti» vovullab turibdi.

- Erimning... Matluba «erimning» degan soʻzga urgʻu bermoqchi edi, ammo ovozi titrab chiqib soʻzini yamlab yubordi. Ovozi titragani uchun oʻzidan oʻzi naf-ratlandi. «Bu maxluqlar oldida past ketishim mutlaqo mumkinmas», deb oʻziga dalda berdi. bir necha nafas sukut qilib, soʻng gapini qaytadan boshladi: Erimning Sibirda ekanliklarini yaxshi bilaman. Lekin bu yerga itlarini bogʻlab ketganlarini bilmapman.
 - Nima deding, voy enag'ar!
- Dada! Nafisa otasining koʻkragidan yengil itardi, Dada, ichkari kiring, aralashmang.
- Sen!.. Toshbolta unga ham ikki ogʻiz «shirin» gaplaridan aytmoqchi edi, qizining koʻzlariga koʻzi tushib, shashtidan qaytdi.
 - Bu safar siz «xo'p» deng...
- Yaxshi, omma, gapni kalta qil. Sen uning erini bilmaysan, tanimaysan... Hech qanaqa qogʻoziga qoʻl qoʻyma, shunday deb iziga qaytgach, Nafisa eshikni yopdi.

Matluba oʻsha sharmandali kunda, gʻazab olovida yonayotgan damda unga tuzukroq qaramagan ham edi. Hozir oʻgʻrincha emas, dabdurustdan tikilib qaradi. Xushbichim, xushroʻy ekanini tan olgisi kelmadi. «Erim bekorga ilakishmagan ekan, menga

«yoshingga yarashadigan qiliq qil», deb bejiz aytmagan ekan. Bu ishva qilib turganda men yoqarmidim», degan fikrni xayolidan quvdi.

Nafisa «mayli, to'yganicha garab olsin», deb indamadi. Oxiri sabri chidamadi:

- Keling, opa...
- Opa? Matluba zaharli iljaydi. Men qachondan beri senga opa bo'lib qoldim? Men sendaqa singilni bilasanmi, nima qilaman?

Nafisa qaydan bilsin buni. Toʻgʻrisi aytilsa, Matlubaning oʻzi ham bilmaydi. Hozir Nafisa «xoʻsh, nima qilardingiz?» deb soʻrasa dovdirashi tayin edi.

- Singlingiz emasman. Yoshingizni hurmat qilib aytuvdim. Boshqa demayman. Menga bir nima demoqchimisiz?
- «Bir nima demoqchimisiz?..» Matluba kundoshiga oʻtli nigohini qadadi. Sen menga qaysi xushtoringni yubording?
 - Nima deyapsiz? Nafisa ajablanib, kaftini yuziga bosdi.
 - Erimni kanadek so'rganlaring yetmaganday endi menga yopishmoqchimisanlar?
 - Tushunmayapman, nimaga unaqa deyapsiz?
- Sen oʻzingni merovlikka solma. Bilib qoʻy, oʻsha xushtoringni ham, oʻzingni ham oʻldirtirib yuboraman!

Bu gapdan keyin oshxona eshigi qiya ochilib, Samandarning boshi ko'rindi:

- Qizlar, nima gap, tinchlikmi?
- Eshikni yoping! dedi Nafisa zarda bilan. Amri shu zahoti bajarilgach, Matlubaga qaradi. Endi uning koʻzlarida ham gʻazab uchqunlari koʻrindi. Qoʻlingizdan kelsa oʻldiring, lekin menga tuhmat qilmang.
- Tuhmatmi? Mana bu ham tuhmatmi? Matluba shunday deb sumkachasidan xatni chiqarib uzatdi. Nafisa xatni oʻqiyotganida undan koʻzini uzmadi.
 - Bu... Tursunali akamning xatlari-ku? dedi Nafisa ajablanib. Sizga kim berdi?
 - Xushtoring.
 - Tuhmat qilmang, dedim sizga! Xudo ursin, bu xatni endi koʻrib turibman.

Matluba «rost aytyaptimi yo tonyaptimi?» degan fikrda unga tikilib qoldi. Moʻljalidagi «hujum» kuchi zaif boʻldi. Natijasi esa, undanda zaif boʻladiganga oʻxshab turibdi.

Nafisa o'ylab bir to'xtamga kelishi uchun kundoshiga sharoit yaratib berdi. Ichkaridan esa Toshbolta yolg'on yo'tali bilan qizini shoshirdi. «Dadam ham ba'zida oshirib yuboradilar-da», deb g'ijindi Nafisa, Matluba ham yo'talning ma'nisini tushundi. «He, o'pkaginangga qurt tushsin, iloyim, shu yo'tal olib ket-sin-a...» deb qarg'adi.

- Agar ishonmasangiz, dedi Nafisa kundoshiga tik qarab, turmaga borib kelamiz. Oʻzlaridan soʻraymiz.
 - Nima? Matluba bunaqangi taklifni sira kutmagan edi.
- Sibirga birga borib kelamiz! Nafisa shunday deb taklifiga aniqlik kiritgach oshxona eshigini ochdi. Samandar aka, Irkutskka ikkita bilet olib kelasiz.
 - Hozirmi? dedi Samandar ajablanib.
 - Ertaga... ertalab. Borish-kelishga olasiz. U yoqda sarson bo'lib yurmaylik.
- Toʻxta, dedi Matluba. Senga «Sibirga boraman» dedimmi? Menga qara, sen erimning Irkutskda ekanini qaerdan bilasan? Matluba savolni Nafisaga berib, «koʻrib qoʻy, xotiningni» deganday Samandarga qaradi.

Nafisani bu savol dovdiratmadi:

- Odamlardan eshitdim, dedi xotirjam ravishda.
- Odamlar qaerdan eshitishibdi? Radiodan aytibdimi? Yo gazetda chiqibdimi?
- Endi maydalashmay qoʻyaqoling. Avval manavini hal etaylik, Nafisa shunday deb xatni eriga uzatdi. Oʻqing, oʻrtogʻingizdan.

Samandar xatni o'qib, boshini qashidi. Malla kipriklari pirpiradi.

- Matlubaxonim... Men bilmadim-u, ammo Nafisdan bekor gumonsirayapsiz. Xohlasangiz Tursunalining oldiga oʻzim borib kelaman. Agar yanglishmasam, bu xatni oʻz xohishi bilan yozmagan. Aniqlash kerak. Turmalarda har xil voqealar boʻlib turadi.
 - Anigladingiz nimayu aniglamadingiz nima?
 - Qanchadan to`lash kerak ekan?

Matluba aytdi.

- Har oydami? dedi Samandar ajablanib. Bu butun bir kapital-ku? Bilasizmi, Matlubaxonim, bunday qilamiz: birinchi vznosni biz beramiz.
 - Yo'q!
- Rad etishga shoshilmang. Axir Tursunali menga begona emas. Biz aka-ukadaymiz, axir.

«Aka-ukadaymisan, yo kundoshmisan?» deb oʻyladi Matluba. Bu yerda ortiq toʻxtagisi kelmadi. Bularga uchrashgani uchun oʻzidan oʻzi nafratlandi. Xuddi tilanib kelganday his qilib, oʻzini oʻzi yulib tashlashni istadi. Shart burilib, eshik tutqichiga qoʻl yuborganida Samandar uni yelkasidan ushlab toʻxtatdi.

- Bunday qilishga haqqingiz yoʻq. Menda pul bor. Bu yil baribir kurortga bormaymiz. Ishdan menga ijozat yoʻq. Undan tashqari biz puldan sira qiynalmaymiz. Doʻstim uchun men ham nimadir qilishim kerak.
- Siz do'stingiz uchun juda ko'p ish qilib qo'ygansiz, xayr, dedi Matluba eshikni ochib. So'ng ostona hatlab, orqasiga o'girildi: Bilib qo'ying: men tilanchi emasman. Erimni ham, nomusimni ham o'zim himoya qila olaman.

Matluba shunday deb eshikni yopdi-da, tez-tez yurib zinapoyadan tusha boshladi. Samandar ham, Nafisa ham uning ortidan yurmadilar. Samandar «Erini himoya qilishi tushunarli, ammo nomusni nima uchun aralashtiradi?» degan xayol bilan xotiniga qaradi. Nomus masalasi bekorga eslanmaganini tushungan Nafisa eridan koʻzini olib qochib, «yoʻtali bosilib qolgan» otasi huzuriga yurdi.

O'LIMNING BAHOSI

Matluba zinapoyalardan tushib, tashqariga chiqqunicha xuddi najasxonadan oʻtayotgandek nafasi qaytdi. To soʻnggi zinapoyani bosgunicha har tashlagan qadamida oʻzini la'natladi. Dastlabki soniyalarda bu yerga kelib xato qilganini anglab, pushaymon edi. Uning oʻziga boʻlgan nafrati bu pushaymondan tugʻilmadi. Koʻngilga taskin bera olguvchi «olishuv» boʻlmagani, ulardan baland kelish u yoqda tursin, hatto teppa-teng gaplashishga jur'ati yetmagani, eng muhimi — bu xonadondan besamar ketayotgani uning gʻazabini qoʻzgʻotgan edi. Ba'zan odam achchiqlansa gʻazab toshlarini birovga otib humoridan chiqadi. Hozirgi holatda esa, Matluba gʻazab toshlarini faqat oʻzigagina ota olardi.

Alhol, Matlubani dardga solgan yana bir sabab bor: Matluba kundoshining yayrab-yashayotganini anglab, avval ichi kuydi, soʻng rashk qildi. Yoʻq, eriga nisbatan emas, oʻsha qoshu kipriklarigacha malla Samandarga rashk qildi. Eri doʻstini «zoʻr olim, faqat Maskov bilan gaplashadi», — degan edi. Ana shunday zoʻr odamni bir buzuqning quliga aylanishiga Matluba toqat qila olmadi. «Bu itdan tarqagan gʻarkoʻzga er hayf. Nima qilib boʻlsa ham ajratib yuboraman. Yursin menga oʻxshab beva boʻlib...» Matluba xayolidan yarq etib oʻtgan bu fikrni chuqurlashtirmadi. Hatto qanday qilib ajratib yuborishini oʻylamadi ham. Buni keyinroq mulohaza qiladi. «Samandarga borib hammasini aytaman. Qiz olmaganini bilib qoʻysin...» deb qaror qiladi-yu, ammo ahdini amalga oshirishni galga solaveradi. Bu galga solishi ham besabab emas. Avvaliga ajratib yuborishni

o'ylagan bo'lsa, keyinchalik «Juvonmarg Nafisa bu dunyoda yashamasligi kerak», degan fikrga ko'prog yopishib oladi.

Bu o'y-qarorlar keyinroq tug'iladi. Hozir esa...

Matluba besh-oʻn qadam yurgach, bolalar oʻynaydigan maydoncha qarshisida toʻxtadi. «Tepadan kuzatishayotgandir», degan fikrda oʻgirilib, ularning derazalariga qaradi. Oʻnlab derazalardan qaysi biri ularniki ekanini aniq bilmasdi. Uning moʻljalidagi bironta deraza ortida ham sharpa sezilmadi. «Er jonivor idish-tovoq yuvayotgandir. Anavi buzuq esa, otasiga hisob berayotgandir. Hamma gaplarni eshitib turdi u it! Yana yoʻtaladi-ya! He, oʻpkalaring irib ketsin sening!» Matluba noaniq derazaga shu qargʻish toshini otgach, sal hovuri bosilganday boʻldi.

Nimqorong'i muyulishda to'xtab turgan odamning o'zi tomon yura boshlaganini ko'rib, cho'chidi. Yuragiga qo'rquv oralab, tislangan mahalida tanish ovozni eshitdi:

- Opa, bu menman.
- Vali? nima qilib turuvding?
- Kechqurun yolg'iz yurmang, dedim. Harholda bu yerda yotib qolmasangiz kerak, deb o'yladim.

Matlubaga Valijonning bu ishi ma'qul bo'ldi. Ammo sir boy bermaslik uchun:

Meni bo'ri yermidi? — deb to'ng'illab qo'ydi.

Katta ko'chaga chiqishganda Valijon:

- Opa, men bir moshin toʻxtatayin. Adangiznikiga borasizmi? deb soʻradi.
- Yoʻq, dedi Matluba, ukamnikiga boraman. Sen ham yura qol, joyi bemalol.
- Rahmat, opa, mening boradig'on yerim bor.

Matluba «boradigan yeri boʻlmagani uchun meni poylab turgandir», deb oʻylagan edi. Valijonning bu gapidan soʻng oʻsha fikri uchun oʻzi uyaldi.

- Yuraver, seni tanishadi, dedi muloyimlik bilan.
- Yoʻq, opa, bahonai sabab bilan qarindoshlarni koʻrib ketayin. Yana qachon tushaman bu shaharga...

Valijon Matlubani mashinada kuzatgach, oʻzi temir yoʻl bekatiga ketdi. U Matlubaga yolgʻon soʻzladi: shaharda uning qarindoshlari yoʻq edi. Xojasining davrida orttirgan oʻynashlarinikiga borishning ma'nosi yoʻq. U xotinlar «Valijon akaginam qachon bagʻrimga kelarkinlar?» deb koʻz tikib oʻtirmaydi. Allaqachon boshqa xushtorlar topib, maishatlarini davom ettirayotganlari aniq.

Valijon yomon bir o'yinga beixtiyor aralashib qolayotganidan ko'ngli xijil bo'lib, turli o'ylar changalida tong ottirdi. Yaxshi kunlari tugab, tashvishli davri yaqinlashganidan darak beruvchi bu shahardan tezroq qochgisi keldi. Tongda birinchi avtobusga o'tirib uyiga jo'nadi. Halqa yo'ldan uzilgach, xuddi tashvishlari ortda qolganday sal yengil tortdi.

Matluba esa, mashinadan tushgach, ukasi yashaydigan hovli darvozasiga yaqinlashdi-yu, ammo qoʻngʻiroq tugmasini bosishga shoshilmadi. Hozir u hech kim bilan koʻrishishni, gaplashishni istamayotgan edi. Toʻgʻri, ukasi uni koʻrib, «nega bemahalda kelding?» demaydi. Bil'aks, quvonadi. oralaridagi farq bir yosh boʻlgani sababli ular Fotima-Husan kabi yaqin, aytish mumkinki, ma'lum ma'noda hatto sirdosh ham edilar. Yoshdagi farq oz boʻlgani sababli ukasi uni «opa» ham demasdi, sizlamasdi ham. Matluba erga tekkanidan soʻng «opa» deb sizlay boshladi. Bu Matlubaga ham erish tuyuldi. Ukasi bilan uzoqlashib ketganday boʻldi. Ukasiga ham shunday tuyulib, yana eski odatiqa qaytdi.

Erga tekkanidan soʻng ota-ona huzuriga kelib-ketish uning uchun oʻlim chigʻirigʻidan oʻtish kabi azob edi. Otasi Matlubani e'tiborli bir odamning oʻgʻliga berishni moʻljal qilib qoʻygan ekan. Moʻljalning oʻzigina boʻlsa koshki edi. Doʻsti vakilligida goʻzal, oqila qizi

borligini ma'lum qilibdi. U odam esa, qadrdonlaridan birida oʻgʻliga mos qiz borligidan «xabar topib», sovchi ham yuborgan edi. Balo buluti yopirilib, balo yomgʻirlari ana oʻshandan soʻng yogʻa boshladi. Otasiga qoʻshilib onasi avval yalindi, soʻng poʻpisa qildi. Poʻpisa qilishda akasi hammadan oshib tushdi, gapira turib, bir-ikki marta doʻpposlashdan ham qayt-madi. Onasi soʻnggi chora — koʻz yoshlarini ishga solganida Matluba chiday olmadi. Onasiga qoʻshilib yigʻlab turib, bir yigitni «juda yaxshi koʻrishini» aytdi. «Boʻlmagan gap, — dedi onasi, — yaxshi koʻrganingni erga tekkaningdan keyin unutib yuborasan». «Unutolmayman, oyijon», dedi yigʻidan toʻxtamay Matluba. «Agar oʻsha yaxshi koʻrganingga tegaman, desang mening oʻligimni hatlab oʻtib chiqasan bu uydan», dedi onasi qat'iy tarzda. «Oyijon, sizning bir tomchi koʻz yoshingiz uchun undan kechsam kechvorar edim, lekin... toʻyning ertasiga kuyov tomon meni izimga qaytarib yuborsa isnodga chiday olmaysizlar...» Onasi beixtiyor «nega?» deb soʻradi-yu, nima voqea sodir boʻlganini anglab, labini tishladi, yuzini yuldi.

Matluba toʻgʻri aytgandi — isnodga chiday olishmas edi. Boʻlib oʻtgan sharmandali voqeadan xabar topishgach, dardlarini ichlariga yutmoqdan oʻzga chora boʻlmadi. Agar bu uyatdan odamlar xabar topishsami?! Xudo koʻrsatmasin!

Matluba xohlagani — Tursunaliga tegdi. Unga dabdabali to'y nasib etmadi. U alamli, azobli hayotni o'ziga ravo ko'rdi. Otasi esa, «oziq-ovqat savdosi bosh-qarma»siga rahbarlik qilish niyatiga yetolmadi. Sir uch kishining orasida qoldi. Matlubaning akasi, ukasi uning Tursunaliga tegishini o'jarligidan, deb baholadilar. Otasi Matlubani rasman oq qilmagan bo'lsa-da, gaplashmay qo'ydi. Salomlariga ham alik olmadi. Faqat tilsiz, harakatsiz qolganidan keyin qiziga qarab bir nimalar demoqchi bo'lib g'o'dranardi, ko'zlari yoshlanardi.

Otasini isnod emas, pul gʻami yiqitdi. Ulardan ikki uy narida qimorboz qoʻshnilari boʻlardi. Bir kuni chiqib «Qimorni tashlamoqchiman. Ammo bu shaharda yashab turib tashlay olmayman. Samarqanddan joy topdim. Ota yurtimga joʻnayman, joy begona boʻlmasin. Siz bizga koʻp yaxshilik qilgansiz. Uyimni sotib oling, sizga arzonroq qilib beraman», debdi. Otasi ham qiziq, uyga muhtojligi yoʻq edi. Katta oʻgʻli oʻzi bilan qolib, kichigi joy qilib chiqib ketgan edi. Lekin nafs qurgʻur «arzonroq olu u yer bu yerini tuzatib, ikki baravar ortiqqa pulla», deb qutqu qilaverganmi, harholda mahalladan uchtoʻrt odam chaqirildi, savdo pishdi. Pul toʻlandi. Qoʻshni ikki oydan soʻng koʻchishga ijozat soʻradi. Oradan ikki oy emas, yarim yil oʻtsa ham u joyidan jilmadi. Sakkiz oydan soʻng koʻchishi lozimligi eslatilganda u «nega koʻchaman?» deb «ajablandi». Uyni sotganini aytishganda esa, «Qachon sotibman? Shunday uyni nimaga sotaman?» deb yana «ajablandi». Guvohlar chaqirildi. Biri «eslay olmadi», boshqasi «bunaqa gap boʻlmagani»ni aytdi. Guvohlar chiqib ketishgach, otasi yiqildi, tilsiz, harakatsiz boʻlib qoldi. Oradan uch oy oʻtar-oʻtmas, onasi uyqusidan uygʻonmadi. Moʻ′mina ayol edi, omonatini ham osongina topshirdi.

Onalar hech mahal farzandlaridan norozi bo'lib ketmaydilar. Shunday bo'lsa ham Matluba «onamdan rozilik ololmadim», deb armonda goldi.

Onasi oʻtganidan beri ota uyiga borgisi kelmaydi. Akasi bilan yangasini koʻrishga tobu toqati yoʻq. Akasini oʻsha urganlari uchun sira-sira kechirolmaydi. Hatto onasini behurmat qilganida ham xotinini chertmaydigan insonning singlisini doʻpposlashi chindan ham kechirish mumkin boʻlgan hol emasdi.

Janozadan keyin qaysi bir kuni ukasi yolgʻon yigʻisini avjga chiqarayotgan yangasiga qarab turib, «onam boyaqish oʻldilaru bu dunyodagi doʻzax azobidan qutuldilar», degan edi. Yomon kelindan Yaratganning oʻzi asramasa qiyin ekan. Qayin singillar turmushga chiqib ketishar, qayin inilar koʻchib ketishar, ota bilan ona esa, bu dunyo azobiga dosh berib, yashashdan oʻzga choralari yoʻq. Ularni bu azobdan faqat oʻlimgina qutqaradi.

Matluba shaharga tushganida «otamnikiga boraymi yo ukamnikigami?» deb ikkilanib o'tirmas edi. To'g'ri, otasini borib ko'rardi, ammo u yerda uzoq o'tirmas edi. Yangasining «qiz degan otaga qarab o'tirishi kerak», degan fasod gaplariga javob bermay iziga qaytardi. Erining ishi sudda ko'rilayotganda bolalarini olib ukasinikiga ko'chib keldi, deyilsa ham bo'ladi.

Matluba ukasining darvozasi qarshisida turib, yuragi uvishib ketdi. Bir qarasang atrofingda mehribon odamlar koʻp. Ular senga yaxshilik qilgisi keladi-yu, ammo nima uchundir qilmaydi. Dardingga mal-ham qoʻygisi keladi-yu, ammo nimagadir qoʻymaydi. Senga qoʻshilib yigʻlagisi keladi-yu, ammo nimagadir yigʻlamaydi. Boshing uzra baxt quyoshi charaqlab qolsa, uning nuridan sen bilan birga bahra olishga shoshilishadi. Bu baxt quyoshi yuzini abri balo qoplaguday boʻlsa, pana-panaga qochadilar. Oʻsha panada turib, senga boʻlgan sadoqatlarini izhor etadilar. Matluba eri qamalgunicha buni bilmas edi. Balo buluti hamma yoqni zulmatga oʻragani bilan hayotni yaxshi-yomonga ajratib, odamning gʻaflat uyqusidagi koʻzini ochar ekan.

Shaharda qarindoshlari koʻp, tanishlari undan-da koʻp. Ammo ularga baxti kulgan Matluba kerak. Bir olam dard iskanjasidagi baxti qaro Matlubani ular boshlariga uradilarmi? Ularni ham ayblash qiyin, chunki dard masalasida ularning boshqalardan kam yeri yoʻq. Matluba qaysi birlarinikiga hasratdosh izlab borsin? Ukasi... mehribon, ammo Matluba ayrim masalalarda unga yorila olmaydi.

To'g'ri, shaharda bittasi bor... Lekin u ham hasratdosh emas. Ammo agar gapi rost bo'lsa, Matluba uchun jonini berishga tayyor odam. Dorulfununga qabul imtihonlari paytida ishqi tushib, to Matluba erga tekkunicha tinch qo'ymadi. Ismi Ramziddin bo'lgan bu yigitni oshiqligi sababli hamkurslar Romeo deb kulishardi. Bu ism uning o'ziga ham yoqib, Matlubani bir-ikki «Juletta» deganida eshitadigan «shirin» qaplarini eshitib olgan edi. Bu Romeo tushmagur mulohaza, odob, muomala ko'chalaridan o'tmagan soddagina yigit edi. Matlubaga bo'lgan muhabbatini hech kimdan yashirmas, muhabbat yashirin mevasi ekaniga fahmi yetmas edi. May bayramida ketishayotganda, Qizil maydonga yetmay, ancha vaqt to'xtab qolishdi. Shunda bu Romeo tushmagur dabdurustdan «shu yil imtihonlardan soʻng uyingga sovchi yuboraman, yoʻq desang uvolimga qolasan», dedi. Matlubaning qitmirligi tutib, «chindan yaxshi ko'rasizmi?» deb kuldi. Unga dugonasi qo'shilib «yaxshi ko'rsangiz hozir hammaning oldida isbot qiling», dedi. «Qanday isbot qilishim kerak?» dedi Romeo ajablanib. «Matlubaning garshisida hozirog tiz choʻqing!» dedi dugonasi shaddodlik bilan. «Tiz cho'kaymi?» deb so'radi Romeo Matlubadan «yo'q» degan javobni kutib. «Nega Matlubadan so'raysiz. Yaxshi ko'rsangiz tiz cho'king darrov! Amerikaliklar shunday qilisharkan. Zamonaviy yigitlar Amerikaga ergashishlari kerak», dedi dugonasi bo'sh kelmay. Romeo yana Matlubaga qaradi. Najot bo'lmagach, cho'ntagidan tanga pullarini olib qizning oyoqlari ostiga sochdi-da, ularni terib olish bahonasida tiz cho'kdi. Uning bu topgirligidan goyil golgan gizlar ko'chani boshlariga ko'tarib, sharaglab kulib yuborishdi. «Matlu, shundan boshqaqa teqsanq xor bo'lasan», deb hazillashishdi. O'shanda farishtalar «omin» degan ekanmi, boshqaqa teqdiyu xor boʻldi...

O'sha kezlari esa, Matlubaning ko'z oldidan Tursunali ketmas edi. Boshqa barcha yigitlar uning uchun arzimas bir odamchalar edi.

Romeo bilan turli tasodif tufayli keyin ham uchrashdilar. Har gal uchrashishganda u uylanmaganini, Matlubaning erdan chiqishini kutayotganini aytardi. «Sovuq nafas qilma, nega erdan chiqarkanman?» derdi Matluba. «Sen u bilan baxtli boʻlolmaysan. Yo ajralishasan, yo siqilib oʻlib ketasan. Boshqa yoʻl yoʻq senga. Mening ham bitta yoʻlim bor — seni kutaman. Qariganingda boʻlsa ham senga uylanaman. Uylanmagunimcha oʻlmayman», derdi u.

Tursunali qamalgach, yana uchrashishdi. Bu safargi uchrashuv tasodifiy boʻlmadi. Romeoning oʻzi qishloqqa qidirib bordi. Yana oʻsha gapni aytdi. «Uni oʻn besh yil kutmoqchimisan? Kutma», dedi. «Ahmoq ekansan,— dedi Matluba. — Boshqa kelma, men ersirab qolmaganman». «Boshqa kelmayman, oʻzing borasan», dedi u ishonch bilan. Soʻng yon daftarchasining bir varagʻiga turar joyini yozib berdi. Matluba bu qogʻozni gʻijimladi-yu, ammo tashlab yuborolmadi.

Hozir ukasining darvozasi qarshisida shuni eslab, bir entikdi. Bu yomon xayol domiga tushmaslik uchun qoʻngʻiroq tugmasini bosdi. Eri qamalganidan beri dam yarim tunda, dam erta saharda kelib yurgani uchun eshikni ochgan kelini bu tashrifdan ajablanmadi. «Keling, opa», deb soʻrashdi.

- Sarvar uydami? dedi Matluba, ostona hatlab ichkari kirgach.
- Uydalar, futbol koʻryaptilar. Odatlarini bilasiz-ku, futbol desa oʻzlarini tomdan tashlaydilar.

Sarvar chiqib, opasi bilan salomlashdi-da, «choy-poy ichib tur, hozir tamom boʻladi», deb yana kirib ketmoqchi edi, xotini toʻxtatdi:

— Odamni isnodlarga oʻldirib yuborasiz-a, futbol oʻlguringizni bir marta koʻrmasangiz nima qilibdi?

Bu gaplarni eshitib, Sarvar qoshlarini chimirdi:

- Yana bir marta «futbol oʻlgur» degsang, jiydaxaltangni qoʻltiqlaginu onangnikiga joʻnab qol.
 - Axir opam…
- Opam boʻlsa, oʻzimning ming yillik opam. Mensiz yarim soat chidab oʻtirishga qurbi yetadi. Sen kallangni ishlat: bunaqa oʻyin toʻrt yilda bir marta boʻladi. Toʻrt yil kutaman men bunaqa oʻyinni.
 - Mening kelin degan nomim bor. Har qanaqasiga kim yomon kelin yomon.

Matluba er-xotinning «olishuvi»ni eshitib, ma'yus jilmaydi.

— Sarvar, bor, kiraver, futbolingdan qolma.

Shu payt ichkaridagi televizordan muxlislarning hayqirig'i eshitildi. Nimadir demoqchi bo'lgan Sarvarning qapi og'zida golib, sapchiganicha ichkari kirdi.

- Nazmixon, qoʻying, odatini bilasiz-ku. Oʻzining toʻyida futboldan kechmagan odam shu paytda kechadimi?
- He quribgina ketsin, shu futbollari, Naz-mi shunday deb qayin egachisini mehmonxonaga boshladi.

Bu xonadondagi er-xotin yechishi mushkul boʻlayotgan asosiy muammo futbol masalasi edi. Sarvar bu oʻyinning ashaddiy muxlisi boʻlsa, Nazmi ashaddiy dushmani edi. «Futbol — san'at! Sochi uzun, aqli kalta odam bu oʻyinning gashtini bilmaydi». «Futbol — yigirma ikkita ahmoqning bitta toʻp ketidan Ali akaning itiday halloslab yugurishi». Er-xotinning bu boradagi «falsafasi» shundan iborat. Oʻn yilning nari-berisida davom etayotgan «ilmiy» bahsda hali tomonlarning kelishuvidan darak yoʻq. Hozirgi bu bir «choʻqishib» olish ham Matluba uchun yangilik emas. Har safar «qozilik» qilishga toʻgʻri kelsa, kelinga toʻylarini eslatadi. Bu eslatuv Nazmiga yoqadi. Aslida Naz-mi bu voqeani sira unutmaydi. Chunki bu unutadigan voqea emas. Biron hajvchining qulogʻiga chalinsa yozib yuborishi turgan gap. Tasavvur qiling: nikoh bazmi avjida. Tabriklarning biri-ikkinchisiga ulanadi. Shirakayf mehmonlar kelinning yarim soatdan beri yolgʻiz oʻtirganini sezishmaydi. Ammo bunaqa holat ayollarning nazaridan qochmaydi. Tabiiyki, eng avvalo kelin poshsha bezovtalanadilar. «Hozir kelaman», degan kuyov toʻra qayoqqa gʻoyib boʻlishlari mumkin? Yangasi biqiniga asta turtib, «Qani kuyov?» deb soʻraydi. Nazmi qaerdan bilsin?

Xotinlarning shivir-shiviri tavonxonagacha yetib boradi. «Opoqi, qudalar xavotirlanishyapti, o'g'lingiz bir soatdan beri yo'g emishlar». «Yarim soat» tavonxonaga «bir soat» bo'lib yetib bordi. Bu gap xotinlar tili vositasida ko'chaga chiqquday bo'lsa, «ikki soat»ga yetishi tayin. Oʻgʻlining qaerdaligini ona bilmay, kim bilsin? Toʻgʻri, bu gapni eshitib, avvaliga yuragi «shuv» etib ketdi. Harholda do'stdan dushman ko'p. Onaning ziyrak fahmi bu xavotirni darrov quvdi. «Voy, shoʻrginam, bugun futboli boridiya! To'yni ertaga ko'chiring, deganida qudalar ko'nishmovdi». Xullas, Sarvar yana o'nbesh dagigadan so'ng «topildi». O'sha kuni u umrida yagona zo'r «jasorat» ko'rsatdi: futbol o'vinining fagat ikkinchi bo'limini ko'rdi. Birinchi bo'limini esa «umrida bir marta bo'ladigan tantana» — to'y uchun gurbon gildi. Tabiiyki, Nazmi bundan o'sha paytda bexabar edi.

Kuyov to'ra xushnud holda joylarini egallaganlarida kelin poshsha arazlaganday bir chimirilib qo'ydilar-u, tergamadilar, turmushning dastlabki daqiqalaridayoq tergashni o'zlariga ep ko'rmadilar. Bu ham o'ziga xos bir jasorat bo'ldiki, zikr etilmog'i albatta, o'rinlidir. O'yin ko'ngildagiday tugagani uchun kuyov to'raning kayfiyatlari yaxshi edi. Barmoqlarining uchi bilan kelin poshshaning yumshoq joylarini o'g'rincha silab, quloqlariga shivirladilar:

— Sizga bitta she'r aytib, beraymi?

Kelin poshsha ajablanib, «she'r yozgani ketgan edingizmi?» degan savol nazari bilan qarab qo'ydilaru bosh irg'ab, she'rni o'qimoqqa ijozat berdilar.

Kuyov to'ra yana quloqqa shivirladilar:

— Ekin ekadig'on yering bo'laman, bugundan boshlab ering bo'laman.

Kelin poshsha «piq» etib kulib qoʻydilar. Bu kulgi kuyov toʻraning gunohlari kechirilganiga bir ishorat edi. Qadah koʻtarib tabrik soʻzi aytayotgan mehmon goʻyo kuyov toʻraning hozirginada she'r aytganlarini sezganday «mushoira»ni davom ettirdi:

«Sarvarbek! — deb xitob qildi u. — Toʻy toʻylashib keldik elingizga, Xudo quvvat bersin belingizga!» Toʻyxonani qiyqiriq bosib, xotinlarning farazlarga boy «shivirshiviri»ga yakun yasaldi. Mana shu qisqa vaqt davomida Sarvar xotinlar tili bilan yasalgan «uchar gilam»da yaxshi koʻrgan qizi bilan uchrashib qaytishga» ulgurdi.

Nazmi har safar shu voqeani eslaganida bir entikib qoʻyadi. Hozirgi entikish eriga boʻlgan arazni nari surdi. Qayin egachisiga mehribonlik koʻrsatib, Matlubaning qarshiligiga qaramay dasturxon tuzadi. Choy damlab kelgach, qoʻni-qoʻshnilar, qavmu qarindoshlar hayotidan qisqa-qisqa axborot berdi. Matluba kelinining bu odatini ham yaxshi koʻradi, ham ranjiydi. Yaxshi koʻrganining boisi — Nazmi bilan besh daqiqa birga boʻlsa bas, barcha yangiliklardan xabardor boʻladi. Ranjiganining boisi — uning tashrifi haqidagi ma'lumot ham ertasigayoq «xotinlar telegrafi» orqali tarqaydi. Tursunali qamalganidan beri bu «telegraf» toʻla quvvat bilan ishlaydi. Matluba ba'zan «gap shu yerda qolsin», deb keliniga qattiq tayinlaydi. Kelinning «ogʻzi mahkam». Matluba ketguniga qadar bu gap ostona hatlamaydi. Matluba tushgan avtobus shaharni tark etmay, sir saqlanmogʻi lozim boʻlgan yangilik ozgina qoʻshilgan, bezalgan holda «xotinlar telegrafi»ga ulanadi.

Nazmi mahalla yangiligini tugatib, qarindoshlarga oʻtganida Matluba uning gapini boʻldi:

— Vazirlikka hisobot olib tushgan edim. Qogʻoz oʻlgur biram koʻp. Bitta-bitta tekshirib olgunicha kech boʻlib ketdi.

Matluba bu gapni «xotinlar telegrafi» uchun atay aytdi. «Hisobot oladigan qoʻngʻiz moʻylov opamga bir-ikki ilmoq tashlash uchun atay kechgacha olib oʻtiribdi», degan qoʻshimchadan, shubhasiz, Matluba bexabar qoladi.

Futbol tugab, Sarvar chiqib keldi.

- Voy opa, qarang, bir qarang, dedi Nazmi, shoxlari chiqibdi!
- Boya nima deding? dedi Sarvar uning pichingini tushunmaganday, «Odamni isnodlarga qoldirasiz» dedingmi? Men futbolni koʻrmay shu gapingni oʻylab oʻtirdim.
 - Gapimga nima bo'pti?
 - Qiziq-da. Odam isnodga qolsa, senga nima?
 - Voy, savil, opa, ukangizning gaplarini eshityapsizmi? Men odam emas emishman...
- Men unaqa demadim,
 Sarvar shunday deb choy xoʻpladi,
 choyni yangila, sovubdi.

Nazmi opa-ukaga bir-bir qarab chimirildi-da, jahl bilan oʻrnidan turib, tashqariga chiqdi.

- Ba'zan juda oshirib yuborasan-da. Choy issiq edi-ku? dedi Matluba ukasiga norozi qiyofada boqib.
 - Shunaqa demasam, vaysab o'tiraveradi. Ha, nima bo'ldi, tinchlikmi?
 - Vazirlikka hisobot olib tushuvdim...
 - Boʻladigan gapni gapirsang-chi.

Matluba ukasidan sir saqlamas edi. Ammo boʻlib oʻtgan gaplarni hozir aytgisi kelmadi. Erining oʻynashi oldida, oʻzi «shaltoq, isqirt», deb hisoblagan bir ayol qarshisida past ketgani, aniqroq aytilsa, magʻlub boʻlganini tan olgisi kelmadi. Shu sababli «boʻladigan gaping nimasi», deb ukasidan nigohini olib qochdi. Ziyrak Sarvarga shuning oʻzi kifoya qildi.

— Boʻldi, toʻk dardingni, yana yorilib ketmagin, — dedi u opasiga tikilib.

Matluba bu qarashga bardosh bera olmadi. Bir soat avvalgi voqea, magʻlubiyatdan toshgan dardu alam daryosi koʻzlaridan yosh boʻlib quyila boshladi.

— Yorilasan, dedim-ku! Ayt, nima bo'ldi?

Matluba ro'molchasi bilan burnini chimdib qo'yib, «hech narsa» dedi-da, sumkachasidan erining xatini olib, uzatdi.

Sarvar xatni oʻqib, bir oz oʻylandi. Soʻng «xato oʻqimadimmi» deganday satrlarga yana koʻz yugurtirdi.

- Ha... tushibdilar, akaginam... dedi oʻziga oʻzi gapirganday.
- Nimaga tushadi?
- O'g'rilarning qo'liga tushibdi ering.
- Qanaga o'g'rilar? Matluba bu yangilikdan ajablanib, yig'ini ham unutdi.
- Qanaqa boʻlardi, oddiy sovet oʻgʻrilari, deb piching qildi Sarvar. Soʻng jiddiylashdi: Ularga soliq toʻlanmasa ersiz qolasan.
 - Sen buni gaerdan bilasan?
 - Bilaman-da.
 - Yo'q, ayt, qaerdan bilasan?
- Men bilan birga oʻqigan Habib esingdami? «Zolotoy» derdik. Oʻninchida oʻqiyotganida qamalib ketuvdi. Esingda yoʻqmi? Xoʻp, unda esing Tursunali akang bilan band edi. Xullas shu bola ikki marta oʻtirib chiqqan. Salkam «vor v zakone».
 - Bu nima degani?
 - O'g'rilarning zo'ri, degani. O'sha gapirib beradi menga bunaqa gaplarni.
 - Uchrashib turasanmi? O'g'ri bilan-a?
 - O'g'ri bo'lsa, ko'chada o'g'ri. Uyda mening oshnam.
 - Bu xatni unga koʻrsataylik.
 - Foydasi yoʻq.
 - Nega?
- Tanish-bilishlik, iltimos degan narsa bizlarda boʻladi. Oʻgʻrilarda bunaqasi yoʻq. Eringni shunga hukm qilishibdimi tamom. Davlatning xazinasiga oʻxshab, ularning

ham xazinasi bo'ladi. Tomib turmasa, quriydi bu xazina. Ular esa xazinalarining qurishiga sira yo'l qo'yishmaydi.

- Xazinasiga o't ketsin!
- Qarg'ama. Ularning ishi to'g'ri. Ular duch kelgan odamni tushirishmaydi. Pochchaginamga o'xshagan g'irromlarni o'marishadi. O'zing o'ylab ko'r, ishchidan yo dehqondan nimani o'marishadi?
 - Pochchangdan hech nima golmadi. U uyga tashimas edi.
 - Bu bilan ularning ishlari yoʻq.
- Men qayoqdan topaman shuncha pulni?! Matlubaning titroq ovozi bir necha parda koʻtarildi. Oshxonada ivirsib yurgan, qoʻli ishda, qulogʻi esa mehmonxonada boʻlgan Nazmi ham bu ovozni eshitdi.
 - Er kerak boʻlsa, topasan, dedi Sarvar xotirjam tarzda.
 - Bermasam o'ldirishadimi?
 - Bilmayman. Agar shunaga shart qoʻyilgan boʻl- sa oʻldirishadi.
 - Bolalarimga-chi? Tegishmaydimi?
 - Bilmayman... Agar bolalarni garovga qoʻygan boʻlsa...
- Nega garovga qo'yarkan? Bolalarda nima haqqi bor uning?! Voy Xudoyim, qayoqdanam shu hayvonga tegdim!
 - Boʻldi, gʻingshima. Endi hayit oʻtgan, xinani xohlagan joyingga qoʻyasan.
- «Xotinlar telegrafi» uchun qiziq ma'lumot bera oluvchi gapga shoshgan Nazmi kirib kelib, ikkovlari ham jim qolishdi.
- Bolalarning o'qishiga qattiq turganing yaxshi,— dedi Sarvar gapni burib. Matluba avvaliga ukasining muddaosini tushunmay ajablandi. So'ng keliniga bir qarab olib:
 - Hozir o'yinqaroq payti. Otasi bo'lganidayam ha-yiqib turarmidi... deb qo'ydi.
- Onasi, ertalab vaqtli ketaman. Kiyimlarimga dazmol urib qo'y, dedi Sarvar, xotini uzatgan choyni olib.

Nazmi «kiyimlaringiz tap-tayyor» deyishga ogʻiz juftladi-yu, oʻzining bu suhbatga ortiqchaligini anglab, oʻrnidan tura qoldi.

- Menam vaqtli ketaman, dedi Matluba, Ertaga kelaman. Pul oladigan yigit adamlarnikini tayin qilgan.
 - Men ham adamlarnikida boʻlaman. Oʻsha yigitni bir koʻrib qoʻyay.
 - Ko'rmaganing yaxshimikin. «Birov bilmasin» degan.
- Aytaveradi. Bu birov bilmaydigan ish ekanmi? Sen koʻp siqilaverma. Yolgʻiz boʻlganingda boshqa gap edi. Ahmoq boʻlsa ham, hayvon boʻlsa ham oʻsha peshonangga bitgan ering. Oʻn besh yil bergan boʻlsa, oʻn besh yil oʻtirmaydi. Oʻn besh yilgacha yo podsho oʻladi, yo eshak.

Sarvar shunday deb o'rnidan turdi.

- Rostdan ham vatli ketishim kerak. Sen ham damingni ol.

Matluba bu xonadonga har kelganida kelini hurmat yuzasidan mehmonxonada yotmoqchi boʻladi. Har safar ham Matluba uni yotoqxonasiga chiqarib yuboradi. Odat bu gal ham kanda boʻlmadi. Mehmonxonada yolgʻiz qolgach, Matluba oʻringa yonboshladi. Bir necha nafasdan soʻng yuragi bezovtalanib, qaddini koʻtardi. Xayollari choʻl shamoliday bevosh boʻlib ketdi. Tursunali akasini ilk bor koʻrgan kunini ham esladi. Eslay turib, oʻsha kunni la'natladi. Asalday totli tuyulgan damlar zaharga toʻla turmushning aldamchi debochasi ekanini kech angladi. Yumuq koʻzlar ochilgan damda zaharga toʻla hayot qoʻyniga kirib boʻlgan, endi ortga yoʻl yoʻq edi. Hozir ham turmushning zaharli nishi yuragiga sanchilib, bezovta qila boshladi. Yuragi qattiqroq sanchganda beixtiyor «oyijon!» deb yubordi.

Ona — farzandiga yopirilajak dardu alamlar seli yoʻlidagi bir toʻgʻondir. Ona yaratgan Olloh huzuriga qaytgach, bu toʻgʻon oʻz-oʻzidan yemiriladi. Matluba buni ham kech angladi. Faqat Matluba emas, koʻpgina farzandlar shundaydirlar. Oxir-oqibat «Voy, onajonim!» deydilar, nolayu faryod dengiziga gʻarq boʻladilar. Soʻng esa, toʻgʻon boʻlishni Onaning ruhidan umid qiladilar. Johil bandalar... ofatlardan Onaning ruhi emas, Yaratganning oʻzigina saqlashiga aqllari yetmaydi... Yana Xudo biladi, onalarning ruhiga biron-bir qudrat kasb etilsa, borini hayotda qolgan farzandlari hi-moyasiga baxsh etarmi edilar... Bu shunchaki ojiz bir faraz. Aslida esa, Onalarning ruhlari farzandlar duosiga muhtojdirlar...

Matluba o'rnidan turib deraza oldiga keldi. Uyda dimiqib ketganday bo'lib hovliga chiqdi-da, taxta so'riga o'tirib, tirsagi bilan panjaraga suyandi.

«Oyijon, «baxtli boʻl», deb duo qilardingiz. Duolaringiz nima uchun qabul boʻlmadi? Oʻzim aybdormanmi? Endi nima boʻladi? Dunyodan baxt nima ekanini bilmay oʻtamanmi? Mening boʻlarim boʻldi. Bolalarim baxtli boʻlishsin, duo qiling, oyijon. Oyijon, duo qiling, menga koʻp umr kerak emas. Zilolani kuyovga uzatganimdan soʻng bir yilgina yashasam yetadi. Zilolaning bolasini koʻrsam, beshik qilsam boʻldi, keyin yoningizga chaqiring. Kuyovingiz bugun-erta qamoqdan chiqib kelsa ham men bolalarimni unga ishonib tashlab keta olmayman. U chiqib kelgani bilan baribir yana oʻsha shiltasi bilan topishadi…»

Shu fikr xayoliga kelishi bilan oʻsha «qon qusgur Nafisa» koʻz oldida gavdalandiyu badaniga titroq yugurdi. Boshqa narsalarni oʻylashga harakat qilsa ham oʻsha «kafansiz koʻmilgur Nafisa» qarshisida tirjayib turaverdi. Shunda bir necha soat ilgari xayolini yoritib oʻtgan fikr yana qaytaladi: «Bu baloginaga yoʻliqqur oʻlmas ekan, men tinchimni topa olmayman. U oʻlmasa — menga hayot yoʻq...» Bu fikr qat'iylasha boshlaganda ayvonda sharpa sezildi.

— Nima qilib o'tiribsan?

Matluba ukasining ovozini eshitib, oʻgirildi.

- Uyqung, kelmayaptimi? Negadir men ham uxlay olmayapman. Koʻzlarimni yumsam, adam chaqirayotganga oʻxshaydilar.
 - Sog'ingandirlar. Qachon borib ko'ruvding?
 - To'rt kun bo'ldimikan?
 - Yoʻling-ku, kunda bir koʻrib oʻtsang boʻlmaydimi?
- Boʻladi-ku, Ofatni kunda bir koʻrish menga ham ogʻir-da. Kirishimdan sasishni boshlaydi, yarim soatga zoʻrgʻa chidayman. Shuni qoʻydirib, akamga boshqa xotin olib berishimiz kerak.
 - Qo'ysang-chi.
 - Sen nimaga uxlamayapsan? Siqilma, dedim-ku.
 - Anavi o'g'ri o'rtog'ingni qachon ko'rasan?
 - Xohlasam hozir, xohlasam ertaga. Nima edi?
 - So'rab ko'rgin. Bitta odam o'ldirish qancha turarkin?
- Nima? Sarvar hayratlanib opasining koʻziga qaramoqchi boʻldi. Oʻn kunlik oy yorugʻida koʻzlardagi ma'noni uqib boʻlmadi. — Nima deding? Kimni oʻldirtirmoqchisan? Pul soʻrab kelgan bolanimi? Kallangdan chiqarib tashla bu xayolni! U oʻlsa, boshqasi keladi.
 - Uni emas... bittasi bor.. so'rab bera qolgin.
- Narx bir xil bo'lmaydi. Odamiga qarab so'rashadi. Lekin Habib bunaqa ishga bormaydi. U o'q'ri, killer emas.
 - Killering nima?
 - Pulga odam o'ldirib beradiganlarni «killer» deyishadi.

- Eng arzoni qancha, bilib ber.
- Sen... esingni yigʻ. Agar killer qoʻlga tushsa, buyurtmachi ham ketadi. Aqlingni yigʻu bunaqa ishlardan nari yur. Agar yaxshilab qargʻasang, oʻladigan odam shu qargʻishing bilan ham joʻnavoradi. Boʻldi, kirib yot. Ahmoq boʻlib qolibsan.

Sarvar keyingi gapni zarda bilan aytib, opasini tirsagidan ushlab uyga boshladi.

Matluba yotgani bilan uxlay olmadi. Tongga yaqin koʻzi ilingan ekan, darvoza qoʻngʻirogʻi ketma-ket jiringlab uygʻotib yubordi. Sarvar maykachan holda shoshilib hovliga chiqdi. Darvozani ochishga ulgurmay, koʻcha tomondan jiyanining ovozi eshitildi.

- Amaki, tez borar ekansiz, adam aytdilar. Men telegrafga borib, ammamga telefon qilaman.
- Ammang shu yerda, dedi Sarvar darvoza eshigini ochib. Toʻn kiyib, qiyiq bogʻlab olgan jiyanini koʻrdiyu otasidan ayrilganini angladi.

Ukasiga ergashib chiqqan Matluba ostona hatlay turib, «Adammi?» dedi-yu, javob kutmay yigʻlab yubordi.

— Kechqurun chaqirishlari bekorga emas ekan, gʻaflatda qolibman-ku, — Sarvar ichichidan kelgan bir oʻkiriq bilan boshiga mushtlab ingrandi.

Opa-uka ota uyiga kelganlarida akalari koʻchaga qoʻyilgan stullardan birida yolgʻiz oʻzi shumshayib oʻtirgan edi. Matluba akasini bu ahvolda koʻrib, yanada xoʻrligi kuchaydiyu «Voy otam»lab aytib yigʻlashni boshladi.

Marhum uy oʻrtasiga solingan yangi koʻrpa-toʻshakda yotardi. Jagʻi tangʻib bogʻlangan boʻlsa-da, ogʻzi xiyol ochiq edi. Koʻzlari ham butkul yumulmagandi. Xuddi berkinmachoq oʻynayotgan bolaning koʻzlariday yarim ochiq edi. Goʻyo u jon bermaganu, hazillashib oʻzini oʻlganday qilib yotib olgan edi. Yarim ochiq lablari hozir bir jilmayib soʻng soʻzlay boshlaydiganday edi.

- Ada! Adajon!!

Tabiiyki, javob bo'lmadi. lablar jilmaymadi. So'zlar aytilmadi. Go'yo murda gapirib yubormasin, degan ehtiyotni qilib jag' tang'ib bog'langanday...

Matluba kirib kelgan yangasini quchoqlab olib yigʻladi. Bilmagan odam quchoqlashib boʻzlayotgan bu ayollarni bir-biriga mehribon opa-singil deb oʻylashi ham mumkin edi. Ular bir-birini tinglamagan holda aytib yigʻlashardi: «Mehribonim otam...» Yarim ochiq koʻzlar esa, goʻyo ularni kuzatardi, lablar esa, goʻyo pichirlar edi: «aytayotganlaring rostmi? Chin dildan achinyapsanlarmi?..»

Afsus shuki, murdalar gapirmaydilar. Ularga bir necha daqiqalik soʻzlash imkoni berilsami edi... Bu olamda nimalar yuz bermas edi-ya... Yana kim biladi, balki birovlar bu imkoniyatdan foydalanib kalimai tavhidni toʻxtatmay aytarlar, birovlar «shuncha yil talashib-tortishib erishganimiz oqibat shu boʻldi, koʻrib qoʻying, ibrat oling», derlar, birovlar esa, «falonchi mendan besh soʻm qarz olib edi, gʻaflatda qolmanglar, borib olinglar», deb oqohlantirar?

Kimdir Yaratganning huzuriga borayotganiga shukr qilib ko'z yumar, kimdir lahadda yolg'iz yotishini o'ylab qo'rquv bilan jon berar, kimdir to'plagan boyligi qolib ketayotganidan achinib o'lar...

Bu dunyoni qanday tark etishidan qat'i nazar, barchalariga aza ochiladi. Bu dunyoda bir-birlari bilan tenglik qilmagan odamlar lahaddagi guvalaga bosh qo'yishlari hamonoq tenglashadilar. Ammo bu tenglik ham uzoqqa bormas. Savol-javobdan so'ng, amalga qarab ajralish yuz berar — birov to qiyomatga qadar qabr azobiga giriftor bo'lar, birov esa bu azoblardan ozod etilar. Qiyomatda esa, uzil-kesil ajralish yuz berar...

Lablari ham, koʻzlari ham yarim ochiq marhum erishajak ajr ne boʻlar, yolgʻiz Tangri biladi. Matluba esa, astoydil aytib yigʻlaydi: «joyingiz jannatdan boʻlsin, adajon!..»

Marhum dafn etib kelingach, yigʻini uygʻotayotgan ehtiroslar ham soʻndi. Tashqarida odatdagi «Bandalik ekan» — «Ollohning irodasi» — «Sabr bersin», degan ta'ziya bildirishlar, ichkarida esa birdan boshlanib, birdan soʻnuvchi yigʻi tovushlari eshitilib turdi. Matlubaning yangasi koʻngil aynitar gaplarini ana shundan keyin boshladi.

Odatda qizlar ota uyida qirq kungacha o'tirishardi. Matlubaning qirq daqiqa o'tirishga ham toqati qolmadi. «Ta'ziyaga keluvchi xotinlarning keti uzilmasayu yangamning vaysashi uchun fursat bo'lmasa», deb orzu qildi.

Ertasiga yangasining navbatdagi diy-diyosi boshlanganda Sarvar ichkariga moʻralab, Matlubani imlab chaqirdi.

- Xursanali degan yigit so'rayapti. Sovxozingdan kelibdi.
- Bu oʻsha, dedi Matluba. Endi nima qilamiz? Shunday kunda ham kelib, bez boʻlib turibdimi?
- Nima qilarding, toʻlaysan. Bularda toʻy-aza degan gap yoʻq.— Sarvar shunday deb choʻntagidan qogʻozga oʻralgan pul olib, opasiga uzatdi.— Ma, olib chiqib ber.
 - Pulmi? Tayyorlab qo'yuvdingmi?
- Zolotoyga aytuvdim. Yordam bera olmasligidan afsuslanib, bu yilgi soliqni koʻtaradigan boʻldi.
 - O'zi berib qo'ya qolmaydimi?
- Bunaqa hotamtoyligini bilib qolishsa tinch qoʻyishmaydi. Lekin odamlari bilan gaplashibdi. Bolalaringga tegishmaydi. Xotirjam boʻl. Seni ham himoya qilishadi.

Sarvar keyingi gaplarni opasini dardini yengillatish uchun oʻzidan qoʻshdi.

Matluba pulni olib, koʻcha eshik tomon yurdi. Yigit uni koʻrib, oʻzini chetga oldi. Birinchi soliq toʻlash marosimi gap-soʻzsiz boʻldi. Matluba pulni uzatdi, yigit olib choʻntagiga soldi-yu «xayr, rahmat» deganday tirjayib qoʻygach, burilib joʻnadi.

Matluba iziga qaytayotganida akasi «Ha, tinchlikmi?» deb soʻradi.

— Tinchlik, — dedi Matluba, — sovxozning kassiri. Qogʻozlari menda edi.

Akasi xavotirlanib emas, shunchaki soʻragan edi, bu javob bilan qoniqdi.

DARBADAR

Birinchi qor yomg'irga aralashib yoqqani uchun tez erib ketdi. Qor bahonasi bilan yopirilib kelgan sovuq tunda kuchga kirib, faoliyatini yer sathini muzlatishdan boshladi. Bunaqa sovuqni endi ko'rayotgan Tursunali diydirab, «shu sovuqlarda muzlab, o'lib ketsam kerak», deb xo'rligi keldi. Bir qo'lida cho'kich, ikkinchisida belkurak ushlab, saf bilan yo'lga hozir bo'lib turganida ro'parasida Tengiz paydo bo'ldi.

— Ha, zemlyak, ishlar qalay? Muncha shumshayasan? Nima, sovqotdingmi? Agar shuni sovuq desang, bir-ikki haftadan soʻng onangni koʻrar ekansan-da. Ha, xotiningga xat yozib, rahmat deb qoʻy. Aqlli ekan. Buyrugʻingni bajaribdi.

Tengiz shunday dedi-yu, burilib nari ketdi. Tursunali «meni bu azoblardan qutqaring», deb iltimos qilmoqchi edi, ulgurmadi, gapi ogʻzida qoldi. Safga qarata «Yurilsin!» degan buyruq berildi.

Uch kundan beri ular daraxt kesishmaydi. Kesilgan yogʻochlar yigʻilib qolganmish. Oʻn chaqirimcha piyoda yurib, soʻng oʻrmon ichida handaq qazishadi. Bu ovloqda handaqning nima keragi borligini hech kim bilmaydi. Aslida bu handaqlarning birovga zarurati yoʻq. Daraxt kesish vaqtincha toʻxtatilgani sababli mahbuslar bekor yotishmasin, degan maqsadda handaq qazdirishadi. Bir guruh kelib qaziydi. Ikkinchisi kelib koʻmadi.

Avvalgi kun Nuriddin ham Tursunali bilan birga edi. Kecha uni Tengiz yoniga chaqirib olibdi. Nuriddinsiz uning bo'lari bo'ldi. Belgilangan vazifasini bajara olmay kaltak ham yedi. Kechqurun Nuriddinga arzi hol qilib «Tengizga ayt, menga yengilroq ish olib

bersin», degan edi. Bugun Tengiz yaqinlashayotganini koʻrib, bir ichi yorishdi-yu, keyin yana zulmat qoʻynida qoldi.

Nuriddin uning iltimosini Tengizga aytgan edi.

- Hamzat, dedi Tengiz unga javoban, sen hech qachon odamlarga, ayniqsa, bunaqalarga achinma. Bu odam kim boʻlgan, bilasan-a? Sovxoz direktori! Bu yerda sen bilan menga yalinib yuribdi. Amal otida kerilib, davr surayotgan damlarida bizni odam oʻrnida koʻrarmidi? Bu xunasa boshqalarni eshshakday ishlatib, oʻzi maishatini surib yurgan. Ana endi mehnat nima, azob nima bilib qoʻysin.
 - U chidolmaydi, oʻlib qoladi, dedi Nuriddin.
- Qo'yaver, o'lsa ham mehnat bilan o'lsin. Sen daraxt kesish boshlanguniga qadar mening yonimda yura turasan. Ammo bir narsani unutma: men bilan bo'lganingda ko'zing ko'r, qulog'ing kar bo'ladi. Ko'rganingni ko'rdim demaysan, eshitganingni eshitdim demaysan.

Nuriddin bu buyruqqa itoat etdi. Bu itoati bilan oʻgʻrilar olamiga dastlabki qadam qoʻyganini oʻzi ham sezmay qoldi. Shu paytgacha oʻgʻrilar sirtmogʻiga boʻyin bermay kelayotgan edi. Tengiz koʻzga koʻrinmas sirtmogʻini ustalik bilan tashladi. Oʻsha kuni «politbyuro» toʻplandi. Hal qilinadigan aniq masala yoʻq edi. Shu bois «chefir» choy ichib, qarta oʻynab gaplashib oʻtirishdi. Qoʻtos ham, Koshak ham, boshqalar ham xizmatdagi Nuriddinga qarab-qarab qoʻyishardi. Koshak nech-ta uyni bosganiyu qancha odamni asfalasofilinga joʻnatganini aytayotganida Tengiz uning gapini boʻldi:

— Koshak, biz bu gaplarni bilamiz. Agar Hamzatni qoyil qoldirmoqchi boʻlsang, yanglishasan. Hamzat Afgʻonda oʻldirgan odamlarni sen sanogʻiga yeta olmaysan.

Koshak «shunaqami?» deganday Nuriddinga zimdan qarab qoʻydi. Tengiz aytmasa ham Nuriddinning kimligi, ochiqlikda nima qilgani bu yerdagilarning hammasiga ayon edi. Bu choyxoʻrlik, bu xizmat boʻlajak oʻgʻri bilan «yaqinroq tanishish» maqsadida uyushtirilgandi.

«Politbyuro» a'zolariga Nuriddin ma'qul keldi. Unga qarshi e'tiroz bildirilmadi. Tarqalish paytida Koshak:

- Uning tarbiyasini Qo'tosga ber, deb talab qildi.
- Hozir emas, dedi Tengiz, Bu bola egar urilmagan asov ot. Hurkib ketadi. Uni o'zim egarlab, jilovlab beraman. Ana undan keyin Qo'tosning qo'liga tutgizaman.

Nuriddin Bifshteksni oʻldirgach, qamoq lagerida oʻziga nisbatan munosabat oʻzgarganini sezdi. «Polit-byuro» majlisidan soʻng esa, lager boshliqlari ham unga yumshoqroq muomala qila boshladilar. Ana shunda Nuriddin «bularga bogʻlanib toʻgʻri qildimmi?» deb oʻylandi. Bulardan uzoqlashishning turli yoʻllarini izladi. U fahmi yetgan, bilgan barcha yoʻllarning boshi berk edi. «Faqat oʻlimgina bulardan qutqarishi mumkin», degan toʻxtamga keldi.

Garchi qamoq lagerida erkinroq yurishga sharoit yaratilgan boʻlsa-da, u ruhini qafasdan boʻshata olmas edi. U Bifshteksdan zoʻrroqlari bilan ham olishmogʻi mumkin, ammo oʻzini oʻzi yenga olmas edi. «Ismingiz nima, otaxon?» deb soʻraganida kulimsirab turib «Darbadar» degan oʻsha qariyani qutqarib yuborolmagani uchun oʻzini oʻzi to oʻlgunicha la'natlasa kerak.

Tayyorgarlik mashqlari davrida askarlar orasida «Afgʻonga tashlashar ekan», degan mish-mish yurardi. Birovlar qoʻrqib, najot istab uylariga xatlar yozsalar, boshqalar «baynalminal burch»ni bajarish, qahramonlik koʻrsatish ilinjida janggohga oshiqardi. Ba'zi yigitlar esa, «Afgʻondan qaytganlar istitutlarga imtihonsiz qabul qilinar ekan», deb umid qilishardi. Institutlarga kirish uchun Afgʻondan tirik holda qaytish lozimligini esa

o'ylashmas edi. Har kuni o'nlab qora temir tobutlar selining oqib kelayotganini ular bilmasdilar.

Nuriddin esa, «Nima bo'lsa, peshonamdan ko'rdim», deb o'zini taqdir yozug'i ixtiyoriga bergan edi. U jang-gohda yetti uxlab tushida ko'rmagan fojialarga duch keldi. Dastlab «bu vahshiyliklarni ko'raverib jinni bo'lib qolsam kerak», deb o'yladi. Yo'q, aksincha, diydasi gotib bordi. U afg'onlarning aaldan urushayotganini tushunmas edi. Uning uchun bir narsa aniq — qarshisidagi dushman! Sen otmasang, u seni o'ldiradi. Chunki u uchun sen dushmansan! Bu dunyo-da yashab golmog uchun ham garshingdagini o'ldirishing shart. «Baynalminal burch», «Afg'oniston ozodligi», degan tushunchalar minginchi darajadagi masala edi. Ajal o'qlari yog'ilib, fagat o'z joning ko'zga ko'rinib turgan onda fagat agldan ozgan odamgina bunday burch haqida o'ylashi mumkin. «Qarshimdagi dushman emas, musulmon birodarlarim. O'z uyini, molu jonini himoya qilgan odam nima uchun dushman bo'lar ekan?» degan tushuncha ham Nuriddinga yot edi. Qadimda Xuroson deb atalmish bu yurtni bobolar bir tomondan ingliz, shimoldan esa o'rus hamlasidan himoya gilib jon berganlarini ham bilmas edi. O'rusga qarshi jihodda jon berganlarning avlodlari endi o'rusga sherik bo'lib jon olsa... Bobolar o'rusga Xurosonni bermagan edilar. O'rus Termiz bilan Ko'shkdan nari o'ta olmagandi. Nuriddin bularni ham bilmas edi. Bilganda-chi? Bilganda nima gila olar edi? «Bobolarim yurtiga qarab o'q otmayman» desa, «Mayli uka, siz uyingizga qayta goling, bu yog'ini o'zimiz eplashtiramiz», devisharmidi? Be, insof gilishsa «xizmatdan bo'yin tovlash» deb qamashardi. Rahm qilishmasa shartta otib tashlashardi — vassalom!

Nuriddin o'zini Darbadar deb atagan qariya bilan uchragunicha aqlsiz go'dak kabi edi. Darbadar otilganidan beri oradan to'rt yildan oshiqroq vaqt o'tdi. Qariyani otish uchun besh kishi chiqishdi. «Otilsin!» deb buyruq berildi. U ham beixtiyor tepkini bosdi. Mo'ljalga olmadi. Balki o'qi xato ketgandir, qariyaga tegmagandir?

Oʻq otilmay turib qariya unga qarab jilmayib qoʻydi. Nega jilmaydi ekan? «Men Vatanning bir boʻlagiman, sen Vatanga qarab oʻq uzmaysan, a?» demoqchi boʻldimi? Yo «Ana, aytmovmidim, qul boʻlganing uchun ham bularga qoʻshilib chiqding», demoqchimidi? Nuriddin bu jilmayishning ma'nosini uqishga koʻp harakat qildi. Biroq, tayin bir xulosaga kela olmadi. Badani oʻqlardan ilma-teshik boʻlgan Darbadar koʻkragini changallab, yana Nuriddinga tikildi. Bu safar jilmaymadi. Yoʻq, yoʻq, koʻzlari bir nuqtada qotdi: oʻtkir nigohiga savol alomati muhrlandi. Nuriddin bu qarashning ma'nosini ham uqmadi.

O'sha fojeadan keyingi tunlar Nuriddin uchun behalovat, azobli tunlarga aylandi. Darbadar o'sha savol alomati muhrlangan nigohi bilan har tun uni ta'qib etadigan bo'ldi.

Asirlar saqlanadigan hibsxonada Darbadardan boʻlak hech kim yoʻq edi. Nuriddin hibsxonani qoʻriqlash uchun navbatni qabul qilganida bundan keyingi hayoti algʻovdalgʻov boʻlib ketishini oʻylamagan ham edi. Avvaliga «gapirish mumkin emas», deb ogohlantirdi. Darbadar «Sen gapirma, eshit», deb soʻzlayverdi. Xuddi tarix oʻqituvchisi dars oʻtayotgandek edi. «Oʻsha suhbatdan soʻng yigitning ongi oʻzgardi, vatanparvarga aylandi», desak lofga oʻrin bergan boʻlamiz.

Vatanni bir martagina boʻlsa ham koʻrishga zor koʻzlar jon taslim qilinganidan soʻng ham yumulma-gan edi. Ana shu koʻzlar tunlari Nuriddinni uygʻotardi...

«Qoʻlingni uzat, boʻtam, qoʻrqma, kaftingni bir hidlay, undan Vatan hidi kelsa ajab emas. Imkonim boʻlsa edi, seni bir quchar edim. Axir sen Vatanimning bir zarrasisan. Men ham bir boʻlagiman. Taqdir oʻyinini qaragina — Vatan ikkiga ayrilmish — biri qafasda, biri esa, qullikda».

«Men qul emasman».

«Qulsan, bo'tam, qulsan. Ko'zlari yumuq qulsan. Aqli muhrlangan qulsan. Ko'zlaring ochiq bo'lsa edi, ozodlik sari yurgan bo'lar eding. Aqling qulflari buzilsa edi, kishanlarni urib sindirar eding».

«Kishan? Yoʻq, bizda kishan...

«O, koʻngil, sen bunchalar nega

Kishanlar bilan do'stlashding,

Na faryoding na doding bor...»

Bo'tam, sen bu satrlarni bilarmisan? Cho'lponni eshitganing bormi?»

«Cho'lpon? Kim u?»

«O, millat, baxti qaro millat! Seni zulmatdan yorug`likka olib chiquvchi avlod shularmi edi?»

«Gaplaringizni tushunmayapman?»

«Vatan nadir? Millat nadir? Erk nadir? Anglarmisan oʻzing? «Kulgan boshqalardir, yigʻlagan menman... Hayvon qatorida sanalgan menman...» O, millat holing na boʻlar endi»

«Ota, biron yeringiz og'rimayaptimi? Kasal emasmisiz?»

«Men sog'man, bo'tam, millatim xastadir. Men bugunmi, ertami o'limimni toparman. Oqibat bu yorug' dunyoga sig'may qolarman. Vatan sog'inchi bilan tepayotgan yuragimga bittagina o'q kifoya. Vatanni bir martagina ko'rmoq umidimni o'zim bilan tufroqqa olib keturman».

«Vatan, Vatan, deysiz? Vatanda turibsiz-ku?»

«Bir jihatdan gaping toʻgʻri, boʻtam. Bu Xuroson — bobolarimiz Vatani. Bizningda Vatandir bu. Ammo mening kindik qonim toʻkilgan Vatan — Andijondir».

«Ie, men ham o'sha yerlikman».

«Qora qoshlaringga qarab koʻnglim sezib edi. Sen kirishing bilan Vatan isi dimogʻimga ufurdi. Shu bois soʻzlayverdim».

«Ismingiz nima, otaxon?»

«Ismim — Darbadar».

«Ie, shunaga ism ham bo'ladimi?»

«Toʻgʻri, bunaqa ism yoʻq. Lekin shunaqa odamlar bor. Mingtepa degan joyni bilasanmi? Jannatmakon otamning kindik qonlari oʻsha qishloqqa tomgan. Otam bir yoshga toʻlmay turib bobomning yurak qoni shu qishloqda oqqan. Oʻruslar Mingtepa ariqlarida inson qonlarini oqizib, soʻng atrof qishloqdagilarni adirga haydaganlarini nahot eshitmagan boʻlsang? Oʻzbeklarni darbadar qilib, ularning oʻrniga oʻruslarni koʻchirib olib kelib «marhamat, yashanglar!» deganlarini ham eshitmaganmisan? Axir oʻsha fojiadan «Marhamat» degan nom xotira boʻlib qolgan-ku? Yo Rab, bu ne koʻrgulik? Dukchi eshonni bilarsan balki?»

«Maktabda oʻqiganmiz. Odamlarni aldab boyigan kishi ekan».

«Astag'firulloh! Eshon hazratlarining niyatlari ko'krak suti kabi pokiza edi. Vatanni ozod etmoqni niyat qilib edilar. Jannatmakon bobom hazrat eshonning muridlari bo'lgan ekanlar. Ularning isyonini eshitganmisan?»

«O'qiganmiz. Uch-to'rt soatda bostirilgan ekan».

«Nima uchun shu qadar tez bostirilgan? O'ylab ko'rganmisan?»

«Biz oʻqituvchi oʻtgan darsga ishonamiz. Oʻylamaymiz».

«Yo millat, holingga voy! Sen bir o'yla, bo'tam, Eshon hazratni fitna, ig'vo tuzog'iga tushirganlar. O'ruslar eshon hazratdan qo'rqqanlar. Hazratning atrofiga odamlar tobora ko'p to'planaverganlar. Yana bir yil qo'yib berilsa, Eshon hazrat g'oyat katta kuchga ega bo'lur edilar. Agar jihod bir yil keyin boshlanganida bu yurtlarda o'rusning urug'i qurur edi. Bilib qo'y: millatni xor qilgan o'ruslar emas, o'zimizdan chiqqan xoinlar, ig'vogarlar.

Hazratimni ham shular badnom qildilar. Bularsiz oʻrus hech nimaga erisha olmas edi. Igʻvogarlar turk sultonidan deb yolgʻon maktub toʻqidilar. Hazrat eshon bunga inonib bemavrid jihodga qoʻzgʻoldilar. Oʻzing oʻyla-chi, qurol-yarogʻsiz ham jihodga chiqadimi kishi? Bobomning yoʻllarini otam davom ettirdilar. Madaminbekka qoʻshilib ikki yil jang qildilar. Bunda ham oʻruslarga igʻvo ish berdi. Amiral-musliminning muborak boshlarini oʻz birodarlari uzishdi... Shundan soʻng yurtdan quvildik. Qashqarda makon topdik. Oʻrusning bolshevigi Qashqarga yetib keldi. Biz esa, bu yerlarga panoh izlab keldik. Endi oʻrus bu yerlarda urush qoʻzgʻadi. Koʻpchiligimiz tinchlik istagida Turkiyaga yoxud Saudiyga joʻnashdi. Men qoldim. Jihod istab qoldim. Oʻrusdan qachongacha qochamiz? Yo hayot, yo mamot! Seni duo qilaman boʻtam, yurtga omon-eson qaytib bor. Qaytib borginu jaholatda yumuq boʻlmish koʻzlaringni och! Doʻstlaringni ham uy-gʻot! Vatanda bevatan yashama. Vatan bogʻini quritma. Inson oʻz qoni ila sugʻorib boʻlsa-da, Vatan deb atalmish muazzam bogʻning qurimogʻiga yoʻl qoʻymasligi lozim, unutma! Millat xasta, oʻqʻlonlar esa tabibdurlar!»

Shu so'zlarni ayta turib xuddi nafasi siqilganday chuqur tin olgan edi. So'ng ovozini pastlatgani holda bir bayt o'qib edi:

«Marizing bir tarafdin, bir tarafdin xorsan — millat, Badandan doimo qon oldurar bemorsan — millat...»¹⁰

Bolalikda she'r yodlashga uquvi durust bo'lgan Nuriddin bir eshitishdayoq bu baytni eslab qolgan, so'ng mag'zini chaqmoq uchun tez-tez takrorlashni odat qilgan edi.

Darbadarning tunlari uygʻotib behalavot qilgʻuvchi, savol alomati muhrlangan koʻzlari bilan shularni gaplashadi. Hibsxonadagi qisqa suhbat takrorlanaveradi.

Darbadar duo qildi. Lekin yurtga qaytish baxti Nuriddinga nasib etmadi. Bir qishloqqa hujum qilishganida chiday olmadi. Xonadondagi himoyasiz ayollar, bolalarni otayotgan sherigining boshiga qoʻndoq bilan urdi. Soʻng avtomatning barcha oʻqlarini uning koʻksiga boʻshatdi.

Darbadarning umidi jasadi bilan birgalikda koʻmildi — jaholat, gʻaflat uyqusidan uygʻonish, qullik tamgʻasidan qutulishi zarur boʻlgan yigit Sibiriyaning ovloq yerlarida qandaydir odamlarga choy damlab, xizmat qilib yuribdi. Oʻsha tun uygʻonib, Darbadarning koʻzlariga roʻpara boʻlganida shularni aytib:

- «Siz g'aflatdan uyg'on, dedingiz. Qanday uyg'onishni esa aytmadingiz».
- «Xudo senga aql, zehn bergan. O'yla, yo'lni top».
- «Men bunaqa joylarda nima qilay endi?»
- «Sen bu joylarda ozodlikning qadriga yetasan».
- «Men bular bilan birga bo'lishni istamayman».
- «Bularning millati yoʻq. Sen millatsiz odamlar bilan birga boʻlib, millatni qadrlashni oʻrganasan...»

Nuriddin odati bo'yicha Darbadarning ko'zlariga qarab ko'p savollar berdi. Lekin javob ololmadi. Chunki u Darbadarning ko'zi bilan emas, balki o'zi bilan o'zi gaplashardi. Uning ongi esa ko'p savollarga javob topmoqqa ojiz edi.

«AZIZ MEHMON»

Daraxt kesishga ijozat berilib, keraksiz zovur qazish barham topdi. Yer yuzasi qalin qor bilan qoplangan kezlarda kutilgan «aziz mehmon» — oʻgʻrilar olamida «Murik» degan yangi laqab olgan Slava Galiulin paydo boʻldi. Tengiz qish kunlari ham barakda biqib yotmay, tashqarida yoqilgan gulxan yaqinida oʻtirishni xushlar edi. Ayniqsa, qor

_

¹⁰ Abdulla Avloniydan.

boʻralab yogʻayotgan damda uzoq oʻtirardi. Bunday paytda baland togʻ bagʻriga joylashgan ovuli yodiga tushib, yuragi ezilardi. Yelkalariga boʻrklarini tashlab olgan ovul oqsoqollari gulxan atrofida suhbat qurishardi. Ergashib chiqqan nabiralarni bobolari boʻrkka oʻrab olishardi. Bular orasida Tengiz ham boʻlardi. Ular xuddi xaltadan boshlarini chiqarib javdirayotgan kenguru bolalariga oʻxshab ketishardi. Bobolari ularni sovuqdan asramoqchi boʻlishardi. Ammo bolachalar «kenguru xaltasida» uzoq oʻtira olishmasdi. Tipirchilayverib, bobolarining jonlariga tegaverishgach, «ozodlik»ka chiqishardi. Qorda yugurib-yugurib, dumalab-dumalab oʻynashardi...

Qani o'sha ozod onlar... Qani o'sha mehrli bobolar... Qani ularning yomon shamollardan asraguvchi bo'rklari... Qani ona ovul...

Ana shu hislar bilan o'tirganida kimdir gulxanga yaqinlasha boshladi. Ozod osmonlardan yayrab-o'ynoqlashib tushib, to bahorning issiq nafasiga qadar yastanib yotmoqni niyat qilgan qor og'ir qadam yukiga dosh berolmay zorlanib g'ijirladi. Tengiz «kim ekan bu?» deb o'girilmadi. U «aziz mehmon»ning shu kezlari kelishini kutayotgan edi, ziyrak zehni bu safar ham pand bermadi.

«Aziz mehmon» ikki qadam narida toʻxtab ovoz berdi:

- Salom, Knyaz!

Tengiz salomga darrov alik olmadi. Qoʻlidagi kosov bilan gulxandagi oʻtinlarni titib qoʻygach, orqasiga oʻgirildi-da:

Ha, Cho'mich, keldingmi, o'tir, — dedi.

Tengizning oʻrnidan turmagani, koʻrishmagani, atrofida xira pashsha kabi har on gʻingʻillab gʻashiga teguvchi odamni koʻrganday ensasining qotishi sababsiz emas edi. «Murik»ning xoinligi xususidagi ma'lumot, garchi tekshirib, aniqlanmagan boʻlsa-da, unga iltifot koʻrgazmoqqa mutlaqo yoʻl bermasdi. Tengiz hech narsa bilmaganday uni iliq qarshilashi, gapni aylantirishi mumkin edi. Lekin buni istamadi. Chunki u ayyorlikka nisbatan togʻliklarga xos magʻrurlikni afzal bilardi.

Murik Tengizning sovuq muomalasidan ajablanmadi. Avvalo «knyaz» martabasidagi bu yigitning dovrugʻini eshitgani bilan oʻzini endi koʻrishi. Garchi «qonundagi oʻgʻri» degan maqomga Tengizdan avvalroq yetishgan boʻlsa-da, bu olamda yetarli darajada nom chiqara olmagan edi. Shunday ekan, dovruqli oʻgʻrining bu qadar bepisandligi, tabiiy bir hol boʻlmogʻi aniq. Biroq Murik bu iltifotsizlik boisini yaxshi angladi. Qamoq lagerlarida maxsus topshiriq bilan yurgani oʻgʻrilar olamiga ma'lumligini, oʻziga «Murik» degan laqab taqalganini u bilar edi. Bu ishga rozilik berganidayoq oqibatni — oʻgʻrilar olamida la'natga uchramogʻi aniqligini hisobga olgan edi. Ammo tarozining boshqa pallasidagi oʻlja qarshisida bu la'nat arzirli gap emasdi. Ta'bir joiz boʻlsa, «qimor»ga juda katta boylik tikilgan edi. Murik nafs oldida ojiz qoldi — oʻzini toʻxtata olmay «yo oʻlaman, yo bo-yib ketaman», deb tavakkal qildi. «Ilohiy tuygʻular ruhga hayot berur, hayvoniy orzular hayvoniy hislarga quvvat berur», deganlaridek, yaxshilik koʻchasidan yurmagan bu odamning oʻzgacha qarorga kelmogʻi mumkin ham emasdi.

Murik Tengizning yelkasiga kaftini qo'yib, go'yo salomlashgan bo'ldi-da, qarshisiga o'tib, g'o'lacha ustiga o'tirdi.

Tentiz qoʻlidagi kosov bilan gulxanni yana titib qoʻydi. Taqdirga tan berganicha ohista yonib ado boʻ-layotgan oʻtinlar bu titkilashga dosh berolmay faryod chekkanday hisobsiz uchqunlar sachratdilar: goʻyo oʻlayotgan oʻtinlarning bezovta ruhlari osmonga sapchiganday boʻldi. Bu hol uzoq davom etmay, alanga yana oʻtinlarni yamlab yutaverdi. Uning magʻrur tillari uchqunlarni quvalab yuqoriga intildi. Ammo oʻchgan uchqunlarning izlarini topolmay toʻlgʻondi.

Bir olamning ikki fuqarosi orasida gulxan ana shunday hunar koʻrsatmoqda edi. Tengiz kutilgan mehmonga qattiq tikildi. Murik esa bu niqohni sezmaganday xotirjam oʻtirdi. Tengiz undan koʻzlarini uzmagan holda umrini yashab boʻlgan oʻtin choʻgʻlari ostidan kartoshkani kosovda tortib oldi-da, Murik tomon surdi. Bittasini oʻzi tomon tortdi. Choʻgʻda pishib yetilgan kartoshkalar poʻstlari archilib, yeb ado qilinguncha gap soʻz boʻlmadi. Tashqaridan kuzatgan kishi bularning birdan-bir maqsadi gulxanda isinib, kartoshka yeyishdan iborat deb oʻylashi mumkin edi.

- Choʻmich, dedi nihoyat Tengiz, sen katta ishlar qilib yurgan odam eding. Uyni urishga urib, royalda oʻynaganingga¹¹ hayronman.
- Atay qildim bu ishni, dedi Murik xotirjam tarzda. Oldinroq zoʻr bir ishni doʻndirib qoʻygan edim. «Ish» bosdi-bosdi boʻlgunicha ozgina sayohat qilib kela qolay, dedim. Bir xunasa bilmay turib gap tarqatib yuboribdi. Knyaz, sen aqlli odamsan, har qanaqa gaplarga ishonaverma. Men nomiga isnod keltiradigan qanjiqlardan emasman.
 - Sen isnodga golib bo'lgansan, Cho'mich.
 - Bir xunasaning sassiq ig'vosi bilan isnodga qolaveramanmi?
- Xunasaning ig'vosi... degin. Yaxshi. Unda Gobelyan bilan nima uchun uchrashding? Sening ishing rayon prokuroridan nariga o'tmaydigan edi. SSSR prokuraturasida nima qilib yuribsan?

Murik bu savoldan gangimadi. Biroq, javob qaytarishga ham shoshilmadi. Boshini egib, sovuqda eti junjikkanday bo'lib, kaftlarini gulxanga tutdi.

- Aytsam, ishonmaysan, dedi u shu holatda. Bir shilta ishga aralashtirmoqchi boʻlishdi.
 - Qanaqa shilta ish ekan?
 - Ikki yil oldin bir «tovuqqa» borib yurardim. Oʻshani oʻldirib ketishibdi.
 - Qanaqasiga qutilding?
- Alibi! Oʻsha kuni men Chorjoʻyda edim. Qarindoshlarnikiga toʻyga boruvdim. Nafsim buzuqlik qilib koʻp yevoribman. Ichburuq boʻlib toʻrt kun kasalxonada yotdim.
 - Gobelyan ishondimi shu bahonangga?
 - Nega ishonmasin?
 - Yo Gobelyan ahmoq, yo sen. Yoki... men.
 - Nega... axir...
- Murikjan... Tengiz bu soʻzni armani lahjasida, erkalash ohangida aytdi, Murikjan... Sen aytgan shilta ish bilan MUR shugʻullanyapti. Gobelyanning ishi boshqa. Oʻzbekistonning tit-pitini chiqarib yurgan odam bir shilta ishni deb bir shilta oʻgʻri bilan konyak icharkanmi?
 - Konyak ichganim yoʻq.
- Sen quloqqa lagʻmon osma, Murik. Sening taqdiring hal etilgan. Gobelyanning xonasidan chiqishing-da oʻzingga oʻzing hukm oʻqigansan. Agar yuragingda bir tomchigina halol oʻgʻrining qonidan qolgan boʻlsa ham hukmni oʻzing ijro etishing kerak. Oʻzingni oʻldirsang, yaxshi nom bilan ketasan. Biz oʻldirsak, «qanjiq» degan nom kafaning boʻladi. Boshqa yoʻling yoʻq, Murikjan.
 - Knyaz, ikkita yoʻl bor joyda uchinchisi ham topiladi. Menga imkon ber.
 - Gobelyan nima dedi senga?
 - Bu gap ikkimizning oramizda golishi kerak, knyaz. Bu juda nozik masala.
- Sen menga shart qo'yma. Gap shu yerda qoladimi yo teletaypga qo'yamanmi,
 o'zim hal qilaman.
- Yaxshi, Knyaz. Men sening aqlingga ishonaman. Gobelyan avvaliga meni oʻsha shilta ish bilan qoʻrqitmoqi boʻldi, ishon. Keyin bir taklif aytdi. «Yaqinda katta «ov» boʻladi. Atrofingga ishonchli oʻgʻrilarni toʻpla. Agar shartimizga koʻnishsa, ham ozod

¹¹ Aslan: «Sыgrat na royale» — ya'ni «barmoq izlarini qoldirmoq» ma'nosida.

bo'lishadi, ham boyib ketishadi. Vazifa qoyilmaqom qilib bajarilsa, to o'lgunlaricha ularga tegmaymiz», dedi.

- Qanaqa vazifa? Qanaqa «ov»?
- Unisini aniq aytmadi. Gapining mazmuniga qaraganda «Ov» Oʻrta Osiyoda boʻlishi kerak. Vazifamiz gʻalva chiqarib berish boʻladi. Qolganini oʻzlari eplashadi.
- Yaxshi vazifa olibsan... Demak, sen o'g'rilarni emas, qanjiqlarni to'plashing kerak ekan. Sen meni qanjiq deb yurarmiding?
- Knyaz, unday dema. Sen men hurmat qiluvchi eng buyuk o'g'rilardan birisan. Ular bizga yaxshi ish taklif qilishdi. Evaziga umrbod erkinlik...
 - Hukumatning har qanday ishiga yordam berish qanjiqlik ekanini unutibsan, Murik!
 - Bu alohida bir imkoniyat, Knyaz. Oʻgʻrilar olamiga katta foyda keltiradi.
 - Faqat isnod keltiradi.
- Yaxshi, knyaz. Men bu taklifni faqat senga aytdim. Agar sen buni qanjiqlik deb hisoblasang, mayli, men ham bu ishga qoʻl urmayman. Ikki yilni eplashtirib, tinchgina yuraveraman.
 - Shunday qil: tinch yuraver, Tengiz bu gapni aytib zaharli iljaydi.

Murik suhbat yakuniga yetganini anglab, oʻrnidan turib nari ketgach, Tengiz u oʻtirgan tomonga qarab tupurdi. Uning tupugi gulxanning olovli bagʻrini yorib oʻtolmadi — manzilga yetolmadi.

Gulxandan uzoglashayotgan Murik «Knyazni ishontirdim», deb yengil tortib yanglishgan edi. Tengiz u o'ylagan darajada befahm emasdi. Gobelyanning asl maqsadi unga hozircha aniq boʻlmasa-da, Murikka «katta ov»ni va'da qilganiga ishonmadi. Ishonmasligiga bir gancha sabablar mavjud edi. Agar chindan ham «katta ov» bo'lsa, buni allaganday «Cho'mich»ga qo'yib bermaydi. Bu yoqda Arutyunan, Nersesyan, yana allagancha nahang baliglar turganida bu itbaligga balo bormi? Gobelyan o'zining «yan»larini ishga solmadimi, demak, «ov» katta emas. Yomon nom chiqarishga arzimaydi. Bu birlamchi sabab. Ikkilamchisi — prokuratura janjal chiqarish bilan shug'ullanmaydi. Tengiz Murik bildirgan ishdan isqirt bir siyosat hidi anqiyotganini sezdi. Demak, Murik Gobelyandan tashqarida yana bir kishi bilan uchrashgan. «Ammo kim bilan, gaerda? Agar uch harflilarga aralashgan boʻlsa, ish jiddiy, — deb oʻyladi Tengiz. — «Ov» balki ularninn rejasidir? Unda Gobelyan nima degan bu qanjiqqa?» Muammo botqog'iga botayotgan Tengiz kosovni jahl bilan bir-ikki gulxan bag'riga sanchdi. O'tinlarni ohistagina yamlab yutayotgan gulxan alangasi norizo holda bir to'lg'ondi-yu, yana yumushini davom ettiraverdi.

Mehmon uzoqlashgach, barakning darchasidan xojasini kuzatib oʻtirgan Pachoqburun oʻrnidan turdi-da, yelkasiga paxtaligini ilib, tashqariga chiqdi. Gulxan tomon borsammi, yo yoʻqmi, degan oʻyda bir necha nafas turdi-da, soʻng «biron amri bordir», degan oʻyda xojasi tomon yurdi.

Tengiz ro'parasidagi g'o'lachaga o'tirgan Pachoqburunga bir qarab oldi-yu, indamadi. Gapirish o'rniga amrni ijro etmoqni afzal biluvchi Pachoqburun bekorga qarab o'tirmaganini bildirib qo'yish uchun so'z aytdi:

- Jmura¹², dedi u soʻng ovozini balandlatib qaytardi: jmura! soʻziga xojasi tomondan e'tibor boʻlmagach, qoʻshimcha qildi: yelkanlarini poralab tashlash¹³ kerak.
 - Tengiz uning bu hukmini eshitib, unga o'qrayib qaradi.
- Ogʻzingni yum!¹⁴
 Tengiz shunday deb chirt etib tupurdi-da, «Bikovatiy»¹⁵ deb mingʻirlab qoʻydi. Tengiz bu «unvonni» tez-tez ishlatardi. Ovoz chiqarib aytgan mahallari

¹³ Besoqolbozlik nazarda tutilyapti.

^{12 «}Qanjiq» demoqchi.

¹⁴ Aslan: «Zakroy podduvalo» yoki «Privyaji metlu».

ham koʻp boʻlardi. Bu qamoq lageriga kelib, «taxt»ga oʻtirgan onida Pachoqburunni «xos nav-karlik»ka tavsiya etayotgan Qoʻtos «oʻzi bikovatiy boʻlgani bilan ishimizga sadoqati zoʻr», deb ta'riflagan edi. Tengiz ta'rifning ikkinchi qismini qoʻyib, birinchi boʻlagiga e'tiborini qaratgan edi. Ba'zan shunday toʻnkaga roʻpara boʻlgani uchun taqdiridan nolib qolardi. Ammo tur desa turib, oʻldir, desa oʻldirib keluvchi odamning ong darajasi bundan ortiq boʻlmasligini bilgani uchun ham chidar edi.

Pachoqburunning hozir ro'paraga kelib o'tirishi yoqmadi, g'ashiga tegdi.

- Sen juchok¹⁶larga tayinla, bundan uzoqroq yurishsin. Ammo har bir qadamini kuzatishsin. Aytib qo'y, kim bunga yaqinlashsa, tramvayga qo'yiladi.
 - Xo'p, dedi Pachoqburun mutelik bilan.
 - Gapimni eshitdingmi?! dedi Tengiz zardali ohangda.
 - Eshitdim. Hammasiga aytaman.
 - Eshitgan bo'lsang, tuxum bosib o'tirmay, tur o'rningdan!

Pachoqburun kelib oʻtirgani xojasiga yoqmaganini anglab, oʻrnidan turdi-da, barak tomon yurdi. Ostona hatlay deganda orqadan ovoz keldi:

- Menga Hamzatni topib kel!

Amrga itoat etmoqqa odatlangan Pachoqburun ostona hatlamay, yelkasidagi paxtaligini kiydi-da, daraxt kesayotganlar tomon yurdi. Daraxt arralayotgan Nuriddinga yaqinlashib, odatiga xilof qilmagan tarzda «Bu yoqqa yur», deb toʻngʻilladi-yu, iziga qaytdi. U amrga soʻzsiz itoat etilmogʻiga ishongani uchun ham «kelyaptimikin?» degan xayolda orqasiga qarab ham qoʻymadi. Pachoqburunning kim ekanini yaxshi bilgan nazoratchi arrani qoʻyib, unga ergashgan Nuriddindan «qayoqqa ketyapsan?» deb soʻramadi ham.

Nuriddin gulxanga yaqinlashib, salom berdi. Tengiz salomga alik olgach, roʻparadagi gʻoʻlacha tomon imlab «oʻtir», dedi. Nuriddin oʻtirgach, kosovning uchi bilan choʻgʻni titib, orasidagi kartoshkani u tomon surdi. Bittasini oʻzi olib, sovutish uchun u kaftidan bu kaftiga otib oʻynadi.

— Musulmonlarning afzal tomoni nimada, bilasanmi? — deb soʻradi u kartoshka poʻstlogʻini archayotib.

Nuriddin «bilmayman, oʻzingiz ayta qoling», deganday unga qarab, yelka qisib qoʻydi.

- Afzalligi shundaki, musulmon hamisha boshqalarga yaxshilik tilaydi. Mana, sen menga sogʻlik tilab yaqinlashding. Men esam senga sihatlik bilan birga Ollohning rahmatini soʻradim. «Bu oʻgʻri bunaqa gaplarni qaerdan biladi?» deb hayron boʻlyapsanmi? Men bobomdan eshitganman bu gaplarni. Mening fojiam nimada, bilasanmi? Chin musulmon boʻla olmaganimda. Bobomning chizigʻidan chiqmaganimda bu yerda kartoshka yeb oʻtirmas edim.
 - Endi afsuslanyapsizmi?
- Afsuslanishimdan foyda yoʻq. Bu ham dunyoning bir sinovi-da. Oʻlmasam yana Xudoni tanish yoʻliga oʻtarman. Lekin... unda kech boʻlib qolishi mumkin. Fir'avnni eshitganmisan?

Nuriddin «yoʻq» deb bosh chayqadi.

- Ha, eshitmagansan. Qadimda Misr podshosi boʻlgan. Oʻzini Xudo deb bilgan ekan. Oʻsha ahmoq Muso paygʻambarni quvib borayotganida suvga choʻkkan ekan. Oʻlayotib «boʻldi, Xudoni tanidim», deganida Xudo ham «Endi kech!» degan ekan. Bu juda kuchli falsafa, Hamzat! Hayotda kechikmaslik muhim, juda muhim!
 - Kechikmaslik uchun hozirdan boshlasangiz-chi?

_

^{15 «}Aqlsiz, toʻnka» degani.

¹⁶ Yosh o'g'rilar.

- Hozirdan? Tengiz unga qarab jilmaydi: Hozir yoʻl yoʻq... Hamzat, bir yangi odam keldi. Sen u bilan gaplashibsan. Kimligini bilasanmi?
 - Yoʻq, oʻzi kelib gap boshladi.
 - Nima deydi?
 - «Bizlar musulmon farzandlarimiz, bir-birimizni qoʻllab-quvvatlaylik», dedi.
- Oʻsha toʻqqiz qaytgan endi musulmon boʻlib qolibdimi? Bilib qoʻy: u bir maraz! Undan nariroq yur. Ammo harakatini koʻzdan qochirma.
 - Kim o'zi u?
- Vaqti kelsa bilib olasan. Tengiz shunday deb oʻrnidan turdi-da, barak tomon yurdi. Nuriddin esa iziga qaytdi.

OSMON UZOQ

Bu odamning gaplari Tursunaliga moydek yoqdi.

«Men gamalaverib pishib ketganman. Senda musulmanin, menda musulmanin. Birbirimizni suyab yurmasak, bu haromilar bizni yebda yuborishadi. Zemlyak, yaxshi odamligingni gora ko'zlaring aytib turibdi. Uncha-muncha odamga so'zimni o'tkaza olaman, qamoqlarning tuprog'ini bekorga yalamaganman. Sen menga suyanaver...» Bunaga yoqimli qaplarni o'ziga yaqin olib yurgan Nuriddindan ham eshitmagan edi. «Koʻzlari sovuq boʻlsa ham Xudo koʻngliga yaxshilik solibdi. Xudo mening rahmimni yeganga o'xshaydi», deb o'yladi u. Qamoqxonalar tuprog'ini yalayverib to'yib ketgan bu «mehribon»ning koʻngli nima uchun iyib ketganini u yana uch-toʻrt kundan keyin biladi. Hozir esa... Xudoga shukur qiladi. «Xudo tavbamni qabul etdi», deb ko'ngli taskin topadi. U qo'llariga kishan solingandan boshlab Xudoni tildan qo'ymaydi. Dam tavba, dam munojot giladi. «Gunohim bo'lsa kechir», deydi. Ha, aynan shu so'zlar uchadi «Yo yaratgan Egam, men gunohkor bandangman, bilib-bilmay gunohlarimni kechir», demaydi. «Gunohim bo'lsa kechir», deydi. Harom-xarish yurib, yeb-ichganlarini gunoh emas, odatiy yashash tarzi deb biladi. Zino qilayotgan paytda Xudoni eslamagan edi. Qo'llariga kishan tushishi bilan yodga oldi. vasvasalaridan qutqar» deb so'ramagan edi, «qamoqdan qutqarib ol» deb nolalar qildi. Birovlarning haggini yeganida bu dunyoning hisob-kitobli ekanini unutgan edi, gamoq zindonida xotirladi. «Nafs balolaridan qutqar» deb soʻramagan edi, «zindon azoblaridan qutqar», deb faryodlar qildi. Yemoqning qusmog'i borligini bilmaganday yurdi, tepki zarbidan qayt qilganida bu haqiqatni anglaganday bo'ldi. «Nafsimni o'ldir», deb so'ramagan edi, «o'zimni o'ldirma», deb tavallolar gildi.

Bandaning holi shu: go'yo u yoki bu ishning gunoh ekanini bilmaganday yuraveradi. Boshi devorga urilib, zarba tufayli ko'zlaridan uchqunlar sachraganida Tangrini eslaydi. So'ng «gunohlarim bo'lsa kechir», deydi. Shunday degani ham katta gap. Ba'zan «E Xudoyim, qaysi gunohlarim uchun meni bunchalik qiynaysan?» deb zorlanib ham qo'yadi. «Haromdan saqlansam edim, nafsimni tiya olsam edim, bunchalar xorlikka yo'liqmas edim», deb o'zini ayblamaydi. Bil'aks, «Falonchi mendan ko'proq yegan edi, begona to'shaklarni mendan ko'ra ko'proq gullatgan edi. U yallo qilib yuribdi, men esam bunda horman», deb Xudoni adolatsizlikda ayblab ham qo'yadi. Har bir odam o'z amalining asiri ekaniga esa fahmi yetmaydi.

Dunyo bamisli birdaniga koʻkarib tezda qurigan dalaga oʻxshashini, ehtiyotsizlik qilinsa bu manzara kishini aldab qoʻyajagini, aldangach esa, bir kuni hayoti sargʻayib soʻla boshlagach, ma'yus va gʻamgin boʻlajagini anglamaydi. Dunyoni fohishaning quchogʻiday totli deb oʻylaydi. Dunyoning botqoq yuzasini qoplagan oʻtloqqa oʻxshashini, oʻylamay tashlangan har bir qadam bot-qoqqa botirajagi mumkinligini fahm etmaydi.

Tursunali shunday bandalardan biri. U marhamat soʻrab Xudoga koʻp yolboradi. Ammo iymon kalimasi bilan yumshamagan tildan uchgan bu yolborishlar qabul boʻlarmikin, vallohi a'lam?! Insonlarni salomatga, saodatga erishtiruvchi yagona narsa iymondir. Bani Odam har qanday yomonlikni faqat iymon bilangina yengajagini va har bir zafarga faqat iymon bilan erishajagini anglab yetmoq shu qadar mushkulmi? Dunyo toʻplashga yetgan aql bu haqiqatni tushunishga kelganda qosirlik qilarmi? Yoki buni fahm eta olmaslikka qalblarning muhrlangani sababmi ekan?

Tursunali bir muttahamning aldov soʻzlariga mahliyo boʻlib «Xudo menga marhamat qildi», deb oʻtiribdi. Nodon banda bilmaydiki, bu odamning roʻpara boʻlgani — gunohlariga yarasha va'da qilingan ajrlarning davomidir. «Gunohim nima edi?» deb yanada battar yigʻlatadigan daqiqalarning debochasidir.

Tangrining marhamatiga erishmoq oson edi. Nafsni tiymoqqa kuch topsa, sabr eta olsa, kunni shukr bilan o'tkazsa bas edi. Bu unga og'ir tuyulib, yanada mashaqqatliroq, azob oroliga yetaklovchi yo'lni tanladi. Hamonki shu orol nasib etgan ekan, o'zi pishirgan oshni ichmoqdan o'zga chorasi yo'qdir!

Tursunali Murikning shirin soʻzlariga mast boʻlib oʻtirganida pastdagi karavotda yotuvchi «qoʻshni»si bexosdan «Ablah, maraz!» deb qichqirib yubordi. Soʻng qoʻlidagi maktubni pora-pora qilib yirtdi. Keyin esa duch kelgan narsani tortqilab, irgʻitaverdi. Bunga ham qanoat qilmay karavotni mahkam changallaganicha silkita boshladi. Atrofdagilar «hay-hay»lab ushlab qolishmaganida Tursunalining tepadan yerga qulashi aniq edi.

Chorasiz odam joyiga o'tirib yig'lay boshladi. Dunyodagi eng ayanchli narsa balki erkakning yig'lashidir. Qamoq lagerlarida esa tez-tez uchrab turgani uchunmi ayanchli tuyulmaydi. Kunduzlari butalar panasida, tunlari esa yostiqqa hasratlarini to'kkan tarzda yig'lash odatiy hol. Lekin bu chorasiz odam kabi ho'ngrab, yelkalari silkinish darajasi yig'lamoq kamyob hodisa. Shu sababli ham «Nima bo'ldi, nega dodlayapsan?» deb so'raguvchilar topildi. Chorasiz odam avvaliga qo'l siltab qo'yib javob bermadi. Dam o'tmay ko'z yoshi daryosi qurib, hasrat dengizi esa tosha boshlagach, dardini aytdi:

- Xotinim mendan ajralishibdi. Ablah, iflos! Axir men uni sevardim. Men uni deb o'tiribman bu yerda. Odamni men bosmaganman. Rulda uning padarla'nati ukasi edi. Mashinamni yashirincha olib chiqqan ekan, hayvon! Xotinim «yolg'iz ukamni qutqarib qoling», deb yalinsa, men lagma bo'ynimga olib o'tiribman.
 - Ukasi yolg'izmidi?

Chorasiz odamning talvasasini ensasi qotgan tarzda kuzatayotgan Qo'tos shunday deb unga yaqinlashdi.

- Ha, bittagina ukasi bor edi.
- Eri-chi? Eri nechta edi?
- Tushunmadim, o'rtoq, bu nima deganingiz?
- Ukasi bitta, ammo eri bitta emas ekan, demogchiman.
- Unday demang, biz bir-birimizni sevar edik.
- Burningni art! He, mishiqi! Qoʻtos shunday deb hech bir kutilmaganda tarsaki tortib yubordi. Zarbning zoʻridan chorasiz odam yonboshlab qoldi. Tarsakidan qanoatlanmagan Qoʻtos unga qarab tupurdi.
- Sen ham erkakman, deb yuribsanmi? Bir-birini sevar emish! Bilib qo'y, «sevgilim!» deb quchoqlaganida xayolida sen emas, ketvorgan o'ynashi turadi. Hezalak! Xotinlarni senga o'xshagan hezalaklar buzadi. Eplash qo'llaringdan kelmasa nima qilasanlar uylanib?! Shu hollaringga yana ko'ngillaring begonalarni ham tusaydi. Sen ham borarmiding begonaga? Yuzini silab o'tirgan chorasiz odam indamadi. Borarding. Begona bilan o'pishayotganingda xotinchang ham begona bilan ayshini surardi.

Senlarning hayoting mana shunaqa axlat. Xotining seni qoʻygan boʻlsa nima boʻpti? Bu yerda oʻlib ketmasang, chiqib, boshqasini topasan. Yuzta er koʻrib toʻymagan shilta bir ishvasi bilan koʻzingga qizdek koʻrinadiyu, tamom, unga uylanasan. Bir-birlaringni sevib yuraverasanlar. — Qoʻtos shunday deb chorasiz odamning oyogʻiga tepdi-da, soʻkinganicha nari ketdi. Soliqni vaqtida toʻlamagan mahbusning masalasini hal qilishga kirgan Qoʻtos ishni pishitib, chiqib ketgunicha birov lom-mim demadi.

Bu yerdagi bema'niliklarga, bekordan bekorga so'kishlaru urishlarga ko'nikib golgan Tursunali chorasiz odamning kaltaklangani boisini tushunmadi. Har ganday sharoitda ham o'zini chetga olish tinch hayotini ta'minlayajagini anglab yetgan Tursunali yana joyiga chiqib yonboshladi. Chorasiz odam esa yigʻlamasirab, oʻzicha bir nimalar deb o'tiraverdi. Unga dardkash topilmadi. Olam-olam dardni yelkalarida ortmoglab yurgan odamlarga begona dardning hojati bor ekanmi? Shular kabi Tursunali ham o'z dardining asiri edi. Hozirgi voqea sabab bo'lib, ko'z oldiga xotini keldi. Shu paytga gadar «xotinim men bilan ajralishi mumkin», degan fikr xayoliga kelmagan edi. Odatda er xotinni qo'yguvchi edi. Xotin «javobimni bering», deb so'raguvchi, er janoblari esa hushlariga kelsa taloq xatini berguvchi edilar. Ajib zamonning ajib qonunlarini qarangki, endi xotin erni qo'yadigan bo'libdi. Yana «gamoqdagi erimni qo'ydim», desa qonun ham «xo'p» deyaverar ekan. Tursunali shunisiga besh ketmadi. Hozir kaftlarini bolish gilib shiftga tikilib yotar ekan, «Bitta ahmoqning gapiga kirib Matluba ham ajralishsa-ya?!» degan fikr xayoliga urilib dahshatdan sapchib ketayozdi. Davrini surib yurgan kezlarida xotini «javobimni bering» deb qolsa, koʻp ham tarang qilmagan boʻlardi. Matluba ba'zan nolib qolsa «Chidasang shu, chidamasang to'rt tomoning Toshkent» deb ajralishga sha'ma gilardi. Hozir esa «ajralish» degan so'z uni dahshatga soldi. «Yo'g, ajrashadigan bo'lsa o'ynash bilan tutganida tashlab ketardi. U meni yaxshi ko'radi», deb o'ziga o'zi tasalli berdi. «Yaxshi ko'rardi...» — «Biz bir-birimizni sevardik...» — «Bilib qo'y, «sevgilim!» deb guchoglaganingda xayolida sen emas, ketvorgan o'ynashi turadi!...» — «Begona bilan o'pishayotganingda xotinchang ham begona bilan ayshini suradi...»

Bu gaplarni eslab Tursunalining yuragi uvishdi. Shu paytga qadar xotini begona erkak bilan don olishmogʻi mumkinligini oʻylab ham koʻrmagan edi. «U ham tirik jon, unda ham nafs bor. Shayton uni ham vasvasaga soladi», degan fikrdan uzoq edi. «Oʻynash bilan nafsni qondirish erkakka yarashadi. Xotin oʻz eriga sadoqatli boʻlmogʻi shart!» — Tursunalining bu sohadagi falsafasi shundan iborat. U oʻzining buzuqligini xiyonat deb hisoblamagan, agar birov unga «bu qiligʻing oila deb atalmish oppoq, pokiza dasturxon ustida balchiqqa botgan oyoqlar bilan yurishdir», desa zaharli jilmayib «Bu yigit uchun ayb emas, yigit kishiga qirqta xotin oz», deb qoʻygan boʻlardi. Agar oʻsha odam «Bir juvonga qirq erkak oz», desami, «Jinni ekansan!» deb soʻkib berishi aniq edi.

«Begona bilan o'ynashayotganingda xotinchang ham...»

«Yoʻq, — dedi Tursunali oʻziga oʻzi, — Matluba bunaqa haromdan hazar qiladi...»

«Harommi bu ish? Sen o'zing nima uchun hazar qilmading?»

Kimdir shunday deb qulog'i ostida pichirlaganday bo'ldi.

Gʻoyibdan berilgan bu savolga javob qaytara olmadi. Chunki haromdan nima uchun hazar qilmaganini oʻzi ham bilmas edi. Shaharga tushgan kezlari maishat qilgan damlarida koʻz suzib turuvchi ofatijonlar ustidan pul sochgan onlarida bularning fohisha ekanini, kechagina yoki bir soatgina muqaddam boshqa bir erkak koʻnglini ovlaganini, ertaga yoki bir necha soatdan soʻng bu ahvol takrorlanayajagini, unga «jonginam» deb choʻchchayayotgan lablar oʻnlab yoki yuzlab erkakka ishva qilgani va qilajagini oʻylamas edi. Nafsni qondirishdan oʻzga narsani bilmasdi. To zahmga chalinguniga qadar palapartish yurdi. Soʻng tanlaydigan boʻldi. Tanlagani qursin! Pul evaziga oʻzini sotuvchi ayolning yaxshi-yomoni, tozasiyu iflosi boʻlarkanmi?! Oq it bilan qora itning farqi

boʻlmaganidek, bularda farq yoʻqligi, barchasi «fohisha», «buzuq», «shilta»... kabi «unvon»lar bilan xorlanishini uning oqsoq fahmi idrok qila olmas edi.

Ishtoni yoʻqning hadigi choʻpdan, deganlaridek, oʻzi botqoqqa botgani holda, pokiza odamning etagi loy emasmikin, deb gumonsirashi qiziq. «Yoʻq, begonaga yaqinlashmoqqa haqqi yoʻq!» deb hukm chiqarmogʻi undanda qiziq. Uyidagi pokiza toʻshakka oʻynashini boshlashdan hazar qilmagan odam «haromdan hazar qilish» xususida oʻylagani yanada qiziqroq.

Xotinining koʻrpa-toʻshaklarni kuydirib tashlaganini bilib, «bunaqa ahmoq xotin dunyoda yagona boʻlsa kerak», deb oʻylagan edi. Hozir oʻsha voqeani eslab, yuragi uvishdi. «Bu mallavoyning xotini boshqa. Matluba haromdan hazar qiladi», degan fikri qat'iylashdi. Sogʻingan qalbiga bir iliqlik yugurgiladi. Ammo... bu qalbning toʻri Nafisaga boʻshatib berilgan edi. Manfiy va musbat bulut parchalari yaqinlashganida yashin chaqnagani misol yuragi bir sanchdi. Haromga oʻrgangan koʻngil pokiza hislarga oʻrin bermogni ixtiyor qilmadi. Nafs tarozisining Nafisa turgan pallasi bosib ketaverdi.

Ko'tosning hozirgi gapiga qadar xotinini gumon qilmagan, birovdan qizg'anmagan edi. Biroq... Nafisani qizg'anardi. Uni do'stiga «oshirib» yuborganidan keyin, hatto oshnasidan ham qizg'anadigan bo'ldi. Samandar og'ushida ishva qilayotgan Nafisa ko'z oldiga kelsa badaniga muz yugurardi.

Raykom taxtini egallash uchun yoʻl ochilganida «oʻynash haqidagi ma'lumot toʻgʻanoq boʻlishi mumkin», degan ogohlantirishdan soʻng Nafisani doʻstiga «uzatgan» edi. «Gilam sotsang qoʻshningga sot, bir chekkasida oʻzing oʻtirasan», deganlari shu-da! Xotindan kuygan Samandar xotinidan ajrashib doʻstiga arzi hol qilganida Tursunali qulay fursat kelganini fahmlab, kayfi oshib chuldirab qolgan oshnasiga Nafisani roʻpara qildi. Nafisa yigʻladi, tarang qildi, soʻng tayinli bir erga, yana toʻgʻri Moskva bilan gaplashadigan olim erga ega boʻlishini anglagach, koʻndi. Samandar ertalab bir qizning «qizlik nomusiga» tegib qoʻyganini bilib, qoʻrqib ketdi. Qoʻrqitishmasa ham bu goʻzal juvonga uylanishga jon-jon deb koʻnaverardi. Xullas, «gilam qoʻshniga sotildi», «bir chekkasida rohat ila oʻtirmoq» esa davom etdi. Biroq, «gilam egasi nima uchun gilamda oʻtiradi?» degan hasad qalbini yondiraverdi. Aslida «gilamni» sotmasa ham boʻlarkan. Raykomga olib boradi, deb faraz qilingan yoʻl aldamchi ekan, chiroyli jilva qilayotgan bu yoʻl birdan qorongʻulashdi-yu, taxtga emas, zindonga roʻpara qildi...

Bitta qozonda ikki qoʻchqorning kallasi qaynamaydi, deganlari balki mubolagʻadir. Qozon katta boʻlsa oʻnta kalla ham qaynar. Ammo bitta yurak ikki ayolga bir xilda mehrmuhabbat bera olmasligi aniq. U qalbini xotini Matlubaga toʻliq boʻshatib berishni istasa ham, haromlik bulogʻidan suv ichishga koʻnikkan nafs talvasaga tushib, Nafisani unutishga yoʻl qoʻymaydi. «Matlubadan nima koʻrding? Toʻgʻri, avvaliga totli edi, keyin chaynab tashlangan turshakning oʻzi boʻldi-qoldi. Egov emasmidi u? Har kuni umrni egovlamas edimi? — der edi nafs balosi. — Nafisa-chi? Bu dunyoning lazzatini kim berdi? Nafisa! Nafisa bor joyda jannatni orzu qilishning oʻzi kulgili emasmi? Mingta Matlubani toʻplasang bittagina Nafisaning toʻshakdagi toʻlgʻonishiga yetmaydi...» Shundan soʻng koʻzlarini yumib, oʻzini Nafisaning quchogʻida koʻrardi. Hammasini unutardi: ahli ayoli, farzandlarini ham, Xudoning balolariga uchraganini ham, bundagi azoblarni ham...

Shunday bo'lib kelgan edi. Hozir, xotinidan tiriklayin ajralib piqillab o'tirgan notavonning alamli nolasi uni sergak torttirdi.

«Bu azoblardan qutulib borgach, seni kutib oladigan kim? Matluba! Bolalaring!.. Sen ulardan boshqa yana kimga keraksan? Hech kimga! Qariganingda shular asqotadi. Senga bir burda nonni shu farzandlar beradi. Oʻlganingda shular olib borib koʻmadi. Sendan boshqa er boʻlganida sabr-toqati uchun Matlubaga haykal qoʻyardi...» Nafs pinakka ketgan paytlarda ojiz vijdonning pichirlab aytgan bu soʻzlarni endi sal quvvatga

kirgandek bo'ldi. Ammo falakning gardishi bir aylanib, «Mulla Tursunali, biz xato qilibmiz. Siz aybsiz ekansiz, ozodsiz», deyilsami, qanot chiqarib uyga uchardi. Uchardiyu... ikki-uch haftada yana nafs qurg'ur Nafisasi sari yetaklab borarmidi...

«Ey Odam farzandi! Men Allohdurman. Bandalarni oʻz qudratim bilan yaratdim, bas, kimlargadir yaxshilikni iroda qilib yaxshi xulqni berib qoʻyaman. Kimlargadir yomonlik boʻlishni iroda qilsam, unga yomon xulqni beraman», deyiluvi besabab emas. Ammo Odam bolasiga tugʻilganidayoq yomon xulq berilmas, vallohi a'lam. Bu hol shaytonga maylini berganlargagina nasib etguvchi. Derlarkim, agar Odam bolasi uchun ish ulugʻ martaba, ish haqi esa arzimas darajada boʻlsa, uning oliy janobi mehnatdir, aniqroq bayon etilsa bu mehnatni yaratguvchisi Tangridir. Agarchi U uchun ish ikkinchi yoki quyiroq darajada, ish haqi esa muhimroq yoki oliyroq martabada ekan, demak U ish haqining qulidir. Ish haqining xojasi esa shayton ekan, shaytonlarning ham eng tubani ekan. Yoshlik choqlaridayoq ana shu eng tuban shaytonga muhabbat qoʻygan Tursunaliga yana qandayin xulq nasib etmogʻi mumkin edi? Zulmning har turidan totib koʻrayotgan bandaga bu haqiqatni anglamogʻi uchun yana qancha muhlat kerak, yana qancha sinovlar darkor?

«Xotinim menga vafo qilarmi yoki yoʻqmi?» degan xavotir bilan uyquga ketgan Tursunalini yana bir zulm oʻz quchogʻiga olmoqqa hozirlanar edi.

«Sen-da musulmanin, men-da musilmanin...» degan gaplari bilan Tursunalining mehrini qozongan «mehribon» tushlik chogʻida unga yaqinlashdi. Kulimsirab kelayotgan Murikni Tursunali oʻrnidan turib qarshi oldi. Zamonning hukmini qarangki, ilgarilari faqatgina oʻzidan ustunlar bilangina oʻrnidan turib salomlashadigan, yuqori lavozimdagilar telefon qilishadigan boʻlishsa, ovozlarini eshitiboq oʻrnidan tura qulluq qilganicha gaplashadigan odam endi bir tuban oʻgʻridan ehtiromini darigʻ tutmasa...

Tursunalini yelkasidan quchgan Murik «Zemlyak, ahvollar nichuk? Orqamdan yur, muhim gap bor», deb pichirlab, atrofga alanglab olgach, butazor tomon boshladi. Tursunali ham beixtiyor ravishda alanglab qoʻyib, unga ergashdi. Qor bosgan butazorda yurish ogʻir edi. Shunday boʻlsa ham Tursunali takaning izidan boruvchi nodon qoʻy singari ergashaverdi. «Gapingni shu yerda aytaver», demadi. «Tengiz eplay olmayotgan ishni balki shu qoyillatar, meni oshxonaga joylab qoʻyar», degan umidli oʻy boʻyniga sirtmoq boʻlib tushgan, sirtmoq uchini esa Murikning qoʻliga tutgan edi.

Murik kutilmaganda to'xtab, orqasiga o'girildi.

- Qalay, zemlyak, qizishib oldingmi? dedi u tirjayib.
- Ha... endi... dedi Tursunali nima deyishni bilmay.
- Sen zolotoy odamga oʻxshaysan, zemlyak, seni bik yaxshi koʻrib qoldim. Murik shunday deb otini erkalagan chavandoz kabi Tursunalining yuziga yengil shapatiladi.

Bu qiliq Tursunaliga erish tuyulib tisarildi.

- Zemlyak, sen zolotoy odam ekansan, deb takrorladi Murik unga qattiq tikilib. Sening yordaming kerak. Agar yordam qilmasang bir odam xor boʻlib oʻlib ketishi mumkin.
 - Men... kimga.. qanday yordam qilishim mumkin?— deb ajablandi Tursunali.
 - Arzimas yordam... to'rtta yoki beshtagina so'z aytsang kifoya.
 - Qanaga so'z?
- Qanday so'z deysanmi? Murik shunday deb uning yuziga yana yengil shapati urdi. Bu safar Tursunali orqasiga tisarilishga ulgurmadi. Shapatilagan panja uni kekirdagidan oldi. Zemlyak, mening bir oshnamga pul kerak. Bo'lmasa o'ladi.

¹⁷ Qudsiy hadisdan.

- Menda pul yoʻq, dedi Tursunali uning qoʻliga yopishib. Shu onda Murik tizzasi bilan uning nozik yeriga tepib, bukchaytirib qoʻydi. Soʻng ixranayotgan oʻljasining oʻziga kelishini kutib, sigaret tutat- di. Zemlyak, bu yerda puling yoʻqligini bilaman. Ammo uyingda ancha puling qolgan. Berkitgan yeringni shu paytgacha oʻzingdan boshqa hech kim bilmas edi. Endi bu sirga ikkalamiz egalik qilamiz. Men oʻgʻil bolacha ish tutaman: hammasini olmayman, yarmisi oʻzingga qoladi. Oʻzingni qiynamay qaerga yashirganingni ayt. Hozir bilmasdan tizzam tegib ketdi. Bilib tepsam, yomonroq boʻladi. Qani, ayta qol.
 - Nimani?

Bu savol Murikka yoqmay, bir soʻkindi-da yana kekirdakdan oldi. Tizza zarbidan hali oʻziga kelolma-yotgan Tursunali xirilladi, rangi oqara boshladi. Murik uning ahvolini sezib, kekirdagini qoʻyib yubordi-da, yuzini siladi:

- Sen zolotoy odamsan, zemlyak. Bilib qo'y, shu paytgacha hech kim mening bir gapimni ikki qilmagan. Men sening izingdan shu yergacha keldim. Ahmoq bo'lib qaytib ketmayman. Sen esa... yo pullaringni qayga berkitganingni aytasan yoki bahorgacha shu yerda yotasan. Omadli odam bo'lsang, bahorda suyaklaringni yig'ishtirib olib ko'mishar. Xudoning qarg'ishiga uchragan bo'lsang sen xunasaga shu ham nasib etmaydi. Qani, yechin.
 - Nega?
 - Negaligini keyin bilasan.

Tursunali yalang'och holda muzlab o'lishni tasavvur qilib, dahshatdan titrab ketdi.

- Aytaman, dedi u jon talvasasidagi odamning ovozi bilan.
- Zolotoy odamsan demadimmi?! Seni o'ldirish hayf. Qani, ayt.
- Qishloqda...
- Faqat «molxona tagiga koʻmilgan», dema. U yer kavlab tashlangan.

Bu gapni eshitib Tursunali hayratdan qotib qoldi. «Qayoqdan biladi?» deb oʻyladi. Qoʻliga kishan urilgan dastlabki kunlarda, dastlabki soʻroqlarda shunday deb aldagan, soʻng buning evaziga rosa tepki yegan edi. Oʻlim xavotirida turgan Tursunali hozir shuni esladi. Ammo «bu oʻshalarning sherigimi?» degan gumonga bormadi. Molxonani aytishga ogʻiz juftlagan Tursunali uchun bu ogohlantirish durust boʻldi.

— Hojatxonada ham dema, u yerni titadigan ahmoq yoʻq. Boʻl, ayt. Bilib qoʻy: aldasang, it koʻrmagan azoblarda oʻlasan. Bu — bir. Urugʻing bilan quriysan, bu — ikki. Tushundingmi? Bolalaring ham oʻzingga oʻxshab oʻladi. Oʻzing bittagina bola boʻlgan ekansan. Sendan oʻsha bittasi ham qolmaydi.

O'lim talvasasi, ayni choqda najot umididagi Tursunalining ko'z oldiga Tengiz keldi. «Nima qilib bo'lsa ham o'shanga yetib olsam bo'ldi», degan xayolda yana bir marta aldashga qaror qildi. Bu holda ham nafs g'olib chiqdi. O'zining joni emas, hatto bolalarining joni emas, berkitilgan boyligini saqlab qolish ilinji ustun keldi.

- Hozir aytaman, dedi Tursunali unga najot nazari bilan boqib.
- Aytasan, aytmay qayoqqa ham borarding. Sen bilan biz musulmaninmiz, zemlyak. Bir-birimizni suyab-qoʻllamasak, xor boʻlib oʻlib ketamiz. Boylik yoʻq boʻlib ketadigan narsa. Sen bu yerlardan chiqib borguningcha berkitgan pullaring chirib ado boʻladi. Ertaindin Gorbach pulni almashtirsa bundan battar boʻladi. Sen zolotoy ekansan, zemlyak. Toʻgʻri yoʻlni tanlading: puling ham chirimaydi, oʻzing ham bu yerlarda chirib qolib ketmaysan. Uyingga soppa-sogʻ kirib borasan. Pul degani nima, bilasanmi? Murik shunday deb Tursun-alining bilagidan ushladi-da, kaftiga sigaret kulini qoqdi. Soʻng puflab, bu kulni toʻzitdi. Tushundingmi, zemlyak? Endi oʻzingga kelib olgandirsan, a? Boʻla qol, tarang qilmay, ayt.

«Buning orqasidan ergashib kelganimni Tengizning odamlari koʻrmadimikin? Yordamga kelib qolishmasmikin?» degan ilinjdagi Tursunalining atrofga javdirashini

koʻrgan Murik zaharli tarzda tirjaydi. U mamnun edi. Murik turli joylarda, turli holatlarda, turli boylardan pul undirgan, lekin bunaqangi vaziyat, bunaqangi odamga birinchi duch kelishi edi. Shu paytgacha hech kim birgina tepki zarbidan bunday hiqillab qolmagan edi. Kievga «gastrol»ga borganida Abramovich degan ziqnani toʻrt kechayu toʻrt kunduz temir quvurga kishanlab, och qoldirib, tepkilaganda ham aytmagan, toʻrt kecha-kunduz najot kutib yashagan. Beshinchi kuni oʻlib ketishiga koʻzi yetgach, aytgan edi. Bu odamga esa birgina tepki kifoya qildi. «Bulardan qaysi biri aqlliroq? — deb oʻyladi Murik, soʻng oʻz qarichi bilan hukm qildi: — Shunisi aqlli. Qiynalib jon bergandan koʻra, boylikni osongina berib qoʻya qolgani durust...»

Murik «Pul qoʻlning kiri, pul chiriydi, pulni Gorbach almashtiradi...» deb oʻljasining koʻngliga gʻashlik solganday edi. Agar berkitilgan boylik qogʻoz puldan iborat boʻlganida Tursunali bu qadar talvasaga tushmasmi edi. «Oʻgʻilbolacha ish qilaman, yarmini olaman», deydi. Tillayu javohir, duru gavharni koʻrganda kim yarmiga qanoat qilar ekan? Tursunalini ayblash balki nooʻrindir: boylikni peshona teri bilan topmagan boʻlsada, tillayu javohirning jilosi yurak tomirlariga koʻz ilgʻamas nurlar bilan ulangan edi.

- Endi haddingdan oshma, dedi Murik unga tarsaki tushirib. Zolotoy odam yaxshi gapning chegarasini bilishi kerak.
- Yerto'lada... to'sinlarning beliga qo'yilgan yettita ustun bor. O'rtadagi ustunning tagida... Tursunali shunday deb yutinib qo'ydi-da, qassob qarshisidagi qo'zichoq holatida Murikka mo'ltillab qaradi. «Qassob» esa «hozir so'yayinmi yoki yana picha semirishini kutayinmi?» degan kabi unga tikildi. So'ng bir qarorga kelib, cho'ntagidan buklama pichoq chiqardi-da, tugmasini bosdi. «Aytdimu qutuldim, jonim foydaga qoldi», deb ko'ngliga xotirjamlik oralayotgan Tursun-ali pichoqni ko'rib, qo'rqib ketdi.
 - Yechin, deb buyurdi Murik, sovuq ohangda.
 - Aytdim-ku! dedi Tursunali jon holatda.
 - Shu gapingga ishonadigan ahmoqqa o'xshaymanmi men?
- Rost aytdim, gapim rost, axir!— Tursunali yigʻlamsiradi. Nega ishonmaysiz? Ustunning tagida chuqurcha bor. Chuqurchada ikki qavat yogʻoch qopqoq bor.
- Sen tirik odamning terisini qanday shilishganini koʻrganmisan? Tursunali bu savolga javoban javdiraganicha bosh chayqadi. Koʻrmagansan, dedi Murik pichoqni bukib, choʻntagiga solgach. Agar aldasang koʻrasan. Uch-toʻrt kun ichida koʻrasan. Te-ringni shilib, bi-ir rohatlanaman. Ungacha birovga churq etmaysan. Ogʻiz ochishing bilan kuragingning tagida shu pichoqni koʻrasan. Boʻldi endi, bor.

Tursunali qutulgani rostligiga bir ishonib, bir ishonmay iziga qayta boshladi. Uch-toʻrt qadam bosgach, orqadan Murikning ovozi keldi:

— Zemlyak, ishtoning hoʻl boʻlganga oʻxshaydi, almashtirib ol, yana shamollab qolmagin. Sen menga tiriklayin keraksan, — u shunday deb hiringlab kuldi. Tursunali orqasiga qaramadi.

U Murikni aldamagan edi. Chindan ham yerto'ladagi ustun ostida sandiqcha bor edi. Ammo bu sandiqcha bo'sh edi. Aniqroq aytilsa, bu sandiqcha bir necha haftagina asqotdi — boyliklarni bag'rida yashirdi. Lekin Tursunalining ko'ngli to'lmay, to'plaganlarini boshqa joyga ko'chirdi. Hozir yerto'lani aytishga aytdi-yu, «buning odamlari uyga borar, sandiqchani topib ochar, so'ng aldanganlarini bilib xotinimni siquvga olishar, bolalarimni qiynashar», deb o'ylamadi. Uning uchun hozir eng muhimi — o'z jonini qutqarish edi. Niyati amalga oshib, Xudoga shukr qilgan tarzda jo-yiga qaytdi. Mahbuslar ovqatlanib bo'lishib, ishga tarqalishayotgan edi. Tursunali javdiragan nigohi bilan Nuriddinni qidirdi. Tushlikdan avval uni Pachoqburun chaqirib ketgan edi, hali ham qaytmabdi.

Tursunalining qo'llari ishda, ko'zlari esa Nuriddinning yo'lida bo'ldi. Murik ikki marta unga yaqinlashib «Horma, zemlyak, charchamayapsanmi?» deb ketdi. Nuriddin ish

oxirlay deganida paydo bo'ldi. Barakka qaytar mahallarida Tursunali uning yengidan asta tortib, past ovozda:

- Tengizni tez koʻrishim kerak, dedi.
- Olib boraymi? dedi Nuriddin.
- Yoʻq, bexit joyda koʻrishim kerak. Anov yangi kelgan odam ishkal chiqaryapti.

Nuriddin «yangi» deganingiz kim?» deb soʻramadi, chunki u gap kim haqida borayotganini darrov anglab yetdi. Nuriddin «qanday ishkal chiqaryapti?» deb ham soʻramadi, chunki Tengiz ogohlantirgandayoq shu odamning bir baloni boshlashini fahmlagan edi. Lekin aynan Tursunali atrofida oʻralashayotgani unga yangilik boʻlsa-da, ortiqcha savolga hojat sezmadi. Kechki ovqat paytida Tengiz koʻrinmadi. Shu sababli Qoʻtosning yonidan oʻtayotib «Knyazga zarur gapim bor», deb qoʻydi. Qoʻtos unga qaramagan holda «tushundim» deganday bosh irgʻadi. Oʻsha kech «politbyuro»ning yigʻini belgilangan edi. Shu bois Tengiz Nuriddinni yoʻqlatmadi. Pachoqburun uni ertasiga, nonushtadan soʻng chaqirdi.

Qor boʻralab yogʻayotganiga qaramay Tengiz odatini kanda qilmagan — gulxan yaqinidagi oʻrnini egallagan edi. Boshiga, yelkalariga qoʻngan qorga qaraganda u jo-yida koʻpdan beri oʻtirar edi.

Tengiz Nuriddinning salomiga alik olib, unga qo'l uzatdi. «Kel, Hamzat, o'tir», deb ro'parasidagi to'nkani ko'rsatdi.

- Nima bo'ldi?
- Yangi odam Tursunali akaga ilakishib qolibdi. Bir ishkal chiqarmoqchiga oʻxshayotganmish.
- Ha... ilinibdi-da.. Tengiz shunday deb jilmaydi. Uzumni yigʻishtiradigan payt kelibdi... Shu qorda ham uzum yigʻishtiriladimi, deb hayron boʻlyapsanmi? Bizda hikmat bor: bir oʻrgimchak qarasaki, uzumzorda kapalaklar koʻp emish. Darrov toʻrini toʻqib, ovga kirishibdi. Uzum pishgan payt ekan. Bogʻbon uzum uzishni boshlabdi-yu, oʻrgimchakni toʻrlariga qoʻshib pachoqlab tashlabdi. Oʻrgimchakda nafs bor edi-yu, aql yoʻq edi, tadbir yoʻq edi. Choʻmichvoy oʻsha oʻrgimchakka oʻxshagan ahmaq. Tursunali akang esa kapalakka oʻxshagan ahmaq.
 - Cho'michvoy?.. Nuriddin kulimsiradi. Laqabi qiziq ekan. Kim o'zi u?
- Kim bo'lardi, bizga o'xshagan bir qul-da... Gapim yoqmadi, a? Xo'p, senga o'xshamagan, menga, hamtovoglarimga o'xshagan bir gul. Sen esa ozod odamsan. Piching qilayotganim yo'q. Chindan ham hursan. Shuning uchun seni yaxshi ko'raman, senga havasim keladi. Sen Epiktet degan odamni eshitganmisan? Uni ko'pchilik bilmaydi. Dunyoda shunaga faylasuf o'tgan. Lenin- gradda o'gib yurganimda uning kitobi qo'limga tushib, esimni teskari qilib yuborgan edi. Bitta fikrini aytib beraymi? — Tengiz shunday deb iyagini sila- di — go'yo kalavanig uchini topib olmoqchiday o'ylandi-da, siniq ovozda davom qildi: — «Derlarki, Inson uchun eng ulugʻ dunyoviy ne'mat — uning ozod va hurligidir. Agar ozodlik ne'mat ekan, ozod insonning baxtsiz bo'lmog'i mumkin emasdir. Agar sen baxtsiz insonga duch kelsang, qayg`u-hasratda yonayotganiga guvoh bo'lsang bilki, u OZOD EMASdir. U shubhasiz, kim yoki nima tomonidan ezilgandir. Agar ozodlik ne'mat ekan, ozod inson ablah bo'la olmaydi. Agar sen bir odamning boshqalar oldida past ketayotganini, laganbardorlik qilayotganini ko'rsang bilki, u ozod emasdir. U bir quldir. U bo'ynini qullik sirtmog'iga tutib, buning evaziga bir tovoq ovqat yoki biron mansab, yoki shunga o'xshash biron nima undirmoq istaydi. Kim ozroq manfaatga erishibdi, demak, ozroq xushomad qilibdi. Zo'rroq xushomad bilan esa kattaroq boylikka erishadi.

Ozod odam hech bir to'siqsiz egalik qilish mumkin bo'lgan narsaga egadir. Hech bir to'siqsiz nimaga egalik qilishi mumkin? Faqat O'Z-O'ZIGA! Agar sen odamning o'z-o'ziga

egalik qilmay boshqalarga ham hukm oʻtkazmoqqa jazm etganini koʻrsang bilki, u ozod emasdir. U boshqalarga hokimlik qilishni istadimi, demak, u oʻz istagi, nafsi qulidir...»

Tengiz shunday deb boshini egdi. Qoʻlidagi kosov bilan gulxanni titdi. Olov bagʻridan alam bilan otilib chiqqan hisobsiz uchqunlarni qor zarralari yutdi. Tengiz hozir bir necha daqiqaga oʻgʻrilik botqogʻini ruhan tark etib, talabalik dunyosiga, faylasuf boʻlib yetishmoq orzusidagi yigitning pokiza olamiga qaytgan edi. Nuriddin uni bu holatda avval koʻrmagani sababli ajablanganicha oʻtiraverdi. Unga biron soʻz aytish yoki aytmasligini ham bilmadi.

— Bu oddiy gaplarga oʻxshaydi, — dedi Tengiz boshini koʻtarib. — Lekin uni tushunish oson emas. Amal qilish esa, mushkul... juda ham mushkul. Biz... oʻgʻrilar, oʻzimizni ozod insonlar deb hisoblaymiz. Bu nisbiy tushuncha. Aslida esa Epiktet haq — biz qullarmiz!.. Ana endi oʻylab koʻr: bu dunyoda ozod inson koʻpmi yoki qulmi? Men Choʻmichni ahmaq oʻrgimchakka oʻxshatdim. Aslida biz ham oʻsha ahmaq oʻrgimchaklarning birimiz. Faqat qaysi bogʻbon qanday yanchib oʻldirishini bilmaymiz. Bizning qismatimiz shu — boshqacha boʻlishi mumkin emas... Shunaqa gaplar ham bor bu dunyoda, oshnam. Akangga aytib qoʻy, talvasaga tushmasin. Choʻmichni tinchita oladigan aqlimiz bordir.

Nuriddin suhbat yakunlanganini anglab, oʻrnidan turdi. Yarim soatdan soʻng Pachoqburun Tursunalini boshlab keldi. U kelguniga qadar Tengiz oʻrnidan turib, egniga qoʻngan qorni qoqib, gulxan yaqinida u yoqdan bu yoqqa yurdi. Unga Murikning maqsadi oz boʻlsa-da ayon edi. Sobiq sovxoz direktoridan nimani istash mumkin? Pul. Balki Gobelyan unga shu ishni topshirgandir? «Uch harf»dan olgan vazifasi-chi? «Bu qanjiq hamma yoqni chigallashtirib tashladi-ku?» deb gʻijindi Tengiz. Kalavaning uchini topa olmay yuragi siqilayotganda Tursunali yaqinlashib, salom berdi.

Nima gaping bor? — dedi Tengiz salomga alik olay.

Bunday qo'rsliklarga ko'nikib qolgan Tursunali joyida qotib, atrofiga qo'rquv aralash bir alanglab oldi.

- U meni oʻldirmoqchi boʻldi,
 dedi miskinlik bilan.
- Nega o'ldirmadi?

«Nima uchun oʻldirmoqchi edi», degan savolni kutgan Tursunali javobga taraddudlandi.

- U «boylikni qaerga yashirding?» deb zug'um qildi.
- Xo'sh, aytdingmi?
- U yoqda boylik qolmagan oʻzi...
- Seni Gobelyan so'roq qilganmi?
- Ha.
- Boyliging gaerdaligini unga aytganmisan?
- Bo'lsa aytaman-da.
- Qanjiq seni nega o'ldirmadi?
- Unga aytdim.
- Demak, bor ekan-da? Tengiz shunday deb unga g'azabli nigohini qadadi.
- O'zi yo'q, bo'lsa sizga aytmasmidim. Unga aytgan yerimda sariq chaqa ham qolmagan. Meni qutqarish uchun xotinim hammasini sovurib, ado qilgan.
 - Boyliging qolmagan bo'lsa, nega qaqshayapsan? Nimadan qo'rqyapsan?
 - U meni oʻldirmoqchi.
 - O'ldirsa savobga qoladi.
- Nega, axir?.. najot umidi bilan kelgan Tursunali sovuq tarzda aytilgan bu gapni eshitib bir seskandi. «Shartga binoan siz meni himoya qilishingiz kerak-ku!» demoqchi boʻldi-yu, da'vo qilishga tili bormadi qoʻrqdi. «Nega, axir...» dan nariga oʻta olmadi. Da'vosini aytolmagan boʻlsa ham, Tengiz uning maqsadini angladi.

- Seni uning changalidan qutqarishim kerakmi? Kallang joyidami?! U sen bilan uchrashish uchun atay boʻynini sirtmoqqa tutib bergan. Bekordan bekorga qamaladigan bolamas u. Bir narsaning isini sezmasa izingdan tushmas edi. Shu bugundan boshlab shartni bekor qilaman. Toʻlaydigan soligʻing ham oʻzingga siylov. Erta-indin uyingga odam borib, aytgan yeringni titadi. Hech narsa topolmasa xotin, bola-chaqangni oʻldiradi. Keyin oʻzing bu yerda it azobida oʻlasan. Shunaqa boʻlgani durust. Sen ahmaqni himoya qilganim uchun men oʻgʻrilar orasida isnodga qolaman. Yoʻqol, koʻzimga koʻrinma.
 - Nega ishonmaysiz? Tursunali shunday deb yig`lab yubordi.

Tengiz «o'l bu kuningdan!» deganday aftini burishtirdi-da, burilib nari ketdi. To'rt-besh qadam yurib, gulxan yaqinidagi to'nkaga o'tirdi.

Tursunali nima qilarini bilmay gangigan holda turib qoldi. Yordamga ishongan edi, najotni Yaratgandan emas, shu yigitdan kutgan edi. Hozir ham umidining soʻnggi iplarini shu odamga bogʻladi. Agar hozir bir moʻʻjiza yuz berib, Tangri-taolo aytsaki, «Ey Odam bolasi, men butun olamlarning yaratuvchisiman, sen ham bandasan, u ham bandamdir. Najotni kimdan kutasan?» Nodonlik, jaholat chodiriga tamoman burkalib olgan, koʻz nurlarini, aql-farosatini shayton alayhila'na ixtiyoriga butkul topshirgan bu banda hech ikkilanmay ikkinchi bandani koʻrsatar edi. (Astagʻfirulloh!)

U asta yurib, hoʻngrab yigʻlagan holida Tengizga yaqin keldida, yonida tiz choʻkdi. Shu yoshga kirib biron marta boʻlsin Yaratganiga sajda qilmagan banda xorlik libosiga oʻralib ikkinchi bir banda yonida tiz choʻkdi. Tengiz toʻgʻri aytgan edi: erkakning bu qadar xorlanishidan koʻra oʻlib ketavergani ming karra afzalroq.

— Meni gutgaring. O'lguningizcha gulingiz bo'la-yin.

Tengiz salgina burildi-yu, uning yonog'iga musht tushirdi. Marhamat kutib tiz cho'kkan Tursunali bu zarb-dan chalqanchasiga yiqildi.

— Mishigʻingni art, he xunasa! — Tengiz shunday deb kaftiga qor olib ishqadi. — Qul boʻlarmish... Sendaqa erkakni moyagidan osib qoʻyish kerak. Erkakman, deb yuribsanmi hali... — Tengiz xumordan chiqqunicha soʻkib, unga qarab tupurdi. — Oilangning ehtiyotini qilaman. Ular yemagan somsalariga pul toʻlab yurishmasin. Sen bilan ishim yoʻq. Yoʻqol!

«Hammang bir goʻrsanlar! Hammang ablahsanlar! Hammangni qirib tashlash kerak! Urugʻlaringni oʻynatib tashlash kerak!» — Tursunalining xayolini shunday hayqiriq toʻzitdi, ammo boʻgʻzi bu nidoni tilga koʻchishiga yoʻl bermadi. Tengizning salgina yon bosgani unga dalda boʻlib, oʻrnidan turdi. Rahmat aytib, iziga qayta boshladi. Oʻn qadamcha bosib toʻxtadi-da, najot koʻzlari bilan orqasiga oʻgirilib, Tengizga qaradi. «Kel, boʻpti, oʻzingni ham himoya qilaman», degan gapni kutdi.

Ish joyiga qaytib, qo'liga bolta oldi. Amal kursisini egallab, raykom taxtiga yo'l ko'rsatgan aqli endi jonini saqlab qolish yo'lini aniqlashga ojizlik qilayotgan edi. Yuzlab odamlarning nonini yarimta qila olgan tadbirlari bu yerda o'lumtuk ahvolga tushdi. Aql ham, tadbir ham unga xiyonat qildi. Aql, tadbir deganlari shayton izmida bo'lgach, o'zgacha oqibat kutish mumkinmi?

Beixtiyor ravishda daraxt shoxlariga bolta urar ekan, qutulish choralarini izlaydi. Ammo sonsiz kapalak singari toʻzigan fikrlari oʻziga boʻysunmaydi. Shaytonning burchi uni jar yoqasiga yetaklab kelmoq edi — vazifasini ado qildi. Qadamini bir qarichgina nari tashlasa kifoya. Shu paytgacha shaytonning mehri bulogʻidan suv ichib, quvvat olgan agli uni asrab qola olarmikin?

Bu agl unga yagona najot yoʻlini koʻrsata boshladi.

Najot — O'LIM! Qanday go'zal manzil! Bu azoblar, bu xorliklar birato'la barham topgusi. Birgina harakat kifoya, bir necha nafas kifoya. Yana ikki-uch kunmi, ikki-uch haftami azoblanib yashamoqdan ko'ra, hoziroq o'lim topgani yaxshi emasmi!

O, g'ofil banda! U dunyoda bu yerdagidan yuz, balki ming chandon ortiqroq azob hozirlab qo'yilganini fahm etsami, o'limga bu qadar intilmasmi edi...

Hozir esa... soʻnggi najot yoʻli unga afzal koʻrinaverdi. Endi fahmi yetganicha oʻlimning tez va oson turini izlay boshladi. Nima qilsin: shu qoʻlidagi bolta bilan peshonasiga qarsillatib bir ursinmi? Miyasining qatigʻini oʻynatib yuborsinmi? Shu fikrda boltaning tigʻiga qaradi. Beixtiyor ravishda tigʻ ustiga barmogʻini qoʻydi. Tigʻ nazarida oʻtmas boʻlib tuyuldi: bolta urish fikridan qaytdi. Oʻzini osish, tomirini kesish... barchasi ogʻir tuyuldi. Shu asnoda peshinga qadar gʻimirlab yurdi. «Bu koʻrguliklardan koʻra oʻlganim ming marta yaxshi», degan toʻxtamga keldi-yu, ammo oʻzini oʻldirmoqqa kuch topa olmadi.

Peshindan keyin esa... Pachoqburun paydo boʻlib, uni ovloqqa boshladi. Tursunali qor yuzasidagi bir tomonga qarab ketgan izlarni koʻrib, koʻpchilik oʻtganini fahmladi. Biroq «koʻpchilik taqdirimni qanday hal etar ekan?» degan jumboqqa javob topa olmadi. Butazor oralab ancha ichkarilashgach, sayhonlikka chiqishdi. Tursunali bu yerning qatl maydonchasi ekanini keyinroq bildi.

Ustidagi paxtaligi yechib tashlangan Murik koʻylakchan holda maydoncha oʻrtasida turardi. Ikki oyogʻining toʻpigʻidan bogʻlangan arqon uchlarini ikki yigit mahkam tutganicha tarang tortgan edi. Murikning orqa tomonidan Koshak, roʻparasidan Tengiz, sal naridan esa Qoʻtos joy olishgan edi. Uchovlari maydonchada paydo boʻlgan Tursunaliga oldinma keyin qarab qoʻyishdi.

— Sen oʻzingni burgut deb oʻylovmiding? — dedi Tengiz Murikka yuzlanib. — Ana, changal solmoqchi boʻlgan oʻljang keldi. Murikjan, seni kim oʻgʻrilar oilasiga tavsiya etgan, kim qabul qilgan, bilmay- man-u, ammo unisi ham, bunisi ham oʻzingdan battar ahmaq ekaniga yuz foiz ishonaman. Oʻgʻri degan sal aqlliroq boʻlishi kerak. Bu yerlarning xoʻjayinlari bizlar ekanimizni yaxshi bilarding, a? Bilib turib bizning yerlarda ov qilmoqchi boʻldingmi? «Bular bir laqma, ogʻziga pashsha qoʻndirib yotishadi», deb oʻyladingmi? Umuman fikringda jon bor. Men laqma boʻlsam kerak. Koshak, sen-chi? Sen ham laqmamisan?

Koshak xoxollar tushunishi mumkin boʻlgan tarzda bir soʻkindi-da, Murikning gardaniga musht tushirdi. Oyoqlari bogʻlangan Murik uchun ana shu zarbaning oʻzi kifoya qildi — yuztuban yiqilib bir necha daqiqa harakatsiz yotdi.

— Suzishni bilmasang nima qilarding oʻrdak ovlab. Qani, tur, tuqqan xotindek yalpayib yotma.

Murikning bu yotishi ayyorlik chegarasidan narida edi. Bundan oldingi mushtlarning zarbalari qoʻshib hisoblansa, uning ahvoliga achinish ham mumkin. Ne afsuskim, mazkur olam ongidan odam joniga achinish, ayash kabi tushunchalar oʻchirib tashlangan. Alhol, Murikning holiga achinmoq ham nooʻrindir. Chunki «qaytar dunyo» deganlar-ku!

Murik qorga yuzini bosib, picha orom oldi. Tengizning gaplari qulogʻiga kirguniga qadar davom etgan bir necha lahza tanga ozgina rohat bersa-da, ruhi azobdan chirqirayverdi. U Gogikning taklifiga uchgan onlarini eslab, uni ham, oʻzini ham la'natladi. Gobelyan nima uchun Gogikni bu ishga joʻnatmaganini Koshakning birinchi mushtidan keyinoq tushunib yetdi. Hammasini oʻylagan edi, reja qilgan edi. Oʻgʻrilar nafratiga uchrashi aniqligini ham bilgan edi. Faqatgina jazoning bu qadar tez kelishi va ogʻir boʻlishini hisobga olmagan edi.

Yana picha orom olish maqsadida oʻrnidan qimirlamagach, tovonidan tepki yedi. Shundan soʻnggina qaddini koʻtara boshladi.

- Valeriy Ivanovich, sen burgutning oʻrdak ovlaganini eshitganmisan?— dedi Tengiz Qoʻtosga qarab.— Eshit, bu qiziq hangoma. Bir nodon burgut... Qara-ya, burgutlarning ham nodoni boʻlar ekan, oʻsha nodon burgut oʻrdak ovlamoqchi boʻlibdi. Endi oʻrdakka chang solaman, desa oʻrdak shartta suvga shoʻngʻib ketarmish. Shunda burgut astoydil qasd qilib oʻrdak tomon oʻqdek uchibdi. Oʻrdak bu safar ham suvga shoʻngʻigan ekan, «endi qutulib boʻpsan!» deb u ham shoʻngʻibdi. Oʻrdak esa suv yuzasiga chiqib, qanotlarini yoyibdi-yu, uchib ketibdi. Burgut esa suvga boʻkib oʻlibdi. Qalay, Valeriy Ivanovich?
- Nima demoqchisan? Shu itpashshani burgutga o'xshatyapsanmi? dedi Qo'tos ensasi qotib.
- Yoʻq-oʻq, Valeriy Ivanovich, kelib-kelib shuni burgutga oʻxshatamanmi? Bu jonivor oʻz nomi bilan Murik! Sen esa buni itpashshaga oʻxshatyapsan. Itpashshalarni ranjitma. Valeriy Ivanovich, harholda ular orasida qanjiqlari yoʻqdir.

Murik qaddini rostlagach, Tengiz barmoqlari uchi bilan uning iyagini ushladi-da, boshini Tursunali tomon burdi:

- Xo'sh, bu laqmada nima ishing bor edi?
- Yolg'iz o'zingga aytaman, dedi Murik.
- Hilvatda achomlashib turadiganlarga oʻxshab gapingni qulogʻimga aytasanmi? Koshakka ishonmaysanmi? Yo Valeriy Ivanovichdan hadiksirayapsanmi? Ularni qanjiq deb oʻylayapsanmi?

Bu gaplardan so'ng Koshak yana musht hozirlagan edi, Tengiz bir imo bilan uni to'xtatdi.

- Noz-ishvalaringni hali tramvayga qo'yganimizda qilarsan, deb davom etdi
 Tengiz, qani, ayt!
- Bular boy bo'lishadi, dedi Murik, ozginasini baham ko'rsin, devdim, hammasini olmayman, dedim.
 - Qaerga berkitgan ekan?
 - Molxonada...

Murik shunday deyishi bilan Tengiz uning qorniga mushtladi. Soʻng yiqilib tushmasin, deb sochlarini changallab, boshini koʻtardi.

- Bunchalar ahmaq boʻlmasang, sen xunasa! Bu laqma senga aytganini bizga aytmaydimi?
- Gapimni oxirigacha eshitmading, Knyaz! dedi Murik ixranib. «Molxonaga yashirganman» demagin, dedim unga. Keyin... aytdi... Yertoʻlada ekan...
 - Gobelyan bilan ganagasiga kelishgansan?
- Uchdan biriga. Biri Gogikka, biri unga. Bu ishga meni Gogik tortdi. Qanjiq deyiladigan boʻlsa, oʻsha gʻirt qanjiq. Meni emas, uni oʻldirish kerak.
- Seni kim oʻldirmoqchi boʻlyapti, Murikjan?.. Gogikning esa oʻz hisob-kitobi bor. Sen uning taqdiri uchun qaygʻurmay qoʻyaver. Sen bizga ikkinchi topshirigʻingni ayt.
 - Avvalgi kuni oʻzingga aytganman. Mening bilganim shu.
 - Ular nima uchun seni tanlashdi?
- Bilmayman. Mening bilganim: yana uch-toʻrtta odamga buyurilgan. Har xil lagerlarda odam tanlayapti. Ularning kimligini bilmayman. Knyaz, qoʻrqityapti, deb oʻylama. Ammo menga bir narsa boʻlsa, ular seni tinch qoʻyishmaydi.

Tengiz tislanib, Tursunalini chaqirdi-da:

- Seni urdimi? - deb so'radi.

Tursunali Murikka xavotir bilan qarab sekingina «Ha», deb qoʻydi.

— Qanday urgan boʻlsa, sen ham shunday ur. Haqqing qolmasin. Boradigan yeriga qarzsiz borsin. Qani, lalayma, ur!

Tursunali bu gap chinmi yo hazilmi ekanini bilmay, gangib qoldi.

Hoy, it! Senga aytyapti, ur! — deb buyurdi Koshak.

Tursunali shunda ham jur'at etmagach, Tengiz so'kinib, boldiriga tepib qoldi. Tursunali bu zarbdan bir munkib tushdi-yu, o'zini tezda o'nglab oldi. So'ng buyruqni bajarmasa o'ziga yomon bo'lishini anglab Murikning yuziga teskari shapalog tushirdi.

— Murikjan sen shunday urganmiding? — dedi Tengiz. — Ancha ishdan chiqib qolibsan-da. Hezalakchasiga uradigan oʻgʻri oʻgʻrimi, a Koshak? — Savolga javoban Koshak zaharli tirjaydi. Tengiz esa Tur-sunaliga qaradi: — Shu bitta shapaloqqa iching oʻtib ketdimi? Koshak, boʻsh vaqt topib sen bunga urush qanaqa boʻlishini oʻrgatib qoʻyishing kerak ekan.

Koshakning bo'sh vaqti hozirga to'g'ri kelib, buyruq ijrosini hayallatmadi. Tirjaygan holda Tursunaliga yaqinlashdi. O'ng qo'li bilan yuzini silab turdi-da, chap qo'li bilan bexosdan qorniga mushtladi. Tursun-ali bukchayishga ulgurmay musht yeb uch qadam nariga uchib tushdi. Tengiz tepishga chog'lanib borayotgan Koshakning yo'lini to'sdi:

- Birinchi darsga shu ham yetadi. Endi Murikning pichog'ini olib ber. Cho'mich, sen o'g'rilar olamiga zarracha foyda keltirmagansan. Shunday bo'lsa ham haqiqiy o'g'ri sifatida o'lishingga imkon beramiz.
- Knyaz, unday qilma, oʻzingga yomon boʻladi! deb xitob qildi Murik jon achchigʻida.

Tengiz unga oʻqdek nigohini qadab jim qoldi. Murik aytmasa ham oʻziga qiyin boʻlishini yaxshi biladi. Murikni yollab, vazifa yuklaganlar uning oʻlimiga achinganlari uchun emas, balki topshiriq chala bajarilgani uchun ham gʻazab otiga minadilar. Ilonning dumi bosib olinsa chaqadi, deydilar. Ammo ilon ba'zan chaqolmasligi ham mumkin ekan. Lekin Murikni yollaganlar chaqmasdan qoʻyishmaydi. Kechagi «politbyuro» yigʻinida kutilajak bu holat ham nazardan chetda qolmagan edi. «Shunday qilish kerakki, ilon kimni chaqishni aniq bilmay chalgʻisin», degan toʻxtamga kelgan «politbyuro» chalgʻitish yoʻlini izlab topishni Tengizga yuklagan edi.

Kecha Murik Tursunalini ovloqqa boshlaganidayoq Tengizga xabar yetgan edi. Tengiz birinchi «suhbat» «doʻstona» boʻlishini bilgani uchun ularning izidan odam joʻnatmadi. U uchun eng muhimi — Murikning Tursunaliga qopqon qoʻyishi. Nuriddin Tengizni yoʻqlaganida «politbyuro» aynan Murikning taqdirini hal qilayotgan edi.

Tengiz avvaliga oʻlimning yaxshi usulini topganday edi. Murikka «hech kimdan gumon qilmanglar, jonimdan toʻyib oʻzimni osyapman», qabilida xat yozdirib olmoqchi edi. Hozir boshqa durustroq usul xayoliga kelib, dastlabki fikridan qaytdi.

- Murikjan, aqlli bola pichog'ini o'zi oladi. Sen aqllisan, a? Koshak, to'xta, unga tegma. Sen ham pichog'ingni ol.
 - Shu itpashsha bilan olishamanmi? dedi Koshak norozi ohangda.
- Men senga pichogʻingni ol, dedim. Olishasan, demadim, Tengiz Koshak uzatgan dudamani olib, choʻntagidan roʻmolcha chiqardi-da, yaxshilab artdi. Keyin choʻk tushib oʻtirgan Tursunalini chaqirdi: Hoy, laqma, bu yoqqa kel. Tirik qolishni istasang, oʻzingni himoya qil. Ma, ushla!

Tursunali pichoq emas, zaharga toʻla, chaqishga shaylanib turgan chayon uzatilayotganday seskanib ketdi. Bosh chayqab, yarim qadam tislandi.

- Men umrimda... odam oʻldirmaganman, dedi gʻudranib.
- Senga odam oʻldir, demadim. Oʻzingni himoya qilgin, deyapman. Yo oʻlasan, yo oʻldirasan, boshqa chorang yoʻq.

Koshak orqasiga oʻtib, yumshoq yeriga bir tepgach, Tursunali beixtiyor ravishda pichoqqa qoʻl uzatdi.

— Ha, oʻgʻil bola, shunaqa boʻlsin. Murikjan, ana, hayoting oʻz qoʻlingda.

- Knyaz, ayt, oyoqlarimni yechishsin.
- E, yoʻq, sen professionalsan, Murik, bu esa bir laqma. Erkak boʻlib bugun qoʻliga pichoq olyapti. Bizni qiziq tomoshadan mahrum qilma, Murikjan, Tengiz shunday deb bir arqonning uchini oʻzi qoʻlga oldi. Qani, Choʻmich, burgutmisan yo itpashshamisan, boshla!

Murik Tengizga qarab oldi-da, soʻng gangib turgan Tursunali tomon qadam tashladi. Avvaliga arqonni boʻsh qoʻyib berdilar. Murik uch qadam yurgach, kutilmaganda sapchib, Tursunaliga tashlandi. Yaxshiki u moʻljalni sal noaniq oldi — oʻljasiga ozgina yetmadi. Ammo pichoqning uchi Tursunalinig iyagini tilishga ulgurdi.

— Hoy, it! Nimaga qarab turibsan, ur! — deb baqirdi Koshak Tursunalini turtib.

O'ljasiga yetolmay yuztuban yiqilgan Murik Tursunali tomondan hamla kutib, tezgina o'rnidan turdi. Tursunali esa pichoq urish o'rniga tisarilmoqchi bo'ldi. Ammo orqasida turgan Koshak unga yo'l bermadi.

Shu paytgacha tomoshabin kabi chetda turgan Qo'tos Tursunaliga yaqinlashdi:

— Oʻlging kelmayotgan boʻlsa tashlan. Bu yerda ikkovingdan biring oʻlishing shart. Qoʻrqma. Odam oʻldirish sen oʻylaganday ogʻir ish emas. Dahshat ham emas. Sen eng yaxshi koʻrgan odamingni koʻz oldingga keltir, sen oʻsha yaxshi koʻrganing uchun yashashing kerak.

Eng yaxshi koʻrgan odami... Kim boʻlishi mumkin? Xotinimi? Bolalarimi, yo... Nafisasimi?.. Hozir ularni oʻylaydigan ahvolda emas edi u. Hozir oʻz jonini saqlab qolishnigina oʻylardi. Bu bejiz emas, chunki eng yaxshi koʻrgan odami — OʻZI edi.

Murik esa Tengizning gapiga inonib, jonini saqlab qolish uchun astoydil hamla qilar edi. Oyogʻi bogʻlanmagan boʻlganida dastlabki daqiqadayoq Tursunali naq enasini koʻrishi aniq edi.

Gangib, dovdirashi chekingani bilan qoʻrquv hali Tursunalini tark etmagan edi. Bir necha soatdan beri oʻzini oʻldirish fikrida yurgan odam endi oʻlimdan qoʻrqayotgan edi. U qorongʻu lahaddagi guvalaga bosh qoʻyib yotishdan (ajab! Bu yerda oʻlsa lahad ham, guvala ham nasib etmaydi unga), soʻng boʻlajak hisob-ki- tobdan, keyin esa naqd qilib qoʻyilgan qabr azoblaridan, soʻng qiyomat kunidagi ayanchli taqdiridan emas, bu aldamchi dunyo hayotini tashlab ketishdangina qoʻrqardi.

Murik navbatdagi hamlasida yiqila turib Tur-sunalining paxtaligini tilib yuborishga ulgurdi. Shundan soʻng Tengiz arqonini tashlab, Tursunaliga yaqinlashdi.

— Oʻlging kelmayaptimi? — dedi past ovoz bilan. — Yashashni xohlaysanmi? Toʻgʻri qilasan. Kel, savdoni pishirib qoʻya qolaylik: tarozining bir pallasiga joning, ikkinchisida yashirib kelgan boyliging turibdi. Qaysi birini tanlaysan? Faqat boyligim yoʻq, deb mingʻirlama. Bu eski ashulang jonimga tegdi. Men balki ahmaqdurman. Ammo Gobelyan ahmaq emas. Bir narsaning isini olmasa, shunchalik ovora boʻlmaydi. Men seni qiynagim kelmayapti. Agar xohlasang oyogʻing-dan osib qoʻyishim mumkin. Murikjan esa tovoningdan boʻgʻzinggacha tilib bir rohatlanadi. Agar xohlasa teringni shilib, tuz sepib qoʻyishi ham mumkin.

Bu gap Murikning kechagi po'pisasini eslatib, rostdan ham terisi shilinib tuz sepilganday badani qaqshab ketdi.

— Xoʻsh, qaysi biri ma'qul senga? Boylikni sen mehnat qilib topmagansan. Senga baribir buyurmaydi. Hatto bizga ham buyurmasligi mumkin. Boylik oʻzi shunaqa boʻladi. Birovga vafo qilmaydi. Boylik nima, bilasanmi? Nozaninga aylangan bir ajdaho. Qipyalangʻoch nozanin koʻrinishida qoʻyningga kiradi. Vujuding rohatlanadi. Keyin esa asliga — ajdaho holiga kirib oʻt purkaydi, hammayogʻingni kuydiradi. Sen, ahmaq esa yashirganingni hali ham nozanin deb oʻylayapsan. Senda kalla yoʻq, u allaqachon ajdahoga aylanib boʻlgan. Bu yerdan tirik qaytganingda ham seni nozanin quchogʻiga

olmaydi. Ajdaho baribir kuydirib oʻldiradi. Men sen ahmaqni ajdahodan qutqarmoqchiman. Qani, ayt!

Tursunali oʻgʻridan bunaqa ma'nili gap kutmagani uchun ajablandi. Tengiz esa uning pichoq ushlagan qoʻlini mahkam changallab, tigʻni biqiniga tiradi. «Bir siltasa, tamom, — deb oʻyladi Tursunali. — Jon ham ketadi mol ham birovlarga qoladi. Gapi toʻgʻri bu oʻgʻrining. Hid olishgandan keyin topmasdan qoʻyishmaydi. Bunisi boʻlmasa boshqasi izimdan iskab yuraveradi. Padariga la'nat! Otlar topib, eshaklar yeydigan zamon ekan. Oʻsha boylikni toʻplayman, deb boshim balolarga qoldi. Endi ham tinchitishmasa aytay, balodan qutula qolay... Soʻzida turmasa-chi? Ertaga shart-ni buzaman, deb tursa-chi? Nima boʻlsa ham peshonamdan koʻrdim. Aytaman...»

Shu qarorga kelib, aytdi. Tengiz diqqat bilan eshitdi. «Aldamayapsanmi, aldasang — oʻlasan!» deb poʻpisa qilmadi. Koshakka qarab bir im qoqdi-da, chetga chiqdi. Maqsadni anglagan Koshak jun qoʻlqopni kiydi-da, tiz choʻkib oʻtirgan Murikdan pichoqni tortib olib, Tursunali tomon yurdi. Tursunali nima gap boʻlayotganini fahmlashga ulgurmadi. Koshak tirjayganicha unga yaqinlashdi-da, chaqqon tarzda engashib, boldiriga pichoq urdi. Tursunali «oh! deganicha qoʻlidagi pichoqni tashlab yuborib, boldirini changalladi.

— Dod dema, toʻygacha tuzalib ketadi, — dedi Qoʻtos unga qarab kulib.

Koshak esa Tursunali tashlagan pichoqni oʻng qoʻliga oldi-da, bu manzaradan ajablanib oʻtirgan Murikka yaqinlashib oyoqlarini kerganicha tirjayib turdi. Soʻng chap qoʻlidagi tugmali pichoqni unga uzatdi. Murik pichogʻini qoʻliga olib oʻrnidan turaman, deganida Koshak uning boʻgʻzini tilib yubordi. Favvora boʻlib otilgan qon qor yuzini birpasda qizilga boʻyadi. Koshak esa, Tengizga qarab tirjayib qoʻygach, Murikning boʻgʻzini kesqan pichoqni Tursunalining yoniga tashladi.

Yigitlar Murikning oyogʻidagi arqonni yechib olishgach, barchalari bir zumda gʻoyib boʻlishdi. Tursunali bu yerda qolishi xavfli ekanini anglab, sudralganicha iziga qayta boshladi. Lekin koʻp yurolmadi. Yugurib kelayotgan soqchilar qoʻliga tushdi.

Ikkinchi bayon: FARJOM

DUNYO MANZILINING OXIRI

Nafisani qarg'adilar:

- Oʻynashi bilan yotgan ekan, sharmanda! Oʻldirgan odam savobga qolibdi...

Sanjarni la'natladilar:

— Suyuqoyoqqa ilakishib yurgan ekan, yigit oʻlgur. Toʻrt bolasi koʻziga koʻrinmabdida...

Bu gaplarga, xulosalarga hali fursat bor.

Hozir esa... militsiya telefoni jiringlaydi. Nav-batchi leytenant qulogʻiga tutadi. Soʻng xirildoq ovozli odam «Allo, qizimni oʻldirib ketishibdi», dey- di-yu, hoʻngrab yigʻlaydi. Oʻzini yigʻidan toʻxtatolmagan tarzda manzilni arang ma'lum qiladi.

Jinoyatga oid qidiruv boʻliminig inspektori kapitan Omonullo Yigitaliev tish ogʻrigʻidan ezilib oʻtirganida unga ikki odamning oʻldirilgani haqidagi xabarni yetkazdilar. «Doʻxtirga kirib kelaversam boʻlarkan», deb oʻyladi u ma'lumotlarni yozib olgach. Omonulloning ayrim harakatlariga qarab hayron qolish mumkin. Qurolli jinoyatchiga yuzma-yuz boʻlishdan, otib tashlar yoki pichoq urar, degan xavotirdan yiroq bu odam em ignasidan

qoʻrqardi. Tish tabibi-ku uning koʻziga Azroil kabi koʻrinar, nazarida u tishni emas jonni sugʻurib oladiganday boʻlardi. Ikki kundan beri jagʻ tishi zirqiraydi. Ikki kundan beri moʻʻjiza kutadi: ogʻriq oʻz-oʻzidan toʻxtar, deb umid qiladi. Bu tun ogʻriq zabtiga olganda «tong otishi bilan borib shartta sugʻirtirib tashlayman», deb qasd qildi. Tong otdi. Ahdiga vafo qilib tish tabibiga bordi. Ammo uning shijoati, dadilligi tabib xonasining ostonasiga qadar yetdi. «Birpas nafasimni rostlay», deb oʻzini oʻzi aldab, oromkursiga oʻtirdi. U kabi «botir»lar hali tabibga yetib kelmagan, qabulxonada uning oʻzi tizzasi qaltiragan holda oʻtirardi. Tabib qiya ochiq eshikdan qarab-qarab qoʻyib, oxiri ostonaga keldi-da, «menga kirmoqchimisiz?» deb soʻradi. Omonullo beixtiyor ravishda bosh chayqab, «yoʻq» dedi. Soʻng ajablangan tabibga qarab «oʻrtogʻimni kutyapman», deb izoh berdi. Nazarida tabibni koʻrishi bilan tish ogʻrigʻi toʻxtaganday boʻldi. Tabib joyiga qaytishi bilan u oʻrnidan turdi. Xuddi tabib yana qaytib, «qani bu yoqqa yur-chi», deb zoʻrlaydiganday tez-tez yurib tashqariga yoʻl oldi. Ishxonasiga yetib kelishi bilan ogʻriq yana oʻz zulmini oʻtkaza boshladi. Ana shu paytda telefon jiringlab uni qotillik sodir boʻlgan manzilga daʻvat qildi.

Omonullo prokuratura vakili bilan uy yoʻlagida uchrashdi. Dum-dumaloq koʻzlari kibr bilan boquvchi, sochlari silliq taralgan, sargʻish qaldirgʻoch moʻylovi oʻziga yarashmagan bu yigitni shahar prokuraturasida dastlab koʻrganida «ish bilan kelgan ashulachi boʻlsa kerak», deb oʻylagan edi. Ikkinchi marta koʻrganida kim ekan, deb surishtirib, kimning oʻgʻli ekanini bilgach, «ishqilib shunga roʻpara boʻlmay», deb niyat qilgan edi. Oʻshanda farishtalar teskari duo qilishganmi, mana, bugun unga roʻpara boʻlib turibdi. Omonullo oʻzidan ancha yosh boʻlgan bu yigitdan salom kutib yanglishdi. Unga yaqinlashib, oʻzini tanitdi.

- Men shahar prokuraturasidanman. Mels Abdullaevich Xoʻjaev, dedi yigit qoʻl uzatib.
 - Taniyman sizni, dedi Omonullo iltifotsiz ohangda.
 - Ishni mening nazoratimda yuritasiz, dedi Mels unga buyruq ohangida.

Agar tishi zirqirab turmaganida ensasi qotganini yashirmay, odatiga xilof qilmagan tarzda «qulingiz boʻlayin», degan mazmunda piching toshi otishi tayin edi. Hozir bu oliftaga shu pichingni ham ravo koʻrmay qoshini chimirib qoʻya qoldi.

Zinadan koʻtarilishgan sayin dimoqlariga yomon hid urilib, koʻngillarini behuzur qila boshladi. Omonulloga bunday hid tanish. Sasib yotgan murdalarni birinchi koʻrishi emas. Mels Xoʻjaevning esa koʻngli behuzur boʻlib choʻntagidan roʻmolcha chiqarib burnini berkitdi. «Bunaqa ishga endi roʻpara boʻlishidir, — deb oʻyladi Omonullo. — Lekin bu oliftaligiga qaraganda yuzinchi marta roʻpara boʻlsa ham burnini jiyiraveradi. Bunaqa yigitlarga doʻkonda qizlarning siynabandini sotib oʻtirish yarashadi.»

Omonullo o'z aqli, bilimi bilan o'qib, ishda ham o'z farosati, tajribasiga suyanib yurgani uchun «falonchining oʻgʻliman yoki jiyaniman», deb tirgovichlar yordamida oʻqigan, suyanchiqlar koʻmagida ishlab, «nodir mutaxassis» sifatida amal pogʻonalariga ko'tariladigan nusxalarni yoqtirmas edi. Mels Xo'jaevni shu toifadan deb bilib, hali uning aqli farosatidan xabar topmayoq, ensasi qotdi. Bepisand tarzda «ishni mening nazoratimda yuritasiz», deyishi farosat darajasini oʻlchash uchun kifoya qildi. Iriy boshlagan murdalar yotgan xonaga kirayotib Omonullo «Ey Xudo, dumbulboyvachchaga ro'para qilguncha qolgan o'ttizta tishimni ham og'rita qolsang ming marta yaxshi edi», deb qo'ydi.

Erkakning murdasi hammom eshigi ostonasida, ayolniki esa oshxonada yotardi. Mels Xo'jaev erkakning murdasi ustidan hatlab oshxonaga o'tdi-da, suratga olayotgan kishiga qarab:

— Murdalarni joyidan jildirmadingizmi? — deb soʻradi.

Bu savoldan ajablangan suratchi yelka qisib qo'yib, Omonulloga qaradi. Uning ajablangani bejiz emas: shu sohada qirq yildan beri ishlayotgan bo'lsa hali biron marta murdani yotgan joyidan jildirmagan, boshqalardan bu kabi tanbehnamo savolni eshitmagan ham edi. Omonullo «xo'p deyaverasiz-da, endi» deganday ko'z qisib qo'ydi.

— Har bir buyumdagi barmoq izlarini olinglar. Qoʻshnilarni soʻroq qiling. Sinchiklab ishlanglar. Men oʻzimda boʻlaman, kirib oʻtarsiz.

Mels Xo'jaev shunday deb ko'rsatmalar bergach, tez-tez yurib chiqdi. Turli jinoiy ishlar bo'yicha Omonullo bilan birga ish yuritadigan guruh a'zolari uning bu qilig'idan noroziliklarini yashirmay bir-birlariga savol nazari bilan qarab qo'ydilar. Omonullo «e'tibor bermanglar», deganday qo'l siltab, ayol murdasi ustiga choyshab yopayotgan tibbiy ekspertga yuzlanib so'radi:

- O'ldirilganiga uch kun bo'lgandir?
- Ha, ikki-uch kun orasida. Ikkovi ham bir xilda pichoglanibdi.
- Bir xilda?
- Ha, aniqroq xulosani yorib koʻrganimizdan soʻng aytaman. Hozir olib ketaveraylikmi?

Omonulloning ruxsati bilan murdalar choyshabga oʻralib olib chiqib ketildi. Shundan soʻng Omonullo «depara militsiyasidanman», deb oʻzini tanishtirgan yigitdan «kim xabar qilibdi, bildingizmi?» deb soʻradi.

- Marhumaning otasi. Ichkari uyda o'tiribdi. Alamdan kuyib ketyapti.
- Bolasi boʻlgandan keyin kuyadi-da. Otamlatsang otamlatgin, boʻtamlatmagin, Omonullo shunday deb beixtiyor jagʻini ushladi.
 - Nima dedingiz, tushunmadim? dedi yigit.
 - Shunaqa maqol bor, dedi Omonullo og'riqdan aftini burishtirib.
 - Tishingiz ogʻriyaptimi? Bugun oʻzi gʻalati kun boʻldi. Mening boshim ogʻriyapti.
- Tishim ogʻriganda oldirib tashlovdim, dedi Omonullo, yigitning izidan katta xonaga kirib.

Deraza tokchasiga tirsagini tiraganicha boshini changallab oʻtirgan Toshbolta Omonulloning ovozini eshitib, orqasiga qaradi.

— Bandalik ekan, otaxon, Xudo sizga sabr bersin,— dedi Omonullo u bilan koʻrisha turib.

Toshbolta yaqin odamidan hamdardlik soʻzlarini eshitganday avval lablari titradi, soʻng hoʻngrab yubordi. Omonullo uni yelkasidan quchib, «bardam boʻling», deb qoʻydi.

Toshbolta ovunguniga qadar xonaga nazar tashladi: televizor ustidagi surat uning diqqatini tortdi. Goʻzal juvon yonidagi malla odamdan nari qochmoqni ixtiyor etib, oʻng tomoniga surilmoqchiga oʻxshab oʻtiribdi. Koʻzlariga baxtiyorlik emas, loqaydlik muhrlangan. Malla odam esa goʻzal juvonga yaqinlashish istagida boshini u tomon sal egib olgan. «Bular kim boʻldi? — deb oʻyladi Omonullo. — Oʻldirilgan juvonmi? Yonidagisi-chi? Oʻlgan erkak malla emasdi, yoshroq ham edi...»

- Qizingizmi bu? deb so'radi Omonullo, Toshbolta yig'idan to'xtagach.
- Ha, dedi Toshbolta xo'rsinib.
- Yonidagi-chi?
- U... kuyov, eri...
- Eri? Qaysi? Omonullo shunday deyishga deb, nojo'ya savol berganini darrov fahmladi. Yaxshiki Toshbolta garangsib turgan edi. Yo'qsa, bu savolni eshitib «nima demoqchisan? Qizimning o'nta eri bormi?!» deb bobillab berishi tayin edi. Omonullo chalg'imaslik uchun gapni maromiga to'g'riladi:
 - Demak, bu kishi kuyovingiz. Oʻldirilgan-chi? U kim?
 - Tanimayman u buqachani! dedi Toshbolta zarda bilan.

«Buqacha? Nega unaqa deyapti? Qizining oʻynashimi u? Balki bu odam faqat qizining oʻlimidangina emas, nomus azobidan ham ezilayotgandir? Bechora...»

Shu fikrda Toshboltaga astoydil achindi. O'lim — haq. Rizq qirqilgan ekan, iloj yo'q. Ota bir kunmi, bir yilmi kuyar, oqibat dard sovib, taqdiriga tan berar. O'z umri shomining ham yaqinlashib qolganini fahm etib, farzandi bilan u dunyoda ko'rishmoq orzusida yashar. Lekin «o'ynashi bilan birga o'ldirilibdi», degan isnod o'ti sovumas, to joni chiqquniga qadar yurak-bag'rini kuydirib xarob qilar.

Shunday fikrdagi Omonulloning unga rahmi kelardi.

O, g'ofil banda! O'z qiziga o'lim eshiklarini ochib bergan zot aynan ana shu odam ekanini bilsami edi, unga achinmas, bil'aks, nafrat o'qlarining barini unga sochgan bo'lardi.

Dunyodagi odam zotining qarichi bir-biriga mos kelmaydi. Barmoq izlarining ham oʻxshashi yoʻq. Shu kabi baxt haqidagi tushunchalar ham bir-biriga oʻxshamaydi. Agar baxt oʻlchovli narsa boʻlsa edi, uni har kim oʻz qarichi bilan oʻlchaydi, demoq mumkin edi. Agar baxt koʻzga koʻringuvchi narsa boʻlsa edi, uni har kim oʻz koʻzi bilan koʻradi, desak yanglishmas edik. Ayrim odamlar rangni farqlay olmaganlari kabi baxt bilan baxtsizlikning chegarasini bilmaydilar. Masho-yixlar «senga asal boʻlib tuyulgan asli zahardir, zahar boʻlib tuyulgani esa asaldir», deb bejiz ogoh etmaganlar.

Bani Odam faqatgina baxt yoki baxtsizlik nima ekanini farqlay olmasa, unchalik ajablanmasa ham boʻlar, «farosatsiz, adashgan banda», deb qoʻyilar. Ammo oltmish yilga yaqin umr koʻrgani holda nima uchun odam boʻlib tugʻilganini, nima uchun yashayotganini, kaltakesakdan yoki suvarakdan nimasi bilan farqlanishini fahm etmasa, qanday xulosa qilmoq mumkin? Balki bunday kimsalar yorugʻ jahonda ozdir? Oz boʻlsada, shularning biri — hozirgina hoʻngrab yigʻlab, boʻzla-yotgan ota — Toshboltadir. Balki olam aro yagonadir. Agar shunday boʻlsa, oʻsha bittaginasi ham shuning oʻzidir.

Omonullo uning ichini qandaydir dard, qandaydir pushaymon kemirayotgandir, deb xayol qildi. Kishida dard, pushaymon boʻlmogʻi uchun ham iymon lozimligini esa fahm etmadi.

Ilohi bandaman, bechoradurman, Havoyi nafs ila ovoradurman. Erurman barcha nuqsonimg'a iqror, Musulmon o'g'li qilmas ishlarim bor...¹⁸

Bunday demoqlik uchun, bu iqror va tavba uchun Odam bolasiga nechog'lik iymon zarur?

Omonullo buni bilmaydi. Aniqroq aytilsa, bunday tushunchadan u ham yiroq.

Toshboltadagi iymon darajasini aniqlashga banda ojiz. Bu balki qabrga kirganda, balki qiyomatda aniq boʻlar, vallohi a'lam...

Ayni choqda u kuyib yigʻladi. Shu oqibatga olib keluvchi muqarrar boʻlgan yoʻlni oʻzi tanlaganini esa oʻylamasdi. «Hozir dard ichida shundaydir» dersiz? Balki... Ammo haqiqat shuki, dard sovuganidan soʻng ham oʻylamaydi buni. «Qizimga oʻzim oʻlim hukmini yozganman», demaydi.

Tursunalining osh-ovqatini pishirib yursa ham kam boʻlmas edi. Qoʻshmachilik qilishiga balo bormidi? Oʻz qizining nomusini nafsi uchun qurbon qiluvchi otalarni nima uchun yer yutmaydi ekan? Bundaylarni yer bagʻriga olmoqdan hazar qilar, oqibatda bundaylardan hatto doʻzax olovi ham nafratlanar...

¹⁸ Hazrat So'fiy Ollohyordan.

Toshbolta xojasining nafsi buzuqligidan foydalanib, uni qizining nomusi evaziga jilovlab olishni xayol qilgan edi. Bunga erishganday boʻldi ham. «Bir isqirtga xotin boʻlib koʻylak-ishtonlarini yuvib yurgandan koʻra, direktorning oʻynashi boʻlib, zebu-zarga burkanib yallo qilib yashagan afzal» — Toshboltaning hayotdagi falsafasi shu boʻldi. Ajabki bu «falsafa» qiziga ham ma'qul keldi. Tursunalining xumor qarashlariga mast boʻlgan qiz otasi koʻrsatgan yoʻlga osongina kirdi.

Jilva bilan chorlagan bu yoʻlning oxirida yuragiga pichoq sanchilajagini, qarovsiz iriy boshlagan murdasini choyshabga oʻrab olib chiqib ketajaklarini oʻshanda oʻylab koʻribdimi?

Endi diydiyodan ne foyda? Hukm ijro boʻldi — qilmishga yarasha ajr berildi.

Omonulloga bu xonadon ahlining hayoti qorong'u. Xonadagi horij jihozlarining ko'rkamligiga qarab turib «yomon yashashmas ekan», degan dastlabki xulosaga keldi, xolos.

Murdalarga koʻzi tushganida «er-xotin ekan-da», deb oʻylagan edi. Darvoqe, unga xabar berib, bu yerga yoʻllaganlarida «erkak-xotin oʻldirilgan», deyishgan, Omonullo esa buni «er-xotin» deb tushungan edi. Bu odam esa «Buqacha» deb turibdi. «Demak, oʻynashmi? Unda qotil kim? Erimi?.. Xotinini birov bilan aysh qilib yotganini koʻrib... Balki mana shu otaning oʻzidir? Qizining qiligʻidan isnodga qolib... Ular oʻynashganmi?.. Ikkovi ham kiyimda... Hatto ayol uy kiyimida emas... Balki endi boshlashmoqchi boʻlishganda...»

Omonullo oʻng tomondagi eshik balki yotoqxonadir, degan fikrda oʻsha tomon yurdi. Uning maqsadini anglagan Toshbolta «Bu yer mening xonam», deb izoh berdi. Bu izohning zamirida «bu xonaga kirmaganingiz ma'qul» degan maqsad ham mavjud edi. Omonullo bu maqsadni fahmlagan boʻlsa ham, e'tiborsiz tarzda eshikni ochib, ichkariga bir qadam qoʻydi: deraza yonida javon. Guldor gilam xonani enlab turibdi. Oʻrtada uchta katta jomadon, ikkita boʻgʻcha...

- Bular siznikimi? deb soʻradi Omonullo ostonaga yaqinlashgan Toshboltaga oʻgirilib.
 - Ha... bugun yoʻldan keldim.
 - Yoʻldan? Omonullo ajablandi. Qaysi yoʻldan?
 - Oshna-og'aynilar bilan qo'shilib, Irkutskka boruvdim.
 - O'ynaganimi?

Omonullo bu yoshdagi odamlarning Sibir tomonlarga o'ynagani bormasligini bilsa ham atay shu savolni berdi. Lekin o'zi kutgan «Ha», degan javobni olmadi. Toshbolta jomadonlarga xavotir ko'zi bilan boqdi-da:

- Ozgina pamadori olib bordik. Tomorqadan...— dedi.
- Tomorqadan? Tomorqa... shu uydami?
- Bu uyda tomorqa nima qiladi? Men bu yerda muqim turmayman. Asli choʻlda yashayman. Bu buyumlar meniki emas. Sheriklarimniki. Ichida nimalar borligini ham bilmayman.
 - Sheriklaringiz kim edi?

Toshboltaning rostdan ham sheriklari bor edi, ularni nomma-nom aytdi. Omonullo yon daftar chiqarib yozib oldi. Yoza turib «ishiga pishiq bu odam. Qizi oʻlib yotgan boʻlsa ham, jomadonlarini olib kirib joylashga oʻzida kuch topibdi. Qoyilman... Balki boshqa narsalarni ham joylab tashlagandir?..» — deb oʻyladi.

- Sheriklaringiz uygacha birga kirishdimi?
- Yoʻq, ular shahar aylangani ketishuvdi.
- Demak, biror soatlardan keyin kelib golishadimi?
- Kim biladi? Balki kelishmas, qishloqqa jo'navorishar.

- Buyumlari-chi?
- Buyumlari tursa turaveradi, sasib ketarmidi?
- Poezdda keldinglarmi yoki samolyotdami?
- Samolyotda bosh aylanadi, ham qimmat. Bizlarga poezd durust.
- Biletni tashlab yubormagandirsiz?
- Biz qishloqi odam, bilet-miletni bilmaymiz. Paravodnik bilan kelishib kelaverganmiz. Ketishda ham shunaqa boʻlgan.
 - Pravodnikning otini bilasizmi? Nechanchi vagon?
 - Nima, mendan gumon qilyapsizmi? O'z qizimni-ya?!
- Kimdan gumon qilishimni oʻzimga qoʻyib bering. Eshikni birinchi boʻlib siz ochib kirgansiz, xabarni ham siz bergansiz. Mening odatim shunaqa, ishni shu birinchidan boshlayman. Qaysi vaqonda kelgansiz?
 - Yettinchi.
 - Kuyovingiz gaerda?
 - Kuyovim... ishda bo'lsa kerak?
- Ishda? Bular oʻldirilganiga uch kun boʻlgan. Kuyovingiz uch kundan beri ishdami? Kasbi nima kuyovingizning?
 - Kuyovim olim. Yoz paytlari bir kun uyda bo'lsa o'n kun tog'da yuradi.
 - Geoloami?
- Unisini bilmadim. Lekigin toʻgʻri Maskovning oʻzi bilan gaplashadigan bola. Tagida vertoleti bor.
 - Farzandlari... yoʻqmi?
 - Yo'q...
 - Turmush qurishganiga qancha bo'ldi?
- Ikki-uch yil boʻldi... Qizim uning ikkinchi xotini. Avvalgisidan ajralib, ancha vaqt xotinsiz yurgan ekan.

Omonullo katta xonaga, undan dahlizga qaytdi. Oshxonaga qaradi. Hamma yoq sarishta. Yaqin orada birov bunda choy ham ichmagan. Omonullo chap tomondagi eshikni ochdi. Yotoqxona ham sarishta. Oʻrin usti hatto gʻijimlanmagan. Omonullo oshxonadagi ekspertni yoniga chaqirdi:

— Oʻrin ustini, piyolalarni tekshirish esdan chiqmasin. Eshik qulfini ham koʻrish kerak. Begona kalit tushgan-tushmaganini menga aniqlab berasiz.

Ekspert «xo'p» deb iziga gaytgach, Omonullo yana Toshboltaga yuzlandi:

- Uyga kirib hech narsaga tegmadingizmi?
- Nimaga tegaman? Oʻzim bu ahvolda... dedi Toshbolta yigʻlamsirab. Uka, shu yoshga kirib bir roʻshnolik koʻrmagan odamman. Mening boshimga tushganlar itning boshiga tushmasin. Shu yoshga yetganimda menga ilmang bu qotillikni.

Omonullo bu gapdan achchiqlandi.

- Kim sizga ilyapti?— dedi ovozini balandlatib.
- Hozir-ku ilmassiz... keyin jinoyatchini topolmasangiz men siz uchun tappa-tayyor goʻshtman. Bilaman, hali mening hayotimni ham kavlashtirasiz. Qamalib chiqqanimni bilganingizdan keyin osongina menga ilib qoʻya qolsiz. Xudodan qoʻrqing, uka, bunday qilmang.

«Nima qilay: soʻkib beraymi yo tushuntiraymi?» deb oʻyladi Omonullo. Keyin soʻkish ham, tushuntirish ham foydasiz, degan toʻxtamga kelib, xuddi hech qanday tuhmatni eshitmaganday soʻroqni kelgan joyidan bir maromda davom ettirdi:

- Uyga kirganingizda yozugʻliq dasturxonni koʻrgandirsiz. Yoki piyolalar yuvuqsiz boʻlgandir. Shularni yigʻishtirmadingizmi?
 - Hech narsaga tegmadim, faqat tilpon qildim, dedi Toshbolta zardali ovozda.

- Leytenant! Omonullo shunday deb dahlizda turgan yigitni chaqirdi. Depara vakili chaqiriqqa mahtal turganday shu zahotiyoq ostonada paydo boʻldi: Murdalarning shaxsi aniqlandimi?
- Bittasi aniq: Nafisa Boltaeva. 1959 yilda tugʻilgan. «Umid» kooperativida hisobchi boʻlib ishlaydi. Yigitning choʻntagidan faqat shu guvohnoma chiqdi, birga ishlashar ekan.

Leytenant shunday deb koʻk muqovali guvohnomani uzatdi. Omonullo guvohnomadagi suratda boqib turgan chehraga qarab «koʻrkam yigit ekan, oʻynash boʻlishga arziydi», deb qoʻydi. Soʻng yozuvlarni ovoz chiqarib oʻqidi: — «Faoliyati cheklangan «Umid» kooperativi. Sanjar Ibrohimov, Bosh direktor oʻrinbosari...» Tanirmidingiz bu odamni?

- Yoʻq,— deb javob qildi Toshbolta toʻnglik bilan.
- Leytenant, kooperativga borib xabar qiling. Marhumlarning shaxsini aniqlab, natijasini oqshomda menga yetkazasiz.

Leytenant itoat bilan chiqqach, Omonullo Toshboltadan kuyovi ishlaydigan joyning telefonini so'radi. Toshbolta avvaliga yelka qisdi, so'ng qizil muqovali daftarni varaqlab «O» harfli sahifani ochdi-da, yuqoriga katta-katta qilib yozilgan raqamlarga barmog'ini biqiz qilib ko'rsatdi:

— Shu bo'lishi kerak. Lekin o'zi tilponda o'tirmaydi, chaqirib berishadi. Qizim shunaqa deganday bo'luvdi.

Omonullo cho'ntagidan olgan ro'molchasi bilan go'shakni ushlab ko'tardi-da, daftarchadagi raqamni terdi. Dam o'tmay «Eshitaman, gapiring», degan ayol ovozi keldi.

- Menga Samandar Ochilov kerak, dedi Omonullo.
- Kim so'rayapti, nima ishingiz bor?
- «Olim odam ishlaydigan joyda ham shunaga qo'pol qaplashishadimi?»

Shunday deb o'ylagan Omonullo savolga keskinroq javob qildi:

- Men militsiyadanman. Nima ishim borligini oʻziga aytaman.
- Ochilov safarda.
- Qaerda, qachon ketgan?

Ayol darrov javob qaytarmadi. Omonulloning nazarida u kim bilandir gaplashib olganday boʻldi.

— Iltimos, oʻzingizni tanitsangiz, — dedi ayol bir daqiqalik sukutdan soʻng.

Omonullo kimligini aytgach, yana bir necha nafas jimlik hukm surdi. Soʻng goʻshakdan erkak ovozi eshitildi:

— Oʻrtoq kapitan, zarur gapingiz boʻlsa, kelib gaplashing. Telefonda aytib boʻlmaydigan ma'lumotlar ham boʻladi, oʻzingiz bilasiz.

Erkak shunday deb manzilni qisqa tarzda tushuntirgach, xayr-ma'zurni nasiya qilib alogani uzdi.

Omonullo ularning gap ohangidan «toʻgʻri Maskov bilan gaplashadigan bola»ning ishi Davlat siri majmuasiga aloqador ekanini fahmladi. «Tagida verto-lyoti» bor odamni topib gaplashish oson boʻlmasligini ham angladi.

- Qizingizning, turmushi yaxshimidi? Eridan hech nolimasmidi? deb soʻradi Omonullo goʻshakni jo-yiga qoʻygach.
 - Nimaga noliydi? Uyi bor, usti but, gorni to`q...
 - Farzand-chi?
- Farzandmi?.. Kuyovning ishlariga halaqit berar ekan. Bu ishlari ham to'g'ri: itvachchalarni ko'paytirishning nima keragi bor?

Omonullo bu gapni eshitgach, etlari jimirlashib ketdi. «Bu asli odammi yo molmi? — deb oʻyladi unga tikilib qarab. — Mol ham nasl qolirishga oʻzida tabiiy ehtiyoj sezadi. Oʻziga nabira boʻlishi mumkin goʻdakni «itvachcha» deyishi... Yo «shu kuyovdan tugʻilgan bola «itvachcha» boʻladi», demoqchimi? Kuyovni yoqtirmaydimi?»

- Qizingiz yosh, chiroyli ekan, dedi Omonullo undan ko'z uzmagan holda. Kuyovingiz rashk qilmasmidi?
 - Bilmadim... Qizim siz o'ylagandek chakki yurmagan.
- Men o'ylagan? Omonulloning tishi zirqi-rab, jag'ini ushladi. Men hali bunaqa o'yga kelmadim.
- Savollaringiz g'alati-ku? Surishtirishingiz ham... Qizimning chiroyli bo'lgani bilan nima ishingiz bor?
- Bilib qoʻying, dedi Omonullo unga qoʻlini bigiz qilib, qizingizga aloqador gap kattami, maydami farqi yoʻq ishimiz boʻladi. Sizning ishingiz esa, mening savollarimga toʻgʻri javob qaytarish, menga tanbeh berish emas. Tushundingizmi? Avval kamalgan boʻlsangiz bunaqa gaplarni yaxshi bilishingiz kerak. Ana endi ayting: kuyovingiz bilan qizingiz qaerda, qay tarzda tanishishgan?
- Bilmayman. Qizimni qaerdadir koʻrib yoqtirib qolgan ekan. Sovchi qoʻydi. Oʻrtada nozik odam turgan edi, xoʻp, dedik.
 - Sovchi kim edi?
 - Sovchimi?... U hozir yoʻq.
 - O'lganmi?
 - Nega o'larkan? Qamoqda u. Sovxozimizning direktori edi, tuhmat bilan ketdi.

Omonullo Tursunalining ismi-nasabini yozib olish chog'ida ko'z qiri bilan Toshboltaga qarab unda yengil sarosima sezdi. «Harholda bularning nikohida bir sir bor, — deb o'yladi u. — Yosh, go'zal qizning bunaqa taviyaga ikkinchi xotin bo'lib tegishi qiziq...»

Omonullo Tursunalini surishtira boshlaganida Toshboltaning ovozida hadik sezildi, barmoqlari esa yengil titradi. «Hali bu «bechora ota» bilan koʻp otamlashamiz, bugunga shu ham yetar», degan fikrda daftarchasini yopib choʻntagiga soldi-da, «Endi bardam boʻlaverasiz, Xudo sizga sabr bersin», deb yana bir marta ta'ziya bildirdi. Soʻng doktiloskopistning¹⁹ ishini birpas kuzatgan boʻlib, tashqariga chiqdi. Zina panjarasiga suyanib pichirlashib turgan uch ayol bilan qaytadan salomlashdi.

Omonullo «xotinlar bor joyda bizga ham, sudga ham hojat yoʻq», deb hazillashardi. Bu hazil bejiz emas. Jinoyat yuz bergan yerda kim birinchi paydo boʻladi? Militsiyami yoki xotinlarmi? Militsiya jinoyatchini haftalab yoki oylab qidirib topadi. Sud ishni haftalab oʻrganadi. Xotinlar esa bu yumushlarni bir necha daqiqada, nari borsa bir soatda ogʻizlari bilan boplab bajarib qoʻyishadi. Hamisha qosh-qovoqqa qarab yashovchi ma'suma ayol ham bunaqa paytda «siz aralashmang!» deb erini uyiga kiritib yuboradi. Oʻzi esa norasmiy sud hayʻati a'zosi sifatida faoliyatini boshlaydi. Bu safar ham yozilmagan qoida amal qilgan, guvoh sifatida faqat xotinlar toʻplanishgan edi.

Omonullo ostonada paydo boʻlishi bilan koʻrinishi King Kongning uzoq qarindoshlarini eslatuvchi xotin ovozini sal balandlatib «Otish kerak, — dedi. Soʻng qanday otish lozimligini ham aniqlab berdi: — Stadionga yuz ming odamni toʻplab, peshonasidan otish kerak. Televizorga ham olib berish kerak».

Omonullo suhbatni ana shu og'zi botir xotin bilan boshladi:

- Qaysi xonadonda yashaysiz, opa? deb soʻradi u choʻntagidan daftarcha chiqarib.
- Mening uyim bu yerda emas, magazinning tepasidagi doʻmda turaman, dedi ayol.
 - O'lganlarni tanirmidingiz?
 - Yoʻq-a, men nonga chiquvdim. Xotinlar gapi-rayotgan ekan, kelaverdim-da.
 - O'ldirgan odamni ko'rdingizmi?
 - Voy, nega men ko'rar ekanman?

-

¹⁹ Barmoq izlarini aniqlovchi mutaxassis.

- Kimni peshonasidan otmoqchisiz?
- O'sha o'ldirgan odamni-da.
- Kim u?
- Bilmayman.
- Non oldingizmi?
- Non? Nimagaydi?
- Eringiz nonsiz och o'tiribdi. Boraqoling.
- Voy, savil, meni tergaydigan ham, och oʻtiradigan ham erim yoʻq, Xudoga shukr. Haydamasangiz ham ketaman. Sassigʻini hidlab turishga koʻzim uchayotgani yoʻq! Shunday deb mingʻirlaganicha zinadan pastga tusha boshladi.
 - Biz bilganlarimizni yordamchingizga aytdik, dedi ayollardan biri.
 - Biz guvoh ekanmiz, ismlarimizni ham yozib oldilar, dedi ikkinchisi.
 - Nimalarni bilasiz? Nimalarni aytdingiz?

Ularning bilganlari: Nafisa qoʻni-qoʻshnilarga uncha aralashmaydigan «yovvoyiroqmi» yoki «kibrli- mi» ayol. Ishga borish-kelishida yoʻlakda yoki koʻchada koʻrishsa koʻrishardi, boʻlmasa yoʻq. Bozor-oʻchar qilganini, qoʻllari tolib sabzi-piyoz koʻtarib kelganini yoki doʻkondan non olganini birov koʻrmagan. Er-xotinning urishganlari u yoqda tursin, gap talashishganini ham eshitishmagan. Faqat ikki oymi, uch oymi avval bitta xotin kelib janjal qilganday boʻlibdi. Mana shu soʻnggi xabarda, Omonulloning nazarida, jon borday sezildi.

- Qanaqa xotin edi? deb aniqlamoqchi bo'ldi.
- Biz tengi, o'rta yosh,— dedi Omonulloga yaqin tur-gan ayol. So'ng «chiroylikkina» deb alohida izoh berdi.
 - Kimligini bilmaysizmi?
- Yo'-o'q, tanimaymiz u xotinni. O'sha kuni men qizimni kuzatgani chiquvdim. Shu yerda ro'para bo'lib qoldim. Yonida bir erkak ham bor edi. Erkagini sal tanidim. Oldingi eri bilan kelib turardi.

Keyingi gap Omonullo uchun kutilmagan bo'ldi:

- Oldingi eri? deb har ikki ayolga bir-bir qarab oldi. Samandar Ochilov ikkinchi erimi?
 - Oldingisini erimas, devdingiz? dedi gapga qoʻshilmay turgan ayol.
- Bir pas jim turing, endi, deb jerkidi Omonullo bilan gaplashayotgani. Oʻlgan odamlar haqida yomon soʻz aytilsa gunoh boʻlarkan. Erimi yo boshqasimi, kimligini ukamning oʻzlari ajratib oladilar. Bu uyni olishganiga ancha boʻlgan. Avval muqim yashashmas edi. Birinchi eri bilan kelib-ketib yurishardi. Bir marta suv toshirib yuborib, pastdagilarning rasvosini chiqarishgan. Birinchi eri mard ekan, chiroyli qilib tuzatib berdi.
 - Birinchi erining otini bilmaysizmi?
- Kim soʻrabdi, deysiz. Ikkinchisi bilan muqim yashayotgani uchun sal-pal taniymiz. Lekin bu ikkinchi erining ham yoʻq boʻlib ketadigan odati bor.
- Janjal qilgan xotinni kundoshi devdingiz, a? deb gapga qoʻshildi nariroqda turgan ayol.
 - Unaqa demaganman.
 - Voy, devdingiz-ku…
- Demadim, oʻxshatuvdim. Nafisaning anavi baqiroq otasi gapirib qoldi-da, «Bu yerda ering yoʻq, ering Sibirda», dedi. Qizimni kuzatib kelayotsam yana shu xotinga roʻpara boʻldim. «Men tilanchi emasman!» deb eshikni qarsillatib yopdi. Yuragim chiqib ketay dedi.
 - Sherigi-chi? deb so'radi Omonullo.
 - Qaysi sherigi? Ha, anavi erkakmi? Uni ko'chada ko'rdim. U uyga kirmagan shekilli.

- Keyingi bir haftami, o'n kundami notanish odamlar kelib-ketishmadimi?
- Buni biz bilmaymiz, oposi. Bizning gap poylaydigan odatimiz ham, vaqtimiz ham yoʻq. Bu doʻmga, roʻparadagi doʻmga kim kelib-ketayotganini bilsa, Abduqayum biladi.
 - Kim u?
- Tepadagi qavatda bitta bola bor. Belidan pasti ishlamaydi. Uzzu-kun aravachasida o'tirib olib, ko'chaga qaragani qaragan. Bir xil paytda suratga ham oladi.
- Samandar Ochilovni oxirgi marta qachon koʻrdingiz? Oʻn kun boʻldimi yo yigirma kunmi?
- Voy, nega oʻn kun boʻlarkan? Uch kun yoki... ikki kun boʻldi. Yoʻlakdan chiqaverishda roʻpara kelib qoldim. Salom bersam alik olmadi. Men ranjimadim. Shunaqa telba-teskari odati bor odam-da u. Bir hil paytda oʻzi salom beradi, bir xil paytda xoʻmrayib oʻtib ketadi.
 - O'sha kuni Nafisanimi yo o'ldirilgan yigitnimi ko'rmadingizmi?
 - Yo'-o'q ko'rmadim…

Narida turgan ayolning yerga qaraganini sezgan Omonullo undan alohida so'radi:

— Siz ham ko'rmadingizmi?

Ayol unga qaramagan holda past ovozda «yoʻq», deb qoʻydi. Undagi oʻzgarish Omonulloning diqqatidan chetda qolmadi. «Vaqti kelganda oydinlashtiraman», degan maqsadda sir boy bermadi.

Uning sezgisi aldamagan edi: ayol uch kun oldin Nafisani bu yigit bilan koʻrgan, «juvon oʻlgur eri yoʻgʻida oʻynashini boshlab keldi», deb sirdosh qoʻshnisiga aytgandi. Hamma gapni aytaverib keyin balolarga qolmaslik uchun ikkovi ham jim qolishni ma'qul koʻrishdi.

- O'ldirgan odamni topsangiz otiladimi? deb so'radi Omonulloning savollariga javob berayotgan gapdon ayol.
 - Siz otilsin, desangiz, otildai.
 - Voy, menga nima, battar bo'lmaydimi! Endi ketaveraylikmi?
 - Yana ozgina turing, iltimos. Ekspertlarning ishi chiqib qolishi mumkin.

Omonullo shunday deb ayollar aytgan bola bilan uchrashish niyatida yuqoriga ko'tarildi. Eshik qo'ng'irog'i tugmasini bosishga ulgurmay ichkaridan:

— Kiravering, eshik ochiq, — degan ingichka, ammo jarangli ovoz eshitildi.

Omonullo bu taklifga binoan eshikni ochib, ostona hatlashi bilan oʻsha ovoz «poyabzalni yechish lozimligini» eslatdi. Bir necha nafaslik sukutdan soʻng esa, «Endi toʻgʻridagi xonaga kiravering», deb taklif etdi.

Toʻgʻridagi xona eshigi lang ochiq edi. Omonullo ostona hatlay turib beixiyor oʻng tomonga qaradi: enli deraza yonidagi kichkina karavotda boshi katta odamlarniki kabi, boʻynidan boshlab to oyogʻining barmoqlarigacha toʻrt yashar goʻdakni eslatuvchi, bola desa bolamas, yigit desa yigit deyish mushkul boʻlgan, qoʻllariyu yelkalari chandib bogʻlangan bir odam yostigʻiga suyanib, chordona qurib oʻtirardi. U salom bergach, koʻz ishorasi bilan stulni koʻrsatib «Marhamat, oʻtiring», deb iltifot qildi. Soʻng:

— Abduqayum Mahkam, — deb oʻzini tanitdi. — Uzr, siz bilan qoʻl berib koʻrisholmadim. Falokatni qarang, suyaklarim sal ezilibdi. Chiqib kelayotganingizni oyoq tovushlaridan bildim. Xudo menga gavda bermagani bilan quloq bergan. — U shunday deb kuldi. Uning kulgisi begʻubor, koʻz boqishlarida esa mas'udlik bor edi. Qorachadan kelgan bu yigitchaning yuzlarida Omonulloni ajablantirgan bir nur zohir edi. «Ajablantirgan» deyilishining boisi — bu nur «iymon nuri» deyilarki, bu marhamatga, bu ajrga qanday amallar evaziga yetishmoq mumkinligini Omonullo hali bilmas edi. Shu bois ham «bunaqa ahvoldagi odam ham baxtiyor boʻluvi mumkinmi?» degan fikr xayolini bir yoritib oʻtdi.

- O'tgan kuni fotoapparatni sozlayman, deb yiqilib tushdim. Falokatni qarang-a!
 Omonullo deraza tokchasidagi teleob'ektivli foto-apparatga nazar tashlab qo'ydi. Buni sezgan Abdugayum:
- Bu mening ovunchog'im, deb izoh berdi. So'ng mehmondan nigohini uzmagan tarzda: kelishingizni bilardim, dedi.
 - Qiziq... qanday bila qoldingiz? Folbinlik ham qo'ldan keladimi?
- Yoʻ-oʻq, Abduqayum yana kuldi. Bunaqa gunoh ishlardan Xudo asrasin. Diqqat qiling-a, atrofimizda sodir boʻlayotgan yoki endi boʻluvchi har bir voqea bir-biri bilan mantiqan bogʻlangan. Biz faqat bunga e'tiborsiz yuramiz. Mantiqan bogʻlanuvchi voqeani biz koʻpincha tasodif deb bilamiz. Sizning bu uyga kirishingiz tasodifmi yoki mantiqan bogʻlangan voqealar zanjirining bir halqasimi? Yoki: siz tekshirayotgan qotillik tasodifmi yoki bir umrning mantiqiy yakunimi? Siz bilan men uchun bu fojia kutilmagan tuyuladi. Aslida-chi? Olloh hamma narsani mantiq iplari bilan bogʻlab tashlagan.

Omonullo bu gaplarni eshitib lol qoldi. «Gavdaning oʻrniga quloq bergan, deydi. Quloq emas, aql bergan ekan-ku», deb oʻylab, uning gaplarini jimgina tinglayverdi. Abduqayum esa jiddiylashib borayotganini anglab, shirin jilmaydi:

— Mana, qarang, ajal tigʻi ikki kishini oʻt oʻrganday oldi-ketdi. Kasallik bilan jon berishsa birovning, ayniqsa, sizning ishingiz boʻlmas edi. Ular oʻldirilibdi. Aslida ularning rizqi tugagan. Olloh ularning jonini alohida, alohida, biron xastalik bilan olinishini ixtiyor etishi mumkin edi. Yoʻq, Yaratganning xohishi aynan shu boʻldi. Balki ular shunga yarasha gunoh qilgandirlar. Balki Robbimiz ularning bu holatini boshqalarga oʻrnak qilib koʻrsatmoqchi boʻlgandir. Buni bilmaymiz. Bilganimiz — zulm sodir boʻldi. Zulm boʻlgach, militsiya keladi. Militsiya kelgach, albatta, qoʻshnilar bilan gaplashadi. Qoʻshnilar kim? Albatta, hamma narsadan xabardor boʻlishni istaydigan mening mehribon opoqilarim. Ular esa, bilgan-bilmaganlarni qalashtirib aytib tashlashgach, oxirida mening ismimni tilga olishadi. «Bilsa shu bola biladi», deyishadi. Opoqilarim tushmagurlar meni koʻchani kuzatishdan boshqa tashvishi yoʻq, deb oʻylashadi. Bozor-pozorga tushib chiqishgandan soʻng «Biznikiga hech kim kelmadimi?» deb soʻraydigan odatlari bor. Militsiyaga ham menga oʻxshagan odam kerak. Toʻgʻrimi? Ana endi siz «uch kun oldin begona odam koʻrinmadimi?» deb soʻraysiz.

Omonullo «Hozirgi yoshlar urdi-surdi kinolarni koʻraverib, kitoblarni oʻqiyverib, hammalari izquvar boʻlib ketishgan», deb oʻylab, jilmayib qoʻydi.

- Ha, so'ramaysizmi? dedi Abduqayum uning jim turganidan ajablanib.
- So'ramasam-chi? dedi Omonullo kulimsiragan holda.
- Unda mantiq zanjiri uziladi: soʻramasangiz bu uyga kirmas edingiz. Siz mening qoshu koʻrgani kirmagansiz, toʻgʻrimi?
- Toʻgʻri. Lekin men sizdan boshqa narsani soʻrayman: uch kun oldin pastdan shovqin eshitilmadimi?
 - Qanaga shovqin?
 - Masalan, erkak-ayolning janjalimi...
 - Yo'q.
 - Avvalroq-chi?
- Avval?.. Yoʻq. Qotillik er-xotinning janjali oqibati desangiz yanglishasiz. U yer sokin xonadon edi.
 - Lekin begona odamlar kelib turishgan ekan?
- Siznikiga kelishmaydimi? Mantiqning ildizi qaerda? Gap begonalarning kelishida emas, qanday maqsadda kelishida!
 - Aytaylik... magsad fahsh bo'lsin.

- Fahsh? Oshirib yubordingiz. Nafisa opa fohisha boʻlganida opoqilar adabini berib qoʻyishardi.
 - Lekin ular gaplarida shunga shama' qilishdi.
- Birinchi eri bor, deyishgandir yoki o'ynashi de-yishgandir? Bilaman bu gaplarni. O'sha odamni taniyman. Lekin u anchadan beri ko'rinmay qoldi. Uch kun oldin kelgan yigit o'ynash bo'lmasa kerak.
 - Demak, ularni koʻrgansiz? Bu odamni tanirmidingiz?

Bu savolni eshitib Abduqayumning chehrasi yorishdi:

- Baribir so'raysiz, dedim-a!
 Shunday deb kuldi. So'ng jiddiylashib bosh chayqadi:
 Yo'q, uni tanimadim.
 - Unda nimaga asoslanib o'ynash emas, deyapsiz?
- Yurishlari xotirjam edi. Hech qayoqqa alanglamay toʻgʻri yurib kelishdi. Oʻynash boʻlsa, «birov kuzatmayaptimi, tanishlarim koʻrib qolmasin ishqilib», deb xavotirlanadi. U yoq-bu yoqqa qarayveradi. Hech boʻlmasa, yoʻlakka kirishdan oldin orqasiga oʻgiriladi. Yo boʻlmasa, ayol kirib ketadi, sal oʻtmay oʻynash kiradi.
- Siz bu gaplarni qaerdan bilasiz? Xuddi butun umr o'ynashlarni kuzatib yurgan izquvarga o'xshab gapiryapsiz?
 - Bularni bilish uchun unchalik ko'p agl zarur emas.
 - Boshqacharoq holat ham bo'lishi mumkinmi?
- Albatta-da! Siz bilan biz begona koʻzlarni chalgʻitishning mingta usulini sanab oʻtirganimizda qaysi bir uyda oʻynashlar bizning xayolimizga ham kelmagan ming birinchi usulda ishlarini boshlayotgandirlar.
- Ha, fikringiz mantiqan toʻgʻri. U holda, ayol eri yoʻq paytda begona erkak bilan nima maqsadda kelishi mumkin?
- Bunisini bilmadim. Bu faqat oʻzlariga ma'lum edi. Afsus shuki, oʻliklar gapirishmaydi.
- Ha, ayniqsa, biz uchun afsus aynan shunda, deb Abduqayumning fikrini tasdiqladi. Omonullo. Ular oʻzlari bilan juda koʻp sirlarin olib ketadilar.
- «Qabr dunyo manzilining oxiri. Oxirat esa, manzilning boshidir. Modomiki, barchamiz qabrga kirar ekanmiz, qanday qilib kayfu safoga berilib, rohat-farogʻatda yuribmiz?»

Omonullo «Bunchalar aqlli ekan, bu yigitcha», deb o'yladi. Abduqayum unig fikrnii o'qiqanday kulimsiradi:

— Aka, bu mening gaplarim emas. Bir valiulloh aytib oʻtgan ekanlar. Shoshilmayotgan boʻlsangiz, yana bir fikrimni aytaman. Faqat bekorchi gap deb oʻylamang. Shu ishingizga aloqador boʻlgani uchun aytmoqchiman. Demak, gap bunday: dunyo nimadir? Dunyo — oʻtkinchi bir mehmonxonadir. Dunyodagi eng ulugʻ boylik nimadir? Dunyoga berilmaslikdir. Dunyo boyligini afzal bilgan kishi zillatga, xorlikka, mol-dunyo toʻplagan kishi esa qashshoqlikka giriftor boʻladi. Dunyo nimaga oʻxshaydi? Dunyo — yasatilgan kelinchakka oʻxshaydi. Koʻzlar unga termulgan, qalblar esa mushtoqdir. Yasatilmish kelinchakka kimlar oshiq? Shub-hasiz NAFS oshiqdir. Bu kelinchak oshiqlarning barchasini halok etadi. Hayotdagi tiriklar oʻliklardan, keyingilari oldingilaridan ibrat olmayaptilar. Uch xususni unutmaslik kerak: dunyoning oʻtkinchi ekanini, ne'matlarning ham oʻtkinchi ekanini, muqarrar oʻlimning haq ekanini.

Abduqayum «bu gaplar ta'sir qildimi, maqbul bo'ldimi?» degan savol nazari bilan Omonulloga tikilib qaradi. Uning gaplariga mos ravishda nazari ham o'tkir edi. Omonullo unga tik qaray olmadi.

— Yaxshi gaplarni aytgan ekan.

- Lekin... Abduqayum kulimsiradi. Hozir bu gaplarni eshitishga fursatingiz yoʻq. Koʻnglimni ogʻritmaslik uchun indamay tinglayapsiz. Balki menga rahmingiz kelayotgandir? Sizdan iltimos, rahmingiz kelmasin. Men oʻzimning shu taqdirimdan ham roziman. Harholda koʻryapman, eshityapman, gaplashyapman. Axir koʻrmaydigan, eshitmaydigan, tili aylanmaydiganlar ham koʻp-ku, toʻgʻrimi? Tan olaman, bir oz ezmaroqman. Lekin laqma emasman. Soʻrang, soʻrayvering.
 - O'sha kunimi, oldinmi yo keyinmi Samandar Ochilov kelmadimi?
- Keldilar. Oʻsha kunning oʻzida bir koʻrindilar. Novvotrang «Volga»da keldilar. Shoshib tushib, shoshilib yoʻlakka kirdilar. Mashinada bitta harbiy odam ham bor edi. Pogoni koʻk, polkovnik. Ular ham shoshib turishgan ekan.
 - Buni qaerdan bildingiz?
- Haydovchi uch marta signal berdi. Uchinchisida polkovnik eshikni ochib pastga tushdi.
 - Ochilov taxminan gancha vagt golib ketdi?
 - Taxminan yarim soatcha.
 - Boltaeva bilan Ibrohimov bu paytda uyda boʻlganlar, shundaymi?
 - Shundayga oʻxshab qoldi.
- Ochilov shoshib kirgan ekan, qaytishda-chi? Qanaqa ahvolda qaytdi, kiyim-boshlarida o'zgarish bormidi?
- Kiyimlarida oʻzgarish sezmadim. Lekin sekin-sekin yurib chiqdilar. Qoʻllarida diplomat bor edi. Polkovnik bir nima devdi, unga javob qaytarmasdan indamay mashinaga oʻtirdilar. Mashina yurishidan oldin derazalariga bir qarab oldilar. Lekin siz bundan darrov bir xulosa chiqarmang.

Abduqayumning keyingi gapi Omonulloga malol keldi.

- «Qimmatli maslahatingiz uchun rahmat, uka», deb piching qilmoqchi edi, tishi zirqirab, gapirtirmay qoʻydi. Mehmonning afti burishganini koʻrgan Abduqayum cheqaradan chiqqanini fahmlab, uzr soʻradi:
- Gaplarimdan xafa boʻlmang, aka, mantiqan olib qaralsa, «er qotil» degan xulosa kelib chiqadi. Lekin bunaqa olim odamlarda rashk kuchli boʻlmaydi. Ular odam oʻldira olishmaydi. Nari borsa bir shapaloq urib, toʻnni yelkaga tashlab chiqib ketishadi.

Abduqayumning gaplarida jon boʻlsa ham Omonulloga malol keldi. Bir yigitchaning yoshi ulugʻ odam kabi fikr yuritishi, unga aql oʻrgatishi gʻashini keltirdi. Abduqayumning tugʻilib, tilga kirganidan beri oʻz tengdoshlari bilan oʻynab-kulolmay, yotgan yerida faqat kattalar bilan suhbatlashishi oqibatida shunday sergap, shunday maslahatgoʻy boʻlib qolganining fahmiga yetmadi. Bu xonadonga kirib Abduqayum bilan suhbatlashgan har bir odam istasa-istamasa uning koʻngliga qarashga majbur boʻlar edi. Omonullo garchi gʻashi kelgan boʻlsa-da, bu yozilmagan qoidaga beixtiyor boʻysundi. Oʻzini kulimsirashga majbur etib:

- Sizdan xafa bo'lgan o'g'ri, deb hazil qildi. So'ng jag'ini ushlab, izoh berdi: Tishim og'riyapti.
- Tishingiz ogʻrisa doʻxturga bormang. Men sizga davolashning osongina yoʻlini oʻrgataman. Tish nimaga ogʻriydi? Sovuq tekkani uchun. Sovuqni qanday haydaysiz? Bitta piyolani olib, ichiga yogʻ surasiz-da soʻng qizdirasiz...

Hozirgina yigitchaning oʻta dono ekanligidan gʻashlana boshlagan odam endi bu gaplarni jon qulogʻi bilan eshitdi. Maslahat soʻngiga yetguniga qadar nima maqsadda bu yerga kirganini unutdi. Yigitchaning maslahati bu safar moydekkina yoqdi. Afsuski, hozirgi tashvish bilan yaqin soatlarda uyiga borolmaydi. Kechasi ham borish nasib etadimi yo yoʻqmi — Xudo biladi. Ishdan holi boʻlganida hoziroq borib shu yigitcha

aytganday piyolani qizdirib, chap qulog'ini qo'yib yotarmidi, og'riq qaytib ko'zlari moshdek ochilarmidi...

Omonullo maslahatlar uchun rahmat aytib, o'rnidan turdi.

— Telefoningizni ayting, qoʻlim tuzalsa qoʻn- gʻiroq qilaman. Balki yangi gaplar esimga tushib qo-lar?

Omonullo yon daftarchaga telefon raqamlarini yoza-yotganida Abduqayum yana donoligini boshladi:

- Amerikada shunaqa jinoyat yuz bersa «qotilni topgan odamga yoki xabar bergan odamga shuncha ming dollar mukofot» deb televizorlarida e'lon qilinadi. Shuning uchun ularda jinoyatchi tez topiladi.
- «Xuddi Amerikada yashaydigan odamday gapiradi-ya!» deb oʻyladi Omonullo. Abduqayum esa davom etdi:
- Sizlar esa hammasini tep-tekinga bajarmoqchi boʻlasizlar. Shuning uchun odamlar sizlardan qochadi. Ish yolgʻiz oʻzlaringizga qolib ketadi. Bunaqa ishda sizga nisbatan guvohlarga qiyin. Guvoh jonini garovga qoʻyib aytadi aytadigan gaplarini. Yo notoʻgʻrimi?
- —Toʻgʻri, dedi Omonullo daftarchasidan sahifani yirtib olib unga uzatar ekan. Mana shu ishni yumaloq-yostiq qilaylik, keyin ikkalamiz Amerika politsiyasiga borib ishlaymiz. Topganimiz oʻrtada, kelishdikmi?

Bu gapni eshitib Abduqayum kulib yubordi. Uning kulgisi yosh bolaning kulgisiday jarangdor va samimiy edi.

Omonullo bu xonadondan dastlabki gumoniga quvvat olgan holda chiqdi. Qotil qiznig otasi boʻlishi ham mumkin, degan yana bir gumoni olinajak ma'lumotlardan soʻng haqiqatga yaqinlashganday boʻladi. Bugun esa qora roʻyxatga birinchi boʻlib Nafisaning eri Samandar Ochilov yozildi.

Odatda biron ayol qoqilib tushib jon bersa ham «eri urib oʻldirgandir» deb gumon qilinadi. Shunday ekan, Samandarning gumon oʻqiga nishon boʻlmogʻi tabiiy hol. Agar tibbiy ekspert qotillik ikki yoki toʻrt emas, aynan uch kun oldin yuz bergan deb tasdiqlasa, unda Samandarning boshiga balo toshlari yogʻilishi tayin.

QONLI GIRDOB

Abduqayum yanglishmadi: Samandar oʻsha kuni uyiga kelgandi. Aslida uning uyga kelish niyati yoʻq edi. Rejasi boʻyicha, Nafisa ta'tilga chiqmogʻi, u esa vertolyotni shaharga joʻnatmogʻi lozim edi. Odam yetib kelishi mushkul boʻlgan, ammo tabiatning mavjud goʻzalliklarini oʻzida mujassam etgan bu darada Nafisa uzogʻi bilan bir hafta chidab yashay olardi. Choʻlda oʻsgan bu juvonni goʻzal manzaralar ham, tongda bulbullarning sayrashi ham, pokiza buloq suvlari ham maftun qila olmasdi. Bir necha olimu xizmatkorlardan iborat bu «shaharcha»ga dastlab kelganidayoq «zindonning oʻziku, bu yer» deb baho bergan, uch kunga arang chidagan edi. Samandarning birinchi xotini ham toqqa toqat qila olmasdi. U chodir atrofida oʻrmalab yurgan ilonni koʻrganidayoq chinqirib olamni buzgan, shu-shu bu yoqqa qadam bosmay qoʻygan edi. Samandar Nafisada ham birinchi xotinining qiliqlaridan bor ekanligini sezib gʻashlandiyu, keyin oʻz ishlari bilan andarmon boʻlib e'tibor bermay qoʻydi.

Tursunali qamalgach, Nafisa bir necha hafta garangsib yurdi. Hatto eriga qaramay ham qo'ydi. Samandar «juda yaxshi ko'rar ekan-da», deb o'yladi-yu, ammo xayoliga kelgan gaplarni tiliga chiqarmadi. Aksar odamlar tish faqat ovqat chaynash uchun mavjuddir, deb hisoblaydilar. Samandarning tishlari esa, ikkinchi vazifasini — tilga qo'riqchilik yumushini ham bajaradi. Uning tili bekordan bekorga tish hatlamaydi.

Samandarning fe'lini yaxshi bilgan kishi «bu malla odamni tashqariga sochilmay, ichiga yutilgan dardlari sarg'aytirib yuborgan», degan xulosaga keluvi tayin edi.

Samandar indamay qo'ya qolgani bilan qaynotasi jim turmadi: qizi Nafisani obdon siquvga oldi. Otasining gaplari ta'sir qildimi yoki sog'inch dardi qarib, kuchdan qoldimi, harholda Nafisaning eriga bo'lgan munosabati yaxshi tomonga o'zgardi. Ikkovlari chinakam er-xotin martabasiga yetishganday edilar. Samandar uchun kutilmaganda Nafisa bu yerga kelish ixtiyorini bildirib, sog'inganini ma'lum qildi.

Ertalab nonushtada Samandar vertolet uchuvchisiga «tayyorlan, shaharga tushib, yangangni olib kelasan», deb tayinladi. Vertolet uchishga ulgurmay uning oʻzini markaz chaqirtirdi. Buyruq qisqa, ayni choqda tushunarsiz edi: «Soʻnggi ma'lumotlar masalasida tezda Moskvaga yetib keling».

Vertolet harbiy aerodromdagi o'z maydonchasiga qo'ngach, novvotrang «Volga» yonida turgan polkovnik uni qarshilab, o'zini tanishtirdi-da, «Sizni kuzatib borish menga topshirilgan», deb vazifasini bayon qildi. So'ng markazni nima qiziqtirayotganini aytdi.

— Men uyga kirib-chiqishim kerak, ba'zi hisob-kitoblarim uyda, — dedi Samandar.

Polkovnik avvaliga norozi boʻldi. Samandar bu qogʻozlarsiz Moskvaga borish foydasiz ekanini aytgach, noiloj koʻndi.

Samandar uyga kirdi-yu, nima uchun kelganini unutdi.

Abduqayum yanglishmagan edi:

... yarim soatcha qolib ketdi...

Toʻgʻri, buning orasida tashqariga bir chiqdi. Oʻsha onda qoʻshni ayolga yoʻliqdi. Zinadan pastga tushayotib, nima uchun kelganini esladi-da, iziga qaytdi. Uning bu harakatini kuzatgan qoʻshni ayol «jinni-pinni boʻlib qolganmi yo mastmi?» deb oʻyladi. Ziyrak nigohi «bu telbaning» panjalari qon ekanini ham il-gʻadi. «Bir balo boʻldi» dediyu, oʻzini tezda ichkariga oldi.

Samandar uyiga qaytib, garangsigan bir ahvolda xonasiga kirdi-da, poʻlat javondan kerakli qogʻozlarini oldi. Qoʻlidagi qon yuqini yuvib tashlash xayoliga ham kelmadi. Faqat mashinaga oʻtirganida polkovnik «qoʻlingizga nima qildi?» deb soʻragach, panjalariga qarab ajablandi. Beixtiyor ravishda «shisha tilib ketdi», dedi. Yaxshiki polkovnik «qanaqa shisha? Qanday tarzda?» deb ezmalanmadi. Buning oʻrniga haydovchidan «aptechkang bormi?» deb soʻradi. Rad javobini olgach, choʻntagidan roʻmolcha chiqarib, Samandarga uzatdi-da, «Bogʻlab oling, samolyotda aptechka boʻlishi kerak», dedi.

Samandar ro'molchani qon tekkan panjalari ustiga tashlab, holsizlanayotganini his qildi. Ko'ngli aynidi. O'rindiqqa suyanib, ko'zlarini yumdi. Ko'z oldini qoplagan qora parda birdan qizil rang oldi. Samandar go'yo qon girdobida qolganday bo'ldi. Bu qon girdobi orasidan behisob qonli panjalar ko'tarilib uni bo'g'a boshladi. Nafasi qaytib, baqirib yuboray dedi. Shoshilib ko'zlarini ochdi.

Uchoqqa chiqqunlaricha koʻngli behuzur boʻlib ancha toqatsizlandi. Uchoq oʻrnidan qoʻzgʻolmay turib polkovnik ensiz doka, dori koʻtarib kelib, «yarangizni bogʻlab qoʻyay», dedi. Garang boʻlib oʻtirgan Samandar «qanaqa yara?» deb yuborishiga sal qoldi. Yaxshiki qoʻlini «shisha tilib yuborgani» esiga tushdi. «Oʻzim yuvib, bogʻlayman», deb doka, dorini olib hojatxonaga oʻtdi, Qoʻlini yuvdi. Uchoq chayqala boshlagach, oʻzini tutolmay qayt qildi. Soʻng yuzlarini yuvib, koʻzguga qaradi. Koʻzguda uning aksi emas, Nafisaning «gunohim nima?» deb baqraygan koʻzlarini koʻrib, qoʻrqib ketdi. Beixtiyor orqasiga tisarildi. Koʻzgudagi baqraygan nigoh yoʻqolib, oʻzining aksi koʻrindi. Malla rangi oqarib oʻlik tusini olganday tuyuldi oʻziga. Yuzlariga asta shapatiladi. Soʻng panjasini doka bilan betartib ravishda bogʻlab joyiga qaytdi. Polkovnik uning bogʻlangan qoʻliga ajablanib qaradi-yu, «adashdim shekilli», deb oʻylab indamadi. Yoʻq, polkovnik

yanglishmagandi: Samandar uyidan chiqib kelganda uning oʻng pan-jasi qon edi. Hozir esa chap qoʻlini bogʻlab olgandi.

Samandar polkovnik gapga tutmasin, degan maqsadda oʻzini ish bilan band qilib koʻrsatish uchun qogʻozlarni varaqladi. Bir oz vaqt oʻtgach, «ish bilan band» ekanini ham unutib, koʻzlari bir nuqtada qotdi. Askar yigit yaqinlashib, qahva uzatganini ham sezmadi. Polkovnik uning bilagiga qoʻlini astalik bilan qoʻyib:

O'rtog Bosh konstruktor, — dedi.

Samandar yengil seskanib, unga garadi.

Qahva iching, yengil tortasiz, — dedi polkovnik kulimsirab.

«Yengil tortasiz» — deb ajablandi Samandar. — Bir nimani sezdimi bu odam? Oʻzimni tutib olishim kerak. Uyda hech nima boʻlgani yoʻq, hech nima... Bu tush edi, vahimali tush...»

Qahva ho'playotib shu tarzda o'zini o'zi ovutib, «tush ko'rayotgani»ga ishontirmoqchi bo'ldi.

- Qondan qoʻrqar ekansiz, dedi polkovnik kulimsirab.
- Yoʻgʻ-e, dedi Samandar aybi oshkor boʻlgan boladay.
- Ha, rangingiz aytib turibdi. Siz hijolat boʻlmang, ayrim odamlar shunaqa boʻlishadi. Qonga koʻzi tushishi bilan hushidan ketib qoladiganlar ham bor. Koʻnglingiz ayniganini mashinadayoq sezgan edim. Tagʻin ham chidadingiz.

Samandar bu lutfni qabul qilganday o'zini zo'rlab kulimsiradi.

Bir oz dam oling, o'tib ketadi, – dedi polkovnik, mehribonlik bilan.

«O'tib ketadi? Qani edi o'tib ketsa!.. O'tib ketadigan manzara emas bu...» deb o'yladi Samandar. Polkovnikning taklifi unga ma'qul keldi: bekorchi suhbatdan qochishning yaxshi yo'li — dam olish. U qahvani ichib bo'lgach, suyanchiqni tushirdi-da, yotib, ko'zlarini yumdi.

Samandar shu bo'yi to uchoq Moskva yaqinidagi harbiy aerodromga qo'nguniga qadar qaddini ko'tarmadi. Polkovnik taomga taklif qilganida ko'zlarini yarim ochib, «yo'q» ishorasini qilib, bosh chayqab qo'ya qoldi.

Koʻzlarini yumib yotgani bilan uxlamadi. Aslida bu holda yotish ham uning uchun azob edi. Biroq, polkovnik bilan suhbatlashgandan koʻra shu alfozda azob chekish ma'qulroq tuyuldi.

U ikki toʻlqin iskanjasida edi. Biri — qon tusida, uyidagi dahshat manzarasi, ikkinchisi — bir necha soatdan soʻng boʻlajak suhbatlar. Samandar birinchi toʻlqinni yengishga, Nafisaning baqraygan koʻzlarini haydashga, girdobdan koʻtarilayotgan qonli panjalarni nari surishga intildi. Bir necha muddat bunga erishganday ham boʻldi. Biroq, nari ketgan manzaralar yana shiddat bilan oʻz oʻrniga qaytaverdi.

Samandar turli tashvishlar nahrida bearmon suzgan, ammo bu kabi kuchli toʻlqinlarga bandi boʻlmagan edi. Yaratganiga banda boʻlolmaganlarning ajri balki shudir — tashvishu alamlarga bandi boʻlishdir...

U keyingi ma'lumotlarga kattalarning ishonishlari qiyin, balki siyosiy tus ham berilar, degan tahminni diliga tugib yurgan edi. Uning kashfiyotiga asoslangan qurilmalar dunyodagi yadro poligonlarining har biridagi eng kuchsiz sinovni ham aniqlab, bilib berishi mumkin edi. Ammo o'n ikki kun avval kutilmagan holat yuz berdi: qurilma zaminning kuchsiz tebranganini xabar qildi. Zaminning tebranishi yangilik emas, ammo tebranish markazi sira kutilmagan yerda edi. Ulardagi xarita bo'yicha bu joyda yadro poligoni yo'q edi. Samandar hisob-kitoblarni qayta-qayta tekshirdi, solishtirdi. Raqamlar bari- bir o'jarlik bilan aynan o'sha joyni ko'rsatib turaverdi.

Samandar ma'lumotlarni bir kun kechikib yubordi.

Markaz tanbeh berar, deb o'ylayotgan edi. Shoshqich chaqiriluvi u uchun kutilmagan bo'ldi. Ayniqsa, uydagi voqea...

Uchoq yerga qo'nib, belgilangan maydonchada to'xtagach, Samandar qaddini ko'tardi. U go'yo uchoqda uchmadi, balki tanklar zanjiri ostida ezg'ilandi. Uchoq uni uyidagi voqeadan uzib olib, necha ming chaqirim nariga olib kelgani bilan xayoliga bog'langan tashvish iplarini uza olmagan edi.

Uchoq zinapoyasida ularni ikki qora «Volga» kutib turardi. Polkovnik hamkasbi bilan salomlashib «vazifa ado etilgani»ni ma'lum qilgach, Samandar mashinaga oʻtirdi. «Vazifasini bajargan» polkovnikka «alohida buyruq boʻlgunicha kutinglar», — deyilgach, mashinalar oʻrnidan qoʻzgʻoldi.

Samandar Moskva koʻchalarini yaxshi bilardi. Shu bois Mudofaa vazirligi joylashgan koʻchaga burilishmaganidan ajablandi-da:

- Qaerga ketyapmiz? deb soʻradi. Uni polkovnikdan «qabul qilib olgan» odam bamaylixotirlik bilan:
 - Kremlga, dedi.
 - Kimning oldiga? deb so'radi Samandar.
 - Sizni o'rtoq Baygildin kutyapti.
 - Bazarovchi?
 - Viktor Bazarovich ham o'sha yerda.

Bazarov deganlari vazirlik huzuridagi Markaz boshlig'i edi. Odatda Samandar asosan shu odamga yo'liqardi. Baygildinning huzuriga kamdan kam hollardagina borishardi. Samandar bu safar to'g'ri o'sha yerga borilayotganidan masalaning jiddiy ekanini angladi. Bir jihatdan Baygildinga ro'para bo'lishi yaxshi. Farosatli odam. Bazarovga o'xshab huda-behuda so'kinib baqiravermaydi. Harholda unda harbiylikka nisbatan olimligi ustun turadi.

Kremlda to'g'ri Baygildinga ro'para bo'lmadi. Bari-bir avval Bazarovga yo'liqdi:

- Sen nima qilib qoʻyding, bilasanmi? dedi u sovuqqina salomlashib.
- Nima qilibman? dedi Samandar ham sovuqroq ohangda.
- Butun razvedka oyoqqa turgan. Agar ma'lumoting isbotlanmasa, bilasanmi nima boʻladi?
 - Bilaman. Ishlarimning oyogʻi osmondan boʻladi.
 - Fagat ishlaring emas, o'zing ham. Fagat o'zing emas, men ham...
 - Shunaga xatar bor ekan, ma'lumotni bularga ko'rsatmang edi.
- Sen shunaqa vaqillayverasan. Rost boʻlsa-chi? Unda yana bir balo! «Qayoqqa qarayapsanlar?!» deb uchirib yuborishadi. Nima boʻlsa boʻldi tavakkal! Yur.

Baygildin u qadar vahima qilmadi. Ma'lumotnoma, hisob-kitoblar xulosasi bilan tanishgan boʻlsa-da, Samandarning tushuntirishlarini diqqat bilan tingladi.

- Ilmiy ekspertiza xulosalaringizning toʻgʻri ekanini tasdiqladi. Lekin hozircha uzil-kesil toʻxtamga kela olmaymiz. Hozir orbital stantsiyadagilarga ham topshiriq berilgan. Samandar Ochilovich, siz uch-toʻrt kun Moskvada dam oling. Siz bilan Vasiliy Ignatevich ham koʻrishmoqchilar. Qurilmalaringizni Hindiqushga ham oʻrnatsak-chi? Nima deysiz?
 - Afg'onistongami?
 - На.
 - Shartmi? Hozirgi joyi ham yetarli. Qurilma sezgirligini yana ham oshirish mumkin.
 - Qanday qilib?

Samandar uydan olib chiqqan qog`ozlar taxlamini unga uzatdi.

- Hammasi hisob-kitob qilingan. Hindiqushda yangisini qurgandan koʻra sezgirlik oshirilsa, yuz baravar arzon tushsa kerak.
 - Sen bularni menga aytmovding? dedi Bazarov norozi ohangda.

- To'ppa-to'g'ri bu yerga boshlab kelishlarini bilmabman. Aslida sizga ko'rsataman, deb o'ylovdim. Siz baribir o'rtoq Bayqildinga berardingiz.
- Bu hisobingiz ham toʻgʻri, dedi Baygildin jilmayib. Soʻng qogʻoz yuzidagi qizil dogʻga koʻzi tushib, Samandarning bogʻlogʻliq qoʻliga qaradi: Qoʻlga nima qildi?
- Ha, shunchaki... shisha tilib ketdi, dedi Samandar o'zini xotirjam tutishga intilib. ushlab oʻtirmadi. Samandarni shahar chetidagi Bavaildin ularni uzoa mehmonxonaga kuzatib qo'yishdi. Xonaga kirib, birinchi ko'rgani — Hindiqush xaritasi bo'ldi. «Magsadlari jiddiyga o'xshay-di, — deb o'yladi. — Agar Afg'onistonga ham oʻrnatilsa, yangi oʻta sezgir qurilmaga hojat qolmaydi. Yoʻlni toʻsishadi». Shu fikr xayoliga kelib, battar bo'g'ildi. Muzjavonni ochdi: baxtiga aroq bor ekan. Katta qadahga quyib, sahroda yo'l yurib changagan odam kabi yutoqib ichdi. Bittaga ganoat qilmasdan ikkinchisini ham to'ldirib ichgach, dasturxon ustidagi olmalardan birini olib, karsillatib tishladi. Nazarida aroqning quvvati ojizday tuyulib yana ikki marta ichdi-da, shi-sha beliga yopishtirilgan yorligga garadi. Arogning girg daraja ekanini o'gib, ajablanganicha bosh chay-gadi.

Eshik taqillab, askar yigit koʻrindi-da, «Yemakxonaga chiqasizmi yo ovqatni shu yerga olib kelaymi?» deb soʻradi. Samandar och boʻlsa-da, ovqat yegisi yoʻq edi. Avvaliga «kerakmas», deb rad etdi. Soʻng yigitni chaqirib, «shu yerga olib kel», deb buyurdi.

Aroq ta'sir qilib, badani qizidi. Boshi aylandi. Bogʻlangan panjasiga qarab gʻijindi-da, dokani yechib tashladi. Oʻzicha bir nimalar deb gʻoʻdiranib, hammomga kirdi. Yuvinib chiqqanida xonani ovqatning yoqimli isi tutgan edi. Shishani boʻshatgunicha toʻrt-besh choʻqim ovqat yeya oldi, halos. Tomogʻidan boshqa hech narsa oʻtmadi. Yana bir shisha pivo ichgach, toʻshakka ham yetib bora olmay, gilam ustiga choʻzildi.

...Nafisa koʻzlarini yarim yumganicha toʻshakda ayshini surardi. Samandarning kirib kelganiga na u, na-da xushtori e'tibor berdi. Samandar «Hayvon! Buzuq!» deb baqirmoqchi boʻldi, ammo ovozi chiqmadi. Soʻng... oshxonadan bolta olib chiqib, ularni chopaverdi, chopaverdi. Soʻng... dahshatga tushdi. Bolta ularni qiyma-qiyma qilib tashlagan boʻlsa-da, tanada bir tomchi ham qon koʻrinmadi. Soʻng... qiymalangan tana bus-butun holga kelib, qadlari koʻtarildi. «Ey nodon!» deb unga qarab kuldilar, kulaverdilar. Soʻng... Samandar ularga pichoq bilan tashlandi. Ular qochdilar, qochaverdilar. Samandar gʻazabga kelib, pichoqni otdi. Pichoq kinodagi mergan qoʻlidan otilganday toʻgʻri borib Nafisaning chap koʻkragiga sanchildi. Nafisa yiqildi. Oʻldi. Chinakamiga oʻldi! Ana, koʻkragidan qon sizib chiqyapti. Qon... issiq, qon. Koʻzlari esa baqra-yib qoldi: «Gunohim nima edi?» deb soʻrayotganga oʻxshadi. Samandar qoʻrqib ketdi: «Nafis, seni oʻldirmoqchi emasdim. Tursunali bilan birgaligingni bilganimda ham kechirgan edim. Bu safar ham kechirardim. Oʻlma, Nafis...» Shunday deb turganida xushtor kelib boshiga toʻqmoq bilan urdi, uraverdi. Toʻqmoq har urilganida jaranglab, aks-sado taratdi, tarataverdi... Nafasi esa boʻgʻildi, boʻgʻilaverdi...

To uyqudan uygʻonguniga qadar shu tush asoratida azob chekdi. Qoʻrquvdan uygʻondimi yo eshikning taqillaganidan uygʻondimi — farqlay olmadi. Harholda eshikning taqillashi boshiga urilgan toʻqmoq jarangiga monand edi. Boshiga urilgan toʻqmoq tushida kechgan boʻlsa-da, gardani loʻqillab ogʻrirdi.

Avvaliga qimirlash u yoqdan tursin, «Ha, kim?!» deyishga ham majoli yetmadi. Aniqrog'i qaerda, nima uchun yotganini idrok qilolmadi. Bir oz garangsib yotgach, nonushtadan keyin bo'lib o'tgan voqealarni xira tarzda bo'lsa-da, esladi. Shundan so'ng ko'zlarini arang ochdi. Eshik yana taqillagach, «hozir!» deb ovoz berdi-da, inqillab o'rnidan turdi. Uy xuddi osma ko'prikday u yon-bu yon tebranganday bo'lib, chayqaldi. Gandiraklab borib eshikni ochdi.

Yengsiz ich ko'ylakda turgan gavdali odam uni ko'rib jilmaydi:

— Xayriyat! Bu kimsasiz orolda bittagina insofli tirik odam bor ekan! — dedi u. — Hamma xonalarni birma-bir taqillatib chiqdim. Tirik odam yoʻqmi, bilmayman. Boʻlsa ham ochishmaydi. Qoʻrqishadimi, bilmayman. Men yolgʻizlikni yomon koʻraman. Ichgim kelyapti, qoʻshni, nima men alkashmanmiki hadeb yolgʻiz ichaversam. Koʻnglim shirin suhbatni istayapti. Siz menga sherik boʻla olmaysizmi? — U shunday deb qoʻlidagi aroqni yuqori koʻtardi.

Boshi aylanib, ogʻzi qurib, koʻngli behuzur boʻlayotgan Samandarga bu taklif ma'qul keldi. Garchi u chaqirilmagan mehmonga zid oʻlaroq yolgʻizlikni yoqtirsa ham hozir ulfat bilan ichgisi keldi.

Kiring, — dedi u tisarilib.

Mehmon ostona hatlab qo'l uzatdi-da, o'zini tanitdi:

- Medvedev, Sergey Lavrentevich.

Samandar «Marhamat qiling», deb joy koʻrsatdi. Medvedevning shimi yonidagi qizil hoshiyani koʻrib «generallardan ekan-da», deb qoʻydi. Medvedev esa yozuv stoli ustidagi Hindigush xaritasiga koʻzi tushib «oʻzimizdan ekan», deb oʻyladi.

— Ismingiz nima, qoʻshni? — dedi Medvedev ikki qadahga aroq quyib.

Kiev universitetida, soʻng Moskvadagi aspiranturada oʻqib yurganida Samandarni hamma «Sasha» deb chaqirardi. Shuni eslab u:

- Sasha deyavering, deb qoʻydi.
- Sashoq, salomatlik uchun! Men sendan xursandman. Bu yerdagi yagona tirik odam sen ekansan... Medvedev shunday deb tik turgan holida qadahni bir koʻtarishdayoq boʻshatdi.

Samandar qadahni labiga yaqinlashtirganida aroqning hidi dimogʻiga urilib, seskandi. Koʻngli battar aynidi. Mehmon qarab turgani uchun hijolat chekdi. Keyin chuqur nafas oldi-da, bir zarb bilan ichib yubora qoldi. Dam oʻtmay oʻzini yengil his eta boshladi. Uchinchi qadahdan keyin esa picha oʻziga keldi. Bu yerga kirishdan avval ham boʻkib ichgan mehmonning «gap xaltasi teshilib», tinmay gapiraverdi.

— Sashok, men harbiy odamman. Mening kasbim jang qilish. Qogʻoz titib idorada oʻtiradiganlarga toqat qila olmayman. Rossiyani kim xarob qildi, bilasanmi? Ana oʻsha burniga koʻzoynak qoʻndirib, qogʻoz titib oʻtiradiganlar. Biz esa buyuk Rossiya shuhratiga shuhrat qoʻshamiz. Bu — bizning burchimiz.

Medvedev yana qadahlarni to'ldirdi:

— Buyuk Rossiyamiz uchun, uning shuhrati uchun! — U shunday deb xitob qilgach, qadahni odati boʻyicha bir koʻtarishda boʻshatib, kaftiga «kuf» deb qoʻydi.

Samandar endi ichishga qiynalmadi. Ogʻriqlar uni tark etgan, ammo qulogʻi shangʻillab, mehmonning gaplarini durust idrok qila olmayotgan edi. Medvedev esa «sukut rizolik alomati» sanalganday «gaplarim Sashokka ma'qul kelyapti», degan fikrda joʻshib soʻz-layverdi.

— Bu gʻalamislar Rossiyaning Oʻrta Sharqdagi siyosatini oʻzgartirishmoqchi. Ochigʻini aytaymi? Mixail Mechenniyning ishlari menga yoqmayapti.

Samandar Mixail Mechenniyning kim ekanini darrov anglamadi. Keyinroq fahmlab, nimani tasdiq eta-yotganini o'zi ham tushunmay, bosh irg'ab qo'ydi.

— U bizning Germaniyani ikki qoʻllab topshirdi. Germaniya uchun ruslar qancha qon toʻkishgan, bilasanmi? Endi esa Afgʻonistonni bermoqchi! Gorchakov janoblari 1877 yilda nima qilgan bilasanmi? Bilmaysan! Granvillni bilasanmi? U oʻsha paytda Angliya tashqi ishlar ministri edi. Gorchakov u bilan sulh tuzdi. Hozirgi Afgʻonistonning shimoliy chegarasini oʻsha ahmoq belgilagan. Nega ahmoq, deyapsanmi? Shuning uchunki, yana bir zarb berilsa, Afgʻoniston toʻlaligicha bizniki edi. Hech boʻlmasa yarmi bizniki boʻlardi. Bugun bekorga qon toʻkib yurmasdik. Endi Mixail Mechenniy nima qilmoqchi? Bilasanmi?

Bilmayman, dema, bilasan. Bu yerda bekorga oʻtirganing yoʻqdir. Meni ham shuning uchun chaqirtirishibdi. Bular Af-gʻonistonni topshirishmoqchi! Qoʻshinni qaytarishmoqchi! Bunga chidash mumkinmi?! Yoʻq! Sen chidasang chidayver, ammo men chiday olmayman! Axir u yerlar rus qoni evaziga olindi. Xalqi tamoman qirib tashlansa ham Afgʻonistonni qoʻldan bermaslik kerak. Afgʻoniston — Pokiston kaliti, Hindiston kaliti, Hind okeani yoʻli! Hindiqushchi? Bunday strategik qulay joy yana qaerda bor? Endi sen ayt: qaysi ahmoq kalitni oʻz ixtiyori bilan beradi?

U yana bir oz asabiylashgan holda aroq quydi:

Rossiya shuhratining so'nishiga sira yo'l qo'ymaymiz!

Samandarning koʻzlariga qadah avval ikkita, soʻng uchta boʻlib koʻrindi, keyin chirpirak boʻlib aylana boshladi. Rossiyaning shuhrati uchun ichishga qurbi yetmay yoniga shilq etib yiqildi.

- O, Sashok, ichishni eplay olmas ekansan-ku!

Medvedev shunday deb uni ikki qoʻltigʻidan oldi-da, sudrab borib karavotiga yotqizdi.

— Boʻpti, Sashok, omon boʻl! Bir oz koʻnglim yozildi. Ammo sen mening gaplarimni unut!

Shunday deb yarimdan ozaygan shishani koʻtarib, bir oz gandiraklagan holda xonadan chiqdi. Dam oʻtmay qoʻshni xona eshigi taqillay boshladi. U endi ertalabgacha birga ichishi mumkin boʻlgan «tirik odam» izlardi.

Hammayoqni bulg'ab tashlagan Samandarni esa ertalab harbiylar shifoxonasiga olib ketishdi.

ARMON

Tish ogʻrigʻining davosi ombur, deganlaridek, Omonullo oʻzidagi qoʻrquvni yengishga kuch topib, tish tabibiga kirdi-yu, bir necha daqiqada koʻzlari moshdek ochildi, qorongʻu dunyosi yorishdi. Avvalgi kuni e'tibor bermagan narsalar endi muhim boʻlib koʻrinaverdi.

O'sha kuni Abduqayumning uyidan chiqqach, doktiloskopist uni ichkari xonaga chaqirdi-da, po'lat sandiqdagi qonli dog'ni ko'rsatdi:

Eshik tutqichlarida ham ayni shu iz.

Omonullo poʻlat sandiqni sinchiklab koʻzdan kechirdi: ochishga urinilmagan. Balki oʻz kaliti bilan ochib-yopilgandir? «Kim ochib yopgan? Ochilovmi? Pullarini olib qochganmi?» Omonulloning xayoliga kelgan birinchi fikr shu boʻldi. Samandardan barmoq izlarini olib, qonli izlar bilan solishtirib koʻrilmagunicha aniq bir qarorga kela olmas edi. Shu sababli uning qaerdaligini aniqlash maqsadida ishxonasiga yoʻl oldi.

Telefondagi savol-javobdan soʻng uning kelishini kutishayotgan ekan. Tashqaridan qaraganda koʻrimsizgina boʻlgan uch qavatli uy temir panjara bilan oʻralgan edi. Omonullo darvoza yonidagi qorovulxonadan nariga oʻta olmadi. Qorovulxona odatdagidan koʻra keng-roq, uchdan ikki qismi bel barobar taxta toʻsiq bilan ajratilgan edi. Odamlar oʻtishi uchun moʻljallangan yoʻlak oʻrtasiga xuddi metrodagi kabi ochilib-yopiladigan toʻsiq qoʻyilgan edi. Xuddi shu joyda toʻxtagan Omonulloning guvohnomasini koʻrishdi. Avvaliga toʻsiq yonida turgan yigit harfma-harf oʻqiyotganday tikildi. Soʻng bir suratga, bir Omonulloga tikildi-da, guvohnomani xona toʻrida oʻtirgan oʻrta yosh, tepakal kishiga olib borib berdi. Tepakal koʻzoynagini taqdi, bu ham kamlik qilib, tortmasidan toshoyna chiqarib guvohnomani sinchiklab tekshirdi. Keyin oʻng tomondagi kompyuter tugmalarini bosib, besh-olti daqiqa davomida nigohini ekrandan olmay oʻtirdi. Ekranda javob yozuvlar paydo boʻlganidan keyingina buyruq ohangida «oʻting» deb qoʻydi.

Omonullo avval hovliga, keyin uch qavatli binoga o'tsam kerak, degan fikrda «qayoqqa boramiz?» deb so'radi. Yigit unga javoban jilmayib qo'ydi-da, to'siqni ochib,

«Bu yoqqa», deb tepakal tomonga ishora qildi. Omonullo ichkariga o'tib, tepakalning ro'parasidagi stulga o'tirdi.

- Ochilovda nima ishingiz bor? deb so'radi tepakal unga gattig tikilib.
- Undan so'rab-bilib oladigan gaplarim bor.
- Qanaqa qap?
- Siz bilishingiz shartmi?
- Shart.
- Aytaylik, bir jinoyatga oid gaplar bo'lishi mumkin.
- Qanaqa jinoyat?
- Buni ham bilishingiz shartmi?
- Ochilovga tegishli bo'lsa shart.
- Uning xotini oʻldirilgan.
- Qachon?
- Taxminan uch kun avval.
- Ochilov bir oydan beri safarda.
- Qaerda?
- Kerakli joyda.
- Uni ko'rishim shart.
- Kelganida koʻraverasiz.
- Qachon keladi?
- Kerak boʻlganida keladi.
- Anigrog'ini hech kim bilmaydimi?
- Ochilov bilan ishingiz boʻlmasin. Jinoyat yuz berdimi, jinoyatchini toping. Sizga maslahatim: bu tomonlarga boshqa kelmaganingiz ma'qul.
- Xotinining o'lganini xabar qilish kerakdir? Murdani ko'mish kerakdir? dedi Omonullo bir oz achchiqlanib.
 - Xotinining hech kimi yoʻq ekanmi? deb soʻradi tepakal pinagini buzmay.
 - Otasi bor.
 - Xotirjam bo'ling, otasi ko'maveradi. Eri ko'mishi shart emas.

Tepakal «gap tamom, sizga ruxsat», deganday guvohnomani uzatdi. Omonullo bu yerdagilarning oddiy qorovul emasliklarini tushunib yetgan boʻlsa-da, tepakalning podpolkovnik unvonida ekanidan bexabar edi. Shunga qaramay uning qoʻrsligiga javob bermadi. Oʻrnidan turib xayrlashmoqchi boʻlganida tepakal oʻtirgan yeridan qoʻzgʻolmagan holda qoʻl uzatdi:

- Shashtingizga qaraganda Ochilovga boshqa koʻz bilan qaramoqchiga oʻxshaysiz, dedi u. Sizga maslahatim: Ochilovni tinch qoʻying. Unga tishingiz oʻtmaydi.
 - Qonun oldida hamma teng, dedi Omonullo bu safar qat'iyroq ohangda.
- Siz oʻqigan kitobda shunaqa yozilganmi? Hayotda esa, azizim, butunlay boshqa. Shuni hali ham tushunib yetmadingizmi?

...Tish ogʻrigʻidan qutulib, fikri tiniqlashgach, oʻsha uchrashuvni, oʻsha tepakalning keyingi gaplarini eslab oʻyga toldi: «Nima demoqchi? Qotil Ochilov boʻlgan taqdirda ham qoʻlingdan hech nima kelmaydi», demoqchimi? Shunchalar zirhi qalinmi bu idoraning? Xoʻp kunlarga qoldim-da! Jinoyat ildizini topib, «banditizm» desam, «Bunaqa gap yoʻq, partiya s'ezdida SSSRda banditizmga barham berilgan» deyilgan», deb garang qilishadi. Mana, jinoyatchini ushladim, desam, «toʻxta, qamamay tur, kommunist ekan, avval partiyadan oʻchirib olishsin», deydi. Boshqasini «deputat ekan», deydi. Endi bunisiga nima deyisharkin?..»

Yaxshi hamki Abduqayum novvotrang «Volga»ning raqamlarini eslab qolgan ekan. Harbiy prokuratura orgali mashina haydovchisi ham, polkovnik ham topilib, soʻralgach,

Omonullodagi gumon haqiqat sari yanada yaqinlashdi. Ayniqsa, Ochilovning oʻng qoʻlini «shisha kesib ketgani», uchoqda esa chap qoʻlini bogʻlab olgani uning ahvolini ayon etganday edi. Uning nazarida Ochilovni hibsga olish uchun shu dalilning oʻziyoq kifoya edi. Ayni damda uni boshqa narsalar oʻylantirardi. Sanjar Ibrohimovning qismati oilasiga ma'lum etilgach, ular uchun goʻyo qiyomat boshlanganday boʻldi. Yaqinlari «jasadni beringlar», deb oʻlikxonani qamal qilib olish darajasiga yetdilar. Nafisaning murdasi esa yana ikki kun oʻlikxonada qolib ketibdi.

Kooperativ boshlig'i Omonullo yuborgan vakilga «Ikkovi ham suyuqoyoq edi, endi haydamoqchiydim» debdi. Sanjar Ibrohimovning ukasi esa, Omonullo bilan suhbatda «Bizning urug'da haromga yuradigan odam yo'q. Akam haromdan hazar qilar edilar», deb gapni kalta qildi. Ibrohimovning xotini esa o'tinch bilan «adasidan bunday gumon qilmang», deb ko'z yoshi to'kdi. Ularning bu zorli gaplari marhum xotirasini himoya qilish uchungina aytilmayotganini Omonullo sezdi. Bu gaplarga ishondi. Ammo «Eri safarda bo'lgan chiroyli yosh juvon bilan uning uyiga nima uchun keldi?» degan savolga javob topa olmagani uchun, marhumning ruhi chirqirasa ham, shu gumondan uzoqlashmaslikka majbur edi. Erkakning haromdan hazar qilib yurishi a'lo hol, biroq... o'rtada shaytoni la'in ham bor-da...

Marhumlar xizmat qilgan kooperativning boshligʻi gʻoyatda tez gapirganidan oʻzining ham nafasi qaytib ketuvchi, chaqchaygan koʻzlaridan makkorlik nuri sachrab turuvchi odam ekan. Omonullo «Odamning tili aldagani bilan koʻz qarashi alday olmaydi, men har qanday odamning koʻziga bir qarashdayoq kimligini aytib bera olaman», deb maqtanishni yaxshi koʻrardi. Qaynatma shoʻrvaning koʻpigi boʻlgani kabi, bu maqtanishning chegaradan chiqqan yeri ham bor edi. Ammo Omonullo yuzdan yetmish holda adashmas edi, deyilsa haqiqatdan chetga chiqilmas. Oʻsha yuzdan yetmish holatning biri kooperativ boshligʻini koʻrganida amal qildi. Shu bois ham «Siz marhumlarni yaxshi bilarmidingiz?» — deb soʻramay, gapni aylantirdi.

- Kooperativda ishlar qalay, gullab-yashnayaptimi? deb soʻrab, boshliqqa tikildi.
- Ha, endi, qimirlab turibmiz. Hukumatga rahmat, hamma sharoitlar bor.
- Gapingiz toʻgʻri. Sharoit zoʻr. Xohlagan qingʻirliklarga shart-sharoit mixday yaratilgan, buni biz bilamiz, Omonullo «biz» degan soʻzni alohida urgʻu bilan talaffuz etdi. Bu alohida ohang boshliqning miyasiga toʻqmoqdek urilib, bir seskandi. Lekin oʻzini qoʻllikka solib, xi-xilab kuldi:
- Ie, hali shunaqalar ham bormi? Qing`irlikdan Xudo asrasin. Hukumat shuncha sharoit yaratib berganiga shukr qilib to`g`ri ishlaganga nima yetsin!
 - Gaplaringiz zo'r... ammo sizda ham ozgina bor ekan, deb eshitdik.

Boshliq «buning gapi chinmi?» — degan fikrda kipriklarini pirpiratib, Omonulloga bir zum tikildi. Soʻng yana quvlik koʻchasiga oʻtib, jilmaydi. Jilmayganda lablarining sal titraganini Omonulloning ziyrak nigohi ilgʻadi.

- Hazilingiz bor boʻlsin. Biz «Xudo halolidan bersin», deb yurgan bandamiz, akaxon.
- Shunaqami? Ibrohimov bilan Boltaeva bu qin-gʻirliklarni ochamiz, deb yurishgan ekan-ku?

Omonulloning bu tagdor gapi soyasida «Ular sirni ochmoqchi boʻlganlari uchun oʻldirilganlar», degan ma'no bor edi. Ana shu ma'no oʻq kabi miyasiga sanchilib, butun tanasini zirqiratgan holda tovonidan teshib chiqqanday boʻldi. Endi yuzidagi quvlik jilmayishi ham yoʻqoldi. Bir oz oʻylandi-da:

- Kim shunday degan bo'lsa, o'lgan odamning go'shtini yebdi, dedi.
- O'lgan odamning go'shti? Gapingizga tushunmadim? dedi Omonullo ajablanib.
- G'iybat bilan tuhmat o'lgan odam go'shtini yeyish bilan barobar ekan.
- Shundaymi? Unda siz nima uchun bu go'shtni yedingiz?

- Men-a? Astag`firulloh! Nega bunday deyapsiz?
- «Bular suyuqoyoq edi, haydab yubormoqchiydim» degan kim, siz emasmi?
- Men shunday debmanmi?
- Xotirangiz yaxshi emasmi? Siz chet elning kinolarini koʻrmaganmisiz? Omonullo savolni berishga berdi-yu, javob kutmadi: Tugmachaga joylashtirilgan magnitofonlari bor... Bizda shunaqasi yoʻq deb oʻylaysizmi?
- Degan boʻlsam degandirman. Achomlashib yotishganda oʻldirib ketganidan keyin yana nima deyishim mumkin?
 - Kim sizga «achomlashib yotishgan» dedi?
 - Hammaning ogʻzida shu gap. Oʻzim koʻrmadim. Eshitganimni aytyapman.
 - Siz shu odamlarning rahbari edingiz. Nega anig'ini so'rab-surishtirmadingiz?
 - Menga buning nima qizig'i bor?
 - Siz ularning suyuqoyoq ekanliklarini isbotlay olasizmi?
- O'rtoq tergovchi, men sizning bunday savollaringizga javob bermayman. Meni go'l deb o'ylamang. Men ham yurfakni bitirganman. Uncha-buncha narsaga aqlim yetadi.
- Shundaymi? Omonullo kinoya aralash jilmaydi. Unda oʻrtoq hamkasb, siz ba'zi darslarga kirmay qochib yurgan ekansiz. Siz kirmagan darslarning birida «tergovchi ishga aloqador har qanday savolni soʻrashga haqli», deb ta'lim berilgan.
 - Hozirgi savolingiz ishga aloqadormi?
- Boʻlmasam-chi? Men ularning munosabatlarini bilishim kerakmi? Uyga nima uchun borishgan? Balki kooperativdagi qingʻir ishlarni yozish uchun borishgandir? Jahlingiz chiqmasin, bu shunchaki gumon xolos. Biz siz bilan yana uchrashamiz. Istasangiz advokat yollang. Advokat ishtirokida gaplashing, bu sizning huquqingiz.

Omonullo shunday deb iziga qaytdi. Aslida «Kooperativdagi qingʻir ishlarni fosh qilmoqchi boʻlishganda oʻldirilgan», degan gumoni zaif edi. Lekin kooperativ boshligʻining sarosimasi bu zaif gumonga quvvat berib qoʻydi. Yon daftarchasidagi «qotil kim?» savoli ostiga yozilgan «Eri», «Otasi» degan javob yoniga «Boshligʻi?» yozuvi ham paydo boʻldi. Ayniqsa, ertasi kuni boshliq nomidan advokatning kelishi uni ajablantirdi. «Oliy ma'lumotli yurist»dan bunaqangi harakatni kutmagan edi. «Bir balosi bor. Boʻlmasa he yoʻq, be yoʻq himoyachi yollaydimi?» deb oʻylab, «boshliq?» degan yozuv tagiga ikki marta chizib qoʻydi-da, Boshqarma boshligʻiga uchrab, kooperativning moliyaviy ahvoli zudlik bilan tekshiriluvi lozimligi haqidagi fikrini bayon etdi. Fikr ma'qullangach, ertasigayoq kooperativ muhrlanib, tekshiruv ishlari boshlandi.

Qotillikka oid tekshiruv qamrovi kengaygani sa-yin Omonullo savollar, jumboqlar girdobiga bandi boʻlib boraverdi. Girdobdan chiqa olish yoki tamoman muvaffaqiyatsizlik bahriga gʻarq boʻlishi oʻzining farosatiga bogʻliq ekanini u yaxshi fahmlardi. Bu kabi girdob uning uchun yangilik emas. Har bir jinoyatga doir ishning oʻziga yarasha oʻramasi mavjud. Shuning barobarida choʻkishdan asrab qoluvchi himoya chambaragi topilmasa ham ushlab olishga yaraydigan daraxt ildizimi yo xasmi, albatta boʻladi. Eng muhimi ularni vaqtida koʻra bilish, mahkam ushlab olishda. Choʻkayotgan odam xasga tirmashganidek, u ham biron bir dalilga mahkam yopishadi. Hozirgi girdobda u xas emas, himoya chambaragini topganday edi. Nazarida uydagi qonli izlar aynan shu chambarakning oʻzi edi. Qolgan dalillar suv oʻrami kabi uni oʻziga tortar, ammo u xaloskorlikni aynan oʻsha qonli izlarda deb oʻzini ishontirmoqchi boʻlardi.

Omonullo boshlig'iga kooperativda tekshiruv o'tkazish haqidagi fikrini bayon qilib, uning rizoligini olgach, yengil tortdi. U Boshliq huzuriga kirishda «siz jinoyatchini topish bilan shug'ullaning, kooperativning moliyaviy ishi sizga aloqador emas», deb qolarmikin», degan hadikda edi. Yaxshiki jinoyatning bir uchi shu ishga borib taqalishi mumkinligini Boshliq ham tushundi. Omonullo shundan xursand edi. Barcha sohalardagi

kabi ularning ishida ham ba'zan boshliqlarga gap tushuntirish qiyin boʻladi. Aynan bir xilda fikrlaydigan, ish yuritadigan boshliq bilan xodimni topish qiyin emas. Oʻz fikri, oʻz uslubi boʻlmagan odamlargina boshliq bilan bir xilda ish yuritadilar. Aqlli boshliqlar bunday xodimlardan ehtiyot boʻladilar. Bundaylarni oʻzlariga yaqinlashtirmaydilar. Ayniqsa jinoyatga daxldor ishlarda boshliq chizgan chiziqdan chiqmay yurish yaxshi natijaga olib kelmasligi mumkin. Boshliq qanchalar tajribali, bilimli boʻlmasin, har-holda u idora odamiga aylanadi. Har bir jinoyat esa alohida olam. Bu olamning oʻziga yarasha, boshqalarga oʻxshamaydigan past-balandliklari boʻladi. Idoradagi odam bularni oʻtgan tajribalariga suyangan holda payqashi qiyin. Boshliq shuni tushunsa — xodimning omadi yurishgani. Omonulloga bu safar shunday omad kulib boqqani uchun kayfiyati koʻtarildi. Uyiga ertaroq qaytib hordiq chiqargisi, fikrlarini tiniqlashtirib olgisi keldi.

Toʻqqiz qavatli uyning yoʻlagiga kirgach, ta'bi tirriq boʻldi: lift ishlamayotgan ekan. Yettinchi qavatga piyoda bosib koʻtarilish malol keldi. Halloslab chiqib borganiga yarasha uni bir mehribon kutayotgan boʻlsa ekan, dasturxon tuzasa ekan, erkalab, mehribonliklar qilsa ekan...

Xotini Fotimani Hindistonga kuzatganidan beri uyi huvillab, kirgan odamni yutaman, deydi. Sakkiz yil muqaddam Fotimaning barmog'iga nikoh uzugini tagganida, so'ng suyib bo'sa olganida xotinining nozli iltimoslariga, o'jarliklariga qul bo'lib golishini o'ylamagan edi. Ba'zan Fotimaning biron iltimosiga «xo'p» deb qo'yib keyin o'zi afsuslanib yurar edi. «Shu xotinning nimasini yaxsha ko'raman? Nimasiga ishqiboz bo'lib olganman? Bir og'iz yurganlar ko'p edi-ku? Bo'ldi! Endi bironta ilhaa dil'od bajarmayman!» deb ont ichardi. Ammo bu qasam qo'rg'oni Fotimaning birgina shirin jilmayishidayog vayron bo'lib ketardi. Fotima uzun gora soch-lari bilan bog'lab olganmidi, yo hamisha kulib tu-ruvchi shahlo ko'zlari bilan rom etganmidi, yo galdirg'och ganoti kabi qoshi, qayrilma kipriklari bilan qalbini o'ziga bo'ysundirganmidi — Omonullo bilmaydi. Bilgani — Fotimani jondan ortig sevadi. Fotima esa... Omonulloni sevadimi yo o'zining ilmiy ishinimi? Mana shu jumboq ba'zan yuzaga qalqib chiqib qolardi. O'shanda Omonullo «Men sizga kimman? Bir qulman. Sizga eng muhimi — ilmiy ish! Nomzod bo'lib olay, dedingiz — bo'ldingiz. Endi doktor bo'lmogchisiz — bo'lasiz. Keyin professor bo'lgingiz keladi, keyin akademik bo'larsiz. Omongul esa mishigi boladay atrofingizda girdikapalak bo'lib, xizmatingizni qilib yuraveradi», deb arazlaydi. Shunda Fotima yonar edi. Lov etib emas, atrofiga uchgunlar sachratib, «yaginlashsang — yutaman!» deb emas, mayingina, rohatijon bo'lib yonardi. O'zining eng ishonchli guroli — shirin jilmayishni ishga solardi, yuzidagi kulgichi erining araz o'tlarini so'ndira qolardi. «O'ttiz yoshimgacha chidaysiz, deb shart qo'yganmidim, siz o'shanda ko'nganmidingiz? Hozir to'qson foiz siznikiman, o'n foiznigina ilmiy ishimga berganman. Yoqlab olay, yuz foiz sizniki bo'laman. Boshqa unvonlarning orqasidan yugursam betimga tupuring. Men uchun eng muhimi — ilm. Odamlarga nimadir berish. Agar aglim bilan ilmim yetarli bo'lsa siz aytgan martabalarning o'zi keladi. Nima, akademikning eri bo'lsangiz yomonmi? Akademik kiringizni yuvsa, ikki bukilib choy uzatsa... yomonmi?» Shu gaplardan keyin Omonullo araz narvonidan pastroqqa tushardi: «Ha... endi siz ham xonim, generalning xotini bo'lsangiz yarasharmidi... General bozoringizni qilib bersa, gilamlaringizning changini qoqib bersa, «buyursinlar xonim!», deb qo'l qovushtirib tursa...»

Ularning birov uchun achchiq, birovga nordon tuyulgan, oʻzlari uchun esa yoqimli, shirin boʻlgan turmushlari shu zaylda davom etardi.

Hind olimlari Bobur saltanatiga oid doktorlik ishni Hindistonda davom ettirishni taklif qilishgach, Omonulloning yuragi bir uvishdi. Yarim yil yolg`iz yashash hazilakam gapmi?! Fotima «Bormasam bo`lmaydi!» deb ikki oyoqni bir etikka tiqib, janjal qilmadi. Odatiga

xilof ravishda «Siz nima desangiz shu — astoydil rozi boʻlsangiz, boraman, koʻnglingizga xiralik aralashsa — qolaman», deb qoʻydi. Omonullo nima derdi: «Qirqiga chidagan qirq biriga ham chidayman», deydi-da! Buning ustiga Fotima Omonullo uchun kutilmaganda tantanali va'da berdi: doktorlik dissertatsiyasini yoqlagach, to ilmiy ish Moskvadan tasdiq etilib, diplom qoʻlga tekkunicha Hasan-Husan tugʻib beradigan boʻldi. Bu gapni xuddi «Doʻkonga chiqamanu ikki quti gugurt yo tuz olib kelaman», degan tarzda aytdi. Omonullo esa ishondi. Uyi hasan-husanlar bilan toʻlib ketganday koʻngli yorishdi. Toʻgʻri, «Hasan-Husan emas, balki Fotima-Zuhra boʻlar», deb ham oʻyladi. Lekin uning uchun bu muhim emas, muhi-mi — xotini tugʻishga rozi! Rozi boʻlganida ham belgilangan muddatdan ikki yil avvalroq tugʻib bermoqchi. Matbuotchilarning tili bilan aytganda «planni muddatidan avval bajarmoqchi!» Bu katta yutuq!

Shu paytgacha oʻttiz yoshdan keyin, deb belgilagan muddatini astoydil himoya qilardi. Buni faqat oʻzining ilmiy ishlari bilan izohlamay, tibbiy jihatdan «ilmiy isbot» ham topgan edi. Nima emish, oʻttiz yoshdan keyin tugʻsa, bolalari zehnli, aqlli, ham jismonan baquvvat boʻlarmish. Bu da'voni eshitib, Omonullo kulgan edi. «Nimaga kulasiz?» — degan edi Fotima. «Mening bir tanishim bor, — deb javob qaytargan edi Omonullo, — u tugʻilganida otasi yigirma bir yoshda, onasi oʻn toʻqqizda boʻlgan ekan. Men oʻsha tanishimni koʻp kuzatganman: zehni past ahmoqqa oʻxshamaydi. Har-holda u salkam fan doktori-ya! Jismoniy jihatdan ham unchalik nozik emas...» Fotima oʻzi haqida aytilgan bu gapga javob berolmay, «Bu alohida masala», deb qoʻygan edi.

Hindistonga ketishdan oʻn kun avval Omonullo uyga yarim kechada qaytdi. Tunda qaytadimi yo sahardami — Fotimaning uxlamay kutishini yaxshi biladi. Fotima boshqa xotinlarga oʻxshab xavotir olmaydi, desak noinsoflik boʻlar. Haqiqatga koʻchsak, oʻlchami yoʻq, sigʻimi mavhum bu xavotir deganlari oʻlchansa, Fotimaniki hammanikidan koʻproq chiqar. Faqat u boshqalar kabi «Erim qachon kelarkin?» (yoki «Erim kim bilan ayshini surib yurganiykin?») deb jagʻini deraza tokchasiga tirab, koʻchaga tikilib oʻtirmaydi. Omonullo qay paytda kelsa ham uni yozuv stoliga muk tushgancha oʻqib-yozib oʻtirganini koʻradi.

Bu safar ham shunday bo'ldi.

Fotima bu safar ham odatini kanda qilmadi — «qayoqlarda yuribsiz?» demadi. Oʻrnidan turib salom bergach, oshxona tomon yurmoqchi boʻlganida eri toʻxtatib, «qornim toʻq», dedi.

— Hm, oʻgʻrilaringiz toʻydirib yuborishdimi? — dedi Fotima oʻziga yarashiqli kinoya bilan.

Boshqa xotinlar «oʻynashlaringiz», juda madaniy tarzda aytsa «xushtorlaringiz toʻydirib yuborishdimi?» deyisharkan. Fotima esa hamisha «oʻgʻrilaringiz» deydi, bu soʻzni aynan aytadi, uning panasiga «oʻynash», degan ma'noni yashirmaydi.

- Qamashdan oldin ziyofatini yeyish kerak-da, dedi Omonullo xotiniga javoban, soʻng stol ustidagi kitobga koʻz tashladi. Nima oʻqiyapsan? Yana «Boburnoma»mi? Yuzinchi martami?
- Ming marta o'qishim kerak. Har o'qiganimda bittadan ma'no topsam mingta ma'no topgan bo'laman.
 - Joningga tegmaydimi?
 - O'g'rilaringiz sizning joningizda tegishmaydimi?
 - O'... ularsiz yashay olmayman, deb kuldi Omonullo.
 - Men ham bu kitobsiz yashay olmayman.
 - Mensiz-chi?
- Gapni burmang. Siz koʻchada hushtak chalib yuradigan oddiy milisa emassiz. Oliy ma'lumotli ziyoli odamsiz.

- Buning ustiga boʻlajak akademikning eriman.
- Ha, shunaqa desak ham boʻladi. Lekin siz gapni burmay turing. Siz menga ayting: Boburni bilmagan, tushunmagan odamni ziyoli deyish mumkinmi? Qani, mana bu yerga oʻtiring-chi!

Omonullo kulimsiragan holda itoat etdi.

- Kulmang, deyapman.
- Xonim, tarix darsi uchun tunning qolgan yarmi yetarli boʻlarmikin? Balki boshqa tunga qoldirarmiz?
- Yo'q, hozir aytmasam, yorilib ketaman. Eshiting: Fotima shunday deb kitobning kerakli varag'ini ochib, o'qiy boshladi: — ...Muhammad Humoyun... olti oygacha anda edi: zohiran ani yer va suyi xush yoqmadi. Isitma tutar ekandur, bora-bora uzoqqa tortar» Tushundingizmi? — Fotima kitobdan bosh ko'tarib, eriga gapira ketdi: — Boburning o'g'li xasta ekan. Uni avval Dehliga keyin kemaga o'tgazib Agraga olib kelishni buyuryapti. Humoyun mirzoga tabiblar chora topib berisholmagach, Mir Abulqosim degan kishi deydiki, — Fotima endi yoddan ayta boshladi: — «Ushmundoq dardlarga davo budurkim, yaxshi nimarsalardan tasadduq qilmoq kerak. Toinki Tengritaolo sihhat bergay. Mening ko'nglumga keldikim, Muhammad Humoyunning mendin oʻzga yaxshiroq nimarsasi yoʻq. Men oʻzum tasadduq boʻlayin, Xudoy qabul qilsun. Xoja Xalifa, oʻzga muqarrablardin arzga tegurdilarkim, Muhammad Humoyun sihhat topar, siz bu so'zi nechun tilingizga kelturasiz? G'araz budirkim, dunyo molidin yaxshisini tasaddug qilmoq kerak. Bas, o'sha olmoskim, Ibrohimni urushida tushub erdi...» bu yerda dunyoga mashhur Ko'hi nur olmosi nazarda tutilayotgan bo'lsa kerak. Tushunyapsizmi? Ular «o'zingizni emas, shu qimmatbaho buyumni sadaga qilsangiz ham yetar», deyishibdi. Bobur nima debdi: «Tilga keldikim, dunyo moli aning evaziga nechuk boʻlgay, men aning fidosi gilurmenkim, hol anga mushkul bo'lubdur. Va andin o'tubturkim, men aning betoqatligini toqat keltur-g'aymen. O'shal holatga kirib, uch qatla boshidin o'rgulub, dedimkim, men ko'tardim har ne darding bor. O'shal zamon men og'ir bo'ldum, ul yengil bo'ldi. Ul sihhat bo'lub qo'pti. Men noxush bo'lub yiqildim...» Xo'sh, bunga nima deysiz? Qaysi podsho o'q'liga jonini sadaqa qilgan? Husayn Boygaromi? Ikkovini solishtiring: biri nabirasini o'ldirtirdi, biri jonini o'g'liga hadya qildi.
- Men ham gapirsam maylimi? dedi Omonullo xuddi oʻquvchi bola kabi qoʻl koʻtarib. Fotima sal chegaradan chiqqanini fahmladi-yu, ammo sir boy bergisi kelmay bir oz jilmaygan holda amr etdi:
 - Gapiring, o'rtoq kapitan, so'z sizga!
- Birinchidan, bu satrlarni menga avval ham oʻqib bergan edingiz, xonim. Ikkinchi gapim shuki, avval aytmovdim, endi aytaman: agar mening oʻgʻlim boʻlganida uch marta emas, uch ming marta atrofini aylanardim. Bitta emas, uch mingta jonim boʻlsa, hammasini sadaqa qilib yuborardim.

Fotima yarim tundagi suhbatning bu tarzda nozik torlarni chertib yuborishini sira kutmagan edi. Shu sababli taslim boʻlishdan oʻzga chorasi qolmadi. Kitobni yopdi. Kipriklari nigohini toʻsdi. Siniq ovozda:

— Ovqat yemaysizmi? — deb qayta soʻradi. Soʻng eriga iltijo bilan boqdi: — Yana ozgina sabr qiling...

Omonullo hozir uy yoʻlagida turib shuni esladi. Hovlida oʻynab yurgan bolalarga qarab havasi keldi. «Uylangan yilim tugʻib berganida hozir yetti yoshga toʻlardi. Qoʻlidan yetaklab yurardim. Maktabiga olib borib, olib kelardim. Oʻzi Hindistonida yursa yuraverardi...»

AJR

«Qizimni urgan qo'llaring akashak bo'lsin! Sen mening qizimni urding — seni Xudo ursin! Mening qo'llarim sening yoqangda! Qiyomatgacha qarq'ayman seni!».

Qaynonasining faryod bilan aytgan bu soʻzlari xotirasiga mixlanib qolgan.

O'shanda sud hukmini kutib o'tirgan edi. Qaynonasi ayyuhannos solib kirdi. Qarg'adi. Qarg'ab-qarg'ab xumoridan chiqmadi. Dod solib yig'layverdi. «Sud ishiga xalaqit beryapti», deb uni qariyb sudrab olib chiqishdi. Uning faryodi tashqarida ham tinmadi.

U avvaliga qaynonasining qarg'ishlariga tushunmadi. Xotinining o'lganini keyinroq bildi. Bildi-yu, qo'rqib ketdi. «Agar bu o'limni ham yelkamga yuklashsa, rahm qilishsa o'n besh yil berishadi, bo'lmasa otishlari tayin», deb o'ylab yuragi orqasiga tortdi. Har tugur «traktorni mast holda haydagani, «Jiguli»ga urilgani, haydovchining jarohat olgani...» qamalish uchun kifoya qildi. Qo'liga kishan urib, sud xonasidan olib ketishdi. O'sha onlarni keyinchalik eslasa «Baxtimdan o'rgilay», deb qo'yadigan bo'ldi. Xotini o'sha kuni emas, ikki-uch kun avvalroq o'lganida otuvdan qutulib qololmasligi tayin edi.

Sudga nima, «urganingda jigari yorilib ketgan», deb qotillik jandasini boʻyniga iladi. Qaynonasinikiga borib janjal qilgani, xotinini quvib yurib urganini bilishgach, «qasddan oʻldirgan», deb hukm chiqarib yuboraverishadi.

Qasddan... Xotinini oʻldirish xayoliga kelganmidi oʻsha damda? Qaynonasinikiga nima uchun borgan, xotinini nima uchun urgan — oʻzi ham bilmaydi. Esida qolgani: shiyponda mehmon kutadigan boʻlishdi. Raisning muovini kelib, unga «Traktoringni tutatma. Bugun nozik mehmon keladigʻon, bi-ir pazandaligingni koʻrsat», deb ketdi. Raisning mehmon kutadigan bogʻi, oʻzining oshpazi boʻlsa ham mehmonning bu yerda kutilishi ular uchun tushunarsiz hol edi. Uning pazandaligiga koʻpchilik qoyil qolardi. Oʻzi ham qozon atrofida yayrab ketardi.

Xullas, mehmon keldi. Ovqat yeyishining tayini yoʻq, ozgʻingina odam ekan, Jussasi nozikmidi yoki amali nozikmidi, bilisholmadi. Bilishga qiziqishmadi ham. Mehmon ketgach, ziyofatni oʻzlari davom ettirishdi. Bir tomondan kunning issigʻi, yana bir tomondan xalqumlarini qizdirib oʻtgan shayton suvi ta'sir qilib, shomga qolmay yumalab qolishdi.

U shom salqinida bir oz oʻziga kelib, koʻzini ochdi. Shishalarda, piyolalarda qolganqutganini toʻplab, nafsini orom oldirtirgach, bir amallab traktoriga chiqib oldi. Uyga borgani esida. Onasi nimadir dedi. Nima deganini keyin hech eslay olmadi. Soʻng qaynonasinikiga bordi... Qaytishda bir mashina roʻparasidan chiqdi. Keyin bilsa, uning oʻzi traktori bilan mashina roʻparasidan chiqqan ekan.

«Shunga yosh umrini juvonmarg qilib qamash shartmidi?..»

Uning xulosasi shu edi.

Koʻp narsalar esidan chiqib ketdi. Lekin qaynonasining faryodini unuta olmadi. Qamoqda yurganida ham, keyin ham vaqti-vaqti bilan qulogʻi ostida jaranglayverdi. Har jaranglaganda bir choʻchib tushadi. «...Seni Xudo ursin!..» Ibodatsiz boʻlsa ham qoʻrqardi bu qargʻishdan. «Xudo qanaqasiga urar ekan?» — deb koʻp oʻylardi.

Toshbolta Xudoning qanaqasiga urishini mana endi bilganday boʻldi.

Bu ojiz banda, bu nodon banda, bu shayton izmidagi banda foniy dunyodagi har bir harakati, har bir aytgan gapi uchun ajr mavjud ekanini, hatto qizining o'limi ham o'ziga yarasha mukofot ekanini anglab yetmagan edi.

U «norasmiy kuyovi», bir vaqtlardagi oʻzining ta'biri bilan aytganda «valine'mati» boʻlmish Tursunalining qoʻliga kishan urilganida koʻp ham qaygʻurmadi. Topar-tutari yaxshi, obroʻ-e'tibori ham baland chin kuyovga yolchiganidan soʻng Tursunali koʻziga shumqadam boʻlib koʻrinayotgan edi. Shilqimligi bir kunmas bir kun qizining oilasini

buzishi mumkinligini oʻylay boshlagan, avvalgi fikrlaridan qaytgan, boy amaldorga oʻynash boʻlishning qisqa umrli baxt ekaniga tushunib qolgan edi. «Erta-indin urilib ketish ehtimolidagi amaldorga oʻynash boʻlishdan, tagida vertolyoti bor olimga xotin boʻlish ming karra afzal», degan toʻxtamga kelganida uning mushkulotini Xudoning oʻzi yengillatib berdi — oʻynashni yoʻldan olib tashladi. Unga qadar «norasmiy kuyovi»ning marhamati bilan Sibiriya shaharlariga meva-cheva olib borib sotishni kasb qilayotgan edi. Bu ish bilan shu paytgacha shugʻullanib kelgan odamlari Tursunalining nazarida gʻirromlik yoʻliga oʻtishgan, uncha-buncha pulni oʻmarib qoladigan boʻlishgan edi. Gulday qizining nomusini hadya etishdan qaytmagan Toshboltaning sadoqatiga ishonib, Magadanga olib boriladigan bir vagon pomidorni unga topshirdi. Toshbolta pulga qoʻshib, bu yerlarda topilishi qiyin boʻlgan tilla-javhar buyumlarni olib kelib bergach, moʻljalni bexato olganidan oʻzicha quvondi. «Men buni bir laqma oshpaz deb yursam, baloning oʻqi ekan-ku!» deb ishonch darvozalarini kengroq ochdi.

Toshboltaga aynan shu — ishonch darvozasidan oʻtib, ichkariroq kirib, yaxshiroq oʻrnashib olish kerak edi. Aslida u yulduzni benarvon uradigan toifadan emasdi. Tursunali gumon qilganidek, ozgina laqmaligi ham bor edi. Ammo kattaroq daromadning hidi dimoqqa urilsa hiyla bosh koʻtarib, laqmalikni quvar ekan. Vagon Magadanga yetib borgunicha sheriklarining suhbatlariga zehn solib, pulni pulga urishtirib tilla «yasash»ni oʻrgandi. Magadandagi mijozlar esa «direktorga yaqin odam»ni oʻzlariga ogʻdirib olish uchun bu kasbning sir-sinoatlarini oʻrgatdilar. Pulning bir qismiga javhar koʻzli tilla uzuk olib borish ham ana oʻshalarning maslahati bilan boʻlgan edi. Birinchi safardayoq kishi bilmas tarzda puldan oʻmarib qoldi. Tursunali uning «sadoqati»dan, «vijdonan ishlashi»dan mamnun boʻlgan holda foydadan tuzukroq ulush ajratdi. Choʻntak pulga toʻlgach, yurish-turish ham boʻlakcha boʻldi. «Koʻrmaganning koʻrgani qursin», deganlari shu-da!

Tursunali qamaldi-yu, «norasmiy qaynota» ikki jumboq qafasida qoldi. Birinchi jumboq — tilla bezaklarga oid edi. U Sibiriya tomonlardan har safar tilla-javhar bezak olib kelardi. Tursunali qamalib, uyi tintuv qilinganda «boylik chiqmagan» emish. «Boylik topishni bilgan yashirishni ham bilgandir, ammo qaerga yashirgan?» Toshboltaning tinchini olgan jumboqning asosiysi shu edi. Qizidan bir necha marta soʻradi, Nafisa «bilmayman», deb yelka qisib turaverdi. Ikkinchi jumboq Sibirga qatnashning toʻxtashi yoki toʻxtamasligiga bogʻliq edi. Uning baxtiga yangi direktor begonalardan boʻlmadi. Oʻzining qoʻlidan taom yeb yurgan, Tursunalining maishatiga sherik bosh muhandis yigit direktorning kursisiga oʻtirdi. Bir oy mobaynida bogʻdagi mehmonxonaga qadam bosmadi. Kelgan mehmonlarni ham idoradan nari kuzataverdi. Yangi «halol» rahbarning ibratli ishlari haqida gap-soʻzlar boshlangach, ustozining yoʻliga pinhona tarzda oʻta qoldi. Meva-chevalar pishishi arafasida Toshboltani chaqirib, Sibiriya safari haqida surishtirib, ishni avvalgiday davom ettirishi lozimligini aytdi. Soʻng:

Nafisaxon sog`-salomatmilar? Bu tomonlarga bir kelaman ham demaydilar-a?
 Kelsalar bexabar qolmaylik, — deb qo`ydi.

Bu bilan ustozining merosxo'ri sifatida o'ynashga ham ega chiqajagini shipshitgan bo'ldi.

«Obbo xunasa-ey, sening ham darding bormi?! — deb oʻyladi Toshbolta gʻashlanib. «E, bola, mening qizim fohisha emas, eri bor, uy-joyi bor!» — deb siltamoqchi boʻldi-yu, oʻzini tiydi. «Gapiraveradi-da, koʻz tikkani bilan qizim kelib toʻshagiga yotib olarmi-di», — deb oʻzini ovutdi.

El og'zida «Ot bosgan joyni toy bosadi», degan naql yuradi. Shunga ko'ra Tursunali ot bo'lsa, shogirdi toy misol edi. Qo'polroq tarzda tavsif berilsa, Tursunali tupirganu u yalagan edi. Ustozi qamalganida uning ham paytavasiga qurt tushdi. Harholda ustozi

oshni oʻzi oshalagani bilan unga yalatib turardi. Yangi direktor Yaratganga emas, rahbarlariga shukr qiladi: har tugul oshalaganlarni olishdi-yu, yalaganlarga mar-hamat darvozalarini ochishdi. Ular anglashmadiki, yaloqxoʻrlarning nafsi oshalaganlardan ham buzuqroq boʻladi. Oshalagan qorni toʻygunicha yeydi. Yaloqxoʻr esa koʻzi toʻygunicha. Koʻzning hech qachon toʻymasligi esa barchaga ayon. Xususan, kattalarning xizmatini qilib yurib fe'l-atvorlarini bilib olgan Toshboltaga ham ma'lum bu. Shu sababli qizi tilga olinganda uning koʻzlarini oʻyib olgisi kelgan boʻlsa-da, oʻz aravasini oʻzi tortib ketishga qurbi yetmasligini bilgani uchun oʻzini tiydi. «Yaloqxoʻr» deb yangi direktordan nafratlangani bilan tirjayib, unga qulluq qilib turishga majbur edi.

Yangi direktor ham Toshboltani suymas edi. «Belida belbogʻi boʻlsa gulday qizini xoʻjayinga oʻynash qilib qoʻyarmidi», deb gʻijinib yurardi. Bu gʻijinish pokizalik alomati emas, balki rashk olovining mevasi edi. Tursunalining qilmishi haromning oʻzi boʻlgani kabi buning gʻashligi halollik emas edi. Ba'zan bu goʻzalning bir kechalik ogʻushi uchun dunyosini berishga rozi boʻlib ketardi. Omadini qarangki, dunyosini bermasa ham jonon naqd boʻlib qoldi. «Bu Oshbolta deganlari hozircha xizmatimni qilib yuraversin. Vaqti kelganda bir tepsam enasinikiga kirib ketadi» — yangi direktorning moʻljali shu edi.

Bir-birlarini yomon koʻrganlari bilan ularni nafs deb nomlangan koʻrinmas zanjir mahkam bogʻlagan edi. Nafsning miqdorini oʻlchaydigan tarozi boʻlganda ham qaysi biriniki buzuqroq ekanini aniqlab bera olmas edi. Nafsga bandi bandalar shu holatlarida bir-birlari bilan murosa qila oladilar. Pokiza hayotni afzal biluvchilar esa arzimagan masalalar boʻyicha gap talashib, oqibatda ittifoq qila olmaydilar va oqibatda nafsga bandi bandalar yetkazgan zulmdan azob chekib noliy boshlaydilar.

Toshbolta ham, yangi direktor ham qimorbozning «gardkam!» deyishi kabi tavakkal qilgan edilar. Dast-labki ittifoq ikkovlari uchun ham manfaatli edi. Ayni choqda ikkovi ham ajralish onlariga tayyorgarlik koʻrardilar. Yangi direktor Toshboltaning avvalgi kabi sadoqat bilan ishlashiga ishonmagani sababli uning oʻrniga «oʻz odami»ni tayyorlardi. Toshbolta ham yangi xoʻjayin eskisi kabi marhamatli boʻla olmasligini anglab mustaqil ish yuritishni, hatto boshqa yerga koʻchib ketishni koʻzlardi. Shu borishida Sibiriyada orttirgan oshnalari bilan maslahat qilib ayrim ishlarni pishitdi. Yangi direktorga topshiradigan puldan koʻproq urib qolib, noyob mollar xarid qildi. Safardan koʻngli toʻlib, yaxshi niyatlar bilan kelib qizi yashaydigan uy eshigini ochdi-yu...

Yaratgan tayyorlab qo'ygan mukofotlardan biri — shu edi...

Koʻzlariga ishonmadi. Xuddi tush koʻrayotganday boʻldi. Eshikni ochishi bilan dimogʻiga sassiq hid urilganida «Eri bilan ketgan boʻlsa, ovqat-povqati hidlanibdi», deb oʻyladi.

Keyin... avval notanish erkakning jasadini koʻrib bir seskandi. Soʻng qizining ahvolini koʻrib tanasidan jon chiqib ketganday boʻldi. «Qizim! Nafis!» — deb baqirmoqchi edi, ovozi pichirlab chiqdi. Koʻz oldi qorongʻilashib, hamma narsa ayqash-uyqash boʻlib ketdi. Ana shu qorongʻulik qa'ridan qaynonasining hayqirigʻi otilib chiqdi: «Seni Xudo ursin!!».

Militsiyaga xabar qilgach, yuklarni ichkari olib kirdi-da, jomadon ustiga holsizlanib o'tirdi. Boshini changallab, tebrandi. Yig'lashi kerak edi — yig'lay olmadi. Yig'i ham Ollohning ne'mati ekan, rahm qilganiga berar ekan bu ne'matni. Yaratgan Toshboltaga bu onda yig'isiz ruh azobini ravo ko'rdi.

Poezdda kelayotganida yuragi gʻash edi. Gʻashlikni yoyish uchun sheriklari uzatgan aroqni qaytarmay ichaverdi. Ikki tun ketma-ket birinchi xotinini tushida koʻrdi. Xotini ozib ketgan, eti ustixoniga yopishgan holda emish. Holsiz emish, xasta emish. «Meni qaraydiganim yoʻq, mehribonim yoʻq», deb yigʻlar emish. Koʻzlaridan oqqan yosh muz donalariga aylanib qolarmish. Toshbolta «Seni bu yerdan olib ketaman», deb opichib olganmish. Xotini esa yigʻlab, yalinib «yoʻq, olib ketmang, oʻzingiz keling», der emish.

Toshbolta ertalab uygʻonib, bu tushidan ajablandi. U tush yoʻyishni bilmas edi. Harholda bu tush yaxshilikka ishora emasligiga aqli yetdi. Keyingi uyqusida xotinini yana koʻrdi. Xotini juldur kiyimda emish. Keyin qaynonasi paydo boʻldi. U qargʻadi, qargʻayverdi, xotini esa kuldi, kulaverdi...

Jomadon ustida boshini changallaganicha tebranib o'tirgan Toshbolta shularni esladi.

Keyin... odamlar kelishdi.

Keyin... tergovchi so'roq qildi...

Bularning hammasi tush kabi edi. Go'yo hozir uyg'onadiganday, dahshatli tush barham topadiganday edi.

Tekshiruvchilar tekshiradiganlarini tekshirib boʻlishgach (Sibiriyadan keltirgan mollari ham e'tibordan chetda qolmadi — xatga tushirildi), «uyni berkitib, muhrlaymiz», deyishdi. Qalbi muhrlangan banda uyni muhrlamoqchi boʻlganlarga nima ham deya olardi? Boshini xam qilib uydan chiqdi. Qizining nomusi sotilganda egilishi lozim boʻlgan bosh ajal tiqʻi qoʻzgʻolgach, biratoʻla egildi.

Toshbolta uyiga anchagina mol-dunyo koʻtarib kelishni reja qilgan edi. Bu safar adoqsiz alam-gʻam dunyosini yelkasiga ortmoqlab kirib keldi. Erini gʻamnok ahvolda koʻrgan Adolat avvaliga ajablanib qarab turdi. Keyin uch-toʻrt qadam qoʻyib peshvoz chiqdi-da. «Salomaykum», deb savol muhrlangan nazarini eridan uzmay qarab turdi. Savol soʻralmagan boʻlsa ham Toshbolta bu qarashda «Ha, nima boʻldi, yuklaringiz qani?» degan ma'noni uqib gʻijindi-da, ichida «He, saloming boshingni yesin!» — deb qoʻydi.

...Toshbolta qamoqdan chiqib qishlog'ida uzoq yashay olmagan edi. Xuddi birov atayin uyushtirayotganday qaynotasiga, qaynog'asi, qaynilariga duch kelaverdi. Ular, aynigsa gaynonasi, tilda gapirmasalar ham ko'z garashlari bilan garg'ardilar. Traktorchilikka birga o'qigan oshnasi cho'ldagi yangi sovxozda brigada boshlig'i ekan, onasining ziyoratiga kelganda Toshboltani uchratib, ishga taklif gildi. Tasodifni garangki, o'sha yili Adolat ham «qalb da'vati» va komsomol yo'llanmasi bilan «cho'l quvqani» kelgan ekan. Uning shahardagi qiliqlaridan bexabar Toshbolta jilmayib qo'yishlariga xushtor bo'lib, «o'qituvchi xalqi yaxshi bo'ladi», degan fikrda odam qo'ydi. Adolat «gamalib chiqqan traktorchiqa tegamanmi», deb nozlanib o'tirmadi. Zero, bu yerga kelishdan maqsadi cho'l quvish emas, biron laqmani topib er qilib olish edi. Unga nomi uchun er bo'lsa bas edi. Shunga binoan uning magsadi shoirlarning tili bilan aytiluvchi «choʻlguvarlik» emas, balki «erquvarlik» edi. Toshbolta uylangach, «xotinimning ismi o'ziga mos ekan», deb gizini olib keldi. Dastlab turmushidan rozi edi. Adolat ko'p jihatlari bilan birinchi xotinidan a'loroq tuyuldi. Keyin-keyin asal oylari tugab, zahar kunlari boshlangach, «Agar Adolat degani shu boʻlsa, adolatiga ming la'nat!» deb peshonasiga shapati urdi. «Qo'shning yomon bo'lsa, ko'chib qutulasan, xotining yomon bo'lsa qo'yib qutulasan», deyishadi. Toshbolta bu maqolni birinchi kim to'qiganini bilmaydi. Bilganida edi, o'sha aytgan odam hayot bo'lganida edi, unga tik bogib: «Bekor aytibsan! — derdi. — Gapimga ishonmasang, ana, Adolat degan shaytonning urg'ochisiga uylanib ko'r-chi, qo'yib qutula olarmikansan!»

> Yomon xotun shayotun qamchisidur, Qoʻlung bogʻlaguvchi argʻamchisidur. Oʻshal xotunki nomahram nazardur, Agar u shamsu qamardur mochaxardur. Agar chandiki buzrukzodadur ul,

Yaqin bil, to'rt oyoqlik modadir ul...²⁰

Ayni chilla paytida brigadalariga bir muxbir kelib, qamish chaylada oshxoʻrlik qilib, «yuzta-yuzta otib» oʻtirishganda yomon xotindan gap chiqdi-yu, mehmon shu satrlarni oʻqib berdi. Ayrim soʻzlariga yaxshi tushunmasa ham she'r Toshboltaga ma'qul kelib, uch marta qayta oʻqittirdi. Muxbir yigit «xotin oydek boʻlsa ham, quyoshdek boʻlsa ham, agar u yomon boʻlsa urgʻochi eshshakning oʻzidur», deb izoh bergach, toʻlqinlanib, koʻzlari yoshlanib «akam boʻlasiz!» deb choʻlpillatib oʻpib ketdi. Soʻng satrlarni bir parcha qogʻozga yozdirib ham oldi. Kayfi tarqagach, she'rni ham, satrlar yozilgan qogʻozni ham unutdi. Koʻylagi yuviladigan boʻlganda Adolatning qoʻliga tushib, u labini burdi. She'rni oʻsha muxbir yozgan deb oʻylab, eriga dashnom berdi-da: «oʻshaningiz bekorlarning beshtasini aytibdi, shayton urgʻochi boʻlmaydi, erkak boʻladi, she'r ham «yomon xotun emas, yomon erkak deyilgan», deb donolik qildi. Uning ishonch bilan aytgan gaplarini tinglagan kishi «shaytonni shu tuqqanga oʻxshaydi, shaytonning erkakligini aniq bilyapti-ku» deyishi mumkin.

Er-xotin orasida birinchi janjal chiqqanida Adolatning oʻzi unga «ovora boʻlmang, meni qoʻya olmaysiz. Mendan faqat oʻlibgina qutulasiz», deb dangal aytgan edi. Toshbolta nima qilsin, taqdirga tan berib yashayverdi. Faqat ichib olgan kezlari doʻstiga hasrat qilib «e, oshnam, sen mening dardimni bilmaysan, peshonamning shoʻrini oʻlchash uchun traktor tortadigan tarozining ham kuchi yetmaydi», deb nolirdi. Adolat esa mehribonlik qilib unga yana uchta qiz tugʻib berdi. Qizlari tugʻilgunicha bir navi edi. Ana undan keyin Nafisaning ham qora kunlari boshlandi. Oʻgay ona qanday boʻlmogʻini bilmoq istaganlar Nafisadan soʻrasalar edi, u aytib berardi. Oʻgay onalarning zulmi haqida hikoyalar koʻp. Adolat ulardan oʻtsa oʻtardiki, kam emas edi. Nafisani Tursunaliga roʻpara qilish fikri dastlab aynan shu xotindan chiqqani inobatga olinsa, makr bobida tengsiz ekanini anglamoq mumkin.

... Toshbolta oʻlikxonaga olib ketilgan qizining murdasini qachon olishi mumkinligini soʻrashni ham unutib, qishlogʻi sari yoʻl olganida Adolatning oʻsha fikrini esladi. Esladiyu, boʻgʻildi. Shunda ham «Ahmoq xotinning gapiga kirgan — men ahmoq!» demadi. Uning aqlsiz aqliga bunday gapning kelishi mumkin ham emasdi. Buning oʻrniga «Nafisani direktorga qoʻshingu keyin Tursunalini sogʻin sigirday sogʻib yuravering», degan tillarini uzib olgisi keldi. Qanday qilib qoʻshishni oʻrgatgan bu xotinni oʻsha paytda oʻldirmaganiga achindi. «Oʻldirganimda meni ham otishardi, bu azoblarga duch boʻlmas edim...».

Toshbolta qizining shu yoʻl bilan baxtli boʻlishiga ishongan edi. Dastlab baxt quyoshi charaqlagan ham edi. Bu nurdan uning xonadoni bahramand edi. Uylariga gilamlar... rangli televizorlar kirgan edi. Sibiriyaga qatnay boshlagach, u ertakdagi baliqchi cholga, Adolat esa kampirga aylandi-qoldi: teshik togʻoraga qanoat qilmadi, saroyga ham... Uylari direktornikidan kam emasdi... Navbat «Jiguli»ga yetganda...

Baxt quyoshi birdan soʻndi. Baxt quyoshi deb oʻylab yurganlari aldamchi koʻrinish ekan. Bu quyosh deb oʻylaganlari nur emas, qon sachratayotgan ekan.

Toshboltaning nazarida bularning barchasiga Adolat aybdor edi. Uyiga kela kelgunicha bu fikr qat'iy qaror quvvatini oldi. Shu bois ham salomga alik olmay «saloming boshingni yesin», deb qo'ygan edi.

Toshbolta ayvonga toʻshalgan koʻrpachaga omonat oʻtirdi. U aslida uyga kirmay qishloqdagi oshnalarinikiga borib, boshiga tushgan kulfatdan ogoh qilmoqchi, «qaerga koʻmganimiz ma'qul, shu yergami yo qishloqqami? Togʻalariga xabar berayinmi yo yoʻqmi?» deb maslahatlashmoqchi edi. Keyin fikrini oʻzgartirib, xotinga xabar berib

²⁰ Hazrat So'fiy Ollohyordan.

qo'yay, deb yo'lni uyga burgandi. Ko'rpachaga o'tirgach, bir xo'plam choy umidida xotiniga qaradi. Xotin esa uning ro'parasiga o'tirib oldi. Toshbolta choy so'rashni ham, kulfat xabarini aytishni ham bilmay garang, Adolat esa erining ahvoliga tushunmay hayron edi. Xotin kishining sabr kosasi erkaknikiga nisbatan sayozroq bo'ladi. Shu bois ham birinchi bo'lib Adolat tilga kirdi.

— Ha, muncha, men yeb siz quruq qolganday tumtayyapsiz? Nima boʻldi, yorila qoling!

Toshbolta uchun bu gaplar yangilik emasdi. Avvallari eshitganida «e, oʻchir!» — deb qoʻya qolardi. Hozirgisi goʻyo oʻq boʻldi-yu, azob iskanjasidagi yuragiga qadaldi.

— Uningni o'chir, qanjiq! — deb baqirib yuborganini o'zi ham bilmay qoldi.

Kuchli, ayni damda alamli hayqiriq bilan otilib chiqqan bu haqorat Adolatning hushini oldi. Uncha-bunchaga gap bermaydigan, boʻyin egmaydigan bu xotin chindan ham «unini oʻchirgani» ma'qulroq ekanini ang-lab, chaqqon oʻrnidan turdi-da, oshxonaga qarab yurdi. Bir ozdan soʻng choynak-piyolani koʻtarib kelib, eriga choy kuyib uzatdi:

Dadasi iching, hovuringiz bosiladi.

Iliq lafz bilan aytilgan bu gap ham Toshboltaga malol keldi.

- Hovurim bosilsinmi? Hovurim bosilishini istab qoldingmi?! He, enangdi... He, seni menga roʻpara qilgandi... deb turib tuyqusdan piyolani otdi. Adolat chaqqonlik qilib boshini egib qolmaganida piyola naq peshonasiga tegardi. Erining fe'lini yaxshi bilgan Adolat gʻazab oʻtining alanga olishiga yoʻl qoʻymaslik maqsadida chaqqon oʻrnidan turdi. Bunday holatda koʻp ayollar qochishga, berkinishga harakat qilishadi. Adolat esa oʻzini tank ostiga tashlaydigan jasur askar kabi eriga yaqin kelib, yelkasidan quchib oldi.
- Voy, dadasi sizga nima bo'ldi? Sizni qaysi uying kuygur xafa qildi? deb ovuta boshladi.

Adolatning makri amal qilib Toshbolta picha hovuridan tushdi. Bo'g'ziga yig'i kelib, ko'zlari pirpiradi.

- Ayting, ayta qoling, yengil tortasiz, nima bo'ldi?
- Nafis... Nafisni oʻldirib ketishibdi... Shunday deb yigʻlashi lozim edi, ammo boʻgʻziga qadar kelgan yigʻi zohirga chiqa olmadi.
 - O'ldiribdi? Qaysi uying kuygur o'ldiribdi? Nima qasdi bor ekan?

Toshbolta «bilmayman», deb bosh chayqadi.

Adolat bir zum jim qoldi. Keyin past ovozda:

- Bir kunmas bir kun shunday bo'lishini bilardim, dedi.
- Nimani bilarding? dedi Toshbolta sergak tortib.
- Jahlingiz chiqmasinu, gʻar boʻl, oʻgʻri boʻl, insof bilan boʻl, deyishadi.
- Nima?! Xotinining bu gapini eshitib, Toshboltaning koʻzlari kosasidan chiqar darajada olay-di: — Nima deding, qanjiq?! Hali mening qizim senga gʻar boʻldimi?!

Toshbolta shunday deb xotinini tirsagi bilan turtib yubordi. Adolat kutilmagan zarbdan yiqildi. Astoydil doʻpposlashga hezlanib oʻrnidan turayotgan erining vajohatini koʻrib, kurash qurolini oʻzgartirishi lozimligini angladi. Harbiylarda «eng ma'qul mudofaa usuli — hujumdir», degan haqiqat bor. Adolat harbiy emas, bu qoidani bilmaydi. Ammo xalqda mavjud «qoʻrqqan oldin musht koʻtarar», degan maqoldan xabardor boʻlgani sababli eridan avvalroq oʻrnidan turib, unga chekchaydi:

— Ha, g'ar bo'lmay go'rmidi? G'arligini bilmasmiding?!

Avvalgi janjallarda Adolat baqirib, sensiray boshlaganida Toshbolta «Sen it bilan teng kelamanmi», — deb chekinib qoʻya qolardi. Adolat bu safar ham shunday boʻlishiga umid qilib yanglishdi: bu shunchaki «er-xotinning urushi — doka roʻmolning qurishi» emas, oʻrtada fojiali oʻlim topgan farzandning ruhi bor edi. Toshbolta uning sensirashiga ham, baqirishiga ham parvo qilmay Adolatni urib qoldi. Adolat «Voy-dod!» deganicha hovliga

qochdi. Toshbolta uni quvlamoqchi bo'lganida oyog'i zinada toyib ket- di-yu, yonboshiga qursillab yiqildi. Chakkasi ayvon ustuniga urildi.

Adolat bu holatni koʻrib, avvaliga «Ajab boʻlsin, battargina boʻl-a!» — deb oʻyladi. Soʻng erining qimirlamay qolganini koʻrib «voy oʻlayin, voy dadasi!» — deb yugurganicha yaqinlashdi. Toshbolta hadeganda xushiga kelavermagach «Voy-dod, erim oʻlib qoldi! Voy-dod, shunqorimdan ayrilib qoldim!» deb faryod koʻtardi. Uning ovozini eshitgan qoʻshnilar chiqib, Toshboltani koʻtarib ayvonga yotqizishdi, vrach chaqirishdi. Vrach «Shu yerda qimirlamay yotsinlar, qimirlatsanglar uzilishlari mumkin», dedi.

- Tuzalib ketadilarmi, axir? deb soʻradi Adolat.
- Umid qilavering.

Adolat bu javobni eshitib «Doʻxtur boʻlmay oʻla-a, tuzatish qoʻlingdan kelmasa, nimaga umid qilaman»,— deb mingʻirladi.

Ertasiga Toshboltaning xastaligidan xabar topgan oshnalari kelishdi. Yengil xurrak otib, harakatsiz yotgan doʻstlariga achinib qarab oʻtirishdi. «Yoʻlda urinib qolgandir?» — deb xulosa chiqarishdi. Shunda Adolat:

— Yo'l ham bir go'r, qizlarini o'ldirib ketishibdi. Shundan kuyib ketdilar, — dedi.

Oshnalar bu kutilmagan fojea xabaridan ajablanib: «Qachon? Qaerda?» deb soʻrashdi. Adolat «aytishga ham ulgurmay shunaqa boʻlib qoldilar», — deb bezrayib oʻtiraverdi. «Dafn etishibdimi?» degan savol ham javobsiz qoldi. Shunda ular «Dafn etadagʻon boʻlsa oʻsha yerdan telpon qilib xabar berardi, uch kun oʻtirardi», degan toʻxtamga kelishdi.

Bir oz jimlikdan so'ng oshnalardan biri:

Unda borib mayitni olib kelish kerak, dafn etish kerak, — degan taklifni aytdi.

Ayvonning bir chetida o'tirgan Adolatga bu taklif ma'gul kelmadi.

Ko'madigan eri bor-ku? — deb tanbeh berdi.

Oshnalar bu xotin oldida maslahatlashish ortiqchaligini bilib, oʻrinlaridan turishdi. Bu xonadondan chiqib toʻgʻri samovorxonaga bordilar-da, maslahatlarini davom ettirdilar. Oradan bir soat oʻtmay uch kishi shaharga yoʻl oldi. Bir kishi Toshboltaning qishlogʻiga, Nafisaning togʻalariga xabar berish uchun joʻnadi.

Mayitni olib ketamiz, deb kelgan uch kishi kun bo'yi ovorai-sarson bo'ldilar. Maslahatni xom-xatala pishirib yo'lga chiqaverganlaridan afsuslandilar. Marhumaning uyini bilishmasa, nasabini bilishmasa, erining kimligini bilishmasa bu katta shaharda ular sarson bo'lmay yana kim bo'lsin? Ular yo'lga chiqishganda «o'likxonaga boramizu» og'aynimiz Toshbolta kasal bo'lib qoldi, qizining jasadini beringlar», deymizu jasadni moshinga yuklab shomgacha yetib kelamiz, bomdodga chiqaramiz», deb mo'ljal qilishgan edi. Avtobusdan tushishgach, bir taksini kira qilishib, «bizlarni o'likxonaga boshlab boring, uka», deyishdi.

- Qaysi biriga? dedi taksichi.
- Ie, o'likxona ko'pmi bag'da?
 deb ajablanishdi oshnalar.
- Katta kasalxonalarning har birida bor-da, dedi taksichi.
- Unda eng kattasiga boshlang, deyishdi oshnalar.

Kasalxonada «qachon oʻlgan, familiyasi nima?» degan savolga yelka qisish bilan javob berishdi. Ikkinchi joyga borishganida ham shu savolga duch kelishib «egasiz murdalar boʻlsa, koʻrsating», deyishdi. Koʻrishdi ham. Uchinchi yerga borishganida «qachonligini bilmaymiz-u, ammo bir-ikki kun ichida oʻldirib ketishgan shekilli», — deyishdi. Ana shunda masala sal oydinlashib «kasalxonalardan axtarmanglar, oʻldirilgani aniq boʻlsa boshqa yerga boringlar», deb qaerga borish lozimligini tushuntirishdi. U yerda ham «familiyasi?» degan savolni eshitib xunob boʻlishdi.

— Hoy, uka, tushunyapsizmi, juvonni oʻldirib ketishgan, — deyishdi.

— Akaxonlar, yilda bitta juvonni oʻldirib ketishgan boʻlsa, gaplaringga tushunardim. Oʻntami-oʻn beshtami egasiz oʻlik yotibdi...

Oshnalardan biri tarang qilayotgan yigitning choʻntagiga pul qistirgach, ichkari kirib Nafisani tanidi.

- Shu juvon, o'rab bering, uka, olib ketaylik,— dedi.
- Sizlar kimi boʻlasiz, ruxsat oldilaringiz- mi? degan savolga javob boʻlmagach, pul ham yordam bermadi. Uchovlari shomga yaqin izlariga qaytishdi. Ertasiga yetib kelgan Nafisaning togʻasi bilan yana shaharga tushib, mayitni oldilar. Nafisaning togʻasi janoza qishlogʻida boʻlajagini aytgach, noiloj unga ergashdilar.

Dafn marosimida kuyib yigʻlaguvchi boʻlmadi.

Fagat achindilar:

«Yosh ketdi, bechora...»

Otaga farzandining qabriga bir siqim tuproq tashlash nasib etmadi. Xudo hattoki shuni ham koʻp koʻrdi unga...

Omonullo bu gaplardan bexabar boʻlgani uchun ma-yitning kechikib olib ketilishidan ajablangan edi. Oʻlikxonadagilar bilan gaplashib dastlab uch notanish odamning, soʻng ertasiga marhumaning togʻasi kelganini bilgach, Toshboltaning qishlogʻiga borish ehtiyoji tugʻildi. Uning nazarida bu holatda ham qandaydir sir yashirin edi.

Omonulloni depara ichki ishlar boʻlimining vakili Toshbolta yashaydigan qishloqqa boshladi. Vakil hech bir lutfsiz, manziratsiz eshikni ochib, hovliga kirib bordi. Omonullo esa unga ergashdi. Toshbolta ayvonda, bir necha kun avval qoʻshnilar yotqizib qoʻygan joydan jildirilmagan edi. Bemorning bosh tomonida oʻtirgan oq doʻppili qariya qur'ondan oyatlar oʻqib vaqti-vaqti bilan dam solib qoʻyardi. Kir chayayotgan Adolat hovliga bostirib kirgan notanish erkaklarni koʻrib, qoʻllarini peshbandiga artganicha oʻrnidan turdi-da, ularga roʻbaroʻ boʻldi.

- Biz militsiyadanmiz, dedi vakil, soʻng e'tiborsizlik bilan qoʻshib qoʻydi: siz ishingizni qilavering. Domla oʻqib boʻlgunicha kuta turamiz.
 - Oʻqimay oʻla qolsin, bu domla, bir foydasi boʻlsa ekan, dedi Adolat mingʻirlab.

Bu gaplar ming'irlab aytilgan bo'lsa-da, Omonullo eshitib ajablandi. «Bu xotinning esi joyidami o'zi?» deb o'ylab, ayvonga yaqinlashdi. Oq do'ppili qariya unga bir qarab oldiyu, o'qishini, dam solishini davom ettirdi. Toshboltaning ochiq ko'zlari shiftga qadalgan, faqat dam solingan paytda behalovat tarzda, nimanidir izlaganday alang-jalang bo'lib ketardi. Qariya faqat o'zi eshitadigan tarzda pichirlab duo o'qidi-da, bemorning yelkalari, boshini uqalagach o'rnidan turdi. Omonullo bilan hilmlik ila so'rashdi. Shunda Omonullo qariya yuzida ajib pokizalik, ajib nurni il-g'adi.

Adolat ayvonga yaqinlashib, sholchaning bir chetini koʻtardi-da, pul olib «mang, ota», deb uzatdi.

— Hojati yoʻq, singlim, — dedi oq doʻppili qa-riya.— Men Ollohning roziligi uchun xolis xizmat qildim. Yaratgandan shifo tilang, ammo sergak turing. Umid — yolgʻiz Ollohdan, — qariya shunday deb bir-ikki qadam bosdi-da, toʻxtab, orqasiga qaradi: — Ha, darvoqe, singlim, Xudo xayringizni bersin. Zinhor ba zinhor «oʻqimay oʻla qolsin, bu domla», demang. Gunohlardan oʻzingizni asrang. Ajrni berguvchi yolgʻiz Ollohdir.

Adolat bu tanbehdan uyalib, qizarib oʻtirmadi, «shuni ham eshitibdimi-ya?» deb qoʻya qoldi. Omonullo esa «mingʻirlab aytilgan bu gap qanday ma'lum boʻldi?» deb ajablandi.

Oq do'ppili qariya chiqib ketgach, Omonullo ayvonga ko'tarilib bemor yoniga o'tirdida, salom berdi. Ahvolni ko'rib turgan bo'lsa-da, ko'ngil uchun:

Salomatligingiz yaxshimi endi? — deb so'radi.

Toshbolta uni ko'rib, tanidi, ko'zlari bejo bo'ldi.

— Gapirolmaydi, til ketgan. Oyoq-qoʻl ham ketgan. Tirik oʻlikning oʻzginasi, — dedi Adolat.

Bu qo'pollik Omonulloga malol keldi.

- Kechirasiz opa, siz bu kishiga kim bo'lasiz? dedi dag'alroq ohangda.
- Xotiniman, dedi Adolat ayvon chetiga omonat oʻtirib. Keyin izoh berdi: Ikkinchi xotiniman. Oʻzingiz kimsiz?
- Men shahar militsiyasidanman. Nafisa Boltaevaning ishi bilan shugʻullanyapman, Omonullo shuday deb guvohnomasini uzatdi. Adolat guvohnomani olib, qiziqish bilan tikildi.
- Oʻzi nima boʻlgan? Qiz oʻlgurni nimaga oʻldirishibdi? dedi u guvohnomani egasiga uzatar ekan.
 - Eringiz aytmadilarmi?
- Aytolmadi. Shu zinadan yiqildi-yu, shunaqa ado boʻldi. Oʻlib oʻlmaydi, jonlanib jonlanmaydi. Boshimga bitgan bir balo boʻldi. Traktorchiligida yagʻirlarini yuvaverib qoʻlim qavargan edi, endi isqirtlarini yuvish ham peshonamga yozilgan ekan. Peshonam shoʻr boʻlmasa shunga tegarmidim. Shu savilga tegib men bir roʻshnolik koʻrmadim. Yotishini qarang. Bu yoqda uchta qizi yetilib turibdi. Hali bittasining ham orzu-havasini koʻrganim yoʻq. Ayting, ayting, oʻlib qolmasin, oʻlsa butun yiqqan-terganlarim sovruladi. Hali ham dorilari hamyonni oʻpirib ketyapti. Arzonroq dorilar boʻlsa ham goʻrga edi. Doʻxtur oʻlgur nuqul qimmatini tanlab yozib beribdi.

Omonullo xotinlarning turli toifasini koʻrgan, ammo bunaqasini endi uchratishi edi. «Qani, gapiraversinchi», — deb bir oz qoʻyib berdi. Lekin uzoq toqat qila olmadi. Adolat «shu aytayotganlarim bularga kerakmi?» — deb fikr qilmay, tiliga kelganini qaytarmay gapiraverardi. Telba desa telbaga oʻxshamasdi, sogʻ desa sogʻga. Gʻashi kela boshlagan Omonullo uning gapini qoq belida shart boʻldi:

- Eringiz traktorchimidilar?
- Traktorchi bo'lmay go'r bo'larmidi? Boshqa hunari yo'q.
- Irkutskga nima uchun borgan edilar? Traktor olib kelgani emasmi?
- Traktorga balo bormi? Ozgina meva-cheva olib ketuvdi.
- Tez-tez borib turarmidilar?

Adolatning ahmoq ham, telba ham emasligi shu savoldan keyin aniq bilindi. U militsiya xodimi bekorga savol bermasligini anglab, tilini jilovladi. Bir oz o'ylagan bo'lib:

- Bu yil birinchi borishi, dedi.
- O'tgan yillarichi?
- O'tgan yili ham bir marta borgan.
- Sheriklari bormidi?
- Bilmayman.
- Boltaevaning uyida ancha mol bor ekan. «Sheriklarimniki» dedilar. Irkutskdan olingan toza mollar ekan.

Adolat eriga g'azabli nigohini bir qadab oldi-yu, indamadi.

— Bu mollarni biz egalariga qaytarishimiz kerak. Egasi chiqmasa davlat hisobiga o'tadi.

Omonullo moʻljalni nihoyatda aniq olgan edi. Adolat moldan ayrilishi mumkinligini his qilib bir seskandi-da, Omonulloga yomon qarash qildi:

- Davlatga oʻtadi? Nimaga oʻtarkan? Egalariga qaytaraman, deysizmi, kim ekan egasi?
 - Sheriklari-da. Eringizning oʻzlari menga shunday deganlar.
 - Bekor aytibdi. Hech ganaga sherik-perigi yo'q. Mol happi halol bizniki.
 - Irkutskka gachon ketib, gachon keldilar?

- Ketganiga ancha bo'ldi, bir oydan oshdi. Kelishi... shu, avvalgi kuni. Keldiyu shu baloga yo'liqa qoldi.
 - Bizga ma'lum bo'lishicha, bir hafta oldin kelganlar?

Omonullo «otasi oʻldirgan boʻlishi mumkin», degan gumondan uzoqlashgan boʻlsa-da, yana bir qarmoq tashlab koʻrmoqda edi.

- Bir hafta oldin kelgan ekanmi? Qaysi qoʻrlarda yurgan ekan?
- Bu yerga kelmadilarmi?
- Kelsa bir gadam siljitmas edim.
- Nega?
- Uy-joyga ham qarash kerakmi? Erkak oʻlgur qaramasa, kim qaraydi? Men xotin boshim bilan yuguraymi?
 - Siz «ikkinchi xotiniman» dedingiz, birinchisi qaerda?
 - Go'rda.

Omonullo buni to'g'ri ma'noda aytyaptimi yo piching qilyaptimi, fahmiga yetolmay, savol nazari bilan qaradi.

- Ha, nimaga qaraysiz? Goʻrda dedim-ku? Oʻlgan-da.
- Qachon?
- Bilmayman. Qamoqdan chiqib kelganidan keyin tekkanman men bu yer yutkurga. Aniq bilmayman-u, ammo xotinini urib oʻldirgan ekan. Shunaqa jinniligi bor, menga ham tashlanib qolardi.
 - Urib oʻldirgan? Qamalish sababi boshqacha-ku?
 - Boshqa bo'lsa boshqadir, men eshitganimni aytdim.
 - Boltaeva bu yerga tez-tez kelib turarmidi?
 - Kelardi, lekin tez kelarmidi yoʻqmi, hisoblamaganman.

Omonullo portfelidan Sanjar Ibrohimovning suratini olib ko'rsatdi:

— Shu odam bilan kelganmi hech?

Adolat suratga tikilib turib, bosh chayqadi:

— Tanimadim. Toʻgʻrisini aytaymi, bir-ikki marta sariq-moshak eri bilan kelgan edi. Keyin oʻzi kelib-ketib yuruvdi. Oʻsha savil qolgur er bilan birga yurishga uyalgan-da. U odamni koʻrgandirsiz? Qanday qilib koʻngli tortib er qildi, hayronman. Undan koʻra, ersiz oʻtgani ming marta yaxshi. Shunaqa deyman-u, lekigin bu «shilta»ni oʻsha taviyadan boshqasi olmas ham edi-da.

Adolat shu gapni aytganidan keyin Toshbolta gʻalati ovoz chiqarib ingradi. Omonullo ovoz chiqishi bilan unga qaradi. Toshbolta kipriklarini pirpiratib, iltijo bilan boqardi. Soʻng koʻzlarida yosh paydo boʻldi. «Xotinining gapi yoqmay bir nima demoqchi boʻlyapti», — deb oʻyladi Omonullo. Keyin tinmay javrayotgan xotinning gapini boʻlib, soʻradi:

- «Shilta» deyishga biror asosingiz bormi?
- Voy, asosmi? Asos tiqilib yotibdi. Bu qiz o'lgurning oldingi direktorga o'ynash bo'lganini yetti yoshdan yetmish yoshgacha — hamma biladi. Endi yangi direktorning to'shagini obod qilyatuvdi.

Bu gapdan keyin ham Toshbolta ingradi.

— Nimaga g'ingshiysiz? — dedi Adolat ovozini balandlatib. — Boqqa borib kelganlaring yolg'onmi? G'ar bo'l, o'g'ri bo'l, insof bilan bo'l-da! Boshingda ering bo'lganidan keyin o'tirmaysanmi uyingda...

Adolatning ogʻzidan chiqqan keyingi gaplarni Omonullo bozor yoʻlida «folingdan ochayinmi, molingdan ochayinmi», deb oʻtirguvchi loʻli xotinlardan eshitib, bulardan boshqa tuzukroq gap chiqmasligini bilgani uchun ham achchiqlanmagan edi. Ammo eri bu ahvolda yotgan ayoldan shu gapni eshitib gʻazabi qoʻzgʻadi.

— Siz biron yerda ishlaysizmi? — deb so'radi dag'allik bilan.

- —Ishlamay nima, shunga boqimanda bo'lib o'tiramanmi? Maktabda ishlayman.
- Kim bo'lib, farroshmi?
- Vey, nima deyapsiz? Men o'gituvchiman. Oliy ma'lumotli o'gituvchiman!
- O'qituvchi?.. Maktabning ham, bolalarning ham sho'ri qurigan ekan unda,
 Omonullo shunday deb o'rnidan turdi.
 - Voy, voy, og'zingizga qarab gapiring, nima deyapsiz?
 - Ogʻzingizdan chiqayotgan gaplarni qarang.
- Gaplarimga nima boʻpti? Vey, sen kimsan oʻzing, menga tanbeh beradigan? Sen borib oʻzingning xotiningga qil dagʻdagʻangni, bildingmi? Sen yigirma yil shunaqa traktorchi bilan yasha-chi, koʻraman ahvolingni!
- Hov opa, tilingizni tiying, bunaqa deyishga haqqingiz yoʻq, dedi shu paytgacha jim turgan depara vakili.
 - O'zing tiy tilingni. Qani, bir jo'nab qollaring-chi, huv, qoralaring o'chsin-a...

Omonullo o'zini xotinning shallaqiligiga e'tibor bermaganday tutib, ko'cha eshik tomon yurdi. Hovli o'rtasiga yetganda to'xtab, vakilga topshiriq berdi:

— Leytenant, bu opangizni rayonga chaqirib soʻroq qilasiz. Natijasini yozma ravishda yetkazasiz.

Vakil bu topshiriqni po'pisa uchun berilganini anglab, baland ovozda:

Xo'p bo'ladi, o'rtoq kapitan!deb qo'ydi.

Bu po'pisadan keyin sal popugi pasayar deb o'ylashgan edi, yo'q, aksi bo'lib chiqdi:

— Rayoningga desang, rayoningga boraman. Kerak boʻlsa Maskovingga boraman. Meni qoʻrqitmay qoʻyaqol. Sen oʻgʻrini qoʻrqit, banditni qoʻrqit. Mening nimamni soʻroq qilasan? Oʻgʻrilik qilibmanmi, gʻarlik qilibmanmi?

Omonullo bu xotinga hatto shayton ham bas kelolmasligini anglab, qadamini tezlatgan edi, kutilmaganda Adolat:

To'xtang, hay to'xtang, — deb qoldi.

Hozirgina sensirab, qarg'ash darajasiga yetgan ayolning sizsirashi, ovozining muloyimlashuvi g'alati edi. Shuning uchun ham vakil beixtiyor:

- Ha, opa, tinchlikmi? deb yubordi.
- Senda gapim yoʻq, sen ketaver, dedi Adolat unga, keyin Omonulloga yaqinlashib soʻradi: Men mollarni olgani qachon boray?
 - Qaysi mollarni? dedi Omonullo xuddi tushunmaganday.
 - Voy, qaysi deganingiz nimasi? Erim olib kelgan mollar-chi!
 - Mollar sizga berilmaydi, egasiga beriladi.
 - Egasini ko'rib turibsiz-ku?
 - Yaxshilab qarang, tuzating. Tuzalganlarida borib oladilar.
 - Voy, savil, voy savil...

Adolat shunday deb qolaverdi.

Ko'chaga chigib mashinaga o'tirishgach, Omonullo «uf» tortdi:

- Agar shu odam o'lsa, to'g'ri jannatga boradi. Bu odam bilan savol-javob bo'lmaydi,
 dedi, u.
 - Nega? deb so`radi vakil kulimsirab.

Omonullo bu xotinning shallaqiligidan bezib Fotima oʻqib bergan satrlarni eslagan edi. Mirzo Bobur Husayn Boyqaroning katta xotini Beka Sultonbegimni yoza turib, «koʻp kajhulq edi», deb «yaxshi kishining xonasidagi yomon xotun shu dunyoning oʻzidayoq uning doʻzaxidir», degan mazmundagi baytni yozgan ekan. Hozir shu bayt mazmuni yodiga kelib aytvordi shu gapni. Vakilning «nega?» degan savoliga esa Boburdan misol keltirishni istamay, soddagina qilib: «Bu xotin bilan yashagan erkak doʻzax muddatini oʻtab boʻlgan hisoblanadi», deb qoʻyaqoldi.

Ular bu uydan chiqib toʻgʻri sovxoz idorasiga bordilar. Yangi direktor «Nafisa Boltaeva nima uchun kelgan edi?» degan savolga «Men rahbar boʻlganimdan beri uni koʻrganim yoʻq. Tursunali akamga kelib turardi», deb javob berdi. Omonullo gapni har qancha chalgʻitsa ham «kelmagan, koʻrmaganman», deb turib oldi.

Omonullo xayrlashar mahalida «yana kelamiz, uchrashamiz», deganida ham u «yana kelsangiz ham gapim shu: koʻrmadim», — dedi.

Yangi direktor aldamadi: Nafisa kelganida u shaharda edi. Juvonning kelib-ketganini bogʻ qorovulidan eshitib, «eh attang!» deb afsuslangandi. Omonulloning savollaridan keyin «yaxshi hamki u falokat kelganida yoʻq ekanman», deb shukr qildi.

LUQMA

(Qotillikdan avvalroq sodir boʻlgan voqea)

Tursunali boyligini qaerga yashirganini aniq ayt-gan boʻlsa ham Tengiz shoshilmadi. Qish oʻtib bahor kelsa-da, xazina haqida gap ochmasdan yuraverdi. Bu orada Tursunalining yarasi tuzaldi. Lager huzuridagi hibsxonada yotib, tergovchi soʻroqlariga javob berdi. Tursunalining baxtiga tergovchi uni urmadi, qiynamadi-yu, oxir-oqibat «oʻzini himoya qilayotganida meyor-ni oshirib yuborgani uchun» yana qoʻshib berishdi. Lager hibsxonasidan chiqqanida Tengiz uni yoʻqlab, dalda berdi:

— Umrim qamoqda chirir ekan, deb afsuslanma. Agar aytganing rost chiqsa, seni yurtingdagi lagerga joʻnattiraman. Muddating yarmidan oʻtishi bilan erkinlikka chiqasan. Mening gapim — gap!

Tursunali bu gaplarga bir ishonib, bir ishonmay yurdi. Ishonmagani — muddati yarimlagunicha kim boru kim yoʻq. Ayniqsa, bu oʻgʻrilar olamida bugun bor odamning ertaga izsiz ketishi hech gap emas. Bu Tengiz deganlari ham kerilib yurgani bilan zoʻrrogʻiga duch kelsa, iniga kirib ketishi aniq. Tengizning gapiga ishonganining sababi esa, undan boʻlak hech kim dalda bermadi. Va'da yolgʻon boʻlgan taqdirda ham harholda dalda edi. «Oʻgʻrilar bir soʻzli», deb eshitgan. Uning umidi shundan edi.

Bahor yomg'iri ezib yog'ayotgan kunlarning birida Tursunali Tengizga duch kelib:

- Topdilaringmi, aldamabmanmi? deb soʻradi. Bu bilan «Va'dangni qachon bajarasan?» demoqchi edi. Tengiz uning maqsadini anglab, yuziga yengil shapati urib qoʻydi:
 - Shoshilma, har ishning vaqti-soati bor.
 - Topdinglarmi oʻzi? dedi Tursunali, Tengizning javobidan qoniqmay.
- Shoshilma, deyapman-ku. Cho'michga aytgan joyingga borishibdi. U yerda chindan ham yo'q ekan.
 - Bolalarimga tegishmabdimi?
- Ha, ana, aqling joyida ekan-ku! Bolalaringni endi esladingmi? Choʻmichga yolgʻonni aytayotganingda oʻylamovmiding? Borishsa, topisholmasa, bolalarimni qiynashsa... Xotiningni, qizlarningni zoʻrlashlari ham mumkin edi, a? Sen bizdan qarzdorsan. Biznikilar boʻlishmaganda qizlaring juvon holida erga tegardi. Nomussizlik sizlarda ham azob, a? Men oilangni himoya qilaman, deb va'da berganmanmi, demak shunday boʻladi! Tengiz shunday deb uning yuziga yana yengil shapati urdi-da, yoʻlida davom etdi.

Tengizning «nomussizlik — sizlarda azob, a?» deb qoʻyishi Tursunalini tashvishga soldi. «Xotiningni, qizlaringni zoʻrlashlari mumkin edi», degani esa badanini muzlatib yubordi. Shu paytgacha «norasida qizlarimni birov zoʻrlashi mumkin», degan gap xayoliga kelmagan edi. Tengizning gapidan soʻng esa, shu dahshat sodir boʻlgandek, bir necha kungacha ezilib yurdi. Davroni kelgan paytlarda, ayshini surgan kezlarida «shular ham birovning qizi-ku?» deb oʻylamagan edi. Hatto Nafisaning nomusiga ega chiqqanida

ham «buning taqdiri nima boʻladi?» deb fikr qilmagan edi. Alhol, Tengizning gaplaridan keyin ham bularni o'ylamadi. U faqat o'z qizlarining taqdiridan tashvishda edi.

Tengiz uning yuziga yengil shapati urib, o'zini xotirjam ko'rsatgani bilan tashvishi o'ziga yetarli edi. U kim bilan o'ynashayotganini bilardi. Agar bir it qoqsuyakning hidini olib, yaqinlashsa-yu, bu suyakni birov bosib, olsa, naq ilikdan tishlashi tayin. Gobelyan esa it emas, hid olgani ham qoqsuyak emas. U itga o'xshab ilikdan ham olmaydi, naq bo'g'izga yopishadi. Lekin uning navbatdagi odami qachon paydo bo'ladi, qachon va ganagasiga tashlanadi — ana bu muammo edi. Yana bir muammo — bu safar kimni yuboradi? Tursunalining yolg'on ma'lumoti bilan Murikning o'limi orasida bog'liglik borligiga ularning agllari yetadi.

Tengiz shu savollarga javob izlaydi. Uning lagerdagi sheriklari esa betogat bo'lishadi. Tursunali besabrlik bilan so'ragan kunning ertasiga «Politbyuro» yig'ilishida Koshak xazina nima bo'lganini so'radi.

Hozircha xazina yoʻq ekan, deb turaveraylik, — dedi Tengiz.

Bu gapni eshitib, Qo'tos unga ajablanib garadi. Koshak esa, joyida bir gimirlab olib:

- Yolg'on gapirma, knyaz, dedi. Sen bu xabarni teletaypga qo'ymagansan.
 To'g'ri, qo'ymaganman, dedi Tengiz xotirjam.— Aqling bo'lsa, o'ylab ko'r-chi? Bu xabarni teletaypga qo'yish mumkinmi? Undan ko'ra Moskva radiosiga chiqib jar sola qolmaysanmi?
 - Teletaypga qo'ymagan bo'lsang, kim orgali chiqarding xabarni?
 - Hech kim orqali chiqarmadim. Chiqarmayman ham.
- Knyaz, gapni burmay, toʻgʻri tushuntir. Bizga yolgʻon gapirma, dedi Qoʻtos norozi ohangda. — Bilasan, menga boylikning keragi yo'q. O'rtaga o'q'rilik nomusi tikilgan.
- Men nomusini sotadigan odamga o'xshayapmanmi?— dedi Tengiz ovozini bir parda baland ko'tarib. — Koshak, sen ham shunday o'ydamisan?
- Senga birov bunaqa degani yo'q. Shunaqa o'ylasam Murikning yonida yotgan bo'larding. Sen «xazina yo'q», deyapsan. Biz «yolg'on gapirma», deyapmiz.
- Yolg'on gapirmadim. «Xazina yo'q», ham demadim. «Xazina yo'q ekan, deb turaveraylik», dedim. Nima, ruschaga tushunmay goldilaringmi? Ozgina poylashimiz kerak. Cho'michni yuborganlarni ahmaq deb o'ylamalaring. Tuzoqlarini tayyorlab turishibdi ular. Koshakka o'xshagan bir ahmaq xabar chiqarar, yana bir ahmaq deb poylashmaydimi? Mayli, xazinani olgani kelar, ular kutishaverishsin. Kuta-kuta charchashadi. Shunda biz ishni boshlaymiz. Shunda ham lager teletaypidan chiqarmaymiz xabarni.
 - Nima gilmogchisan, ayt, dedi Qo'tos.
- Hozir boshqa odam yuborishsa-chi? Bu laqmani boshqa laqerga joʻnatishsa-chi? dedi Qo'tos.
- Ha, shunaga bo'lishi aniq, dedi Koshak. Vaqt borida uni ham gum qilish kerak. Agar birov higildog'idan olsa, gullab go'yadi.
- O'ldirishga shoshilma. Boylik topishni bilgan odam sen bilan menga o'xshagan yuzta odamni lagillata olmaydimi? Cho'michni aldadi. Balki bizni ham aldagandir? Boyligi boshqa yerdadir? Bugun oʻldirsang, ertaga attang, deb yurasan.
- Knyaz, hamma gaplaring toʻgʻri. Lekin chaynayotgan luqmangni oldirib qoʻyma, dedi Qo'tos ma'nodor ohangda.

Tengiz unga norozi qiyofada bir qarab qo'ydi. «Politbyuro» ahli undan uzil-kesil qaror kutayotgan edi. U biroz o'ylangan bo'ldi-da, o'rnidan turib, ahdini ma'lum qildi:

— Ovqatni qanday chaynab, qanday yutishni oʻzimga qoʻyib beringlar. Hali hech bir kavkazlik og'zidagi lugmasini birovga oldirib go'ymagan. Dunyo turgunicha shunday bo'lib qoladi!

«Politbyuro» berkitilgan boylik va boylik egasining taqdirini hal qilayotganida Nuriddin bilan Tursunali oʻzaro munosabatlarini oydinlashtirayotgan edilar. Aniqrogʻi, Nuriddin oydinlashtirayotgan edi. Bu ovloqda bir-birlarini ko'rganlarida hali notanish bo'lsalar ham suyunib ketishgan edi. Harholda begonalar orasida hamyurtlarning bir-birlariga dalda bo'lishi yaxshi-da. Kunlar, haftalar o'tgani sayin fe'li, tabiati, dunyogarashi turlicha bo'lgan bu ikki mahbusning dastlabki suyunchlari so'na bordi. Aynigsa, Nuriddinda bu odamdan uzoglashish istagi tug'ildi. Tursunalining ham bu mag'rur yigitga da'vosi ko'payib borayotgan bo'lsa-da, lozim paytda himoya qila olishi mumkinligi sababli undan nari ketishni xohlamadi. U «O'zbekning kichigi bo'lgunicha kuchugi bo'lgin», degan magolni bu yerda ham amal qilishini istar edi. U avvaliga Nuriddinni «tug'ishgandan a'lorog ukamsan», deb izzat qilib yurdi. Keyinroq «aka»lik martabasi kamlik qilib, «xojalik»ni da'vo qila boshladi. U hordiq chiqarish paytlarida o'zining mavqei, shon-shuhrati haqida, shu shuhrati oqibatida ko'p dushman orttirgani va tuhmat bilan bu baloga uchragani to'g'risida gapirardi. Shaharda hali ham baland martabali akaxonlari, og'aynilari borligi, Nuriddin ozodlikka chiqqach quchoq ochib kutib olajaklarini tez-tez pisanda qilardi. Borabora bu gaplar Nuriddinning me'dasiga tegdi. Pisanda soyasida «Sen menga hozir sidgidildan xizmat qilaver, ozodlikka chiqqaningdan keyin mening valine'matlarim seni panohlariga olishadi», degan ma'no yashiringanini ham fahm etdi. Tursunalining hasrat daftari ochilishi bilan bir narsani bahona qilib, turib ketadigan bo'ldi. Tursunali buni sezdi-yu, «bilagida kuch bor-u, boshida agli yo'g bu bolaning», degan hukmga keldi. Dorulomon kunlari bo'lganda-ku, bu «boshida aqli yo'q bola»ni sariq chaqaqa ham olmas edi-ya! Bu ovloqda suyanadigan boshqa odami bo'lmagani uchun chidadi. Hatto bir kuni Nuriddin «Aka, yukni hadeb menga yuklayvermang, aravangizni o'zingiz ham torting-da, judayla o'ligingizni tashlab oldingiz», deb go'rslik qilganida ham tishini tishiga qo'ydi. Bunga o'xshagan «manga yigitlar» ilgari ostonasida sarg'ayib o'tirishardi. Bu esa...

«Politbyuro» ish boshlaganida qamoq lagerining tobelari kechqurungi ovqat bilan qorinlarini aldab, yotar joylarga tarqalayotgan edilar. «Qorinlarini aldab», deyilishining boisi — oshxonada alyumin kosalarga suzib beriluvchi suyuqlikning nomigina «ov-qat» edi. Tursunaliga oʻxshab umri maishatda oʻtganlarning oshqozonlari bunday aldovga chiday olmasdan qiynalardi. Xullas, navbatdagi aldovdan soʻng nazoratchi mayor dam olish umidida chiqib ketayotgan Tursunali bilan Nuriddinni toʻxtatib, «idish-tovoq yuvishga oʻtlaring», deb buyurdi. Agar «nima uchun biz yuvishimiz kerak?» deb eʻtiroz bildirilguday boʻlsa, bu kamlik qilib, tuni bilan ishlab chiqishlari mumkinligini bilganlari uchun, mulla mingan eshak holida buyurilgan ishni bajarishga kirishdilar. Nuriddin uchun bunday yumushning ogʻirligi ham, malolligi ham yoʻq, u bundan battar yumushlarni bajaraverib oʻrganib ketgan. Tursunali uchun esa mazkur holat xorlikning bir koʻrinishi edi. Shu sababli nazoratchi sal nari ketishi bilan diydiyosini boshladi:

— Bu dunyoda adolat deganning oʻzi yoʻq, — dedi u mingʻirlab. — Kun boʻyi ishlab berganim kammi bunga? Shunaqa paytda Xudodan ham xafa boʻlib ketaman. Men xalqning noni butun boʻlsin, deb tunu kun tinim bilmas edim. Terim paytida haftalab uyga kelolmas edim...

Tursunali shu tarzda yana eski ashulasini boshladi. Nuriddin uning gaplarini eshitmaslik uchun kosalarni atayin bir-biriga urishtirib, shovqin chiqarib yuvardi. Tursunali esa buning fahmiga yetmay bitta kosani koʻtarib olganicha likopcha ushlab, katta ashulani olayotgan hofiz kabi turib, mingʻirlashini davom ettirdi. Me'daga teguvchi bu «katta ashula» oxiri Nuriddinning sabr kosasini toshirdi:

— Juda-a, ez-zib yubordingiz-da, aka! — dedi u zarda bilan. — Nuqul adolat deysiz, nuqul halollik deysiz, birovlardan talab qilasiz. Oʻzingizda bormikin shu adolat, shu halollik?

Nuriddin shu gapi bilan Tursunalining betiga shapalog tortganday bo'ldi.

- Vey, uka, vey, Nuriddin, sizdan eshityapmanmi shu gaplarni, a? Biz kimmiz axir, adolatsizlik qurbonlari emasmizmi?
- Meni oʻzingizga tenglashtirmang. Sizning yoʻrigʻingiz boshqa. Adolat bilan halollikni hamma gapirganida ham siz gapirmang.
- Vey, uka, siz bu gaplarni bir gapirdingiz, ikkinchi aytmang. Men siz oʻylagan nopoklardan emasman. Hammani bir xil qarichda oʻlchamang. Men halol yashab kelgan odamman.

Nuriddin bu gapdan iljaydi. Bu iljayish zamirida zahar borligini payqagan Tursunali tutaqdi:

- Kulmang. Men sizdaqalarning qanchasini... Tursunali «oʻynatganman» demoqchi boʻldi-yu, mavridi emasligini bilib, gap maromini burdi: Sizdaqalarning qanchasiga yordam berganman, oʻqitganman, hunar oʻrgatganman.
- Aka, dedi Nuriddin qoʻlini kir sochiqqa artib, bu gaplarni boshqaga aytsangiz ham menga aytib, ovora boʻlmang. Men qishloqda oʻsgan bolaman. Sizga oʻxshagan «direktor buva», «rais buva»larning qiliqlarini juda yaxshi bilaman. Siz butun dunyoni aylanib bittagina halol raismi yo direktornimi topib, menga roʻpara qiling, agar u chindan halol boʻlsa, men kallamni shart uzib, qoʻlingizga tutqazayin.

«Kallangni pishirib ye», dedi oʻzicha Tursunali. Bahs oʻzining foydasiga hal boʻlmasligini anglab, unga javob bermay, qoʻlidagi kosani yuvmoqqa kirishdi. Shu onning oʻzida hisob-kitobni roslab olmoq ahdidagi Nuriddin esa, «hujum»ni davom ettirdi:

- Halollik deysiz. Qaysi rais, qaysi direktor amalga bepul oʻtiradi? Siz sarf-xarajat qilmaganmisiz? Keyin raykomlaru obkomlarning tomogʻini moylab turmaganmisiz? Qaerdan olardingiz? Halol odam topa oladimi shuncha pulni? «Terim paytida haftalab uyga bormas edim», deysiz. Toʻgʻri, bormas eding-lar. Sizlarning shtablaringiz boʻlardi, a? Tunlari paxta punktlarida qiladigan ishlaringni qilib olardilaring. Men ketmonchining oʻgʻliman. Esimni taniganimdan beri qoʻlimda ketmon. Lekin birimiz ikki boʻlmagan sira. Plan yuz ellikdan pastga tushmagan, ammo choʻntak pul koʻrmagan. Siz aytgan adolat shumi? Halollik shumi? Bu yerdagi oʻgʻrilar nima uchun sizga yopishib qolishdi? Tuhmatga uchragan odamga ular tegishmaydi. Qaytaga himoya qilishadi. «Halol»dan topganingiz koʻpdirki, tinch qoʻyishmayapti. Oʻgʻrini qaroqchi ursa shunaqa boʻladi.
- Vey bola, sen haddingni bil! Oʻgʻrilaringga qoʻshib iningga kirgʻizvormayin tagʻin! Tursunali shunday deb kosani otdi. Nuriddin kosani kafti bilan bir urib, nariga uchirib vubordi.
 - Ana, haqiqat istaysiz-u, haq gapga chiday olmaysiz.
- Shunaqami? Men haromxo'rmanmi? O'g'rimanmi? Sen o'zing-chi? Kimligingni bilmaymanmi?
- Kimligimni yashirmayman, qilgan ishlarim uchun uyalmayman. Men bir ablahni oʻldirdim. Bu yerda yana bittasini oʻldirdim. Ular tirilib qaytib roʻpara boʻlishsa, baribir yana oʻldirardim. Bu yoʻldan qaytmayman. Bilib qoʻying: men siz kabi odamlardan nafratlanaman. Sizga oʻxshaganlardan bu yerdagi oʻgʻrilar ming marta yaxshiroq. Ular oʻgʻirlaydilar, talaydilar, kerak boʻlsa oʻldiradilar. Lekin sizlarga oʻxshab «Pokman!» deb miyani achitmaydilar. Oʻgʻriliklarini tan oladilar. Oʻgʻri ekanliklari bilan faxrlanadilar. Sizchi? Hamma yogʻingiz shaltoq boʻlib yotibdi-ku, yana pok-likdan, adolatdan gapirib, boshni qotirasiz. Agar ochiqlikda duch kelib shu afsonalaringizni aytsangiz, betingizga tupurvorardim, aka. Bu yerda noilojlikdan salom-alik qilyapman. Atrofdagilar ikki oʻzbek

bir-biri bilan chiqishmas ekan, deyishlaridan hijolatdaman. Bu yerda yana bir kun birga boʻlamizmi yo bir yilmi, mayli, aka-ukadek yuraveraylik. Faqat mening oldimda oʻzingizni pok koʻrsatishga tirishib jigʻimga tegmang, aka. Men toʻgʻri oʻsgan bolaman. Tilim zahar boʻlsa ham toʻgʻrisini aytib qoʻya qolaman. Endi kosalarni men yuvay, siz toza suvda chaya turing. Ishlama-yotganingizni koʻrsa baloga qolasiz.

Nuriddin shunday deb yana ishga kirishdi. Tursunali uni gʻajib tashlagisi keldi-yu, noilojlikdan mushtumini qattiq qisishdan oʻzga chora topmadi. Tengizning gaplaridan soʻng Tursunali uchun qizlarining tashvishi yetarli edi. Begona bir yigitning tilidan oʻzi haqidagi haqiqatni eshitish ogʻir boʻldi. Oʻsha tun bir chimdimgina uyqusida Nuriddin bilan olishib chiqdi. Keyingi toʻrt-besh tun ham shunday kechdi. Bir haftadan soʻng «sovub» bu taqdiriqa ham tan berdi.

DUSHMAN

Samandar hushiga kelib, qaerda yotganini anglay olmadi. Uyiga kirgani... Nafisa... Begona erkak... bular nima, tushmi edi? Soʻng Moskvaga kelgani, Kreml-dagi suhbat... Mehmonxona... Kimdir keldi, nimadir dedi. Kim edi? Nima dedi? Keyin-chi?

Xonadagi anjomlarga qarab, shifoxonada yotganini angladi. Shifoxonaning yogimsiz hidi ko'nglini aynitib, o'qchiy boshladi. O'qchuq ovozini eshitgan hamshira shoshilib kirib, unga idish tutdi. So'ng vrach paydo bo'ldi. Tomirini ushlab, mijjalarini qayirib ko'rgach, hamshiraga qisqa, ammo buyruq ohangida ko'rsatmalar berdi. Shundan so'ng Samandar undan «qaerdaman?» deb so'rab, harbiylarning markaziy shifoxonasida ekanini bildi. «Soppa-sog' edim-ku, bu yerga ganday kelib goldim?» deb o'ylab, ajablandi. Savoliga javob topa olmay vrachdan «nega bu yerdaman?» deb so'radi. Vrach unga garab, bosh chaygadi-da: «Bekordan bekorga o'lib ketmasligingiz uchun shu yerdasiz», dedi. «O'lib ketmaslik uchun? — yanada taajjublandi Samandar. — Nega o'lishim kerak?» Bu savoliga o'zi ham javob topa olmay yana vrachdan so'radi. Vrach yana bosh chayqadi: «Ba'zan shunaqa bo'lib turadi,— dedi u. — Odam o'zi bilmagan holda o'lim jari yoqasiga borib golishi mumkin. Siz gariyb jarga gulagan edingiz. Tortib oldik» «Tortib oldik?.. Nega gulayman? Nega tortib oladi?..» Javobsiz savollar ko'p edi. Birog vrach u bilan hamsuhbat bo'lishni istamay, tashqariga chiqdi. Uning topshirig'i bilan chiqqan hamshira yana uch hamkasbi bilan kirib keldi-yu, Samandar uchun azobli dagigalar boshlandi. «Agar jardan tortib olishi shunaqa azob boʻlsa, oʻlib ketaverganim ming marta yaxshi edi», deb o'yladi. Uning ichaklarini yuvaverib holdan toydirib yuborishdi. Bu jarayon yana ikki kun davom etib, surobi to'g'ri bo'lib goldi. Uchinchi kuni Bazarov yo'glab keldi.

- Ha, Gorinich, ahvol qalay? dedi u. Keyin Samandarning kirtaygan koʻzlariga qarab kuldi: Boʻladiganing boʻlib qolibdi-ku? Eplolmasang nima qilarding ichib? Kelib-kelib Medvedevga hamshisha boʻlasanmi? Sen «Volga» daryosini simirib tashlagan zmey Gorinichni eshitganmisan? Medvedev aroqni xuddi oʻsha daryoday simirib toʻymaydigan Gorinichlardan.
 - Medvedev? Kim u? dedi Samandar uning gaplarini tushunmay.
- Hali kim bilan ichganingni bilmaysanmi? General Medvedevni eshitmaganmisan? Qiziq, u ham seni eslay olmadi. Lekin aytib qoʻyay: agar u bilan teppa-teng ichgan boʻlsang yomon emassan. Seni qahramonlikka tavsiya etish mumkin. Yana u bilan ichishsang ehtiyotroq boʻlgin, yana qahramonlikni oʻlganingdan soʻng olib yurmagin. Bazarovning keyingi gapi piching aralash hazil ohangida aytilgani bilan, zamirida ozgina poʻpisa ham mavjud edi. Xoʻp, boʻlar ish boʻlibdi. Qalaysan endi? Turib, yura olasanmi?

- Siz meni o'limtik odamga chiqarib qo'ydingizmi? dedi Samandar norozi ohangda.
- Hech gaerimda og'rig yo'q, shikoyatim ham yo'q, nimaga yotibman bu yerda o'zi?
- Ichingni tozalashibdi, endi qoningni ham tozalashlari kerak ekan. Yana uch-toʻrt kun yotadiganga oʻxshaysan.
 - Ishlarimiz nima boʻldi?
- Ishlarimizmi? Bazarov mugʻambirona jilmaydi. Ha, durust, esing joyida ekan, ishlarimizni unutmabsan. Ishlarimiz besh, ogʻayni, bundan battar boʻlishi mumkin emas. Sen adashmagan ekansan. Oʻsha yerda chindan ham yadro sinovi oʻtkazilgan. Hozir hukumatning rasmiy bayonoti tayyorlandi. Bugun-erta e'lon qilinishi kerak. Shtatlarning popugi sal pasayadigan boʻldi. Indalmasa da'volari osmon baravar edi. Shunaqa, oshna, sen yengding. Baygildin senga alohida salom aytdi. Moslamani kuchaytirish haqidagi taklifing ham oʻtadigan oʻxshab turibdi.
 - Hindqushga o'rnatish-chi?
- Bu taklif oʻtmasa kerak. Afgʻonistondan askarlar olib chiqib ketilsa-yu, Hindiqushga harbiy kuzatuv markazi qurilsa, aqlsizlikning oʻzi-ku, bu? Kreml-ni ishontirdik shekilli.
 - Viktor Bazarovich, men o'n-o'n besh kun Moskvada qolishim mumkinmi?
 - Nima qilmoqchisan?
- Doktorlik dissertatsiyamga javob boʻlmayapti. Bir shugʻullanib koʻrsammikin, devdim. Samandar shunday deb nigohini olib qochdi. Tabiatan yolgʻondan hazar qiluvchi bu odam ayni choqda asl maqsadini uydagi fojiadan sal yiroqroqda yurish istagi borligini yashirmoqchi edi.
- Be, boshingni qotirmasangchi! dedi Bazarov qo'l siltab, Senga shu diplom zarurmi hozir. Sen yuzta fan doktorining ishini bir o'zing qilib o'tiribsan. Shuning o'zi yetarli emasmi?
 - Harholda...
- Ha, kerak, diplom ham kerak. Lekin sen shoshilmay tur. Men bu ishlarning hammasidan xabardorman. Sening bu ishlaring bilan ba'zilar qiziqib turibdi. Shuning uchun ham himoyang masalasi noaniq muddatga surilgan. Shuning uchun hozircha uyingga qaytaver. Ha, aytmoqchi oila a'zolaring tinchmi?

Samandar bu savolni eshitib yengil titradi-yu, yana koʻzlarini olib qochdi. «Nega soʻrayapti? Xabar topganmi?», deb oʻylab dovdiradi.

- Sen bu yerga kelishingda uyingga kirmaganmiding? deb soʻradi Bazarov unga sinovchan tikilib.
 - Yoʻq, yoʻq, dedi Samandar, toʻgʻri kelaverganman.
 - Yaxshi. Bizga xabar berishdi: xotining kasal emish. Bolalaring bormidi?
 - Yo'a...
 - Yaxshi...

«Yaxshi? Nimasi yaxshi? Nega surishtiryapti? Xabar berishgan... Xabar berishgan...»

Samandarning ruhida sarosima boshlanganini Bazarov sezdi. U hali fojiadan bexabar edi. Bilgani: Samandarning xotini oʻldirilgan. Bazarov unga achinib, koʻnglini koʻtaruvchi gap izladi. Tabiatan qoʻpol muomalali boʻlgan generaldan qalbni yumshata oluvchi, taskin bera oluvchi gapning chiqishi mushkul edi.

— Menga qara, u yerda dushmanlaring borligini bilasanmi? — dedi u xuddi tomdan tarasha tushganday tarzda.

«Dushman? Qanaqa dushman?» Ruh poʻrtanasidagi sarsari Samandarga bu savol gʻalat tuyulib, Bazarovga savol nazari bilan qaradi.

- Nima, dushmanlaring yoʻqmi? dedi Bazarov.
- Qanaqa dushman? Men birovga yomonlik qilmaganman?

- Dushman orttirish uchun birovga yomonlik qilish shart emas. Aqlli boʻlsang kifoya, daraxtning tagidan oʻtsang ham tepangdan dushman yogʻiladi. Agar bilsang, aql ham bir balo, boshqalarda kuchli rashk uygʻotadi. Rashk esa tuppa-tuzuk doʻst odamni dushmanga aylantiradi. Men sinaganman: senlarda shunaqa kasallik kuchli. Bizlarda ham bor-u, ammo unchalik emas. Senlar bir odamning orqasidan qora chaplab yozishni yaxshi koʻrasanlar.
- «Bu kasal millat tanlamaydi, hammada bor», deb oʻyladi Samandar. U hozir bu mavzuda bahslashishni istamas edi. Shu sababli fikrini ochiq bayon qilib, hamsuhbatiga e'tiroz bildirmadi. «Gapini kalta qilib chiqib keta qolsa edi», deb umid qildi. Bazarov esa bu sukutni fikrining tasdigʻi sifatida qabul qilib, xotirjam tarzda gapini davom ettirdi:
- Bilaman, sen «boshqalar ham xuddi shunday», deyishing mumkin. Lekin yanglishasan. Masalan, gruzinlar, armanilar, latishlar bunday qilishmaydi. Kotrikadzeni bilasan, a? Oʻzi yomon olim emas. Lekin, toʻgʻrisini aytsam, ishi Davlat mukofotiga arzimaydi. Nomzodi quyiladigan boʻlganda men shaxsan qarshi boʻlganman. Lekin Gruziya tomondan shunday himoya dovuli yopirildi-ki, oxiri oldi oʻsha mukofotni. Bultur seni mukofotga oʻzimiz tavsiya etdik. Oʻzbekistondan shunday qarshilik dovuli yopirildiki, oxiri ololmading. Hatto Vasiliy Ignatevich ham ajablanib, hech nima qilolmay qoldi. Yana mukofotga nom-zoding qoʻyilganini tor doiragina bilardi. «Ochi- lov Davlat mukofotiga nomzod», deb matbuotda e'lon qilinsa, bilmadim, nima boʻlardi? Nega shunaqasanlar, a? dedi Bazarov norozi ohangda bosh chayqab.
- Bilmayman, dedi Samandar gʻudranib. Hozir uni mukofot ham, dushmanlari ham qiziqtirmas edi. Gapning bu tarzda kalta qilinganini Bazarov yana bosh-qacha tushundi:
- Sen bilmasang men bilamanmi? Men tushunmayman, Ochilov, bitta xotinni qoʻyib, ikkinchisini olishning ilmiy ishga nima dahli bor? Seni «qoloq feodal» deb yozishdi. Shaxsan menga kashfiyot muhim, ilm muhim. Kashfiyotni feodal qiladimi, burjua qiladimi farqi yoʻq. Dushmanlaring uchun esa bu muhim, juda muhim. Senlarda bosh konstruktorning ikkinchi xotinni olishga sira haqqi yoʻq. Esingdami, Sharifxoʻjaev deganning dissertatsiyasi uchun kuyib yurgan eding. «Doʻstim», deb menga tanishtirganding. Seni hurmatingni qilib, unga yordam beruvdim. Esing-da, a?
 - Esimda.
- Xoʻp, bilib qoʻy endi: oʻsha «doʻsting» ham yozgan edi. «Bu kashfiyot faqat Ochilovniki emas», deb yozibdi. Menga emas, toʻgʻri SKga yozgan. Nima men ahmoqmanmi yoki Baygildin ahmoqmi? Kashfiyotda ilmiy guruhning xizmati borligini bilmaymizmi? Lekin boshsiz tana nima qila olishi mumkin? Oʻsha Sharifxoʻjaeving bu tanada kim? Bir barmoqmi? Yoki bir tukmi? Dushmanim yoʻq, deysan-a! Menga qara, balki Moskvaga butunlay koʻchib kela qolarsan, a?
 - Moskvaga? Nima qilaman bu yerda?
- Nima qilarding? Ishlaysan. Sharoit yaratib beraman. Ochigʻini aytsam, Baygildin bilan shu maslahatni pishirdim. Oʻylab koʻr.
 - Bu yerda aqllilik balosi yoʻqmi?
 - Bor, to'g'ri, ammo senlardagi darajada emas.
 - Bu yerga kelsam, u yerdagi ilmiy guruh tarqatiladimi?
 - Shubhasiz. Ammo yaxshi odamlaringni olib kelishing mumkin.
- Yoʻq, u yerda hozir kuchli ilmiy guruh toʻplangan. Bitta-ikkita ahmoqni deb tarqatib yubora olmayman.
- Ahmoqlik qilyapsan, bilib qoʻy. Sen bu yerda eng kuchli guruhni tashkil etishing mumkin. Istagan odamingni, istagan respublikadan chaqirtiramiz. Moskva markazidan joy bersak, har qanday olim ham uchib keladi. Yoʻq, deyishga shoshilma.

- Xoʻp, dedi Samandar suhbatga yakun yasash uchun. Bazarov esa buni rizolik alomati deb tushunib, yelkasiga urib qoʻydi:
- Mana bu boshqa masala. Sen uyingga borib kelaver. Qolgan ishlarni menga qoʻyib ber.

Bazarov shu gaplarni aytgach, xotirjam ravishda oʻrnidan turib xayrlashdi. U ketgach, Samandar oʻzini tamoman yoʻqotdi: xotini kasal... dushmanlari bor... Moskvaga koʻchib kelish... Generalning gaplari chiroqqa urilgan parvonalar kabi xayollarini toʻzitib yubordi. «Nima qilardim uyga kirib, toʻgʻri kelaversam boʻlmasmidi?» deb oʻzini oʻzi koyidi. Uydagi manzara koʻz oldida gavdalanib, haykal kabi qotdi. Kirib kelgan hamshiraga ham ruhsiz tarzda qarab qoʻydi. Bilak tomiriga sanchilgan ignaga ham parvo qilmadi. Oʻylayoʻylay «general balki toʻgʻri aytayotgandir, Moskvaga koʻchib kelganim ma'quldir», degan fikrda toʻxtaldi. Bu fikr bora-bora qarorga aylandi. «Oila, bola-chaqa menga nasib etmagan ekan, Xudo menga faqat ilm bergan ekan, oilam boʻlmaganidan keyin shu yerda qolaverganim ma'qul...» Yana ikki kun shu qaror atrofida taraddudlanib, uchinchi kuni Bazarovga telefon qildi-da, ahdini bildirdi. Bu orada muolaja yakun topib, uni harbiy aerodromga kuzatib qoʻydilar.

Aniq bir qaror bilan qaytayotgan Samandar Omonulloning intiq kutayotganidan bexabar edi.

NOMUS

Omonullo shaharga qaytmay, avtobusga oʻtirib Toshboltaning qishlogʻiga yoʻl oldi. Adolatning «xotinini urib oʻldirgan», degan gapi unga yana bir muammo eshigini ochib bergan edi. Depara markaziga, soʻng ichki ishlar vakili hamrohligida qishloqqa borgunicha qosh qoraydi. Nafisaning fojiali oʻlimi haqidagi mish-mishlar bilan yashayotgan qishloq militsiya xodimlarining surishtirib kelishganidan oʻsha zahotiyoq xabar topdi. «Ikkita milisa surishtirib kelibdi», degan xabar qishloqning narigi boshiga yetguncha «ikki moshin toʻla milisa bosibdi», degan vahimaga aylanib, Yigitali yashaydigan koʻcha jonlanib qoldi. Hangoma-talablar hovliga kirishni istadilar-u, ammo darvoza ostonasida turgan yigitga yoʻliqib izlariga qaytdilar. Biroq bu xonadondan uzoqlashmadilar. Ularning nazarida hozir bu uyda «bir nima» sodir boʻlishi kerak edi. Ular ana shu «bir nima»dan quruq qolmaslik uchun ham shikordagi ovchi misol sergak turdilar. Bu qiliqlari uchun ularni ayblash nooʻrindir. Qishloqda har oydami, har yildami bir juvon oʻldirib ketilsa, surishtirib milisa kelib-ketib tursa, bosh-qa qap edi.

Odamlar «bir nima sodir boʻlishini» behuda kutdilar. Ichkarida hech qanaqa gʻalati voqea yuz bermadi. Balki Omonullo bilan Yigitalining oddiy savol-javoblari boʻlib oʻtdi. Omonullo gapni uzoqdan boshlamadi. Oʻzini qiziqtirayotgan muammolarni yecha olishga xizmat qiluvchi savoldan boshlab qoʻya qoldi:

- Jiyaningiz... Boltaeva bu yerga tez-tez kelib turarmidi?
- Yoʻq...— dedi Yigitali shop moʻylovini silab,— onam rahmatli hayotliklarida kelibketib turguvchi edi. Keyin oyogʻini torta qoldi. Erga tekkanidan ke-yin hecham kelmadi. Eri qoʻymadi shekilli-da.
 - Erini taniysizmi, koʻrganmisiz?
- Yoʻq, koʻrmaganman. Toʻyidan bexabar qogʻonmiz. Toshbolta qishloqdan hech kimni aytmagan. Azaldan fe'li chatoqroq shu bolaning.
- Singlingizni... Omonullo «urib o'ldirganmi?» deb so'ramoqchi bo'ldi-yu, tilini ehtiyot qilib boshqacha tarzda so'radi:—... biron kasal bo'lganmidi?
- Singlim kasalmasidi. Shu Toshbolta xunasa bir kuni deng, kelib uribdi-da. Men yoʻgʻakanman. Bor boʻgʻanimda oʻzining jigʻini ezibla goʻyardim-a. Bu xunasa ichishni

evlolmasidi. Ichdimi, tamom, ishkalning uyasini kavlardi-da. Qattiq urganidan singlim bechoraning ichagi uzilib ketibdi. Do'xtir shunaga degan.

- Qamalishining sababi boshqa-ku?
- Ha-da, biz da'vo qilmadik-da. Oʻshanda bir nima deb qoʻysak umri qamoqda chirirdi. Shu Nafisani debla uni ayadik. Aslida Toshbolta oʻshanda tuhmat bilan ketdi, Xudoning urgani shu, shuning oʻzi yetarli, dedik. Ayamasdan ottirvorsak boʻlarkan. Yoʻq boʻlib ketovursa Nafisaning boshiga bu balolar ham yogʻilmasidi.
 - Nega?
- Nega boʻlardi? Oʻzim tarbiya qilardim. Shu qishloqlik quling oʻrgulsin yigitga erga berardim. Shaharga yubormasidim. E, endi gapirganning foydasi yoʻq, Yigitali shunday deb qoʻl siltadi.
 - Toshbolta akani tuhmat bilan ketgan dedingizmi?
- Ha-da, u traxtorini toʻgʻri yoʻldan haydab borgan. «Jiguli»dagi xunasaning oʻzi kelib unga urilgan. U ham mast boʻgʻon-da. Omma-lekigin uning puli bor edi. Ishni teskari qib yubordi, qiztaloq. Buni koʻrgan guvohlar bor edi-ku, omma-lekigin bir nima deyishga qoʻrqishdi. Menga aytishdi. Men nima, prokurormidimki, bir nima qila olsam. Peshonasida qamalish bor ekan, ketvordi. Yanayam oson qutuldi. Omma-lekigin orada qiziga javr boʻldi. Singlim ham ketdi, jiyanim ham ketdi, hech kim qolmadi... Yigitali shunday deb uf tortdi-da, kaftiga bir chimdim nos toʻkib, soʻng tilining tagiga tashlab, bosh chayqab qoʻydi.
 - Jiyaningizning... dushmanlari bormidi?
 - Iya, gapingiz qiziq, xotin kishida ham dushman bo`lami?
 - Bo'lmaydi, deb o'ylaysizmi?
 - Bo'lar-ku, omma-lekigin o'ldirib ketadag'on dushmani bo'lmasov.
 - Unda kim oʻldirishi mumkin?
- Shunisini bilmayman, uka, Yigitali gʻoʻdiranib nosni tupurdi-da, moʻylovini silab qoʻydi. Men bundaqa gaplarni biladagʻon prokuror emasman. Mening bilganim kuni bitgan ekan, shunaqa oʻlim topibdi. Hammamiz birin-sirin oʻlib ketovramiz, dunyo esa orqamizda qolovradi.
 - Jiyaningiz avvalgi sovxoz direktori bilan yaqin boʻlgan ekan, shuni siz bilarmidingiz?
- Kim aytdi? Toshboltanikiga boruvdingizmi? Ha... unda ashi shaytonning urg'ochisidan eshitgansiz. Bekorlarni aytibdi u shilta! Bizdi urug'dan bunagasi chiqmagan! — Yigitali shunday deb shart o'rnidan turdi-da, xuddi to'nning etagini qoqayotgandek soniga urib qo'ydi. Omonullo uning bu holatidan ajablanmadi. Jiyanining axlogi xususida bunday noxush gap eshitgan har ganday tog'aning g'azablanishi tabiiy. Tag'in ham Omonullo «yaqin bo'lgan ekan», deb pardalab aytdi, agar «o'ynashi ekan», degandami, bu chapanisifat odam qay holga tushardiykin? Yon-atrofdagilarga so'z bermay yuruvchi erkak nomussizlik ko'lankasida qolquday bo'lsa chidashi nihoyatda qiyin. Jiyanining, hatto o'z farzandining o'limiga chidar, «taqdir ekan», deb o'zini yupatar, ammo nomussizlik tamg'asini ko'tarishga har qanday baquvvat bel ham chidamas. Yigitali jiyanining qadam olishini bilmasdi emas, bilar edi. Ular yashayotgan sovxoz dunyoning narigi chekkasida bo'lsa ekanki, gap-so'z yetib kelmasa. Unda birov aksirib yuborsa, yonidagi «sogʻ boʻling», deyishga ulgurmay aks-sadosi qishloqqa yetib keladi. Yigitali bir eshitganida indamadi — «g'iybat gap», deb o'zini tiydi, ikkinchisiga chidadi. Uchinchisida borib jiyaniga indamadi-ku, ammo Toshboltani yogasidan oldi. Tuprog'i ko'pchib yotgan ko'chada og'zi-burnini qora qonga belab urdi ham, yumalatib tepdi ham. Xumordan-ku chiqmadi-ya, lekin «endi tiyilar», deb umid qildi. Semirib ketgan qo'chqorni homilador gumon qilib tug'ib berishini kutgan odam qanchalar laqma bo'lsa, Yigitali ham bu sohada nodon edi: shiraga o'rgangan pashshani yaxshilik bilan

qaytarish mumkinmasligini fahmlamasdi. Bora-bora gʻishtning qolipdan koʻchganini anglagach, jiyaniga «qishloqqa kamroq kel», deb qoʻydi. Nafisa buvisining janozasiga kelib, yettisi oʻtgunicha turmoqchi boʻlganida Yigitali xotinlarning visir-visirlaridan bezib, jiyaniga «Endi qizim, bu yerda turganing bilan buving tirilib qaytib kelmaydilar. Yaqinda er qilgan odamsan, uyingdan uzoqma. Endi qishloqqa kelib ovora ham boʻlovurma. Sogʻinganimda oʻzim borib xabar olaman», deb kuzatib qoʻydi. Shundan soʻng u jiyanini sogʻinmadi, jiyan ham «togʻam yoʻqlamayaptilar», deb xavotirlanmadi. Yigitali jiyanining yashash joyini ham bilmasdi, bilishga qiziqmadi ham. Nafisa bilan birga oʻsgan qizining bordi-keldi qilish haqidagi gapini ham shart boʻlib qoʻya qoldi. Otasining fe'lini bilgan qizi istagini bir aytdi-yu, boshqa tilga olmadi.

Omonulloning «avvalgi sovxoz direktori bilan yaqin boʻlgan ekan», degan savoli Yigitalining yarasini tirnab qoʻydi. U savoldan norozi boʻlib emas, ana shu tirnalgan yara azobiga chidolmaganidan oʻrnidan turib ketgan edi. Yigitali shu savol-javobdan soʻng tumtayib oldi. Buni sezgan Omonullo ezmalanib oʻtirmadi. Soatiga qaradi-da, kechki poezdga ulgurish maqsadida oʻrnidan turib, xayrlashdi.

Tongda poezddan tushib, yuvinib, kiyimlarini almashtirish niyatida uyiga bordi. Qaynonasi yuvib-dazmollagan ko'ylaklarni javondagi ilgichlarga ilib, uyni yig'ishtirib, stol ustidagi kaftdek qog'ozga qisqagina maktub yozib qoldirgan ekan: «Fotimangiz telpon gilib, salom aytdi. Ishlari tezlashyaptiykan. Dadangiz ikki-uch kelib-ketibdilar. Xavotir olyaptilar». Keyingi so'zlarni o'qib, Omonullo jilmayib qo'ydi. Qaynona «dadangiz» deganda Omonulloning tutingan otasini nazarda tutgan, «xavotir olyaptilar», deb borib ko'rishga da'vat qilgan edi. Tutingan otasi ulardan to'rt eshik narida turadi. Uni borib ko'radigan bo'lsa, qaynota-qaynonani yo'qlashi ham tabiiy. Qaynonasi «biznikiga kirib o'ting», demay, chiroyli tarz-da magsadni bayon gilib ketgan edi. Ona mehriga zor o'sgan Omonullo yumshoqko'ngil, shirinmuomala qaynonasini kuyov emas, chin o'g'il muhabbati bilan izzat gilardi. Qaynonasi esa onalik mehrini bergan edi. Omonullo bilan Fotima orasida jiddiy to'qnashuv bo'lmasa-da, ikir-chikir masalalarda ham doimiy ravishda kuyovining yonini olib, qiziga qarshi turardi. Shunaqa paytlarda Fotima «Oyi, qizingizmanmi yo keliningizmanmi?» deb kulardi. Qaynotasining ezmaliqi yogmasligini hisobga olmaganda Omonullo uni ham yaxshi ko'rardi. Vagti bemalol boʻlsa, gaplarini indamay eshitardi. Ba'zan oʻtirgan yerida mizgʻib ham olardi. Qaynotasining eng yaxshi odati — «men shuncha gapirdim-ku, hamsuhbatim indamadiya», yoki «gapimni yoqtirmay uxladi-ya», deb sira ranjimasdi. Omonullo salom berib «Qalay ada, yaxshi yuribsizmi?» deyishga ulgursa ulgurdi, ulgurmasa jim o'tirishga hukm bo'lardi. Qaynotasi gapira-gapira xumordan chigardi-yu, mehmon ketgach, xotinining dashnom o'qlariga uchrab yana kamgap, «mo''min»ga aylanardi. Fotima ba'zan gapga tushib ketsa Omonullo «Ha, ota qizi!» deb tegajoqlik qilib, uning jig'iga teqishni yaxshi ko'rardi.

Omonullo bugun ishdan barvaqtroq chiqib, ularni yoʻqlashni koʻngliga tugib, choy qoʻyib ichdi-da, xizmatga yoʻl oldi. Yoʻl-yoʻlakay prokuraturaga kirib, Mels Xoʻjaevga uchradi. Safarga ketishdan avval koʻrishganida bu kibor yigit uni lol qoldirgan edi:

- Aka, siz haqingizda men ko'p yaxshi gaplarni eshitib, xursand bo'ldim,
 Men bu sohada yangiman. Tajribam yo'q, bilimim ham yetarli emas. Lekin shu ishni yoqtiraman. O'zim xohlab tanlaganman. Menga ish o'rgating, iltimos, ish buyuravering.
 - Ishni prokuratura buyuradi bizga, degan edi Omonullo piching ohangida.
- Shunaqa demang-da. Odamlar «falonchining oʻgʻli» deb menga havas qilishadi. Aka, bilsangiz shu narsa meni koʻp qiynaydi, menga koʻp zarar beradi. Oʻqishda ham uchib yurib oʻqidim. Ba'zi domlalar koʻngil uchun ham soʻrab qoʻyishmasdi. Bu yerda ham qiynagilari kelmaydi. «Falonchining oʻgʻli» boʻlganim uchun men aybdor emasman-

ku? Qachongacha uchib yuraman. Bir kunmas bir kun qo'nganimda nima degan odam bo'laman?

Omonullo taajjubini yashirmay unga tikilib qolgan, Mels Xo'jaev ham «gapim — gap!» deganday tik qaragan edi.

Omonullo unga Samandar Ochilovga tegishli yangi fikrlarini aytib, ekspertiza xulosalarini bayon qildi. Mels Xoʻjaev harbiy prokuror orqali bitadigan navbatdagi ishlar bilan shugʻullanishga va'da bergan edi. Omonullo safar xulosalarini bayon qilgach, u «biz ham bekor oʻtirmadik, aka», degan ohangda hisobot bera boshladi:

— Shaxsan okrug harbiy prokurori bilan gaplashdim, — Mels Xoʻjaev bu gapni bolalarcha zavq, bolalarcha gʻurur bilan aytib, xuddi olqish kutganday Omonulloga qarab qoʻydi. «Chakki emassan», deb oʻyladi Omonullo, biroq, bu gapni tiliga koʻchirmadi. Mels Xoʻjaev yana shu zavq bilan gapini davom ettirdi: — Ochilovni kuzatib borgan polkovnik bilan suhbatlashganingizdan okrug harbiy prokurorining xabari bor ekan. U «shundan boshqa yordam berishga ojizmiz», deb aytdi. Ochilov harbiy sohaga oid ilmiy ish bilan shugʻullangani bilan oʻzi harbiy hisoblanmas ekan. Uning qaerdaligini surishtirishga yoki bizga tutib berishga ularning haqlari yoʻq ekan.

«Shunga aqling yetibdi, boqsa odam boʻlasan. Qani, davom etaver-chi», deb oʻyladi Omonullo. Uning jimgina tinglashi Mels Xoʻjaevda shubha uygʻotib, bir nafas tin oldi. «Biron nima dermikin», deb kutdi. Omonullodan sado chiqmagach, davom etdi:

— Mening amakim shunga yaqin boshqa idorada ishlaydilar. Amakim orqali Ochilovning Moskvada ekanini aniqladim. U hozir harbiy gospitalda ekan. Yaqin kunlarda qaytar ekan.

«Yaxshi, qaytaversin, kutib olamiz», deb o'yladi Omonullo.

- Lekin biz uni kutib ololmaymiz, dedi Mels Xoʻjaev, uning fikrini oʻqiganday, Uni harbiylar samolyotida olib kelishadi. Samolyot harbiy aerodromga qoʻnadi.
 - Biz uni o'zining uyida kutamiz, dedi Omonullo qat'iy ohangda.
- Men ham shunaqa deb oʻylovdim, dedi Mels Xoʻjaev. Agar xohlasangiz shaxsini aniqlashtirish uchun bir odam bilan uchrashtirishim mumkin.
 - Kim bilan?
- Ochilov bilan birga ishlaydigan odam. U amakim bilan maxfiy hamkorlik qilar ekan.
 U bilan uchrashasiz-u, ammo o'zining kimligini surishtirmaysiz.
 - O'zingiz ko'rishmadingizmi?
- Toʻgʻrisini aytsam... koʻrdim. Amakim gaplashdilar, oʻzim indamadim. Uning qotillikdan xabari yoʻq ekan. Gaplariga qaraganda Ochilovni yoqtirmaydiganga oʻxshaydi. «Jamiyat uchun zararli shaxs» deb ochiq aytdi.
 - Nimasi zararli ekan?
 - Ikkita xotini bormish.
 - Ikkita xotinli odam jamiyatga zarar keltira olmaydi, dedi Omonullo kulimsirab.
- Nega? deb ajablandi Mels Xo'jaev bu gapning chinmi yo hazil ekanini farqlay olmay.
- Nega boʻlardi? Omonullo «shuni ham bilmaysizmi?» deganday kuldi. Bunaqa odam ikkita xotinni eplash bilan ovora boʻlib dunyoda sovet jamiyati borligini ham unutib yuboradi. Hayron boʻlmang, hazillashdim. Agar u odamingizning gapi rost boʻlsa, ikkita xotinli odam jamiyatga zarar keltirsa, uchtami toʻrtta xotin olganlar jamiyatga oʻt qoʻyar ekan-da. Siz toʻgʻri fahmlagansiz: ichi qora odamga oʻxshaydi. Yana nima deydi?
- Boshqalarning ilmiy ishlarini oʻzlashtirib olar ekan. Oʻzini Davlat mukofotiga qoʻyib, ololmabdi.
- Bo'ldi, tushunarli. U bilan hozir gaplashmasak ham bo'ladi. Zarurat bo'lsa, keyinroq uchrashamiz.

— Siz... Ochilovning birinchi xotini bilan ko'rishdingizmi?

Omonulloning shunday rejasi bor edi. Biroq, prokuratura xodimining jig'iga tekkisi kelib atay:

Shartmi? — deb so'radi.

Mels Xo'jaev Omonulloning quvlik qilayotganini sezib, yelka qisib qo'ydi-da, ranjigansimon tarzda dedi:

O'zingiz bilasiz, men sizga buyura olmayman.

Omonullo «fikrlaringiz durust, men shunchaki hazillashdim», deb ovutmoqchi boʻldiyu, «past-balandga koʻniksin», degan xayolda indamadi. Xayrlashish uchun qoʻl uzatganda Mels Xoʻjaev unga bir parcha qogʻoz uzatdi:

- Nima bu? dedi Omonullo ajablanib.
- Ochilovning birinchi xotini shu manzilda tu-radi, dedi Mels Xoʻjaev, bu safar kiborlarcha boqib. Omonullo uning qarashidagi «bunisiga nima deysiz?» degan ma'noni oʻqib, jilmaygancha javob qildi:
 - Qoyilman, gap yoʻq!

Omonullo ishxonasiga kiraverishdagi navbatchi uychasi yonida turgan Adolatni koʻrib, ajablandi. Bu ayolning kelishiga amin ediku-ya, biroq bu qadar tez yoʻqlar deb kutmagandi. Adolat uni koʻrdi-yu, kuyoviga peshvoz chiqqan qaynonaday jilmayib qarshi oldi. U yaltiroq ipli sariq kuylak kiyib olgan, oyogʻida yoshlarga rasm boʻlgan poshnali qora tufli, qoshu koʻzlariga qalam tortgan, labiga och qizil boʻyoq surtib olgan edi. Qiligʻi oʻziga yarashmagan boʻlsa-da, harholda avvalgi koʻrinishiga qaraganda sal odambashararoq edi.

- Voy Xudoyimga shukr-ey, dedi u salomlash-gach, kelmay qolarmikinsiz deb yuraqim taka-puka edi-ya.
 - Keling opa, tinchlikmi? Xo'jayin tuzukmilar?
- Ha, yotibdi, gʻoʻldir-gʻoʻldir qilib. Nafisaning uyidagi mollarni olib kel, deb yubordilar.
 - Ie, shunaqami, gapirayaptilarmi?
 - Qayoqda? Til o'sha-o'sha ketgan.
 - Til ketgan bo'lsa ganagasiga «mollarni olib kel», dedilar?
- Voy... Adolat tilidan ilinganini bilib sal sarosimalandi-yu, lekin sir boy bermay, o'zini qo'lga oldi: til o'lgur bo'lmasa ham ko'zlari ochiq-ku? Imo-ishora bilan gapiryaptilar. Shuncha yil birga yashagandan keyin ko'zlariga qarab turib, nima demoqchi bo'layotganlarini bilib olaman.
 - Ovora bo'lib kelibsiz, opa, mol egasiga beri-ladi.
 - Voy, shoshmang, nachalnik uka. Men sizga bir muhim gap aytaman.
 - Xo'p, ayting.
 - Bu yerda idorangiz bormi? Ko'chada aytadigan gap emas.

Omonullo uni xonasiga boshlab kirdi. Adolat stulga o'tirayotib tor xonaga bir razm soldi-da:

- O'ldirgan odamni qidiryapsiz-a? deb so'radi.
- Qidiryapmiz, dedi Omonullo.
- Hali topmadingiz-a?
- Zehningizga qoyilman: topmadim.
- Topa olasizmi?
- Bilmadim. Harholda burun bo'lsa, ro'molcha topiladi, degan gap bor.
- Men sizga bir gapni aytsam, osongina topa-siz.
- Shunagami? Menga aytib o'tirmay o'zingiz topa golmaysizmi?

- Oposi, siz menga bunaqa piching qilmang. Men sizga qishloqda tappi changallab yurgan savodsiz xotin emasman. Bilmasangiz bilib oling: ikki marta raysovetga deputat boʻlganman. Bir narsani bilmasam shundan shunga ahmoq boʻlib kelmasiydim. Yer yutkurning sirini men bilmay, yana kim bilsin?
 - Yer yutkur... kim? Otasimi yo qizimi?
 - Ikkoviyam bir go'r.
 - Qanaqa sir ekan, ayting-chi?
- Toʻxtang, oldin kelishib olaylik. Men sizga bilganlarimni aytaman. Siz esa menga mollarni olib ketishimga ruxsat berasiz.
 - Aytadiganlaringiz shunchaki g'iybat bo'lsa-chi?
 - Voy savil, men g'iybatchiga o'xshaymanmi?
- Nafisa Boltaeva avvalgi direktor bilan don olishardi, devdingiz. Togʻasi «boʻlmagan qap», deb rad etdi.
- Togʻasimi? Anavi moʻylov jinnimi? U qayoqdan bilarkan? Jiyanini abort qildirgani kim olib borgan ekan, soʻramabsiz-da. Bir marta boʻlsa ham goʻrga edi. Uch marta olib borganman. Men gʻiybatchi boʻlsam Matlubadan soʻrang. Juvonmarg boʻlgurni koʻrdingizmi oʻzi?
- Sobiq direktorning xotinini aytyapsizmi? Borsam uyida yoʻq ekan, shaharda deyishdi.
- Voy savil qolsin, shaharda balo bor ekanmi? Uyidan atay chiqmagan. Oʻlguday qoʻrqadi.
 - Nimadan qo'rqadi?
- Eri qamalganidan beri rosa obiska²¹ qilishyapti. Anavinda ham kelib-ketishgan ekan.
 - Oachon?
 - To'xtang, avval kelishib olaylik, keyin so'rang savolingizni.
 - Boltaeva!
- Men Boltaeva emasman, Xudoga shukr, Nizombekovaman! U yergina yutkurning familiyasiga oʻtmaganman.
- Nizombekova, bu yer sizga bozor emas. Savdolashmang. Agar bilganingizni yashirsangiz yo chalgʻitmoqchi boʻlsangiz, qonun boʻyicha jazolanasiz.
- Voy o'layin, holvani hokim yeb, kaltakni yetim yeydimi endi? Birov kelib qizimni o'ldirib ketsin-da, siz o'ldirganni topmang-da, men jazo olayinmi? O'lmay o'la qolsin, bu qiz o'lgur, boshginamga bitgan balo bo'ldi. U yoqda otasi yotibdi «ana o'laman, mana o'laman», deb. Bu yoqda bu kishim o'tiribdilar «aytmasangiz qamayman», deb. Hoy, menga qarang, qamashga mendan boshqa odamingiz yo'qmi?
 - Men qamayman, demadim, jazo olasiz, deb ogohlantirdim.
- Qamayman, deysizmi yo jazo olasan, deysizmi bir goʻr emasmi? Hech nima bilmayman, deb turib olsam-chi? Ichimdagi gapni yorib olasizmi? Undan koʻra molimizni berib yuboring, men sizga kerakli gaplarni aytay.

Omonullo bu shayton qamchisi bilan savdo pishishi qiyinligini anglab, telefon qo'shagini ko'tardi-da, qo'shni bo'limga qo'ng'iroq qildi:

— Hafizxon aka, Boltaevaning uyida roʻyxatga olingan mollarni hozir berib yuborish mumkinmi?— Omonullo shunday deb Adolatga qarab oldi. Adolat masala oʻzining foydasiga hal boʻlayotganidan mamnun holda bir qimirlab oldi. Omonullo esa suhbatini davom etdi: — Ha, odam keldi. Boltaevaning oʻgay onasi, — Omonullo «bu qoʻpol gap ta'sir qilarmikin?» deb Adolatga tikildi. Adolatda norozilik alomati sezilmadi. — Mumkin

_

²¹ Tintuv demoqchi.

emasmi? — Shu savoldan soʻng Adolat bir chayqalab oldi. — Ilojini qilish kerak. Eridan tilxat olib kelsa-chi? Ha, albatta, guvohlar ishtirokida. — Omonullo shunday deb goʻshakni joyiga ildi. — Tushundingizmi? Bir haftadan soʻng tilxat bilan kelasiz. Qani, endi ayting gapingizni.

- Kecha siz ketganingizdan keyin esimga tushdi. Xotiram oʻlgur sal oʻtmaslashib qolibdi, deb gap boshladi Adolat. Omonullo esa oʻzicha «oʻtmaslash- gan aqlda oʻtkir xotira boʻlarkanmi?» deb xayolidan oʻtkazdi.
 - Uch oymi, to'rt oymi avval Valijonni ko'ruvdim.
 - Kim u? Omonullo shu savolni berib qog`ozga «Valijon» deb yozdi.
- Valijonmi? Tursunalining ishongan shoʻpiri. Tursunalini bilasiz, qamalib ketgan direktor. Qorang oʻchgur Matluba eri qamalsa ham koʻchib ketmadi.
 - Ko'chishi kerakmidi?
- Eri qamalganidan keyin ketmaydimi kelgan joyiga. Bir nimadan ilinji bor u megajinning. Hozirgi direktor erining yaqin odami edi. Uyiga ham tegmadi. Nega tegmadi, bilasizmi? Yer yutkur Tursunali Nafisani surib yurganida, Matluba bu odamning koʻngilchasini ovlab yurgan.
 - Ko'rganmisiz?
 - Nimani?
 - Koʻngilchasini ovlaganini?
- Koʻrib nima, men uning lozimiga qorovulmanmi, qachon yechib, qachon kiyganini poylab yuribmanmi?
 - Xo'p, bu gaplarni qo'ying, siz Valijonni ko'ruvdingiz?
- Ha, koʻrdim, Adolat shunday deb gʻashi kelganini bildirish maqsadida bir chimirilib oldi: Bir kuni Matluba chaqirib, toʻppa-toʻsatdan «shaharga boramiz», debdi. Valijon «ertaga boraylik, kech boʻldi», desa ham koʻnmabdi. Keyin Valijon uni yer yutkur Nafisanikiga boshlab boribdi. Borishganidan keyin Matluba Valijonga «sen chiqib tur», debdi. Nafis oʻlgur esa «Oʻtiring, Valijon aka, choy iching, osh pishyapti», desa ham koʻnmabdi. Xullas, Valijonni chiqarib yuborib, janjalning uyasini qoʻzgʻabdi.
 - Nega?
 - Unisini bilmadim. Eri gamalmasidan ilgari jimgina pisib yurardi.
 - Erining o'ynashi borligini bilmasmidi?
- Baloni bilardi, u yergina yutkur. Qip-yalang'och ustidan chiqib qolganida ham damini chiqarmagan.
 - Unda nima uchun janjal qiladi?
 - Bilmadim-u, ammo bir nima talashgan.
 - Erini talashmagan xotin endi nimani talashishi mumkin?
- Nimani talashardi? Boylikni-da. Juvonmarg boʻlgur Tursunali topganlarini yashirib ketganga oʻxshaydi. Yer yutkur Nafis oxirgi kelganida otasi bilan pichirlashib qoldi. Sekin quloq soldim. Qulogʻimga kirgani Nafis oʻlgur nimanidir «topish kerak», dedi. Keyin «oʻsha kechasi oshxona tomonga qarab yuruvdi», dedi. Keyin ikkoviyam ketdi, bilsam oʻshanda boqqa borishibdi. Juvonmarg oʻlgur boqqa nimaga boradi? Erkaksirab boradida. Oʻynashi qamoqda boʻlsa, er jonivor haftalab yoʻq boʻlib ketsa... Maishatni sogʻinadida. Direktor oʻlgur ham bularga laqqa tusha qoldi. Qaytishganida qarasam, qulogʻida yangi zirak, barmogʻida qoʻsh uzuk. Naq tilla! Koʻzlari naq javhar! Koʻrdim-u, indamadim.

Omonullo bu gapni eshitib ekspertiza xulosalarini esladi: quloqlaridan zirak yulib olingan, barmoglarida to'rtta uzuk izlari bor...

- Barmoqlaridagi uzuklar ikkitamidi?

— Oʻzi azaldan ikkita bor edi. Bittasi nikoh uzugi, yana bittasi yoqut koʻzli tilla uzuk edi. Bogʻdan qaytishganda yana ikkitasi paydo boʻldi, deyapman-ku, tushunmadingizmi? Erkak zoti ham gʻirt ahmoq boʻladi. Nafis oʻlgur kim edi? It gʻajib tashlagan bir suyak edi. Shu sarqitning barmogʻiga ikkita uzuk taqasanmi? Shunaqa sarf qilar ekansan, svejiylaridan topmaysanmi?

Adolat yangi direktorni laqmalikda ayblab, yana bir-ikki gap aytdi. Omonullo esa yangi direktor bilan boʻlgan uchrashuvini koʻz oldiga keltirdi. «Nafisa Boltaevani koʻrganim yoʻq», deb tonganini esladi. Sov-xozda ishni xom bajarganini anglab, yana borishni diliga tugdi-da:

- Xoʻsh, endi Valijonning gapi chala qoldi-ku? dedi.
- Ha-ya, Valijon oʻlgur ham laqma-da, «chiq» desa chiqib ketaveribdi. Kundoshlarning qir-pichoq boʻlishlarini mazza qilib koʻrmaysanmi! Matluba shumshukkina boʻlib yurgani bilan balo-da. Nafis oʻlgur-ku togʻasiga oʻxshagan jinni. Yulib tashlashdan ham toymaydi. Bir marta meni yulgan u qoʻling singur. Omma men ham haqqimni qoʻymaganman.
 - Xo'p, qoyilman, opa, Valijon nima dedi?
- U juvonmang aytdiki, Matluba chiqqanida vajohati juda ham yomon ekan. «Shu jalabni oʻldirtirib yubormasam yurgan ekanman», debdi.
 - Valijonga shunday debdimi?
- Yoʻq, Valijonga aytarmidi shunaqa gapni. Uydan chiqib kelayotganda oʻziga oʻzi gapirib kelayotgan ekan, yer yutkur shoʻpir qulogʻini ding qilib eshitib qolibdi. Keyin menga aytdi, «shunaqa, shunaqa gaplar boʻldi, qizingizni ehtiyot qiling», deb qoʻydi. Endi tushundingizmi?
 - Tushundim. Aytadigan gaplaringiz shumidi?
- Ha, shuncha gapim kammi sizga? Boʻpti, agar kamlik qilgan boʻlsa, yana eshitsam yo eslasam kelib aytaman, Adolat shunday deb oʻrnidan turib xayrlashdi. Lekin darrov chiqib ketmadi. Ostonada turganicha «er yutkur» va «oʻlgur»lar haqida yana allaqancha gaplarni aytib tashladi. Omonullo uni bilagidan ushlab, yoʻlga boshlamasa, kechgacha gapirishdan ham toymaydigan edi.

Adolatni kuzatgach, Omonullo boshliq huzuriga kirib qotillik yuz bergan uyni nazorat ostiqa olish masalasida kelishib oldi.

AZOBLARNING MUQADDIMASI

«Ha-ha! Baribir urdi-ku, Xudo!! Hali bu ham kam senga, bir tomchi suvga zor bo`lib o`lasan. Ha, sen qiynalib o`lasan, men esam rohatlanib tamosha qilaman!».

Bu ovoz... qaynonasining ovozi... O'zi qani? Qaerda turib gapiryapti?

Harakatsiz yotgan Toshboltaning koʻzlari javdiradi. «Uxlayapmanmi, tush koʻryapmanmi? — deb oʻyladi Toshbolta. — Yoʻq, uygʻoqman. Hammayoq yop-yorugʻ. Avval domla oʻqiyatuvdi, keyin milisa keldi. Bu ham tushmi? Yoʻ-oʻq... «Adol bilan gaplashdi-ku u milisa? Adol... harom oʻlgur Adol, mendan oldin sen oʻlsang yaxshi edi. Bir kun boʻlsa ham sendan keyinroq oʻlishni orzu qilardim-a, bir kun boʻlsa ham odamga oʻxshab yashab qolardim-a... Milisaga nimalar deb sasiding-a, qanjiq! Menga tekkuningcha nima qilgan boʻlsang qilgansan. Hammasini eshitgan edim, lekin senga rahmim kelib indamovdim. Oʻshanda seni oʻldirvorsam boʻlarkan. Sen... ilon... hammamizni chaqib oʻldirding... Bir soatga boʻlsa ham tuzalsam edi, oʻrnimdan turib boʻgʻib oʻldirardim sen ablahni. Yoʻ-oʻq... avval tilingni kesar edim, soʻng boʻgʻardim. Nafisning oldiga yuzim yorugʻ boʻlib borardim...»

«Ha-ha! Seni Xudo urdi-ku!»

Yana o'sha ovoz. Toshboltaning ko'zlari yana javdiradi. So'ng nigohi qotdi: yonginasida qaynonasini ko'rdi. Qaynonasi o'tirib olganicha eski ko'rpachani so'tyapti.

- «Nima qilyapsiz?» deb soʻradi Toshbolta.
- «Senga kafan bichmoqchiman» deb javob berdi qaynonasi.
- «Eski koʻrpachaning astaridan ham kafan boʻlarkanmi?» dedi Toshbolta.
- «Senga shu ham hayf. Itday o'lib, itday ko'milishing kerak», dedi qaynonasi.
- «Meni buncha yomon koʻrasiz-a? Qizingizni urgan boʻlsam jazosini totdim-ku? Xudo bir alvastiga roʻpara qilib qoʻydi-ku?» dedi Toshbolta.
- «Nafisaning hayotini bulgʻab tashlading. Menda ham ayb bor: uni senga berib yubormasligim kerak edi»,— dedi qaynonasi.
- «Men qizimning baxtli boʻshishini istagan edim. Baxtini topgan edi», dedi Toshbolta.
- «Nomi buzuq boʻlib topilgan baxt baxt ekanmi? Ayt, oʻzing, jon qizim, baxtli edingmi?»

Shu payt qaynonasining orqasida Nafisa koʻrindi: eski, kir koʻylakda, koʻzlarida yosh, ma'yus qarab turibdi. Toshboltaning hech esidan chiqmaydi: qamoqdan qaytib, qaynonasinikiga kelganida Nafisani shu holatda koʻrgan edi. Koʻrib, yurak-bagʻri ezilib ketgan edi.

«Qizim, buvingga aytgin, men senga hech yomonlikni tilaganmanmi?»

Nafisa indamay, shu holatida qarab turaverdi.

- «Qizim, meni qiynama, oʻladigan boʻlsam ham qiynalmay oʻlay, ayt, baxtli eding-ku, axir?»
 - «Nafisa senga gapirmaydi», dedi gaynonasi.
 - «Nega gapirmas ekan?» dedi Toshbolta.
 - «O'liklarning gapirganini qayda ko'rgansan?» dedi qaynonasi.
 - «Siz gapiryapsiz-ku?» dedi Toshbolta.
- «Men senga kafan bichish uchun atayin kelganman»,— qaynonasi shunday deb qahqah otib kula boshladi. Oʻzini toʻxtatolmay toʻxtovsiz kuldi, sonlariga shapati urib kuldi, Toshboltaning naq tepasiga turib olganicha kinolardagi yalmogʻiz kampir kabi xunuk kuldi. Kulgi jarangidan Toshboltaning quloqlari shangʻillab ketdi.
 - He, turqing qursin senlarning, jigarlaringni qurt kemirib quritsin!...
- Bu kimning ovozi? Toshbolta sergak tortdi: qaynonasi emas, Adolatning shang'illashi bu. Kimni qarg'ayapti?
- Molni egasining oʻziga berarmish. Kim egasi? Onangning mahriga tushgan mol ekanmi?

Shang'ish ovozi tobora yaqinlashib, ro'parasida Adolatning qahrli chehrasi ko'rindi.

— Qanaqa erkaksan oʻzing?! Gʻirt ahmoq odam ham shuncha molni oʻsha yerga tashlab kelavermaydi. Milisaning gaplarini eshitdingmi? E, er boʻlmay oʻlibgina ketgin sen! Senga tekkanimdan beri birim ikki boʻlmadi-ya! Endi seni bitimga boqamanmi? Bitta ukoling necha pul, bilyapsanmi. Tuzaladigan boʻlsang, tuzal, boʻlmasa oʻzim boʻgʻib oʻldirib qoʻya qolay. Boqishga arziydigan erkak boʻlsang ekan, sen...

«Noshukur boʻlma, shuncha topib kelganim kammi senga? Uchta emas, oʻttizta qiz uzatishga yetadigan mol yigʻding-ku? Tilla taqinchoqlarni sotsang ikkita mashina beradiku? Buncha noliysan, qora shaqshaq?!» Shunday demoqchi edi, til aylanmadi. Gʻoʻldiragan ovoz chiqdi.

 Nima deyapsan, qaytarchi? — dedi Adolat yoniga tiz cho'kkanicha qulog'ini ding qilib. «Hadeb voy-voylab oʻpkangni koʻrsatavermay bitta qoʻy olib soʻydirib xudoyi qilib yubor. Bizga balo yogʻilyapti. Xudoyi qilmasang boʻlmaydi. Boya domla oʻqiyotganida shu koʻnglimga keldi».

Toshbolta shu soʻzlarni aytmoqchi boʻlganida koʻzlari qassobga qarayotgan qoʻzichoq koʻzlari kabi javdiradi.

Adolat bu nigohga zuhr bo'lgan ma'noni o'z aqli yetganicha o'qidi:

— Mollarni borib olib kelaymi?

«Kallangni ishlatsang-chi: balo yogʻilyapti, deyapman senga. Qoʻy olib soʻydir, xudoyi qil, deyapman. Baloga men uchradim, mayli, endi qizlarga urmasin. Sen alvastiga ham Xudoning atagani bordir, esingni yigʻsang-chi!..»

Ularning bu tahlitda gaplashishi soqov bilan soʻqirning suhbatini eslatardi.

— Ha, boʻpti, nima demoqchi boʻlganingni tushundim, — dedi Adolat. — Erta yo indin borib olib kelaman. Milisa boʻlsa oʻziga, men indamay qoʻyib berarkanmanmi? Noshud boʻlmay qaro yerga kirgin sen. Shuncha molni uyga qoʻymay, xaridorga topshirib kelsang oʻlarmiding? Bu yoqqa hovliqib yugurganing bilan qizing tirilib qolarmidi? Mana, yugurganing bilan koʻmish baribir senga nasib qilmadi-ku? Xudo bizga mehribon-da, seni shu koʻyga solmaganda moʻylov jinning oʻla qolsa jiyanini koʻmmasdi. Butun xarajat bizning gardanimizga tushardi. Eri oʻlgur qaysi goʻrlarda ekan? Xotin olmay oʻla qolsin, u soʻtak. Qiz bilan juvonning farqiga bormasa...

Toshboltaning yuragi sanchib, ogʻriqqa chidolmay ing-rab yubordi. Ancha bosilib qolgan kuragidan ogʻriq ham uygʻondi. Oyoqlari yuzlab chayonlar hukmiga topshirilganday azob cheka boshladi. Ingrash oʻkiriqqa aylandi. Yonogʻiga yosh tomchilari dumaladi.

«Bo'g'ib o'ldirsang o'ldira qol», degan iltijo bilan xotiniga boqdi.

— Ha, shunaqa, — dedi Adolat oʻrnidan turib, — toʻgʻri gap tuqqaningga yoqmaydi. Sogʻ paytingda ham quturgan tuyaga oʻxshab oʻkirib qolarding. Hozir ham shuning xumori tutdimi, he oʻkirmaygina oʻlgin sen...

«Toʻxta, hech boʻlmasa oyoqlarimni silab qoʻy, bu azob bilan oʻlmay. Jonim chiqmasidan oldin sen ham menga bir yaxshilik qil». — Til bu gapga ham aylanmadi. Alhol, bu iltijo tish hatlab aytilgan taqdirda ham xotin tomonidan ijobatga olinmogʻi mahol edi. Javob tariqasida uning tilidan «Endi sening isqirt oyoqlaringni qashilash qoluvdi», degan gapning uchmogʻi ehtimoldan xoli emasdi.

Toshbolta azoblar iskanjasida yotganida Nafisa koʻrindi.

«Qizim, jon qizim, kel, sen qutqar bu azoblardan».

«Qanday gutgaray? Bu azoblarni men bermadim sizga, men gutgara olmayman».

«Buving meni betoʻxtov qargʻayaptilar. «Seni Xudo urdi», deb quvonyaptilar. Men Xudoga nima yomonlik qildim. Mendan beshbattarlari ham yuribdilar-ku, yallo qilishib? Bittagina aybim — onangni urganim. Undan keyin men ham odamga oʻxshab yashayin deb harakat qildim, xalos. Boshqalar yeb-ichib, maishat qilib qornini silab yotganida, men och-nahor yashashim kerakmidi? Nima, nafs bitta menda bormidi? Nafsi oʻpqonlar-chi? Qani, gapir, nega jim turibsan?»

«Dada, men nafsni oʻlchaydigan tarozibon emasman. Mening bilganim — bizlarni shu nafs sharmanda qildi».

«Sharmanda qildi? Tirikligingda ham shunaqa devding. Sharmandalik nima oʻzi? Koʻzga koʻrinmasa, qoʻlga ushlab boʻlmasa, yeb boʻlmasa, kiyib boʻlmasa... Odamlarning gapimi? Oʻshanda ham aytuvdim, hozir ham aytaman: tupurdim, oʻsha odamlarning oʻzlariga ham, gaplariga ham!»

«Dada, unday demang, shu odamlar erta-indin sizni koʻtarib joyingizga olib borishadi».

«Baribir tupurdim! Oʻlganimdan soʻng koʻtarib olib borishadimi yo hojatxonaga tashlab yuborishadimi — menga baribir. Sen qizim, buvingga tayinlab qoʻy: hadeb meni qargʻayvermasinlar. Uch-toʻrt kun boʻlsa ham tinch yashay. Kelsang oʻzing kel, buving kelmasin. Toʻx-ta, buvingga qoʻshilib sen ham meni qargʻayotganing yoʻqmi?»

«Nimaga qarg'ayman, dada?»

«Tursunaliga roʻpara qilganim uchun-da. Lekin, sen bilib qoʻy: bu mening kallamdan chiqqan aql emas edi. Alvasti oʻgay onang aytuvdi, men laqmaga ma'qul keluvdi. Qargʻasang oʻshani qargʻagin. Lekin... oʻzing ham Tursunalini yaxshi koʻrarding-ku, a?»

«Yaxshi koʻrardim, dada».

«Yaxshi koʻrsang baxtsiz emas ekansan-da? Buni buvingga aytgin. Ogʻzimiz endi oshga yetganida, boshimiz toshga yetdi. Oxirgi marta boqqa borganimiz esingdami? Oʻchoq tagidan topgan taqinchoqlarimiz esingdami? «Qorashaqshaq» buni boshqacha tushunibdi. Yangi direktor bilan oʻynashib, shuning haqqiga olgan, deb oʻylabdi u haromi. Seni fohisha deb hisoblaydi. Senga avvallari aytmovdim, dardim ichimda edi. Menga tegmasidan avval oʻzi shunaqa boʻlgan. Shuning uchun boshqalarni ham oʻziga oʻxshatadi, u haromi. Qargʻasang oʻshani qargʻa. Oʻchoq tagidan topgan taqinchoqlarni taqib oluvding. Oʻlib yotganingda qarasam, ziraklaring ham, uzuklaring ham yoʻq. Oʻzing olib qoʻyqanmiding yo... ering olib qoʻyuvdimi?»

Nafisa bu savolga javob bermay ma'yus tikilib turaverdi.

«Bilmaysanmi? Unda seni oʻldirgan odam olib qoʻygan. Nafis, qizim, ayt, seni kim oʻldirdi? Yoningdagi yigit kim edi? Faqat «oʻynashim edi», demagin. Men ishonmayman. Sen unaqa shilta emas eding, qizim. Seni ering oʻldirmagan, undan gumonim yoʻq. Agar u oʻldiradigan boʻlsa, Tursunalini oʻldirardi. U Tursunalini yaxshi koʻrishingni bilardi. Bir marta mast boʻlvolib menga yigʻlagan, senga aytuvdim. «Tursunali bilan uchrashmasin», deb yalingan. Oʻldiradigan odam bunaqa boʻlmaydi. Unda kim oʻldirdi seni? Karvon bormaganmidi uyingga? Oʻchoqni buzgan kunim bir nimani sezib is olganday boʻluvdi. Meni koʻrolmaydi u nokas. Bogʻ qorovulligini mendan olgunicha atrofimda itpashshadek aylandi. Keyin-keyin qiliq chiqardi. Mening gumonim oʻshanda. Sayfini tanirding, a? Yettinchi boʻlimning boshqaruvchisi. Senga sovchi qoʻydirganida unamaganman, esingdami? Oʻsha Tursunali bilan gap talashib qolganida Karvon «Sen hali xoʻja-yinga gap qaytaradigʻon boʻp qoldingmi!» deb itday poʻpalab tashlovdi. Men oʻrtaga tushmasam oʻlib ketardi, bola bechora. He, attang... shu gaplarni milisaga aytsam boʻlarkan...»

Nafisa otasining gaplariga e'tibor bermay tisarila boshladi.

- «Qizim, ketma, sen kelib, azoblarim sal nari boʻlyatuvdi. Meni gutgar, gizim...»
- «O'zimning azoblarim o'zimga yetadi, dada».
- «Azob? Qanaqa azob? Oʻlgan odamda qanaqa azob boʻladi? Oʻlim hamma azoblardan qutqaradi-ku?»
 - «Yo'q, dada, o'lim siz bilan men uchun azoblarning boshlanishi...»
 - «Unday dema...»
 - «Yaqinda oʻzingiz koʻrasiz...»

Shunday deb koʻzdan yoʻqoldi. Toshboltaning qulogʻiga azobli faryod ovozi eshitilib, atrofiga alang-jalang qaradi. Is bosgan ayvon shipi, boʻyogʻi koʻchgan ustundan boshqa hech nima koʻrinmadi.

Kimdir ingradi... Kimdir oh urdi...

POKLIK

— Qo'lingni ko'tar! G'iring desang, otaman!

Gardaniga sovuq bigiz uchi tiralganday boʻlib, Omonulloning eti bir seskandi. Lekin tanish ovoz uni jilmaygan tarzda orqaga oʻgirilishga majbur etdi. Sinfdosh doʻsti Safarning qiligʻi unga ma'lum: poylab turib, orqadan pisib kelib, shunaqa deyishni yaxshi koʻradi.

- Otadigan odam toʻpponchani biqinga tiraydi, qalamni gardanga sanchmaydi, harif! — dedi doʻstining qoʻlini ehtiyotlik bilan qayirgan boʻlib. Keyin ularning harakatini kulimsirab kuzatayotgan navbatchiga qaradi: — Meni «shoshilinch tarzda yoʻqlayotgan xotin» shumi? Serjant, bu yolgʻon uchun nima qilaman, bilasanmi?
 - O'zimizning akaxonimiz-ku?
- Bo'ldi, ukaxonga sasima. Sen kapitan bo'lsang, men Nishonovman! «Nishonov» deganda hozir kapitan tugul generallaringning ham ichi o'tib ketadi. Bo'ldi, yur, ketdik.
 - Qayoqqa?
- Bugun qanaqa kun? Ikkinchi payshanbami? Ikki marta shtrafga tushib turibsan oʻzing.
 - Yo'g'-e?
 - Ha-e! Endi seni himoya qilmayman. Bolalar po'stagingni qoqib olishadi.
 - Avvalgi «gap» kuni kasal edim.
- Kasal-pasaling bilan ishimiz yoʻq. Ahmadjon nima degan? Kasal tugul oʻlib qolsang ham oʻligingni «gap» boʻlayotgan uy yonidan olib oʻtishlari kerak. Ketdik.
 - Ishim bor.
- Ish-pishing bilan ishim yoʻq. Serjant ukaxon, xoʻjayinga aytib qoʻying: oʻrtoq Safar Nishonov shaxsan kelib, muhim bir ish bilan olib ketdilar deng. Nishonovga qarshi bir nima deydigan odam hali tugʻilmagan.

Omonullo Safarning odatini biladi. Tanaga yopishgan kanani yoki zulukni olib tashlash mumkin-ku, ammo Safar bir nima deb yopishdimi, undan oʻlib ham gutulib boʻlmaydi.

- Xo'p, mashinadamisan?
- Mashinadaman, xizmat bormi?
- Bor. Hozir dadamnikiga kirib o'tamiz.
- Tushunarli. Qaynonangni sog'inibsan, u yerga kirib o'tishimiz ham tayin, a? Uyalmay aytaver, men atay bir yarim soat oldin keldim. Sening qilig'ingni bilaman.
 - Ertaga bo'shmisan?
- G'irt bo'shman, o'g'ri oviga olib borasanmi? Benzin topib bersang bo'ldi, dunyoning narigi chetiga ham ketaveraman.

Omonullo xonasiga kirib stol ustidagi qogʻozlarni tartibga keltirib, tortmasiga solgach, tezgina iziga gaytdi.

Tabiatan serg'ayrat bo'lgan Safar mashinani ham behalovat tarzda haydardi. Yashil chiroqning o'chganiga parvo qilmay chorrahadan o'tishi bilan yo'l harakati nazoratchisi ola tayog'ini ko'tarib, to'xtashga ishora qildi.

- Qizilga oʻtmadim shekilli? dedi Safar toʻn-gʻillab. Mashinada milisa olib yurishning hech ho-siyati yoʻq, shunaqa ishkalga roʻpara boʻlaveraman.
- Naq qizilning oʻzida oʻtding. Men guvohman. Hujjat ketdi, deyaver, dedi
 Omonullo tegajaklik qilib, ovora boʻlma, yoningni olmayman.
- Senga ahmoq odam yalinadi. Qarab tur, hozir toʻxtatganiga pushaymon qildirvoraman.

Safar shunday deb mashinani toʻxtatdi-yu, ammo pastga tushmay, oʻtiraverdi. Haydovchilarning yugurib kelib, qoʻshqoʻllab koʻrishishiga koʻnikkan nazoratchi bir oz kutdi, soʻng mashinaga yaqinlashdi. Safar oynakni tushirib bosh chiqardi.

- Ha, ukaxon, tinchlikmi?
- Tinchlik, hujjatlaringizni ko'rsating?
- O'zing kimsan, nega tanitmaysan?
- Inspektor Nuriev. Hujjatingiz?
- Meni tanimadingmi?
- Tanimadim, aka. Hujjatingiz? Iltimos, mashinadan tushing. Nuriev shunday deb Omonullo tomonga qaragan edi, u «bopla, qoʻymaysan!» deganday imlab qoʻydi. Safar esa, sumkasidan hujjatini olib, mashinadan tushdi. Nazoratchi hujjatlarni koʻrib chiqqach:
 - Safar aka, nega qizilga o'tdingiz?— deb so'radi.
- Nima deding? Safar shunday deb xuddi bemorni koʻrayotgan tabib kabi unga tikildi. Men koʻk bilan qizilni farqiga bormaydigan ahmoqqa oʻxshaymanmi? Menga qara, mabodo oʻzing daltonik²² emasmisan?
 - Haqorat qilmang, aka.
- Vey, men seni haqorat qildimmi? Guvohing bormi? Oʻzing menga ikki marta tuhmat qilyapsan. Men seni daltonik dedim. Bu soʻkish emas, ma'nosini xoʻjayiningdan soʻrab ol.
 - Aka, nima desangiz deng, qizilga oʻtdingiz. Protokol yozaman.
 - Uka, sen hujjatni koʻrdingmi?
 - Ko'rdim.
 - Familiyani ko'rdingmi? Familiyani?
 - Ko'rdim.
 - Nima deb yozibdi?
 - Nishonov.
 - Nima degani bu?
 - Bilmayman, Nishonboy akaning yo o'g'li, yo nabirasi deganidir-da.

Safarning doimiy quroli ish bermay, Omonulloga qarab qo'ydi.

- Mashinadagi akangni taniysanmi?
- Tanimayman. Protokol tuzaman, Nuriev shunday deb qogʻozlarini chiqardi.
- To'xta, hovliqma, anavi akang o'zlaringdan, podpolkovnik. Mening qiz o'rtog'im bo'ladi. Vey, Omon, tush bu yoqqa.

Omonullo kulimsiraganicha tushib, nazoratchi bilan koʻrishdi.

— Starshina, sigaretdan oling, — dedi bir koʻzini qisib qoʻyib. Chekmaydigan Safar ham nazoratchi uzatgan sigaretdan olib labiga qistirdi. Omonullo starshinaga oʻt tutib, soʻng oʻzi ham tutatdi-da, Safarga qaramadi. — Starshina siz haqsiz: bu oʻrtoq chindan ham qizilga oʻtdi. Agar protokol yozmasangiz, oʻzingizdan koʻravering. Bu oʻrtoq ikki marta aldayapti: men podpolkovnik emasman.

Omonullo ko'z qisib qo'ygani bilan bu gaplarning hazilmi yo chin ekanini anglay olmayotgan nazoratchi Safarga ajablanib qaradi.

- Omon, qo'y, bu gaplarni. Podpolkovnik bo'lmasang mayordirsan, mayor bo'lmasang kapitansan. Lekin mening nazarim tushgan bolasan. Podshozodalarning nazari tushgan milisa erta-indin general bo'lib ketadi. Sen bu bolalarga hazillashma, bular hazilni tushunishmaydi.
- Nimasi hazil ekan? Qonun hamma uchun bir. Qoidani buzganingdan keyin jazosini ol.

²² Ranglarni farqlay olmaydigan odam.

- Shunaqami? Dodam rohmatli «milisadan oshnang boʻlsa, yoningda oyboltang boʻlsin», deganlarida ishonmagan ekanman, dedi Safar piching ohangida.
- Ikkita oshna oʻzlaring kelishib olaveringlar. Men protokol yozaman, dedi nazoratchi.
 - Ha, yozing, dedi Omonullo atay qitiqlab.
 - Yozsinmi? dedi Safar po'pisa ohangida.
 - Yozaman, aka, oshnachilik o'z yo'liga, ish o'z yo'liga.
- Bo'lmasa, ma! Safar shunday deb unga mashina kalitini uzatdi. Xo'jayiningga berib qo'y. Mashinani shaxsan o'zi olib borib beradi.

Nazoratchi kalitni oldi-yu, savol nazari bilan Omonulloga qaradi. Omonullo yana ko'z qisib qo'yib, sigaretini tutataverdi. Safar esa «qo'ying aka, hazillashdim», degan lutfni bir oz kutib, labiga qistirig'lik tutatilmagan sigaretni chetga uloqtirdi-da, qo'l siltaganicha nari keta boshladi. Shundan so'ng Omonnullo o'zining guvohnomasini ko'rsatib, uzr so'ragach, mashina hujjatlari bilan kalitni olib, haydovchi o'rindig'iga o'tirdi. Safar o'n besh-yigirma qadamcha yurib to'xtab, o'tayotgan mashinalarga qo'l ko'tara boshladi. Omonullo undan uch-to'rt qadam o'tib mashinani to'xtatdi-da, pastga tushib so'radi:

- Akaxon, qaysi tomonga borasiz? Yoʻl-yoʻlakay boʻlsa olib ketay, harna benzin puli chiqsin.
- Ukaxon, katta xolangiznikiga ketyatuvdim, naq yoʻlimning oʻzi, Safar shunday deb toʻngʻilladi-da, haydovchi yonidagi oʻrindiqqa oʻtirdi.
 - Sariqmassan-ku, buncha tutab ketding? dedi Omonullo mashinani yurgʻizgach.
 - Hazil deb gapiraverasanmi? GAI hazilni tushunadimi?
 - Unagada o'zing ham katta ketma.
 - Katta ketib nima debman?
 - «Senga yalingan ahmoq», degan kim edi? Endi ahmoqligingni tan oldingmi?
 - Seni oshnam deb yurgan odam ahmoq bo'lmay nima bo'lardi?
 - Bo'pti, ming'illama. Bir joyda zo'r pivo bor, olib boraymi?
 - Pivoning dodaxoʻjasini hozir borib ichasan. Bavariyanikidan topib qoʻygan.

Pivo bahonasida chalg'igan Safar arazni unutdi. Omonulloning tutingan otasinikiga borishgach, u «o'zing kirib chiqaver», deb mashinadan tushmadi.

Ikki tabaqali eshik qiya ochiq edi. Omonullo qoʻngʻiroq chalib oʻtirmay ichkari kirdi. Uch oyoqli kalta nar-von ustiga chiqib olib, gilos terayotgan Bobomurod Omonullo ovoz bermaguniga qadar uning kirib kelganini sezmadi. Omonullo ana shundan ajablandi. Tabiatan sezgir boʻlgan Bobomurod ichkari uyda oʻtirsa ham koʻcha eshigi ochilganini bilardi.

Tutingan oʻgʻlining ovozini eshitishi bilan gilosga uzatgan qoʻlini tushirib, pastga qaradi. Omonullo uning qarashida ham sustlik sezib «qariyaptilar», deb koʻnglidan oʻtkazdi. Otasining holatidagi oʻzgarish sababini keyinroq bildi, Omonullo soʻramasa ham Bobomurodning oʻzi aytdi:

- Opangning mazasi qochib qoldi, ertalab kasalxonaga tashlab kelganman. Hozir yana ketaman. Kechasi yonida boʻlishim kerak. Harna dalda-da.
 - Safar og'aynimning mashinasidamiz. Kuzatib qo'yamiz, dedi Omonullo.
 - −E, yoʻq, hali ovqat qilishim kerak. Vaqting boʻlsa, ertalab xabar ol.

Bobomurod «opang» deb atagan ayol Omonulloga yetti yot begona edi. Oxirgi marta qamoqdan chiqib qaytayotgan Bobomurod Penza bekatida gʻaribgina kiyingan, sochlari toʻzib, koʻzlari kirtaygan ayolni koʻrib, e'tiborsiz oʻtib keta olmadi. «Ruslarga oʻxshamaydi-ku bu ayol», degan oʻy bilan qaraganida vagonlarga tiki- lib, kiprik qoqmay turgan ayol behosdan gapirib qol-di:

— Biz uch kishi edik: Valya Namanganskaya, Gulya va men. Toʻgʻri, oʻgʻirlik qilmaslik kerak edi...

Ayolning o'zbekchalab gapirib golishi Bobomurodni to'xtatdi.

Singlim, sizga nima bo'ldi? — deb so'radi.

Ayol uning gaplarini eshitmadi, holatini o'zgartirmay, kiprik qoqmagan holda yana o'sha gapini takrorladi:

Biz uch kishi edik...

Bobomurod yana qayta so'radi. Ayol o'zgarishsiz o'tiraverdi.

«O'tirib chiqqanga o'xshaydi, — deb o'yladi Bobomurod. — Boshiga urishgan bo'lsa, esi og'ib qolganmi...»

Bobomurod nima qilishini bilmay turganida militsiya mayori unga yaqinlashib hujjatlarini ko'rsatishni so'radi. Hujjatlarni sinchiklab tekshirgach, qay-tarishga shoshilmay, Bobomurodga sinovchan boqdi-da:

- Hamyurting shekilli? deb so'radi.
- Shunaqaga oʻxshaydi, dedi Bobomurod.
- Hamkasbing bo'lishi ham mumkin, dedi mayor.
- Ha, shunaqaga oʻxshaydi.
- Bu ham qamoqdan chiqqan. Ikki-uch kundan beri shu yerda. Jinnixonaga berib yuborsammikin, deb turuvdim. Agar odamgarchilik qilish qoʻlingdan kelsa, oʻzing bilan olib ket. Yurtida qarindoshlari bordir. Jinnining millati boʻlmaydiku-ya, ammo xor boʻlib oʻlishi yaxshi emas.

Bobomurod militsiya xodimlarini yoqtirmas edi, deyilsa juda yumshoq qilib aytilgan boʻladi. Oʻn toʻrt yoshidan beri toʻrt marta qamoq lagerlarining tuzini totgan odamning nafratini hech nima bilan oʻlchab boʻlmaydi. Shunday boʻlsa-da, mayorning hozirgi gaplari koʻngliga yoqdi. «Nahot senda tuygʻu boʻlsa?» degan ma'noda unga qarab oldida:

- Bir amallab olib ketaman, dedi.
- Sen bu oʻtirishiga qarama, saldan keyin oʻziga keladi, mayor shunday deb hujjatlarni qaytarib berdi-da, nari ketdi.

Ayol kipriklarini pirpirata boshlagach, Bobomurod:

— Singlim, Toshkentga ketyapman, birga ketay- lik, — dedi.

Ayol unga yalt etib garadi-da, yagin mehribonini ko'rgan odamday suyunib, jilmaydi:

— Men uyimga ketaman! — deb kafti bilan burnini artdi.

Bobomurod yoshi oʻttizga yetmagan, koʻrinishidan esa elliklarni qoralagan ayolning fe'li, tabiati qanday ekanini yoʻl-yoʻlakay bilib oldi. Ayol militsionerni koʻrsa qalqib ketardi, jinoyatdan yoki qamoqdan soʻz ochilsa, lablari oshkora titrardi. Bobomurod shu sababli manzilga kelgunicha ham bu mavzuda soʻz ochmadi. Ayol turar joyini unutgan edi. Bobomurod hujjatiga qarab uni qishlogʻiga boshlab bordi. Ayol tugʻilib oʻsgan uy ostonasiga yetishganda hali shom namoziga azon chaqirilmagan edi. Bobomurod eshikni taqillatgach, qirq yoshlardagi odam chiqib Ayolni koʻrdi-yu, ostona hatlagan yerida turib qoldi. Ayol ham unga qarab kipriklarini pirpiratganicha tek qotdi.

- Sen kimsan, erimisan yo sherigimisan? dedi uy egasi dabdurustdan.
- Eri ham emasman, sherigi ham emasman. Yoʻlda uchratib qolib, qogʻozlariga qarab boshlab kelyapman. Oʻzing kimsan?
 - Hech kimi.
 - Hech kimi? Tanimaysanmi bu ayolni?
 - Taniyman... dedi uy egasi mujmal ohangda,— men... akasi edim.
 - Akasi edim? Endi-chi, akasi emasmisan?
 - Ota-onam oq qilishgan, men ham oq qilgan- man.

- Nega og gilasan?
- Ishing boʻlmasin, bu isqirtni olu joʻna bu yerdan. Isnodga qoldirma bizlarni. U shunday deb oʻgirilmoqchi boʻlganida Bobomurod giribonidan oldi-da, qorniga musht urdi:
- Menga qara, hey harom! Singlingni Penzada koʻrib qolib, yetaklab keldim. Oʻsha yerda bir oʻris, oʻris boʻlganda ham bir ment singlingga rahm qildi. Bu yerlarda xor boʻlib oʻlib ketmasin, dedi. Sen nima deyapsan? Men toʻrt marta oʻtirib chiqqan odamman. Beshinchisida nima uchun oʻtirarkinman, deb yuruvdim. Sening qoningni ichib oʻtiraman shekilli? Qani, joningni sugʻurib olmasimdan ayt-chi, nima uchun oq qilgansan?
 - Shaharda o'qiyapman, deb o'g'rilarga qo'shilib ketibdi. Bizlarni nomusga qo'ydi.
- Senda hali nomus ham bormi, harom! Kasal singlingni oq qildim deb, koʻchaga haydab qoʻyib, yana nomusdan gapirasanmi! Ota-onang qani?
 - O'lib ketishdi.
- Qovurgʻangning orasiga panjamni tiqib yuragingni sugʻurib olgim kelyapti. Lekin shu singlingning hurmati uchun hozircha tirik qolasan. Seni yoʻqlab alohida kelaman. Nomus nima, insof nima, vijdon nima gaplashib olamiz. Hozir esa, hamma qoʻshnilaringni chaqir.

Aka avvaliga koʻnmadi, biroq yumshoq yeriga uch-toʻrt tepki tushgach, buyruqni bajardi. Ayrim qoʻshni ayollar toshdek qotib turgan Ayol bilan koʻrishmoqchi boʻlishdi. Ba'zilari esa, ostonalaridan uzoqlashmay choʻchigan holda qarab turaverishdi.

— Qoʻshnilar, bilib olinglar: mana bu harom odam aka ekan. Bu iflos odam singlisini oq qilganmish. Qamalgan qizlar oq qilinsa, koʻchalarda xor boʻlib oʻlsin, degan qonun bormi oʻzi? Qaranglar, singlisi kasal. Shu ayolga bir oʻrisning rahmi keldi, akasining esa rahmi kelmaydi. Endi men shu ayolning nomidan gapiraman: u akasini oq qildi, bilib qoʻyinglar! Endi men unga aka, u menga singil! Omin! Fotiha beringlar!

Birov fotiha qilgan bo'ldi, birov qimir etmadi.

— Biz uch kishi edik: Valya Namanganskaya, Gulya va men. Toʻgʻri, oʻgʻrilik qilmaslik kerak edi...

Ayol bu gapni avval sekinroq aytdi, soʻng baland ovozda qaytardi-da, qah-qah otib kuldi, kulaverdi...

Bobomurod hayron boʻldi: shu paytgacha Ayol kulmagan edi.

Qo'shnilar birin-sirin uylariga daf bo'ldilar. Akaning ham qorasi o'chdi. Bir piyola choyga taklif etuvchi insof egasi topilmadi.

Qishloqdan chiqishganda qosh qoraygan edi. Bobomurod biron xonadon eshigini taqillatib boshpana soʻrashni istamadi. Oʻz mayliga qoʻyib berilgan keksa tulpor kabi yoʻlning oʻrtasidan asta yurib boraverdi. Ayol ikki qadam orqada, unga mutelik bilan ergashgan edi. Bobomurod koʻp zulm koʻrgan — zulm ham qilgan, oqibatsizlik tuzini totgan — oʻzi ham oqibatsizlik zahrini boshqalarga yalatgan, oz boʻlsa-da, mehr sharobidan lazzat olgan — oz boʻlsa-da, boshqalarga ham ilingan, insonning hayvondan ham tubanroq tarzda xorlanishi mumkinligini koʻrgan, vaqti kelsa, bosh-qalarga ham koʻrsatib qoʻygan odam edi. Ammo bugungiday holatni uchratish nima ekan, eshitmagan, hatto xayoliga ham keltirmagan edi.

U ham, izidan kelayotgan ma'suma ham, Bobomurodga fotiha berganlar ham, bermaganlar ham Ollohni tanishmas edi. Buning uchun ularga ayb jandasini kiydirmoq noinsoflik bo'lar. Tug'ilganlaridan to ayni damga qadar biron bir imon egasi Yaratgan tangrini tanishga da'vat etmadi. Yaxshilik bilan yashaganlarga jannat eshiklari ochilajagiyu, yomonlik qilganlarga bu dunyodagi qamoqdan tashqari do'zax azoblari borligini hech kim aytmadi, tushuntirmadi. Ularning har birlari insof, vijdon, iymon, mehr-oqibat tushunchalarini o'zlaricha anglashardi. Bu dunyo sinovli dunyo ekanini, har

bir harakat, har bir so'z imtihon tarozusida tortilajagini o'ylab ko'rishmagan edi. Ayni damda zo'r bir imtihon sodir bo'layotganidan ham bu g'ofil bandalar bexabar edilar.

Qo'shnilar uy-uylariga kirgach, sodir bo'lgan voqeani o'zlaricha muhokama etib, o'zlaricha baholar edilar:

- Xudo yomon uribdi, bechorani. Ota-onaning qarg'ishi yomon-da.
- Xudo jazolabdi...
- Jazosini beribdi...

Alhol, Tangrining jazosiga uchragan kim? Ayolmi, akasimi yo shu qo'shnilarmi? Vallohi a'lam, bissavob...

Yoʻlda borayotgan Bobomurod bularni oʻylamaydi. Ruhoniy masalalar, ruhoniy hukmlardan uzoq boʻlgan bu odamning oʻz dunyosi, oʻz oʻlchamlari, oʻz hukmi, nihoyat... hukmning ijrosi bor. U «Xudoga soldim», «Bir kunmas bir kun ularni Xudo uradi» yoki «Xudoyim, oʻzing jazolarini ber», deb oʻtirmaydi. Masalani oʻzicha osongina hal etadi: oʻzi hukm chiqarib, oʻzi ijro etib qoʻya qoladi. Hozir ham shart iziga qaytgisi, akaning yuragini sugʻurib olgisi, bu bemehr yurakni itlarga tashlagisi keldi. Juda-juda istadi shunday qilishni. Biroq, ogʻir-ogʻir qadam tashlab kelayotgan chorasiz Ayolning qismatini oʻylab, oʻzini bosdi. Hozir qaytib Akani chertsa ham qamalib qolishi oqibatida Ayol koʻchada xorlanishi yoki jinnixonada azob chekib yotishi mumkinligini u bilardi.

Tuni bilan yurish foydasizligini anglab, tashlandiq shiypon yaqinida toʻxtadi. Bir oz oʻylanib turgach, shiyponga qarab yurdi. Xas-xashaklarni oyogʻi bilan sidirib tozalagan boʻldi-da, oʻtirdi. Ayol Bobomurodga yaqin kelishdan qoʻrqqandek shiypon yonida turaverdi. Bobomurod avvaliga indamadi. Soʻng:

O'tir, — deb qo'ydi.

Ayol taklifni eshitmagandek tek turaverdi.

 O'tir, singlim, — dedi Bobomurod yumshoqroq ohangda. — Ertalabgacha dam olamiz shu yerda.

Ayol go'yo shiyponni qimirlatib yubormay debmi, ehtiyotlik bilan qadam bosib chiqdida, narirogga borib cho'ngaydi.

- Endi men akangman. Endi sen xor boʻlmaysan. Sen ulardan ranjima. Ular oʻgʻrini odam oʻrnida koʻrishmaydi. Men esa, ularning oʻzlarini odam qatoriga qoʻshmayman.
 - Men o'g'ri emasman!

Sekingina aytilgan bu so'z aslida qalbning portlashidan hosil bo'lgan nido edi. Bu uchtagina so'z ko'p yillik g'am-anduhlar zanjirini uzib tilga chiqqan edi. Bu gapni uyi oldida akasiga aytmoqchi edi. «Baribir ishonmaydi», deb aytmadi. Yangi akasiga aytdi. Qonsiz lablardan uchgan bu so'zlarni Bobomurod eshitdi.

— Oʻgʻri emasligini bir qarashimdayoq bilgan- man, — dedi u. — Oʻgʻri boʻlganingda seni yetaklab yurmas edim, oʻzingni oʻzing eplarding. Sendan yashirmayman: men oʻgʻriman. Toʻgʻrirogʻi, oʻgʻri edim. Qamoqda ont ichdim: bu hunarni tashlayman. Mening bir oʻgʻlim bor, shu yurishim boʻlsa, uni baxtsiz qilib qoʻyaman. U yaxshi bola... endi u sening jiyaning. Sen hali yoshsan, singlim, hadeb siqilaverma. Siqilgan bilan birov senga rahm qilmaydi. Undan koʻra mazza qilib yashayverginu odamlarning gaplariga ham, qiliqlariga ham e'tibor berma. Oʻylab koʻr-chi, seni oʻgʻri deganlarning oʻzlari tozamikin? Agar tozasi shunaqa boʻlsa, nahs bosgani qanaqa boʻlarkin? Biz endi bir-birovimizga suyanib yashaymiz. Bu ham katta bir baxt. Dunyoda suyanchigʻi yoʻq yakka maxov odamlar tiqilib yotibdi.

Bobomurod shu gaplarni aytib ancha yengil tortdi. Ayol esa unga javob qaytarmadi.

Qorong'i osmonga yulduzlar toshib, samo husnini bezadi. Bobomurod jag'ini tizzasiga tirab bu mo''jizaga boqdi. Yulduzlar — sayyoralarmi yo katta-kichik samoviy jismlarmi — u bilmaydi. Unga ma'lumi — yulduz uchgani kimningdir jon uzilganidan nishona. Hali

oʻzini tutolmay Akani oʻldirib qoʻysa hozir bitta yulduz uchgan boʻlarmidi... «Nahotki hammaning joni shu yulduzlarda boʻlsa, — deb oʻyladi u. — Nahotki iflos odamlarning ham joni shunday begʻubor, shunday pokiza osmonda boʻlsa. Bunaqa odamlarning joni hojatxonaga tashlansa, hojatxona ham bulgʻanadi... Yoʻ-oʻq, yulduzlar odamlarning joni emasdir. Balki... shu ayolga oʻxshab xoʻrlanganlarning koʻzlaridagi yosh osmonga uchib, yulduzlarga aylangandir... Qiziq... bu nima uchun yigʻlamaydi? Shuncha gapdan keyin ham yigʻlamadi. Yigʻlasa boʻlardi, yengil tortardi...»

— Singlim, sen mendan tortinma, yigʻlaging kelayotgan boʻlsa yigʻlayver. Erkak boʻlsam ham ba'zan yigʻlagim keladi...

Ayol javob bermadi.

Tun yarimlaganda Bobomurodning uyqusi keldi. Tizzasiga bosh qoʻyganicha mizgʻidi. Besh-oʻn daqiqadan soʻng choʻchib uygʻondi-da, «ketib qolmadimikin?» degan xavotirda Ayol tomon qaradi. Ayol toshdek qotib oʻtirardi. Bobomurod bir necha marta mizgʻidi. Har safar choʻchib uygʻonib, xavotirlangan tarzda Ayol tomon qarardi.

Tongni shu zaylda qarshi oldilar...

Oʻshandan beri Ayol shu uyda yashaydi. Omonullo uni dastlab koʻrganida «Otam u yoqlarda uylanibdi-da», deb oʻyladi. Soʻng boshqa-boshqa xonalarda yotishlarini bilib, muomalalarida er-xotinlik mehri yoʻqligini sezib, ajablandi. Otasidan «Kim bu?» deb soʻramadi. Bobomurod esa «Singlim», deb gapni qisqa qilib qoʻya qoldi. Ayolning «Biz uch kishi edik...» degan gaplarini eshitgach, qanaqa singil ekanini oʻzicha taxmin etdi. Taxmin notoʻgʻri ekanini keyinroq bildi. Bir kuni Bobomurod uning tiliga chiqarolmay yurgan barcha savollariga bira toʻla javob berdi:

— Men hammasini aniqladim: bu qiz bir nomardning qoʻliga tushib qolgan. Bir oʻgʻirlikni shu bechoraning boʻyniga qoʻyib yuborishgan. Tuhmat bilan ketgan. Hammasini aniqladim, hammasi hal boʻldi.

Omonullo:

- Nima hal bo'ldi? deb so'raganida Bobomurod:
- Tuhmat qilganlar jazolarini oldilar. Bu pok ayol, istasang «amma» degin, istasang «opa» degan edi.

Omonullo otasining koʻngliga qarab «opa» dedi. Ayolni har koʻrganida unga achinardi. Keyinchalik Ayolning rang-roʻyi yaxshi tomonga oʻzgardi. Chehrasida yoqimli nur ham paydo boʻldi. Lekin «Biz uch kishi edik...» boshlanganida betlari birdan qorayib, koʻzlaridan nur qochib xunuk holatga kelib qolar edi.

Bu Ayolning kelganiga oʻn ikki-oʻn uch yil boʻldimi yo undan oshdimi, Omonullo aniq eslolmaydi. Qamoqdaligida «oʻgʻlim, bundan bu yogʻiga faqat sen bilan birga boʻlaman», deb xatlar yoʻllagan odam Ayolning atrofida parvona boʻlishdan ortmay qoldi. Ayol koʻp gapirmasdi, ovoz chiqarib kulmasdi. Bir narsadan xursand boʻlsa salgina jilmayib qoʻyardi xalos. U jilmayganida Bobomurodning nazarida butun olam charogʻonlashib ketardi. Tundlashsa esa uning yuragi siqilib ketardi. Shunday paytlarda ba'zan «Hoy, gapirsangchi, soqov emassan-ku axir!» deb koyib ham berardi. Shunda Ayol zaifgina jilmayish hadya etib, uning koʻngligini ravshanlantirmoqchi boʻlardi.

Omonullo otasining bugungi kayfiyatidan sezdiki, Ayolning kasali shunchaki oʻtkinchi xastalik emas. Shu bois Omonullo «Otamga dalda boʻlar», deb bir oz gaplashib oʻtirmoqchi edi, Bobomurod unamadi. «Oʻrtogʻi bilan kelgan boʻlsa, hoynahoy biron yoqqa ketishayotgandir», degan xayolda «menga halaqit berasan», deb kuzatdi.

Qaynonasinikiga Safar ham kirib, bir-ikki piyola choy ichishgach, izlariga qaytishdi.

— Xafa boʻlmaginu ogʻayni, opangni koʻrsam yuragim siqilib ketadi, — dedi Safar mashinaga oʻtirgach.

Omonullo unga bir qaradi-yu, indamadi. Safarning bu ayolga achinganidan emas, irgangani uchun kirmaganini bilardi.

Ayol bu uyda paydo boʻlganida shu atrofda yashovchilarning ayrimlari undan hayiqishdi, ba'zilari esa irganishdi. Shu koʻchada, shu uyda tugʻilib unib-oʻsgan Bobomuroddan barcha hayiqardi. Qamoqdan qutulib kelib, keyin yana qamalib ketguniga qadar birov unga yurak yutib tik qaray olmasdi. Bobomurod bu mahallada birovning choʻpini olmagan, birovni chertmagan, birovni soʻkmagan boʻlsa-da, «oʻgʻri» degan nom bilan yurgani uchunoq hamma hayiqardi. Ayoldan hayiqishlariga sabab ham aynan shu edi. Ayol koʻchaga kam chiqardi. Chiqqan mahalida oʻziga xavotir bilan qarab turganlarini sezsa, jilmayishga harakat qilardi. Irganayotganlarini sezsa yuzini teskari burib olardi. Bir yili Omonullo Safar bilan kirganida opasi kasallik hurujidan endi holi boʻlib turgan payti ekan. Esi oʻziga qaytgani bilan rangidagi tundlik tarqamagan, parishon sochlarini tarashga hali ulgurmagan ekan. Oʻshanda Ayol Safarning qarashidanoq uning irganayotganini sezdi. Ular uyga kirib oʻtirishgach, xonasiga oʻtib oʻziga oro berdi. Soʻng dasturxon tuzadi. Choy quyib avval Bobomurodga, keyin Omonulloga uzatdi-da «oʻrtogʻingizga» deb pichirlab qoʻydi. Omonullo shundan soʻng Safarning irganganini ham fahmladi, opasining odatini ham bildi.

Oʻshandan beri ancha yillar oʻtdi. Safar bilan yana bir necha marta keldi. Oʻshandan beri Safar ostonaga qadar keladi-yu, ichkari kirmaydi. Har gal «yuragi siqilib ketishini» aytadi. Safar qanchalik yaxshi doʻst hisoblanmasin, mana shu kabi odatlari, kibrga bandaligi Omonulloga yoqmaydi. Ba'zilar doʻst tanlash imkoniyatiga ega boʻladilar. Ba'zilar esa boriga shukr qilib yuradilar. Omonullo ana shu ikkinchi toifaga mansub. Bolalar uyida orttirgan doʻstlari turli tomonlarga tarqab ketishdi. Ikkitasi xastalik tufayli, uchtasi esa jinoyatchilarga qoʻshilib qolib bu dunyoni tark etdi. Institutdagilar ham turli shaharlarda ishlashadi. Birining boʻsh vaqti ikkinchisiga toʻgʻri kelmagani uchun ham kam uchrashishadi. Oyda bir uchrashib turadigani — shu sinfdoshlari. Xudo unga sinfdoshlarni tanlab-tanlab bergan. Kibrli, xudbin, dardi mol-dunyo boʻlgan bolalarning bir sinfga qanday jamlanib qolganini Yaratgan bilmasa, bandasi bilolmaydi.

Bularning ichida xokisori ana shu Omonullo edi. Sinfdoshlar uni oshkora tarzda mensishmadi. Bular orasida faqat Safargina mehribon edi unga. Ota-onasi ham Omonullo kirguday boʻlsa koʻkragidan itarmay, oʻgʻlining suyumli mehmoni sifatida izzat qilishardi. Maktabni bitirgach, besh-olti yilmikin, sinf-doshlari bilan deyarli koʻrishmadi. Militsiyada ishlay boshlagach, ulardan birining ishi tushdi-yu, «gap» deb atalmish ziyofatga chorlanadigan boʻldi. Oʻshandan beri har oyning ikkinchi payshanbasida ular bilan «gap yeydi». Garchi ular bilan maktabda birga oʻqigan boʻlsa-da, oʻzining bu davraga begonaligini his qilib turadi. Ularning yashash tarzlari, dunyoqarashlari, fikrlarini hazm qila olmaydi. Ayniqsa keyingi paytlarda oʻzini tortishga bahona qidiradigan boʻlib qolgan. Davrada hol-ahvol soʻrashayotganida «bola-chaqalar omonmi?» deyilganida uning yuragi uvishadigan odat chiqargan. Oʻrtoqlari unga «xotining nega tugʻmayapti?» deb dashnom berishmasa ham shu savol koʻndalang turganday oʻngʻaysizlanaveradi. Ayrimlar beixtiyor ravishda, savolni kimga berayotganini, oqibati nima boʻlishini oʻylab koʻrmagan tarzda «bola-chaqalar qalay?» deyishganda Omonulloning yuragidan bir tomir uzilganday boʻlaveradi.

Hozir Omonullo ruhini temir iskanjaga oluvchi davra sari borardi. Safar oʻzi kelmay telefonda eslatganida bormaslikning chorasini topardi. Otasinikiga kelgunicha doʻstiga qitmirlik qilib, koʻnglini xushlamoqchi edi. Safarning «yuragi siqilganini» eshitib oʻzining ham koʻngli xufton pardasiga oʻrala boshladi. Tumtayib olmasa-da, gapirgisi kelmadi. Safar unga qarab-qarab qoʻyib:

— Mendan xafa boʻldingmi? — dedi uzrli ohangda.

- Sen xafa boʻlishga arziydigan odammassan, dedi Omonullo zardali piching bilan.
- Xo'p, hisob, biru-bir. Arazlagan o'g'ri, Safar shunday deb kaftini uzatdi.
 Omonullo ruhsiz holda shapati urib qo'ydi-da:
 - Opam kasal ekanlar, dedi. Ertalab kirib oʻtamiz.
 - Bo'pti, dedi Safar jonlanib. Zo'r kabobning o'g'il bolasi mendan.
 - Kabob yemasalar kerak. Reanimatsiyada ekanlar.
- Oʻzlari yemasalar doʻxtirlar yeyishadi. Doʻxtirlarning tomogʻini yogʻlab tursang, yaxshiroq qarashadi. Oʻzingdan ibrat olmaysanmi? Doʻxtir nimayu milisa nima? Milisani moylamasang qamoqqa joʻnatadi, doʻxtirni moylamasang, undan ham battar narigi dunyoga joʻnatadi. Aytgan gapi Safarning oʻziga xush yoqib, huzurlanib kuldi. Gapim yoqmasa ham koʻngil uchun salgina tirjayib qoʻy, hey «kayfitang».

Yoʻlning qolgan qismi Safarning mazali-mazasiz, yoqimli-yoqimsiz hazillari bilan bosib oʻtildi. «Gap» deb atalmish ziyofatga barvaqtroq borib qolishgan ekan, Safar maqtagan pivoning «dodoxoʻjasi»ni ichib rohatlanib oʻtirishdi. Uy egasi paytdan foydalanib, oʻzini qiziqtirgan siyosiy masalalarni oydinlashtirish maqsadida Omonulloni gapga soldi:

- «Vremya»ni koʻrdingmi, Berlin devorlarini yiqitishibdi-ya! dedi ajablangansimon.
- Men bultur boruvdim o'sha yerga. Zo'r do'konlari bor edi. Ular ham ketganmikin?

Omonullo darrov javob bermadi. Pivoni simirib unga qarab oldi. Berlin devorlarining yiqilishidan, yarim asrdan ziyodroq ayri-ayri yashagan xalqning qoʻshilishidan dunyo nima tashvishda-yu, nima quvonchda? Buning gʻami esa devorga yaqin yerdagi mayda doʻkonlarda.

- Devorni nimaga buzishyapti, bilasanmi oʻzing?— dedi Omonullo gʻashlangan tarzda.
- G'ish-pishi kerak bo'lib qolgandir yo paxsa devor ekanmi? dedi Safar qitmirlik bilan.
- Sen jim tur, dedi uy egasi uni jerkib, keyin Omonulloga qarab yelka qisdi: shunga hayronman. Tuppa-tuzuk baland devorlar edi.
- Kallani ishlat: oʻsha yerda koʻrgan doʻkonlaring kichiklik qilib qolibdi. Devorni buzib oʻrniga katta doʻkonlar qurishadi. Ikkita eshigi boʻladi. Bir tomondan gʻarbiy berlinliklar kiradi, ikkinchisidan sharqliklar.
- Gapni ham ezvorasan-da, a? Vey, milisa boʻlmasam ham u-buga aqlim yetadi. Gʻarbiy Berlinni uzoqdan boʻlsa ham koʻrganman. U yoqda zoʻr «importniy» mollar boʻlarkan. Ana endi boradigan boʻldi Berlinga.

Ulfatlar birin-sirin kelishib, «Berlin devori» masalasi surildi. Buning oʻrniga «besh yuz kun» deb nom olgan iqtisodiy reja muhokama qilinib, bu reja eski shahardagi goʻsht bozori talablariga javob berolmagani uchun inkor etilgach, somsalarni yeb, shoʻrvalarni ichishdi-yu:

— Qani, koʻmirxonaga oʻtdik,— degan taklif bilan dasturxondan picha uzoqlashib, uy burchaqida davra qu-rishdi.

«Ko'mirxona» gimor o'ynaladigan joy. Bir-biriga ahil, bir-biridan jonini besh-o'n ayamaydigan do'stlar tiyin tikishdan boshlab so'mlarga o'tadilar. «Ko'mirxona»da faoliyat boshlamay turib bir-birlarining hatto necha yuz so'mlik garzlaridan kechib yuboradigan mard, mehribonlar gimorda o'n-yigirma ti-yin ustida so'kishib, yoqa bo'g'ishib ketadilar. «Gap»ga kechikibroq kelgan do'stlariga «qalay, yaxshimisan?» deb, o'tirgan yerlarida qo'l uzatib qo'ya qoladilar. «Bola-chaqa yaxshimi?» deb hol-ahvol so'rashga fursatlari ham, farosatlari ham yetmaydi. Omonullo qartaqa usta bo'lgani uchun «ko'mirxona»dan umrbod badarg'a qilingan. Qaysidir yili Omonullo Moskvaga borganida to'rtta bir xil ko'rinishdagi garta to'plami olib kelib, har bir to'plamdagi «tuz»larni aralashtirib tashladi. O'ttiz oltita gartada to'rtta o'rniga o'n oltita «tuz» mavjudligini «ko'mirxona»dagilar keyinroq bilib qolishdi. Mana shu hazil bahona bo'lib Omonullo jazolandi — o'yindan tamoman chetlashtirildi. U hatto birovga maslahat berish huquqidan ham mahrum edi.

Omonullo o'yin qizimay turib Safar bilan ertalab uchrashishni kelishib oldi. O'yin «sen g'irrom qilib yutyapsan», deydigan darajaga yetganda sekingina turib, chiqib ketdi.

FITNA

(Qotillikdan avvalrog sodir boʻlgan voqea)

Omonullo Berlin devorlari qismati haqida piching soʻzlarni aytayotgandan, oʻrtoqlari esa besh yuz kunga moʻljallangan iqtisodiy rejani inkor qilib oʻtirishgandan ancha ilgari, tunda, qamoq lagerida bir fitnaga tayyorgarlik boshlangan edi.

Nuriddin o'sha kuni uyidan maktub olib avval quvondi, keyin ko'ngli cho'kdi. Maktubda dilga og'ir botuvchi satrlar yo'q edi. Qishloqdagi hammaning sihat-salomatligi haqida yozilib, oxirida «o'rtog'ing Sherdor uylanyapti», degan xushxabar aytilgandi. Nuriddinning nazarida shu xushxabar botininda onasining armonlari yashiringanday bo'ldi. Harbiyga ketayotgan paytida onasining ma'yus uzori yana ko'z oldida gavdalandi. Nuriddinni sakkizinchi sinfdan so'ng o'qitishga qo'llari kaltalik qildi. Harbiydan olib qolishga esa undan-da kaltalik qildi. Shunda ham noshukr bo'lmay, umid bilan kuzatgan edi. «Birortasini xushlab qolgan bo'lsang aytib ket, unashtirib qo'yay, kelishing bilan, Xudo hohlasa, to'y gilamiz», — degan edi. Nuriddinning hushlagani bor bo'lsa-da, onasiga dadil aytishga jur'ati yo'q edi. O'rtoqlari birin-sirin uylanyapti. Har birining to'yida onasining yarasi yangilanadi. Nuriddin onasining shu holatini ko'z oldiga keltirib, ezildi. Barcha uyquga ketganida ham u mijja qoqmay yotdi. Tun yarimlaganda mizg'iganday bo'ldi. Tush ham ko'rdi shekilli... Biroq, bu tushmi edi yo ro'yomi, farqlay olmadi. Nazarida ko'zlari ochiq edi. Darbadar to'satdan paydo bo'lmadi, barak eshigini ochib kirdi-da, taxtalarni g'ijirlatib yurib kelib, uning ro'parasida to'xtadi. Ha, taxtalarning q'ijirlaganini aniq eshitdi.

— Ha, toy bola, uyqu kelmayaptimi?

Nuriddin ajablandi: uni kichikligida «toy bola», deb erkalashganini Darbadar qaydan bildi ekan?

— Sen bunda bedorsan, yurtda esa barcha gʻaflat uyqusidadir. Ozodlik istovchi qalblar muhrlangandir. Qalblarning qullikka moyil ekanini bilurmisan, boʻtam? Uygʻonish fursati kelganini anglayurmisan, boʻtam? Yurak qonlari ila Vatan bogʻin obod qilmoqni fahm etmasmisan, boʻtam?

Darbadar savollar berdi-yu, nechundir javob kutmadi. Balki Nuriddinning bu savollarga javob qaytarmogʻiga aqli qosir ekanini bildimi ekan? U taxtalarni gʻijirlatib yurib kelgan edi, turgan yerida tutunga aylandiyu shipga koʻtarilib koʻzdan yoʻqoldi. Nuriddin bu sir-sinoatni tushunolmay garang boʻlib yotganida mahbuslardan biri unga yaqinlashib, yelkasidan asta turtdi-da, «tashqariga chiq, kutishyapti», deb tezgina iziga qaytdi. Nuriddin bu yerda «kim chaqir-yapti, nima uchun?» degan savol berilmasligini bil-gani sababli indamadi. Bu yerlarda chaqirildingmi, bas, chiqishga majbursan. Yaxshilik bilan chaqirilgan boʻlsang, yaxshilik bilan qaytasan, tongni oʻz oʻrningda qarshilaysan. Yomonlik qasdida chorlangan boʻlsang, toʻshaging yetim qoladi.

Nuriddin bir necha daqiqa harakatsiz yotgach, qaddini koʻtardi. Barakdan sal narida, maydon chekkasidagi daraxtga suyanib sigaret tutatayotgan Tengizni tanib, xavotirsiz ravishda oʻsha tomon yurdi.

- Ha, Hamzat, dedi Tengiz uning salomiga alik olib, uyqungni harom qildimmi?
- Yoʻq, uyqum kelmay yotuvdim, dedi Nuriddin.
- Odamning koʻngli sezgir boʻladi, yomonlikni tez payqaydi.

- Yomonlikni? Qanaqa yomonlikni?
- Bu yoqqa yur, Tengiz shunday deb uni barakning chiroq nuri tushmaydigan qorong'u tomoniga boshladi. Bir fitna tayyorlanyapti. Yomonlikni bizning qo'limiz bilan amalga oshirishmoqchi.
 - Birovni o'ldirish kerakmi?
- Birovni oʻldirish uchun bosh qotirib fitna yasash shart emas. Bir janjalning uyasini kavlab berishimiz kerak.
 - «Biz» deganingiz kim?
- Sen, men, mening atrofimdagilar, yana besh-oltita ahmaq. Bir-ikki kun ichida Yanis amakingga oʻxshab Boltiq boʻylaridan kelganlar yoppasiga doʻpposlanishi kerak. Ular ham kaltak yeyishlari kerak, ham janjal boshlagan, degan aybni boʻyinlariga olishlari shart. Balki biz tomondan odamlar yaralanar, balki oʻlar. Menga aniq aytishmagan boʻlsa ham koʻnglim shuni sezib turibdi. Agar koʻnglim aldamasa, odam oʻldirilsa, eng avvalida Yanis amaking ketadi.

Tengiz «Yanis amaking» deb aytayotgan odam bilan Nuriddin koʻpincha birga ishlardi. Tursunalidan bezib, uzoqlashgan paytda unga shu muloyim odam bilan sherik boʻlib ishlash ma'qul kelib qolgan edi. Yoshi oltmishdan oshib, kuchdan qolgan, ba'zan xastalik huruj qilganda azob chekuvchi bu odam oʻzini mehnatdan olib qochmasdi. Imkoni boricha oʻz vazifasini bajarishga intilardi. Nuriddin koʻmaklashmoqchi boʻlganida «har kim oʻz aravasini oʻzi tortishi kerak», deb unamas edi. Ana shu beozor odam nima gunoh qilibdi-ki, uni doʻpposlashsa, soʻng esa «qotil» degan tuhmat bilan ayblashsa...

- Gapimga tushunmading-a? dedi Tengiz. Sen juda xomsan, bola. Ha, xomsan! Yanis amaking nima uchun qamalgan, bilasanmi?
 - Ha, ishxonasida elektr choynakdan o't chiqqan ekan...
- Bu bir bahona, Hamzat. Yanis amaking aslida siyosiy mahbus. Lekin bizning «erkin va ulug'» Sovetlar mamlakatidan siyosiy qarashlar uchun qamash mumkin emas. Uning tajribaxonasiga o't qo'yishib, tuhmat bilan qamashgan. Aslida u zo'r fizik olim bo'lgan. Vatanini ruslar bosib olganini ochiq aytgan, xalqini ozodlik yurishiga da'vat etgan. Mana, sening ham, mening ham yurtimni ruslar bosib olishgan. Biz shuni ochiq ayta olamizmi? Yo'q. Mayli, men bir o'g'riman, bunaqa gaplarga aqlim yetmas. Sen ham g'o'rsan, yoshsan, ilmi yo'q bir qovoq kallasan. Seni ham ayblab bo'lmaydi. Lekin olimman, zo'rman, deb kerilib yurganlarimiz aytishadimi? Yo xalqiga yuzlanib, turlaring, ozodlik uchun kurashlaring, deydimi? Shuning uchun ham Yanis amakingni hurmat qilaman. Hozir Moskvada Yanisga o'xshaganlar rus hukumati bilan teppa-teng olishadigan bo'lib qolishgan. Nazarimda ular siyosiy mahbuslarini ozod etishni talab qilishyapti. Bu hukumatni chaqayotgan eng muhim narsa ular Sovet Ittifoqidan ajralib chiqay deb turishibdi. Mosk-va endi ularni shirin yolg'onlari bilan ushlab turolmaydi. Fitnasiz ish bitirishi qiyin. Shuning uchun hamma yerda har turli fitnalar ko'tarishga buyruq kelganga o'xshaydi. Bu yerdagi fitna bizning qo'limiz bilan bo'ladi.
- Koʻnmasakchi? Ur, desa uraveramizmi? Oʻgʻrilarning or-nomusiga toʻgʻri kelmaydiku, bu? Siz tomondan xoinlik boʻlmaydimi?
- Bu gaplarni qoʻy, Hamzat. Oʻgʻrilar hech qachon bularga xizmat qilmagan va qilmaydi ham. Gap yanislarning taqdiri ustida ketyapti. Ularni urmasak boʻlmaydi.
- Nega? Nuriddin ajablanganidan ovozini bir parda ko'targanini o'zi ham sezmay goldi.
- Baqirma, dedi Tengiz yelkasini mushtlab. Aqlingni ishlat: biz urmasak, boshqalar oʻladigan qilib uradi. Avval menga topshirishdi bu ishni. Keyin Koshakni ham chaqirishdi. Unga nima deyishgani noma'lum. Agar yoʻq, desak payimizga tushishadi. Men-ku, bundan qoʻrqmayman, sendan havotirdaman. Erta-indin muddati tugaydigan

ahmaqlar bilan Koshak ishga kirishguday boʻlsa, yomon qiladi. Shuning uchun seni chaqirib aytishsa, haqiqat talashma, jigʻiga tegma. «Yaxshi boʻldi, qoʻlim qichib turuvdi», deb qoʻya qol. Urush chiqsa sen Yanis amakingni urasan. Unga tayinlab qoʻy, u boshqalarga aytsin, olishib, mushtlashib yurishmasin, qoʻllariga hatto temir qoshiq ham olishmasin. Faqat oʻzlarini himoya qilishsin, boshlari bilan biqinlarini ehtiyot qilishsin. Oʻzing ham ehtiyot boʻl. Ola-tasirda Koshakka oʻxshagan bir ahmaq sengami yo mengami pichoq tiqvolishi mumkin. Angladingmi? Bor, endi uxla.

Shu gaplardan keyin odamning uyqusi kelar ekanmi? Nuriddin bir toʻp chaqirtikanak ustida yalangʻoch yotganday qiynalib chiqdi. Siyosat bobida ongi past darajada boʻlgan bu yigit qamoqdagi bir keksa odamning Moskvadagi hukumatga qanday yomonlik qilishi mumkinligini bilolmay garang edi. Har qanday raqib uchun, ayniqsa siyosiy muxolif uchun odamning jismigina emas, balki fikri, ruhi ham xavfli ekanini anglash martabasiga yetmagan edi. Buni Darbadar tushunishi mumkin edi. U yoʻqlik dunyosida, fikrlari esa muhojirot tuproqlariga singganicha qoldi. Faryod-larini togʻu toshlar bagʻriga ololmadi, koʻzlaridan oqqan alamli yoshlardan zamin seskandi.

Nuriddin Darbadar bilan Yanis taqdirida oʻxshashlik topmadi. Zohiran shunday, u haq edi. Biroq qalblar yarasi ikkovida birday edi. Darbadar «Oh, Vatan!» deb jon berdi. Yanis ham shu qalb faryodi bilan bu azoblarga yoʻliqdi. Endi esa yana bir doʻzax azobiga hukm qilinib turibdi.

Nuriddinning izidan qarab qolgan Tengiz barakka, yotar joyiga kirmadi. Qamoq lagerining hamma uchun majbur boʻlgan qat'iy qoidalariga amal qilmaslik uning odatiy holi edi. Faqat oʻzi emas, balki uning iltifotiga sazovor boʻlganlar ham bu qoidalarni buzishga haqli edilar. Ana shuning uchun ham Nuriddin tunda barakdan, kunduzi esa ish joyidan nari ketsa birov tanbeh bermasdi. Tengizning oʻziga-ku bu yer nomigagina qamoq edi. U «oʻziga xon, oʻziga bek» boʻlsa-da, bosar tusarini bilmay qadam bosmasdi. Qamoq lageri hojalariga boʻysunmaganday yursa-da, ular tomondan tasodifiy zarbani kutib yashardi. Bu oqshom Yanislarga uyushtirilayotgan fitna uni sergak torttirdi. Qamoq lageri boshligʻining muovini chaynalib, gapni aylantirdi. «Yuqoridan buyruq kelganini, bajarishga majbur ekanini» afsus bilan ayt-di. Aslida «yanislarga hech bir da'vosi yoʻqligini» bildirib qoʻyishni ham unutmadi.

Tengiz yuqoridan buyruq kelgach, bu bechoralarning bajarishga mahkum ekanliklarini yaxshi bilardi. Shuning barobarinda «ulugʻ ogʻalar»ning kichikroq xalqlar vakillariga zugʻum qilishdan lazzat olishlari ham ma'lum unga. Yanislarga qarshi fitnani ular afsus bilan emas, bil'aks, rohat bilan, bajonidil bajaradilar. Agar bu buyruq oʻzlarinikiga nisbatan boʻlsami, chindan ham afsusda qolishlari muqarrar.

«Bugun — yanislar, ertaga kimlar? — deb oʻyladi Tengiz, — balki mendirman, balki ozarbayjonlar...»

«Tengiz oʻlimdan qoʻrqmaydigan mard oʻgʻridir», demoqlik ta'rifning koʻpigidir. Chunki odamga, oʻgʻrimi yo toʻgʻrimi, farqi yoʻq — jon shirin! Qamoqdami yo erkinlikdami, yigitmi yo cholmi, farqsiz oʻlaroq, yashagisi kelaveradi. Qamoq lageri rahbariyatining iltimosini qabul qilishi, Nuriddin aytganidek, u uchun isnod edi. Halollik ila mulohaza qilinsa Murik bilan uning orasida farq chegarasi sezilmas edi. Tengiz buni bilgani uchun ham, boshqa chorasi boʻlmagani uchun ham oʻzicha ezildi. Bu masalani «politbyuro»ga qoʻygan taqdirda ham «blatkomitet»ning ma'qullashi aniq edi. Ular buni «hukumatga xizmat qilish» emas, «oʻgʻrilar olamini dahlsiz saqlab qolish» deb ta'riflagan boʻlishardi. Bu shunday gʻalati olamki, uni bir qal'a tasavvur etilsa, kiraverishidagi ark peshtoqiga «Harna qilsang qilaver, va ijozatimizsiz hech narsa qilishing mumkin emas», degan shior yozib qoʻysa ham boʻlardi. Bu olam arki juda hashamatli, fusunkor. Bokira qiz kabi oʻziga chorlaydi. Qizning husnidan bahramand boʻlaman, kiramanu chiqaman, degan xushtor

odam esa yanglishadi. Chunki bu bokira koʻrinishidagi olam eshigi bittagina. Kirmoq boru, oʻz oyoglari bilan yurib chiqmoq yoʻq. Ortga faqat tobut ichida qaytiladi.

Tengiz bu haqiqatni avvaldan bilardi. Bu olam uning koʻzlariga bokira boʻlib koʻrinmagan. U bor fasodlarini, mavjud botqogʻu balchiqlarini bilgani holda qadam qoʻygan bu olamga. «Bir boshga — bir oʻlim boʻlgach, qaerda va qanday holatda jon berishning nima farqi bor? Eng muhimi — dunyodan koʻngling talab qilgan darajada lazzatlanasan, dunyodan oʻzing istagancha qasos olasan». Tengiz kashf etgan falsafa magʻzi shu edi. Ammo bu «falsafa»ga zid oʻlaroq, koʻngil oʻtmish hayotini qoʻmsab turardi. Shunda u ikki kemaga ikki oyogʻini qoʻyganday his etadi oʻzini. Bu holatda uzoq suza olmasligini, gʻarq boʻlajagini biladi. Bilsa-da, holatini oʻzgartirmoqni istamaydi.

Tengiz kimsasiz maydon chetida junjikkanday qunishib turdi-da, toʻrtinchi barakka borib, Koshakni chaqirtirdi. Koshak maykachan chiqib, Tengizga yaqinlashgach ogʻzini baralla ochib esnadi. Dimogʻidan ufurilgan qoʻlansa hiddan Tengiz aftini burishtirdi. «Xoʻjayin boʻktirib ichiribdi-da», deb oʻylab gʻashlandi.

- Nima deysan, Knyaz? dedi Koshak junjikib.
- «Enze»²³dan ol, uyqu qochdi, dedi Tengiz ham homuza tortib.

Koshak «menda yoʻq», demoqchi boʻldi-yu, Tengizning oʻtkir nigohiga qarshi bora olmay, ichkariga qaytdi-da, uch kesim kolbasa bilan yarmi ichilgan aroq shishani koʻtarib chiqdi. Tengiz chindan ham ichgisi kelayotgan odam kabi shishani uning qoʻlidan tortib olib koʻtardi. Koshak uzatgan kolbasani olmay «kuf» degach, labini kafti bilan artib qoʻydi.

— Koshak, koʻngil Sochini, Yaltani qoʻmsayapti. Dengiz... Sohil... Jononlar... restoranlar... — Tengiz shunday deb yana ikki qultum ichdi.

Shu turganicha aroqni asta-sekin ichib boʻshatish asnosida gapni chuvaladi. Koshak chaqirilgan zahotiyoq «Knyaz xoʻjayinlarning gapini soʻraydi», deb gumon qilgan edi. Biroq uning kutgani boʻlmadi: Tengiz chaqiruv sababini soʻramadi. Aroq koʻngil taftini bosganday boʻlgach, xayrlashib, oʻzi yotadigan barakka qarab ketdi.

U Nuriddin kabi uxlay olmay qiynalmadi. Aroqning quvvati allalaganday boʻlib, kipriklariga uygu qoʻna qoldi.

Nuriddin ertasi kuni chekish bahonasida dam ola-yotgan Yanisni kutilajak ofatdan xabardor etdi. Yanis Nuriddin kutganidek sapchib tushmadi, gʻazablanmadi ham. Shimolliklarga xos sovuqqonlik bilan oʻzgarishsiz oʻtiraverdi. Nuriddin bu fitnada oʻzining ishtirok etishi mumkinligini aytmadi. Aksincha:

- Siz xafa boʻlmang, biz sizni himoya qilamiz, deb uning koʻngliga dalda bergisi keldi. Bu shunchaki manzirat emas, yigit qalbining ahdi edi. Uyqusiz kechgan tun uni shu qaror bilan tongga yetkazgan edi. Tengizning ogohlantirishiga qaramay, shu magsadda toʻxtaldi.
- Yoʻq, Nuriddin, kerakmas,— dedi Yanis,— qamoqda har bir odam oʻzini oʻzi himoya qilishi kerak.
 - Odam odamga boʻri boʻlib yashashi kerak, demoqchimisiz?
- Boʻrimi...— Yanis shunday deb kulimsiradi. Uning bu nim kulgusi quvonch yeli bilan emas, afsus shamoli bilan uygʻongan edi. Boʻrilarni kamsitma, Nuriddin, agar odamlarda boʻri tuygʻusi boʻlsaydi, odam bosh-qacha yashardi.

Nuriddin Yanisning bu qaplarini fahm etmadi, tushunmaganini yashirmay so'radi:

- Odamlar bo'riga o'xshasa deysizmi?
- Ha, boʻriga oʻxshasa... Boʻrilar odamlar kabi bir-birlarini gʻajimaydilar. Ular ahil yashaydilar. Ular ozodliklarini hech nimaga alishmaydilar. Bunday ahillik, bunday

-

²³ Ehtiyotdan yashirib qo'yilgan aroq nazarda tutilyapti.

mag'rurlik boshqa hech bir jonzotda yo'q. Sen tsirkda bo'rini o'ynatganlarini hech ko'rganmisan? Ha, ko'rmagansan. Fildan tortib ilongacha bir luqma ovqat uchun insonlarga masxara bo'ladi. Faqatgina bo'ri bo'ysunmaydi. Sen turkiylardansan. Ajdodlaring e'tiqod qilgan ramz nima bo'lgan, bilasanmi?

Nuriddin aybdor odam kabi nigohini olib qochib, yelka qisib qo'ya qoldi.

- Qurt, ya'ni bo'ri. Turkiylar bayrog'ida bo'ri tasviri bo'lgan, deb eshitganman. Turkiylar qadimda shunday erksevar bo'lgan ekanlar. E, u zamonlar o'tib ketdi. Yanis shunday deb xo'rsindi. Biz ham ozodlik sevuchi xalqmiz. Men bu qamoqni nazarda tutayotganim yo'q. Meningda, seningda vataning ulkan bir qamoqqa aylantirilgan. Bizlarning yurtdoshlarimiz esa tutqunlar. Mening xalqim tutqunlikka ko'nikib yashaydigan toifadan emas. Sen hozir «Yanis amakimga yangilik aytdim», deb o'ylayapsanmi? Men shunday bo'lishini kutardim. Bugun bo'lmasa ertaga albatta qilishardi shu ishni. Seni bo'lmasa boshqalarni yollashardi. Nafsga qul bo'lganlar ozmi bu dunyoda?
 - Men yollanganim yoʻq, Nuriddin shunday dedi-yu, ammo unga tik qaray olmadi.
- Men shunchaki misol tariqasida aytyapman. Sen bilan biz ikki tomonlama mahkummiz. Bundan gutularmiz, birog Vatan tutgunligichi? Sen «bularni nima uchun qiynasharkin?» deb garang bo'layotgandirsan? Bilib qo'y: biz uchun dunyoda eng shirin so'z — ozodlik! Ular shu so'zni aytuvchi tillarni kesadilar. Erkin nurga tashna ko'zlarni o'yib oladilar. Bunga ajablanmaslik kerak. Axir sen mol so'ygan gassobga garab ajablanmaysan-ku? Nuriddin, sen hali yoshsan, koʻp narsalarga tushunmaysan. Tutqunlikda tug'ilganing uchun ko'zlaringni ocha olmaysan. Men esam vatanimning ganday tutgun bo'lishini o'z ko'zlarim bilan ko'rdim. Bir tasavvur gilgin-a, gassob o'z onangni ko'z oldingda bo'g'izlasa... Men ana shunday odamman. O'lganimdan so'ng yuragimni tilib, ochishsa, qon o'rnida zardob ko'rishadi. Sizlar buni taqdir deysizlar. Biz esa bunga murosa gila olmaymiz. Men, agar bilsang, shu azoblarga duch kelganimdan g`amida Uyida gorin yotgan tuyg`usiz odam gatoriga qolmaganimdan quvonaman. O'lib ketsam ham ranjimayman, axir ruhim ozod tarzda goladi-ku? Agar mening o'limim vatanim ozodlik onlarini bir dagigaga ham yaginlashtira olsa ming-million martabalab qayta-qayta o'lib berishqa roziman. Agar bilsang, yer yuzidagi hamma jonzotlar o'z uyasini qadrlaydi, himoya qiladi. Biz esa... shularchalik ham emasmiz, mening armonim shu xalos. Ovgat yeyishni bilamiz, kiyinishni bilamiz, maishatni bilamiz, chiroyli so'zlashga ustamiz, ammo Vatan qadrini bilmaymiz. Uyimizga o'g'ri tushsa dod solamiz, Vatanni talasalar indamaymiz. Sen bularni tushungin, Nuriddin. Bu yerdan chiqib borganingdan keyin sen ham qorin q'amiga tushib qolmagin. Ular bizlarni xuddi tramvay kabi o'z izlaridan yurmog'imizni, ular istagan yerda to'xtab o'tmog'imizni xohlaydilar. Biz tramvay emas, unutma, bizlar erkin qushlarmiz. Qani edi, burgut bo'la olsak...

Nuriddin bu gaplarni eshitib, ajablandi. Bugunmi yo erta-indinmi boshiga kulfat yogʻilay deb turgan odam oʻz qaygʻusini oʻylamay, shu gaplarni aytib oʻtirsa. Kulfatni tik turib qarshi olish — mutelikmi yo mardlikmi? Alhol Nuriddin bu savolga javob topa olmadi. Shundan soʻng qoʻli ishda, xayoli esa Yanisda boʻldi. Oʻzi istamasa-da, beixtiyor ravishda unga tez-tez qarayverdi. Nuriddinning holatini anglagan Yanis sir boy bermay, sovuqqonlik odatiga xilof qilmagan tarzda ishi bilan mashgʻul boʻlaverdi. Yana bir chekish bahonasida hordiq chiqarishayotganda:

— Sharqliklarning juda zo'r hikoyasi bor, aytaymi, eshitasanmi? — deb qoldi. Nuriddin Yanisning indamay ishlayotganidan siqila boshlagan, hozir hikoya aytadimi yo boshqa bir balonimi, unga farqsiz, sherigi gapirsa bas edi. Shu bois «ayting», deb darrov ko'na qoldi.

— Taqdir degan bir odamning fahm-farosatda tengi yoʻq, oqila va goʻzal qizi bor ekan. Taqdir qiziga qarab: «Aql, Davlat va Umid degan uch odamdan sovchi kelyapti, qaysi biriga rozi boʻlasan?» deb soʻrabdi. Shunda qiz: «Dada, aql — insondagi eng ulugʻ fazilatdir, Aqlga suyanib turib doʻstni dushmandan, hushyorni devonadan farqlash mumkin. Lekin aqlning bir aybi bor: kishini chalgʻitib, xatarli yoʻllarga solib qoʻyishi mumkin. Davlat esa ham ishbilarmon, ham hukmdordir. Lekin Davlat hech qachon, hech kimga vafo qilmaydi. Men Umidni ixtiyor qilaman. Chunki Umid hech qachon Insonga xiyonat qilmaydi, undan ajralmaydi. Butun jahon undan manfaatdor», degan ekan. Biz ham oʻsha Taqdirning dono qiziga oʻxshab Umidni tanlasak, adashmaymiz.

Yanisning bu gaplari Nuriddinga qiziqarli, ayni damda sirli tuyuldi. Shu sababli yana qaytarishni iltimos qildi. Yanis ensasi qotmasdan, bu safar soddaroq qilib tushuntirdi. Garchi u Taqdirning dono qizi kabi Umidni tanladim, degan boʻlsa-da, aslida oʻzi birdaniga ikki erni ixtiyor qilgan qiz kabi edi. U Umiddan avval Aqlni tanlagan edi. Aql uni shu holatga soldi, endi esa «koʻz ochib koʻrganim — Umid», deb oʻtiribdi.

OILA

Eshik qoʻngʻirogʻining asabiy jiringlashidan uy-gʻongan Omonullo darrov soatiga qaradi. Telefon ishlamay qolgan kezlari hamkasblari yarim kechami yo erta tongmi, chaqirib kelaverishardi. U oʻzi ishlaydigan sohada vaqtida hordiq chiqarish yoki bayramlarda dam olish yoʻqligiga allaqachon koʻnikib ketgan. Qatorasiga ikki kun uxlamay, endi koʻzi ilinganda chorlashganida ham indamay turib ketishga odatlangan. Hozir ham tezda kiyinib, eshikni ochdi-yu, Safarni koʻrib, ajablandi:

- Ha, so'fi tahorat qilmay kelibsan? dedi norozi ohangda.
- «Koʻmirxona»dan endi turdik. Oʻyin ja-a qizib ketdi. Uyga bormay, toʻgʻri senikiga kelaverdim, Safar shunday deb, taklifni kutmayoq ostona hatlab ichkari kirdi. Sen ham erkaklarga oʻxshab «gap»ning oxirigacha oʻtirsang, billalashib kelardik.
- Agar «gap»da o'tirishlaring hisobga olinmasa senlarning erkak ekanliklaringni bilib ham bo'lmaydi,
 Omonullo shunday deb yuvinish maqsadi-da yon tomon o'tdi.
- Menga qara, hov erkak, dedi Safar, ma, kalitni ol, xohlasang men uyingda yota qolaman, rayoningga oʻzing borib kel.
- Birga boramiz, dedi Omonullo. Meni himoya qilasan. Mabodo seni ham oʻldirib qoʻyishsa, bahonada bitta medalli boʻlib ketasan bu dunyodan.
- Sen uchun o'lish biz uchun sharaf, okasi, dedi Safar, kinoyaga kinoya bilan javob berib. O'lishdan oldin bir uxlab olmasam bo'lmaydi. Men mashinada yotaman, uyg'otma. Qog'oz xaltaga u-bu solib berishgan. Xohlasang, ye-ich.

Omonullo yuvinib, yengil tamaddi qilib olgach, koʻchaga chiqdi. Orqa oʻrindiqda ikki buklanib yotgan Safarning hurragini tashqaridan ham bemalol eshitish mumkin edi. Mashina oʻrnidan siljigach, u bir silkinib, koʻzlarini yarim ochib qarab qoʻydi-yu, uyquni kelgan yeridan davom ettiraverdi.

Safarning bu qadar barvaqt kelishi, orqa oʻrindiqda uxlab yotishi Omonullo uchun ma'qul keldi. Safar koʻngliga yaqin doʻsti boʻlsa-da, uning ba'zida meyoridan oʻtuvchi safsatalari me'dasiga tegib ketardi. U kasalxonaga oʻtib, tutingan otasining uyqusizlikdan kirtayib, qizargan koʻzlaridan opasining ahvoli uncha yaxshi emasligini tushundi. Kechki payt yana xabar olishini aytib, Matluba Toʻxtaeva bilan uchrashish niyatida choʻlga qarab yoʻl oldi.

Ko'chada harakat siyrak bo'lgani uchun mashinani yeldek uchirdi. U Matluba bilan bo'lajak uchrashuvni, berajak savollarini xayolida yana bir pishirib olgach, kechagi uchrashuvni beixtiyor tarzda esladi. Omonullo Adolatni kuzatib qo'ygach, doktiloskopist

bilan suhbatlashib, ayrim narsalarni yanada aniqlab oldi-da, Samandar Ochilovning birinchi xotini bilan uchrashishga otlandi. Mels Xo'jaev yozib bergan manzilga borib qo'ng'iroq tugmasini bosdi. Eshikni qorachadan kelgan, yuzlari lo'ppi, ko'zlari kulib turuvchi istarali ayol ochdi. Pastga tushishga harakat qilayotgan jingalak sochli shiringina o'g'ilchasini bag'riga mahkam bosganicha kutilmagan mehmonga «Keling?» deb savol nazari bilan qaradi. Omonullo o'zini tanitgach, «adamiz uyda yo'q edilar», dedi uzrli ohangda. Omonullo uyga kirmogga ijozat yoʻqligini anglab, ostonada gaplashib qo'ya qoldi. Samandarning birinchi xotini tabiatan kamgapmidi yo savol-javoblarga hushi bo'lmadimi — Omonullo bilolmadi. Ayoldan ishga asgotadigan yangi gap ham ololmadi. Ajralishganlaridan so'ng bir yil o'tgach turmush qurgan ayol birinchi erini o'shandan beri ko'rmagan, uylanganini eshitmagan ham edi. Ajralishi sababini esa bir oz giynalibrog «Farzandsizlikdan...» — deb yerga qaradi. Omonullo «Ochilov farzand ko'rolmaydigan erkak ekanmi?» deb o'yladi. Bu o'yni o'gigandek ayol unga izoh berdi: «Farzand koʻrishdan qoʻrqardilar... Urush boʻlib qolsa bolalar azoblanadi, cho'chirdilar. Xayollarida ertami indinmi urush boshlanib, hamma yogni atom bomba bosadigandek edi.

Birinchi homilamni olib tashlattirmoqchi boʻldilar. Men unamadim. Tugʻilganida xursand boʻldilar baribir. Lekin... xavotirlari koʻtarilmadi... Bolamizning umri qisqa ekan, atom bombasiz ham bizni tashlab ketdi... Keyin shu masalada baribir chiqisha olmadik. Oʻzlari juda yaxshi odamlar, chivinga ham ozor bermaydilar... Lekin xayollari gʻalati...»

Omonullo xayrlashib qaytar mahalida ham bu gaplarni koʻp oʻyladi. Bunaqa toifani uchratmagani uchun Samandarning qiligʻiga sira tushunmadi.

Hozir choʻlga, Matluba bilan uchrashuvga oshiqayotgan damda ham kechagi suhbatini eslab, tushunishga urindi — uddasidan chiqolmadi...

Safar to manzilga qadar, toʻgʻrirogʻi, mashina qishloqning notekis koʻchalariga kirib chayqala boshlagunga qadar uygʻonmadi. Avval depara vakili bilan kelgan Omonullo Matlubaning uyini qiynalmay topib bordi.

Maktabga otlangan bolalarini kuzatib chiqqan Matluba yonginasida toʻxtagan mashinaga xavotir bilan qaradi. Keyingi oylar ichi uning yuragi qush hadigi bilan uradigan boʻlib qolgan edi. Hovlidagi musichalar bexos patillab urishib ketsa ham, tomdagi mushuklar miyovlab, tunukalarni taraqlatib yugurib qolishsa ham, qoʻshnining eshagi hangrab yuborsa ham bir titrab olardi. Bemahalda koʻchadan mashina ovozi kelsa «iloyim toʻxtamasin», deb yurak yutib oʻtirardi. Mashina toʻxtaguday boʻlsa, yuragi ham urishdan toʻxtaganday boʻlardi. Bu tun koʻchalaridan ikki marta mashina oʻtib uyqulari oʻchib ketgan edi. Oʻsha vahmdan qutulmay turib, yonginasida shaharning mashinasi toʻxtadi-yu, rosmanasiga choʻchitib yubordi.

Omonullo eshik ogʻzida turgan Matlubaga oʻzini tanitishga ulgurmay, Safar ham mashinadan tushib, unga yaqinlashdi. Dumaloqdan kelgan, jingalak sochli, boʻyniga ham, oʻng bilagiga ham tilla zanjir osib olgan Safarga Matluba xavotir bilan qaradi. Safar uning xavotirli nigohini anglamay, tomdan tarasha tushgani kabi:

Opa, xojatxona qaerda? – deb soʻradi.

Omonullo do'stining befarosatligidan ranjib, unga norozi qiyofada qarab oldi-da, Matlubaga uzrli ohangda:

— Bu mening og'aynim, uzoq yo'lda hamroh bo'lib keldi, — dedi.

Matluba «Milisaning o'rtog'i shunaqa bo'ladimi?» deganday Safarga yana bir qarab olib, hovlisi tomon chekindi-da, etak tomonni imlab ko'rsatdi.

- Avvalgi kuni ham kelgan edim, yoʻq ekansiz? dedi Omonullo.
- Ha, ha, eshitdim kelib-ketganingizni. Men... shaharda edim. Dadamning marosimlari bor edi.

Omonullo Adolatning so'zlarini eslab «Rostmi?» deganday qarab turaverdi.

Keling, ichkari kiring,
 Matluba shunday deb ayvon sari yoʻl boshladi.

Omonullo liqillab turgan, ammo bitta odamni koʻtarishga yaraydigan stulga omonat oʻtirdi. Ikkinchi stulni Matluba egallab, qaynonasi oldida mulzam boʻlgan kelin kabi boshini quyi egib, barmoqlariga tikilib qoldi. Omonullo esa atrofga shoshqich razm solib «direktorning uyi obodroq boʻlardi, mulkini musodara qilishganmi yo berkitib ulgurishganmi?» deb oʻylab qoʻydi.

- Akamdan xat-xabar bormi, tinchmilar? Omonullo oʻzining nima maqsadda kelganini bildirib qoʻyish uchun gapni shunday boshladi. Matluba esa «militsiya bekorga surishtirmaydi», degan xavotir bilan titroq ovozda:
 - Kimni so'rayapsiz? dedi.
 - Xoʻjayiningizni soʻrayapman, dedi Omonullo yanada samimiy ohangda.
- Xoʻjayinimning yana chala ishlari qolgan ekanmi? Matluba shunday deb unga oʻgʻrincha qarab ol- di. Qamasalaring ham tinch qoʻymas ekansizlar- da, a?

Omonullo Adolatning gaplarini eslab:

Mendan oldin ham so'rab kelishuvdimi? Kim edi, qachon keldi, nimaga kelishdi? — deb so'radi.

Matluba unga yalt etib qaradi-da, «atay sinash uchun soʻrayapsizmi, rostdan bilmaysizmi?» degan savol muhrlangan nigohini unga qadadi. Matluba soʻnggi tintuvda «yuragim yorilib oʻlib qolsam kerak», deb oʻylagan edi. Dastlab koʻringanda nafratini qoʻzgʻotgan Xursanali oʻshanda joniga oro kirgandi...

- ... Oʻshanda bolalari endigina uyquga yotishgan edi. Koʻchada, ularning darvozalari yonida mashina toʻxtadi, ammo motori oʻchirilmadi gʻirillab turaverdi. Jin-gʻiroq ishlamas edi, mashinadan tushgan odam darvozani qattiq taqillatdi. Matluba oʻrnidan turib tashqariga chiqishni ham, chiqmaslikni ham bilmay turganda tashqaridan «Matluba!» degan ovoz keldi. Matluba ovoz egasini tanib, ham yengillik, ham xavotir bilan oʻrnidan turdi. Tashqarida sovuq izgʻirin ekanini unutib, egniga paltosini ilmay hovliga chiqdi. Besabr Sarvar esa yana darvozani taqillatib, bu safar «opa!» deb chaqirdi. U kamdan kam hollardagina «opa» derdi. Uning bu safargi lutfining sababi darvoza ochilgach bilindi: Sarvarning yonida Xursanali turardi. Begonaning huzurida «opa» deyishqa majbur boʻlganini Matluba tushundi.
 - Voy, tinchlikmi? dedi u bir gadam ortga chekinib.
- Tinchlik, dedi Sarvar ichkariga qadam bo-sib. Bolalaringni kiyintir. Faqat hovliqma, lekin tez boʻl. Nima gapligini keyin aytaman.

Sarvar Xursanali bilan ichkari kirdi-da, ayvon zinasiga yetganda opasidan «Podvalning chirogʻi bormi?» deb soʻradi. «Ha», degan javobni eshitgach, «Yoq!» deb buyurdi.

Ayvon zinasining yon tomonidagi pastqam eshikni ochib, Sarvar, ketidan Xursanali yerto'laga tushishdi. Ayvon ensiz bo'lgani uchun to'sinlarning beliga tirgak qo'yilmagan edi. Bir oz egilgan holda katta uy yerto'lasiga o'tdilar: Xursanali olingan xabarda bayon qilingandek yettita ustun sanadi-da, o'rtasidagisiga yaqinlashib, engashdi:

— Shu yerda bo'lishi kerak, — dedi batartib terilgan g'ishtlar ustiga kaftini qo'yib. — Tesha olib tushing, opangizni ham chaqiring, tushuntirib qo'yay.

Sarvar «xo'p», deganicha shoshilib chiqdi-yu, dam o'tmay kalta sopli eski teshani ko'tarib qaytdi. Xavotirdanmi yo sovuqdanmi titrayotgan Matluba unga ergashib keldi.

— Opaxon, xoʻjayiningiz u yoqda gullab qoʻyibdilar: shu ustun tagida xazina bormish. Matlubaning xayoli yorishib, «shu yerga koʻmilgan ekanmi, aytib ham ketmabdi-ya, u gʻalamis. Endi bularga yem boʻladimi?» degan fikr oʻtdi. Tili esa:

— Xazinasini yer yutsin, — dedi.

- Xazina boʻlsa, yer yutmasin, opa. Xazina boʻlsa, odamlarning kuniga yarashi kerak. Xursanali shunday deb gapirganicha ustunni dam yuqorisiga, dam pastiga urib-urib siljitdi-da, soʻng gʻishtlarni asta koʻchirdi. Keyin ikki qarichcha qalinlikdagi tuproqni teshada tatalab chiqardi. Teshaning uchi taxtaga tekkach, tuproqni kaftlari bilan sidirdi. Hali chirishga ulgurmagan taxtaqopqoq tutqichidan ushlab koʻtardi. Ke-yin yana bir qarich qalinlikdagi tuproqni oldi. Ikkinchi yogʻoch qopqoqni ham koʻtargach, bir jomadon bemalol sigʻadigan oʻra koʻrindi. Nomi xazina boʻlgan bu oʻra boʻmboʻsh edi.
- Akaxonga besh ketdim: aldabdi, dedi Xursan-ali qaddini koʻtarib. Bir-ikkita xarif xazinaning isini olib, pochchakamizning kekirdaklariga chang solgan ekan, shu yerda, deb gullabdi u ahmoq. Ahmoq deganimga xafa boʻlmang, opaxon, bugun-erta xazina bor bu yerda, deb laqillab kelib qolishadi.
 - Kim?
- Kimligini Xudo biladi. Lekin kelishlari aniq. Agarda bu yerda hech narsa topilmasa, avval sizlarga qiyin boʻladi. Akaxon esa, chiqqan joylariga kirib ketaveradilar.
- Quribgina ketsin, shu boyligiyam! Oʻlar boʻlsam oʻlib boʻldim! dedi Matluba yigʻlab.
- Toʻxtang, opaxon, oʻlmay turing. Avval bu ishlarni bir yoqlik qilib olaylik. Hozir hammamiz ketamiz. Bolalaringizni ukangiznikiga tashlab, ertalab qaytib kelasiz. Sarvar ham bir-ikki kun siz bilan shu yerda turadi. Biz ham shu atrofda boʻlamiz. Ishni bexit qilish kerak. Mabodo ishkal chiqsa, oʻzimiz tinchitamiz. Opaxon, mana bu suratga qarab, yaxshilab tanib oling bu ta'viyani, Xursanali ichki yon choʻntagidan surat chiqarib koʻrsatdi. Chap oyogʻi kaltaroq bu odamning. Soʻrashsa, eng avvalo choʻloqligini aytasiz. Chap qulogʻining yarmi yoʻq, burni pachoq. Gapirganda pishillaydi. Nima deganini oʻrisi ham, chulchiti ham tushunmaydi. Panjalari katta-katta, menikiga ikkita keladi. Xullas, bir kuni kechqurun shu choʻloq badbashara bostirib kirgan. Yonida bir malla xotin ham boʻlgan. Pichoq chiqarib, doʻq urgan. Sizni bolalaringiz bilan birga uyga qamashgan. Podvalda bir nimalarning taqillaganini eshitgansiz. Ular indamay ketishgan. Siz podvalga tushishga qoʻrqasiz oʻshandan buyon. Shularni aytsangiz bas.
 - Kim o'zi bu? dedi Matluba titroq ovozda.
- Koʻnglingiz aynisa ham bu taviyaga yaxshilab toʻyib oling. Uch-toʻrtta suratga aralashtirib koʻrsatishlari mumkin. Tanib olishingiz shart. Adashmang. Bu odam xoʻjayiningiz bilan zekvagon²⁴da birga boʻlgan. Zonaga borganda qochgan. Bu tomonlarga kelib ishkal chiqaruvdi, oʻzimiz tinchitib qoʻya qoldik. Xitlar buni bilishmaydi, qidirib yurishibdi hali ham. Xazinani shu olgan, desak, siz ham tinchsiz, u yoqda akaxonga ham chivin qoʻnmaydi. Biz sizni himoya qilamiz, deb shartlashganmizmi, demak, sizni birovning chertishga ham haqqi yoʻq, Xursanali choʻntagidan tanga chiqarib kaftiga qoʻydi. Matluba buni avval besh tiyinlik deb oʻyladi. Sinchiklab qaragan edi, Nikolay podshoning tilla tangasini koʻrdi.
 - Toza tilla, dedi Xursanali izoh berib. Siz uchun qurbon qilamiz.

Tanga oʻra ostiga terilgan pishgan gʻisht ustiga tushib, jiringladi, xira chiroq nurida ojiz tovlandi. Soʻng ustiga bir sidra tuproq tashlanib, qopqoqlar avvalgisiday qilib berkitildi.

Opaxon, siz chiqib bolalaringizni kiyintiravering.
 Xursanali shunday degach tuproqni tortib, oyoqlari bilan shibbaladi, g`ishtlarni batartib terdi, ustunni joyiga o`rnatdi.

Ular kutgan mehmonlar uzoq kuttirishmadi — ertasigayoq kelishdi. Lager teletaypining tezligi shu oʻrinda ish berdi. Kelganlar oʻzlarini «SSSR

²⁴ Mahbuslarni tashuvchi qamoq vagoni.

prokuraturasidanmiz», deb tanishtirishdi, hujjatlarini ham koʻrsatishdi. Uyni tintishdi. Soʻng «har ehtimolga qarshi yertoʻlani ham koʻrib qoʻyaylik», deb pastga tushishdi. Matluba oʻzini bosishga qancha tirishmasin, ularning maqsadlarini avvaldan bilgani uchun ham titrayverdi. «Tintuvga ruxsatnomangiz qani? Ikkita xolis guvoh qani?» degan talab esa xayoliga ham kelmadi. U-ku, xotin kishi, xavotirda oʻzini yoʻqotadi. Opasiga dalda berishi lozim boʻlgan Sarvar ham dovdirab qoldi. Bir ozdan soʻng ularni pastga chaqirishdi. Oʻrtadagi ustun atrofini, sochilgan tuproqni koʻzdan kechirayotgan qirraburun:

- Bu yerda nima bor? deb so'radi.
- Bilmasam, dedi Matluba. Qoʻyadigan narsamiz koʻpam yoʻq, hadeb tushavermayman bu yerga.
 - Bu yer kavlangan. Nega kavlangan? dedi qirraburun qaddini rostlab.
 - Bilmadim.. balki...
 - Nima balki?
 - Aytaverayinmi?
 - Bizni chalg'itishga urinmang, biz hammasini bilamiz.
 - Bilsangiz... aytmay qo'ya qolaymi?
 - Bilganlaringizni gapiring!
- Bilganlarim... Ancha vaqt oʻtdi-da... kuz paytida edi, kechasi bir erkak, bir ayol uyimizga bostirib kirishdi. Darvoza qulf edi, hovliga qanday tushishganini bilmayman. Erkagi choʻloq ekan. Vish-vish qiladi, gapiga tushunmayman... Shu zaylda Xursanali oʻrgatgan gaplar aytildi. Ular ishonib-ishonmay bir-birlariga qarab qoʻyishdi.
- Militsiyaga xabar qildingizmi? deb soʻradi qirraburun. Bunaqa savol Xursanalining rejasida yoʻq edi. Shu sababli Matluba dovdiradi.
- Militsiyaga nima uchun xabar bermadingiz? dedi bu safar qirraburun dag`allik bilan.
- Militsiyaga aytsang, oʻldiramiz deyishgan, bolalarni ham... Matlubaning tiliga kelgan bu gapdan ular qoniqishib, boshqa narsa soʻrashmadi. Ularning buyrugʻi bilan Sarvar ustunni chetga surdi, gʻishtlarni koʻchirdi, tuproqni surdi, qopqoqlarni ochdi. Ochdi-yu, «agar titishmasa tanga qoladi», deb umid qildi. Qirraburun boʻsh oʻraga bir oz qarab turdi-da, soʻng engashib, barmoqlari bilan tuproqni titib, tilla tangani topdi. Qaddini koʻtarmay turib tangani chiroq yorugʻiga tutdi, tishlab koʻrdi. Keyin yana tuproq titdi. Soʻng ketishdi. Ertasiga qirraburunning oʻzi keldi. Beshta odamning suratini koʻrsatdi. Matluba Xursanali koʻrsatganni tanidi. Tanidi-yu:
 - Fagat bitta joyi o'xshamaydi, dedi.
 - Qaeri? dedi qirraburun unga qattiq tikilib.
 - Qulog'ining yarmi yo'q edi. Yo bu eski rasmimikin?

Qirraburun suratlarni cho'ntagiga solib «xayr» ham demay iziga qaytgan edi...

Hozir Omonulloning «kim edi, qachon keldi, nimaga keldi?» degan savoli oʻsha voqeani chaqmoq umrichalik lahzada eslashga majbur etdi. Esladi-yu, ammo sirtiga chiqarmadi: Xursanalining amrini bajardi.

Omonullo suhbatini boshlamay, Safar kelib ayvon panjarasiga oʻtirib oldi. Matluba unga qarab qoʻyib, oʻngʻaysizlandi.

— Safar, kalit mashinada qolibdi, — dedi Omonullo ma'nodor ohangda.

Safar do'stining maqsadini anglab, o'rnidan turdi-da, ko'chaga chiqib ketdi. Ranjiganini sezdirmadi, ammo ichida do'stini avra-astarini ag'darar darajada bo'ralab so'kdi.

Omonullo arqonni uzun tashladi. «Tursunali Toʻx-taev bilan qachon tanishgansiz, qachon turmush qurgansiz, bolalar...» kabi savollarga olinajak javoblar u uchun muhim

emasdi. Shu sababli «bu ayol toʻgʻri gapir-yaptimi yo yoʻqmi?» deb tahlil etmadi. Matluba toʻgʻri javoblardan chekinib, oʻzi istagan gaplarnigina aytmoqchi boʻlayotgani bilan qarmoqdagi xoʻrakka aldanajagini bilmas edi. U Nafisaning oʻlimidan xabar topgani bilan, oʻzining bu fojiaga aloqador deb gumon qilinayotganidan, Omonullo aynan shu ish tufayli kelganidan bexabar edi. «Erimni qamab ham tinchishmas ekan», degan fikr uni chalgʻitib qoʻygandi.

— Savolimga javob bermadingiz, opa, mendan oldin ham birov keldimi? — Omonullo ayoldagi sarosimani sezgani uchun savolini takrorladi.

Xursanali bo'lib o'tgan tintuvning «isini chiqarmaslik»ni tayinlagani sababli Matluba sir boy bermaslik uchun nigohini olib qochdi.

— Adamizni ushlashganidan beri nechtasi kelib, nechtasi soʻroq qildi, nechtasi tintdi. Hisobi yoʻq bularning. Oʻlar boʻlsam oʻlib boʻldim. Adamizning ayblari bor ekan, qamadilar. Bizning gunohimiz nima? Bolalarimning gunohi nimada? Aybimiz boʻlsa, bizlarni ham qamanglar, otinglar, — Matluba shunday degach, yigʻlay boshladi.

Omonullo ovutishni istamay, bir oz kutdi. Matluba yonog'iga yumalagan ko'z yoshlarini kafti bilan artib, xo'rsingach, so'rog'ini davom etdi:

- Tursunali aka bilan munosabatingiz yaxshi edimi?
- Bu nima deganingiz? Matluba ajablangan holda unga tik garadi.
- Oralaringizdan ola mushuk o'tmaganmidi?
- Ola mushuk? U kishi... bolalarimning otasi... koʻz ochib koʻrganim. Ola mushuk deganingiz hammaning uyida bor. Er-xotinning orasidan gap qochmay iloji yoʻq. Savolingizga qaraganda odamlardan bir igʻvo eshitganga oʻxshaysiz. Indamasangiz odamlar nimalar toʻqimaydi?
- Toʻgʻri aytasiz, ba'zan odamlar koʻpirtirib yuborishadi. Lekin... shamol boʻlmasa daraxtning uchi ham qimirlamaydi.
 - Magsadingiz nima, ochiq aytavering?
 - Tursunali aka... sizga xiyonat qilarmidilar?

Bu savoldan soʻng Matlubaning egilgan boshi yanada egildi. Titroq barmoqlariga tikilib jim qoldi.

- Ochiq aytavering. Agar sir boʻlsa, oramizda qo-ladi.
- Sir... bilmayman, odamlar ig'vo qilaverishadi. Bolalarimning otasi axir...

Omonullo tushundi. Tursunalining xiyonati faqat bu ayolga emas, voyaga yetib borayotgan bolalarga ham isnod keltiradi. Ayniqsa xonadondagi qizning bo'yi yetib qolgan bo'lsa og'ir, yanada og'ir. Erta-indin sovchi eshik qoqib kelsayu «otasi buzuq ekan», deb iziga qaytsa naqadar fojia... Xiyonatdan xabar topgan ayol qanchalik qonsiramasin, farzandlari taqdirini o'ylab, dardini ichiga yutadi.

Omonullo iztirob cho'g'lari ustida o'tirgan ayolni qiynamaslik uchun muddao o'qlarini aniq nishonga ola goldi:

- Nafisa Boltaevani tanirmidingiz?
- Nafisa... «er yutsin uni», deb oʻyladi Matluba, ammo tili boshqa gapni aytdi: eshitganman...
 - O'zini ko'rmaganmisiz?
 - Koʻrganman. Lekin... yaxshi tanimayman.
 - Odamlarning gaplariga garaganda...
- Odamlarning gaplarini menga aytmang. Oʻzingiz koʻrib, qoʻl bilan ushlagan boʻlsangiz ayting. Adamizga shuncha azob kammi? Endi nomlarini ham bulgʻashyaptimi?
 - Begonalar emas, Boltaevaning onasi ham aytyapti.

- Adolmi? Juvonmarg boʻlsin, u ofat! Oʻzining qizlari oʻtirib qolganiga alamini oʻgay qizidan oladi. Nafisaning boshida eri bor. Uning buzuqligini birov koʻrmagan.
 - Boltaevaning erini tanirmidingiz?
 - Sal-pal taniyman. Adamizning o'rtoglari.
 - Bu yerga ko'p kelarmidi?
 - Yo'q.
 - Kasbi nima, bilasizmi?
 - Olim shekilli?..
 - Oilalari tinch edimi?
 - Buni oʻzlaridan soʻrang. Men ularnikiga qadam bosmaganman.
 - Nega?
- Savolingiz gʻalati-ku? Hozir yaqin qarindoshlar ham bordi-keldiga vaqt topolmaydilar.
 - Tursunali aka borib turarmidilar, har holda oshna ekanlar?
 - Bilmayman.
- Siz hozir «qadam bosmaganman», dedingiz. Ikki oymi, uch oymi avval, kuz paytlarida borgansiz-ku?
 - Kim aytdi?
- Kerak bo'lsa guvoh bilan yuzlashtiramiz. Ungacha savolimga javob bering: nima uchun bordingiz? Siz o'sha kuni qattiq g'azabda bo'lgansiz. Nimadan norozi edingiz?
 - Esimda yoʻq.
 - Hatto «o'ldirtirib yuboraman», degansiz?
 - Yolg'on!
- Men shu yolgʻonni aytish uchun kelibmanmi? Bir narsadan shubham boʻlmasa gapirmayman.
 - Shubha?.. Hali... uni men o'ldiribmanmi?
 - Kimni?
 - Nafisani aytyapsizmi?
- O'lganini bilasizmi? Omonullo shunday deb Matlubaga ajablanayotgan odam ko'zi bilan qaradi.
 - Men kecha osmondan tushganim yo'q-ku? Eshitmaymanmi?
 - Qanday holatda o'lganini ham eshitdingizmi?
 - Eshitdim... bittasi bilan... ekan.
 - Ishondingizmi?
 - Ishondim nimayu, ishonmadim nima?
 - Kim o'ldirgan bo'lishi mumkin?
 - Bilmayman.
 - Har holda... nima uchun o'ldirgingiz kelgan edi?

Matluba qafasga qamalgan qush holiga tushdi. Nodonligi tufayli qafasga tushdi, endi yana nodonlik qilib, oʻzini qafasga urib qanotlarini yaralashni istamadi. Bir oz sukut qilgach, eridan olgan oʻsha maktubdan qap boshladi.

Matluba bir yigʻlab, bir sukut qilib, bir gʻazab jilovida ezilib gapirardi. Nafisaning oʻlimini eshitganida «battar boʻlsin!» deb quvongan edi. Bunday oʻlimdan battarroq yana nima boʻlishi mumkinligini oʻylab oʻtirmay, birovning oʻlimidan quvonishning gunoh ekanini fahmlamay shunday degan, shunday xursand boʻlgan edi. «Xudo mening rahmimni yebdi», deb ham fikr qilgandi. Hozir oʻtmish kunlarni eslay turib nechundir unga achindi. Norasmiy kundoshining oʻlimidan oʻziga zarracha naf yoʻqligini endi angladi. Uning oʻlimini istagani rost, qargʻagani rost, oʻldirish yoki oʻldirtirish uchun

harakat qilmagani ham rost. Ammo rost gapga bu odam ishonarmikin? Matluba shu armon, shu o'kinch bilan Omonulloga qarab-qarab qo'yardi.

Omonullo uning gaplarini bo'lmay eshitdi. «Shu ayol o'ldirgandir» degan gumon unga hukmini o'tkazmagan bo'lsa-da, fikrdan uzoqlashishga haqqi ham yo'q edi. To chin qotil topilmagunicha shu ma'sumadan ham shubhalanishga haqli edi.

Omonullo Matlubaning soʻzlarini eshitish asnosida beixtiyor Adolatni koʻz oldiga keltirdi. Oʻshandan gumonsiraganda ham tinch qoʻymas edi. Bu ayol... boshqachaga oʻxshaydi. Ezilgan ruhi, toptalgan umidi uchun xun talab qilsa ham arzir. Ammo... bolalarining otasi boʻlgani uchun ham uning nomini himoya qilyapti, uni umid bilan kutyapti. Har qanday ayol erini qiz-gʻanadi. Qalbini yiring bosgan Matlubaning ham qizgʻanishi tayin. Ammo bu rashk, bu qizgʻanish qotillikka undashi mumkinmi? Omonullo uchun bu mubham boʻlib qolaveradi.

U Matlubadan erining maktublarini koʻrsatishni iltimos qildi. Matluba bir oz ikkilangan holda uyga kirib toʻrt-beshta maktub olib chiqdi-da, soliq toʻlashga undovchi xatni ajratib berdi. Omonullo satrlarga koʻz yugurtirgandayoq, lager qamoqxonasidagi ahvolni angladi.

- Boltaevadan shubhalanganingiz oʻrinsiz. Eringiz qamoqdagi katta baliqlarga yem boʻlgan.
 - Bilasizmi shuni? Bilsangiz... nega yoʻl qoʻyib berasiz?
- Buni o'sha yoqdagilardan so'rash kerak. Bizning vazifamiz boshqa. Agar biror kishi pul talab qilib kelgan bo'lsa, ayting. Ular bilan shug'ullanamiz.

Matluba Xursanalining ogohlantirishini eslab: «Yoʻq, yoʻq, hali hech kim kelmadi», deb qoʻydi.

Omonullo bunga ishonganday boʻldi-yu, yana uchrashishga shama' qilib koʻcha tomon yurdi. Matluba ostonaga qadar kuzatib borib, Omonulloning ortidan eshikni yopdi.

Safar orqa oʻrindiqda kavshanib oʻtirardi. Omonullo mashina eshigini ochishi bilan dimogʻiga aroq, kolbasa hidi urildi.

- Ha, ochofat, darrov yutdingmi? dedi Omonullo unga qovoq uyub qarab.
- Boshqa quvvat boʻladi, senam qittakkina olvol.

Omonullo «nafsing qursin», dedi-da, mashinani yurg'izdi. U direktor bilan uchrashib yangi gap ololmagach, bog' qorovuli bilan gaplashishni ixtiyor qildi. Direktor obkomdan vakil kelayotganini aytib, unga bir yugurdagini qo'shib berdi. Nomi bog' qorovuli, aslida xo'jayinning ham mahrami, ham oshpazi bo'lmish ukkiko'z Karvon Tursunali bilan qizini shu yerda ko'rganini aytdi. Aravakash otasining «Karvon» laqabini meros qilib olgan bu odam bilganlarini yashirmadi: «Direktor buva Toshkentda edilar. Xo'jayin yo'qliklarida ishlarimni qilvolay deb rayon markaziga tushuvdim. Qaytib kelayotsam, Oshbolta bilan qizi chiqib kelishyapti. Oshboltaning da'vosi katta — u o'zini menga ustoz deb biladi. «O'choqni harom qilibsan, buzib tashladim, ertamatan kelib yangisini qurib beraman», deydi. «Nimasi harom?» desam, «O'choqning ichida it yotibdi», deydi. It ilgari ham yotardi, harom-parom demasdi, qachondan beri haromni haloldan ajratadigan bo'libdiyikin, deb qolovurdim. Nazarimda u qizini yangi direktorga qo'shgani olib kelganu, ishi unmagach, alamdan o'choqni buzib tashlagan. O'choqni o'sha kuniyoq o'zimla o'nglab qo'ydim. Xo'jayin yarim kechada qaytib, ovqat qil, deb buyursalar «Ertalab Oshbolta o'choq qurib bersin, keyin ovqat pishiray», deymanmi?»

Omonullo Karvonning gaplarida bir ilmoqni sezdi-yu, boʻlib oʻtgan voqeani oydinlashtirishga ojizlik qildi. Savollarni qalashtirgani bilan kerakli javoblarni ololmadi. Nafisaning qishloqqa kelishi, boqqa borishi, oʻchoqning buzilishi... Quloqlariga tilla ziraklar, barmoqlariga tilla uzuklar taqib qaytishi... da sir yashirin edi. Bu sirdan voqif odamning biri tuproq ostida, ikkinchisi tildan qolgan...

- ... O'sha kech Matlubaning nogahoniy tashrifidan so'ng Samandar «ishim bor», deb xonasiga kirib ketdi. Ota-bola televizorda zerikarli bir tamoshani yarmiga qadar toqat qilib ko'rishgach, Toshbolta qizidan:
- Tursunalining boyligi koʻp edi, milisa topolmadi. Xotini bilmasa... qayga berkitdi ekan? deb soʻradi.

Nafisaning koʻzlari teleekranda boʻlsa-da, xayoliga shu savol hukmron edi. Otasiga qarab «bilmayman» deb yelka qisib qoʻydi-yu... keyin soʻnggi kechalardan birida yuz bergan voqeani esladi. Aslida oʻsha voqeani unutmagan, lekin qama-qama boshlanib, boqqa borishga qoʻrqib yurgan edi. Televizorni yana bir oz tomosha qilgan boʻlib, soʻng oʻsha voqeani otasiga bayon qildi...

... Tursunalining kayfiyati xush edi. Maishatni boshlashdan avval Nafisaning quloqlariga tilla zirak, barmoqlariga tilla uzuklar taqdi. Soʻng nafs qongach, tongga yaqin yechib oldi. Avvallari bunaqa odati yoʻq edi — sovgʻalarini qaytib olmasdi. «Zamon nozik boʻlib turibdi. Taqib yursang, odamlar gap qiladi, ering ham shubhalanadi. Shu yerda tura tursin», dedi-da, tashqariga chiqdi. Nafisa oʻrnidan turib yelkasiga choyshab tashlaganicha, derazaga yaqinlashib, tash-qariga oʻgʻrincha qaradi. Tursunalining oʻchoqboshi tomon qayrilganini koʻrdi. «Karvon shu yerda boʻlsa bu ahvolda duch kelmay», deb tashqariga chiqishga qoʻrqdi. Tursunali oʻchoqboshidami yo etakdagi qoʻyxonadami, Nafisa aniq bilolmadi, ancha qolib ketdi. Mehmonxonaga kirishdan oldin qoʻllarini yuvdi. Ichkari kirib yotdi-yu, kun yoyilgunicha uxladi...

Bu voqeadan avvalroq boxabar qilmagani uchun Tursunali qizini gʻadabladi. Ertasiga tongdayoq ota-bola yoʻlga otlandilar.

Oʻchoq ostidan topilgan ziraklar, uzuklarni Nafisa joni uzilganiga qadar taqib yurdi. Adolat bu taqinchoqlarni yangi oʻynashning hadyasi deb oʻyladi. Samandar esa dastlabki kunlari xotinida yangi taqinchoqlar paydo boʻlganini hatto payqamadi ham. Nafisa «erim soʻrasa «dadam olib berdilar», deyman», deb javobni naqd qilib qoʻygan edi. Sinchkovlik, xotinlarga e'tibor degan tushunchalardan begona Samandar taqinchoqlarni koʻrganda ham indamadi. «Maoshlarini yigʻib olgandir», deb qoʻya qoldi.

Taqinchoqlar tarixidan bexabar Omonullo issiq kunda aroqning kuchi bilan yanada qizib olgan Safarning ezmaligidan horigan holda uyiga qaytdi.

MAG'LUBIYAT VA G'ALABA

(Qotillikdan avvalroq sodir boʻlgan voqea)

Tursunali zekkvagonda yonma-yon kelgan badbashara odamning lagabi «Udav»²⁵ ekanini Tengizdan eshitdi. Eshitdi-yu, bular bilan hazillashib bo'lmasligiga yana bir karra ishondi. Baxtini qarangki, u o'sha «Udav» bilan vaqonda birga bo'libdi, bu nodon «Udav» Gobelyanning unina xazinani o'g'irlaganiga odamlari Ishonishmaganda nima bo'lardi, qochmaganida nima bo'lardi, vagonda boshqa o'g'ri bilan kelganida nima bo'lardi? Xayolida shu savollar uyg'onganida Tursunalining yuragi orqasiga tortib ketaverdi, ko'z oldida bolalari, Matlubasining ma'yus chehralari gavdalanib, ezilaverdi. Nechundir o'z joni ham arzimasday tuyula boshladi. Nechundir Nafisadan olgan maktubi dardiga malham bo'la olmadi. Kunlar, haftalar shu zaylda o'taverdi. O'chakishgandek Nuriddin ham teskariligicha golaverdi. O'chakishgandek, oshxonada boshlangan ola-to'palonda do'pposlanib, o'lar holga keldi. Janjal nimadan boshlanganini anglashga ulgurmadi ham. Nazoratchilar nima sababdan mushtlashuvni

_

²⁵ «Boʻgʻma ilon» demakdir.

bostirishga urinishmayotganidan ajablandi. Qamoq shifoxonasida koʻzlari tinib, boshi aylanib yotganda bu haqda koʻp oʻyladi. Chala oʻlik, chala tirik holda azob dengiziga bir gʻarq boʻlib, bir yuzaga qalqib chiqib yotganida oʻzini «prokuraturadanman», deb tanishtirgan odam beshta surat koʻrsatib, «qaysi biri bilan zekvagonda kelgansan?» deb soʻradi. Tursunali Tengizning ogohlantirishini eslab «Udav»ning suratini adashmay koʻrsatdi. «Prokuraturadanman» degan odam nechundir boshqa narsani soʻramadi.

Oshxonada janjal boshlanganida, ayniqsa jagʻiga birinchi musht tushganida Nuriddinni izladi. Keyinroq esladi: Nuriddin oʻsha kuni ertalabdan koʻrinmagan edi. Yoʻq, hatto tunda ham joyida yotmagan edi. «Qayoqqa yoʻqoldi! Yo qochib ketdimi u nodon?» deb oʻyladi Tursunali. Nuriddinning qamoq hibsxonasida ekanini bilgach «omadli bola ekan», deb qoʻydi. Bu masalada u haq edi. Chunki bir necha kunlik hibs Nuriddin hayotini omon saqlab qoldi, deyish ham mumkin.

Tayyorlanmish fitnadan ogoh bo'lgan kunning ertasiga oqshomda Nuriddin hovlida boshliq muoviniga duch keldi. Salom berib o'tib, ikki qadam ham bosmagan edi-ki, mayor «to'xta!» deb buyurdi. Nuriddin to'xtagach, bo'ralab so'kib, «nega salom bermading?» deb baqirdi. «Salom berdim-ku?» deb ajablangan Nuriddinni mayor «hali gap ham qaytarasanmi!» deb urib qoldi. Nuriddin javob qaytarish u yoqda tursin, himoyaga chog'lansa ham battar bo'lishini bilgani uchun tobe holida turib berdi. Mayor urib, so'kib bo'lgach, Nuriddinni hibsxonaga boshlab borib, «salom bermagani, gap qaytargani va lager ichki intizomini qo'pol buzgani uchun» qamadi. Botqoqqa tashlangan odam «nechun bunda loy ko'p?» deb ajablanmagani kabi Nuriddin «bu qadar nohaqlik bo'larmi, axir?!» deb hayratlanmadi ham, g'azablanmadi ham. Bu tarzdagi hibsxonada o'tirishlar uyga yuborajak va olinajak mujdalar sonini kamaytirishini, oqibat ozod bo'lib chiqish onlariga salbiy ta'sir etajagini bilgani uchun afsuslandi xolos.

Hibsdan qutulib chiqishi bilan uni Tengiz chorlatdi. Yomgʻirdan soʻng adl qomat oq qayinlar nozikbadan kelinchaklarday koʻzni quvontirardi. Tengiz daraxtning silliq badaniga kaftini qoʻyib atrofga suqlanib boqardi. Uning ovulida, archalar orasida, undabunda shunday oqbadan qayinlar koʻzga tashlanardi. Ularni birov atayin olib kelib ekkanmi yo qadimdan bormidi — Tengiz bilmaydi. Togʻ archalari orasida begonasiramay oʻsayotgan bu daraxtlarga qarab zavqlanardi. Bu yerda, oʻz yurtida oq qayinlar oʻzgacha jilva qilardi.

Nuriddinni boshlab kelgan Pachoqburun sal berida toʻxtab «Knyaz, keldi», deb ovoz berdi. Tengiz orqasiga oʻgirilgach, oʻzi nari ketdi. Nuriddin esa u tomon yurdi.

— Ha, Hamzat, kel, mana buni qara: agar dunyoda pokizalik istasang, daraxtlaru koʻkatlardan izla. Odamlardan qidirma — ovora boʻlasan. Kaftingni qoʻy bu yerga, soʻng tabiatning shiviriga quloq tut.

Nuriddin Tengizning aytganini qildi. Ammo hech narsani sezmadi, tushunmadi. Tengiz esa xuddi oʻziga oʻzi gapirganday she'r oʻqiy boshladi:

Angladim: nomusning qotili — qullik, Ko'rdim: tojli boshlar ta'zimga keldi. Bulbullarim o'ldi Chamanzorlarda Bulbulli maqomi cho'g'zimga keldi. Haqoratlar yedim. Tahqir, haqorat — Tirnog'imdan tortib bo'g'zimga keldi...²⁶

Ruschalab aytilgan satrlarni Nuriddin yaxshi tushunmadi. Yaxshiki, Tengiz «angladingmi, Hamzat?» demadi. Soʻraganida uning dovdirashi aniq edi.

²⁶ Shoira Qutlibekaning ajib she'rlaridan minnatdorlik ila foydalandik. — *Muallif*.

Bu satrlar Tengizning xasta yuragidan potrab chiqib beixtiyor tilga koʻchgan, Nuriddinga aytish uchun moʻljallanmagan edi. Tengiz ham, boshqa sheriklari ham oʻzlarini «ozod inson» hisoblasalar-da, aslan oʻzlari barpo etgan zindonga mahbus edilar. Dastlab hashamatli qasr boʻlib koʻringan bu zindondan hech kim osonlikcha, aniqroq aytilsa, tirikligicha qutilgan emas. Koʻpchilik qutulish choralarini oʻylamaydi ham, izlamaydi ham. Tengiz esa bu qasr ostonasiga qadam bosgunicha boʻlgan chin ozodligini qoʻmsaydi. Yuragi ba'zan qanoti singan qush singari uchmoq istaydi. Qaysi zamonda, qay makonda qanotlari singan qush erkin osmonga parvoz qilibdi-ki, Tengizning qalbi bunga yetishsa...

— Bu daraxt bechoralar bizlar tufayli tutqunda, bizlarni deb bular ham tikonli qamoq simtoʻrlari bilan oʻralgan... — Tengiz bu gapni ham Nuriddin uchun emas, oʻzi uchun past ovozda aytdi.

Ularning makoni pokiza hislarga bandi bo'lib turishga ko'pam imkon bermaydi. Bunda qalblar bir necha lahzagina asliga qaytishi mumkin. So'ng... yana buzuqlik, yovuzlik, nafrat chodirlariga o'raladi. O'ralganda ham chirmab o'raydi, ezadi, siqadi. Ozgina fursat yayragan hislar esa nola chekadi, ingraydi, oqibat — ovozi o'chadi.

Tengiz shunday holatda edi.

Zulmat chodiri qalbni o'radi — kaftini daraxt badanidan oldi.

- Mazza qilib chiqdingmi? deb Nuriddinning yelkasiga yengil mushtladi. Eshitgandirsan, oʻsha fitna xuddi men aytganday amalga oshdi. Yanis ogʻir yotibdi. Bugun-erta jon bersa ham ehtimol. Bir moʻʻjiza bilan tirik qolsa ham otuvga hukm etiladi. Oʻldirilgan uch mahbusning xuni uning boʻyniga ilindi. Yana uchta sherigi ham ketadi. Sen bilan biz esa maishatlarimizni qilib yuraveramiz.— Tengiz keyingi gapi-ni achchiq kinoya bilan aytdi-da, daraxtni tepdi.— Ular yurtlariga ozodlik urugʻi sepgan edilar. Bu yerga kelib oʻlim mevasini undirib yedilar. Ayb bizda emas, Hamzat, sen hali bunday tamoshalarning koʻpini koʻrasan.
 - Meni nimaga gamashdi?

Nuriddin aslida «siz qamattirdingizmi?» deb soʻramoqchi edi. Tengiz savolning magʻzini oʻqib, bosh chayqadi:

— Bilmayman, Hamzat. Koʻziga xunuk koʻrinib qolgandirsan. — Tengiz shunday deb koʻzlarini loʻq qilganicha unga tikildi. Ayrim odamlar yolgʻonni sezdirmaslik uchun niqohini olib qochadi, Tengiz esa aksincha, tik qaraydi.

Nuriddinning gumonida jon bor edi: u Tengiz istagi bilan qamalgandi. Tengiz kechasi Koshakning arogʻini ichgach, koʻp oʻyladi. Ertasiga Koshakni chorlab, gapni aylantirib soʻradi. Koshak aniq javobdan boʻyin tovlasa ham Nuriddinning oʻlimga hukm qilinganini ishora bilan ma'lum qilib qoʻydi. «Shogirding ham sinaladigan boʻlib turibdi», deyishidanoq Tengiz uning shumligini payqadi. Angladi-yu, mayorni ishga soldi. Mayorning osonlik bilan koʻnganidan bildiki, Nuriddinning nishonga aylanishi qamoq lageri boshliqlarining fikri emas, Koshakning shaxsiy tashabbusi. Shu bois ham Nuriddin qutulib chiqishi bilan uni chaqirtirdi.

— Hamzat, sening bogʻcha bolalik davring oʻtdi. Endi maktabdagi oʻqishni boshlashing kerak. O'jarlikni yig'ishtir, sen uchun eng to'g'ri yo'l — bizning yo'limiz. Birinchidan, joningni asraysan, bu yerdan tirik holda, ikki oyog'ingda yurib qaytasan uyingga. Ikkinchidan, bilib qo'y: uyingga qaytganingda birov seni odam o'rnida ko'rmaydi. Hatto eng yaqin qarindoshlaring uchun ham sen «qamalib chiqqan odam»san. Birovnikiga mehmonga borsang ham sendan xavfsirab tu-rishadi. Igna yoʻqolsa ham sendan ko'rishadi. Ular orasida endi halol yashay olmaysan. Hamonki shubhalanishyaptimi, yaxshisi chinakam o'q'ri bo'lib yashayverganing ma'gul. Sen bizning kasbimizdan nafratlanma, avval ham aytganman, yana aytaman: biz halol odamlarmiz. Biz biron bir ishchining yoki maktab muallimining uyiga bostirib kiradigan ahmoq emasmiz. Xoʻp, kirdik ham deylik, nima olamiz bu uydan? Yuvilaverib yoqalari titilib ketgan koʻylaklarnimi? Men sentyabr oyida ovga chiqishni yaxshi koʻrardim, Hamzat. Nimagaligini bilasan, a?— Tengiz shunday deb huzurlanib jilmaydi. — Ha, aytmoqchi, Hamzat, sen nima uchun institutda oʻqimading? Istamadingmi?

Nuriddin Tengizning maqsadini tushunmadi. Shuning uchun avvaliga «Nima edi, nima uchun qiziqib qoldingiz?» deb soʻramoqchi boʻldi. «Qutulib chiqqanimdan soʻng oʻqishga joylashtirmoqchimi?» deb ham oʻylab, toʻgʻrisini aytib qoʻya qoldi:

- Sakkizinchini bitirib undan u yogʻiga oʻqiy olmaganman.
- Nimaga oʻqimagansan Hamzat, biliming kammidi yo aqling kammidi?

Keyingi savol Nuriddinning hamiyatiga tegib toʻnglik bilan javob berdi:

- Pulim kam edi.

Bu javob Tengizga ma'qul kelib, kuldi:

- Shunaqaligini bilardim, dedi u Nuriddinning yelkasiga yana yengilgina musht urib. Sendaqalar koʻp bu mamlakatda. Oʻninchini tugatganingda ham baribir institutga kirolmas eding. Yozdagi kirish imtihonlarida oʻqituvchilar dengizga toʻr tashlagan baliqchilarga oʻxshab nodonlarning pullarini yigʻib oladilar. Men esam toʻrimni ularning ustiga tashlayman. Qani aytchi, kim koʻproq gunohkor? Ularmi yo menmi? Biz halol oʻgʻrimiz, Hamzat, endi sen ham bizning oilamizga qoʻshilasan.
 - Men...
- Jim bo'l! Gapingni eshitishni ham istamayman. Qarorim qat'iy shikoyatga o'rin yo'q! Sen bugundan boshlab Qo'tosning shoqirdisan. Menga qara, o'jar, sen uning hunarini astoydil o'rganaver, ozodlikka chiqqaningdan keyin nima qilishni o'zing bilasan. aytmoqchi, chap qoʻlda ovqat yeyishni bilasanmi? — Tengiz shunday deb mug'ambirlarcha jilmaydi-da, savoliga javob bo'lmagach, gapini davom ettirdi: Qadimda eng zo'r o'g'rilar Bag'dodda bo'lar ekan. Senga o'xshagan bir ahmag o'g'rilikni o'rganaman deb Bag'dodga kelib, eng zo'rini topib, arzini aytibdi. Zo'r o'g'ri «bo'pti, shogirdlikka oldim seni», deb uni mehmon qilibdi. Ammo «ovqatni chap qo'lda yeysan», deb shart qo'yibdi. Ahmaq shoqird qancha urinmasin, ovqatni chap qo'lida yeyolmay «shu shartmi?» deb norozilik bildiribdi. «Shart, — debdi ustoz, — o'g'rilikning eng asosiy sharti — chap qo'lda ovqat yeyish. Chunki o'g'ri ertami-kechmi pand yeb, hibsga olinadi. Pand yedimi, tamom, shariat hukmiga binoan o'ng go'li kesiladi. Sening gismating ham qoʻlda yeyishni hozirdan shunday bo'ladi. Ovgatni chap o'rgansang, qiynalmaysan». Bu qapni eshitib, haliqi ahmaq orqasiqa qochvorgan ekan. Lekin sen havotir olma, bizning hukumat odil, qo'lni kesmaydi. To'rt yilmi, besh yilmi bogadi, dam beradi. Keyin qoʻyib yuboradi, — Tengiz shunday deb kuldi.

Nuriddin uning bu kulgisi zamirida xushchaqchaqlik, quvonch nurini emas, alam va iztirob zahrini sezdi.

Nuriddin oʻsha kuniyoq Qoʻtosning qoʻliga «tantanali suratda» topshirildi. Qoʻtos dastlabki kunlari uning «gʻoya»sini boyitish bilan shugʻullandi. Oʻgʻrilar olamiga xos tartib-qoidalar bilan tanishtirdi. U har bir tartib yoki qoidaning ahamiyatini erinmay tushuntirar, xuddi rivoyat aytuvchi roviy kabi qissadan hissa yasab, bu qoidalarni buzganlarning qanday jazoga yoʻliqqanlarini batafsil bayon etardi. Qoʻ-tos — jar labidagi soʻqmoqdan, qirgʻoqlarni bogʻlovchi qil koʻprikdan koʻzlarini chirt yumib olib ham yugurib ketaveradigan odam, goʻdakni yetaklab, bu yoʻldan adashmay yurmoqni oʻrgatardi. Oʻrgata turib «orqaga qaytishni oʻylama, hatto ortingga burilib qarama», deb uqtirardi. Tengiz «ozodlikka chiqqach, nima qilishni oʻzing bilasan», degani bilan Nuriddin toʻrga oʻralib borayotganini sezib turardi. Sezardi-yu, qutulmoq chorasini topolmay garang edi.

Navbat «siyosiy» tayyorgarlikdan «amaliy» mashgʻulotga oʻtib, Qoʻtos temir javonlarning, ulardagi qulf-larning turlari haqida tushuntirib oʻtirganda Koshak yaqinlashib, yon tomonga xunuk tarzda tupurdi-da:

Knyazingning kuni bitdi, — dedi Qo'tosga qarab.

Bu kutilmagan xabar Nuriddinni ham, Qo'tosni ham tang qoldirdi.

- Nima bo'ldi? dedi Qo'tos o'rnidan turib.
- Nima bo'lardi, dedi Koshak Nuriddinga qarab zaharli tirjayib, kuni bitgandirda. Qo'llariga kishan urib, hibsxonaga tashladilar.
 - Kim tashladi? Nimaga tashladi?
- Nimaligini ulardan so'ra. Knyazing keyingi payt-da o'zini rostdan ham «knyaz» deb ishonib qoluvdi. Uni uch harf tinchitadi endi.
 - Koshak, sen bundan quvonyapsanmi? dedi Qo'tos achchiqlanib.
 - Bo'lmasamchi! Endi bu yerda men knyazman!
- Bekor aytibsan! Biz hali oʻylashib koʻramiz. Sen birodaringning musibatidan quvonib, qonunni buzyapsan!
- Qoʻtos, sen oʻzingning ishingni bilib qilaver. Lekin mana bunaqa itvachchalarni yoʻqot. Koshak shunday deb yonidan buklama pichoqni chiqarib sopi yonidagi tugmani bosdi. Oftobda yaltillagan pichoq tigʻini Nuriddinning kekirdagiga tiradi: Ana endi himoya-ching yoʻq, Bifshteks uchun javob beradigan vaqting keldi. Shunday deb tigʻni asta botirdi.
 - Koshak, bu bizning odam!
- Bekor aytibsan, bu itvachchalar hech qachon bizning odam boʻlishmaydi. Men Bifshteks uchun buni oʻldiraman, deganmanmi, demak, oʻldiraman. Mayli, hozir emas, ozgina yashasin, qutulib chiqsin, uyiga borsin. Oʻsha yerda... buning sassiq onasini oʻzining koʻz oldida tramvayga qoʻyaman... Keyin...

Keyin nima bo'lishini ayta olmadi. «Sassiq onasini...» deganidayoq Nuriddinning joni halqumiga keldi, «tramvayga qo'yaman», deganida esa qalbida nafrat va g'azab vulqoni portladi-yu, ko'z oldi qorong'ulashdi. Tomog'iga pichoq tirab turilganini ham unutib, Koshakning naq qanshariga musht tushirdi. Nariga uchib tushgan Koshakni tepmoqchi bo'lganida Qo'tos yo'lini to'sdi. Dam o'tmay Koshak o'rnidan turib, yerga sanchilib qolgan pichoqni yana qo'liqa oldi:

- Qo'tos, goch, bu itni menga go'yib ber! dedi u xirillab.
- Faqat oʻzingni himoya qil, Qoʻtos Nuriddinga qarab shunday dedi-da, oʻzi chetga chiqdi. Koshak esa oʻsha zahoti quturgan mushuk misol Nuriddinga tashlandi. Nuriddin uning hamlalariga chap beraverib, bir necha daqiqa sarson qildi. Hamlalari bekor ketgani sayin Koshak boʻralab soʻkar, betoʻxtov ravishda tupurar edi. Uning bu qiliqlari Nuriddinning joniga tegib, oxiri Koshakning pichoq tutgan qoʻlini moʻljallab turib, bilagiga qattiq tepdi. Nariga uchib tushgan pichoqni Qoʻtos oldi-da, tigʻini buklab, choʻntagiga soldi. Keyin qoʻlini changallaganicha tiz choʻkib oʻtirib qolgan Koshakka yaqinlashib, bilagini ushlab koʻrdi:
- O'lmaysan, singan bo'lsa tuzalib ketadi. Besh-o'n kun qitmirlik qilmay o'tira turasan.
- Men uni o'ldirmay qo'ymayman, dedi Koshak, keyin Nuriddinga qarab baqirdi: Ey, it! Endi sen o'liksan, tushundingmi, o'liksan!

Nuriddin tushundi. Bular «oʻliksan», deb hukm chiqarishdimi, demak, muddaoga yetishmaguncha tinchishmaydi. Demak, yashab qolishning yagona chorasi bor: uni oʻldirish!.. Nuriddin shu toʻxtamga kelgani bilan qarorini amalga oshirish yoʻl-yoʻrigʻini bilmas edi. Urushda boʻlsa ekanki, shartta qurol tepkisini bosib, oʻq yogʻdirib yuborsa. Bunda qurol yoʻq, musht bilan esa biron natijaga erishish qiyin. «Oʻychi oʻyiga

yetgunicha, tavakkalchi toʻyiga yetibdi», deganlaridek, u biron yoʻl izlab topgunicha bular masalani hal qilib qoʻya qolishlari mumkin. Bugun kechasimi yo ertasigami, har holda choʻzib oʻtirishmasa kerak.

Kechasi ziyrak holda yotgan Nuriddin yanglishmadi. Hamma shirin uyquda ekanida Qo'tos kelib «Mening o'rnimga o'tib yot», — dedi. Oradan bir soatlar o'tgach, barak eshigi ochilib, Koshak yonida to'rt yigiti bilan kirib kelib, to'g'ri Nuriddin yotgan joyga qarab yurdi. Yigitlardan ikkitasi yotgan odamni Nuriddin deb fahmlab, imo-ishorasiz holda ikki oyog'ini tappa bosgani hamon, qolgan ikkitasi qo'ldan olishga ulgurmay, Qo'tos qaddini ko'tardi:

— Koshak, yana xato ketding, men esam yanglishmadim,— dedi u ovozini pastlashga harakat ham qilmay.— Bolaga tegma, dedimmi, demak, tegmaysan. Joʻna endi!

Koshak so'kinganicha chiqib ketdi.

Qo'tos esa o'tirgan yerida o'yga toldi. Knyazning hibs-ga tashlanishi bilan Koshakning bu qadar quturishi sabablarini izlab topmoqchi bo'ldi. Koshakning har bir bosgan qadamini kuzatib yurgan maxfiylar tongda Qo'tosga kutilgan va kutilmagan xabarni yetkazdilar. Qo'tos Koshakning Tursunalini siquvga olajagini gumon qilgan, ammo hibsxonadagi Tengiz huzuriga kirishini o'ylamagan edi. Qamoq lageriga Moskvadan odamlar kelishi, Knyazning qo'liga kishan urilishi va Koshakning quturishi bir zanjir halqalari bilan bog'langanini fahmladi. Avvaliga «politbyuro»ni shoshqich ravishda to'plamoqchi bo'ldi. Biroq, o'g'rilardan yana qanchasi Koshak tomonda ekanini aniq bilmagani uchun bir oz kutishga qaror qildi.

O'g'rilar olamida tug'ilib, voyaga yetgan, suyagi qotgan Qo'tosning aqli bu safar ham o'ziga xiyonat qilmagan, voqealarni bog'lab turgan ko'rinmas zanjir halqalarini aql ko'zi bilan ko'ra olgan edi.

TALVASA

Omonullo bir varaq qogʻozni toʻrtga boʻldi-da, biriga «Samandar Ochilov», ikkinchisiga «Toshbolta», uchinchisiga esa «Matluba Toʻxtaeva», toʻrtinchisiga esa «kooperativ», deb yozib, soʻroq belgisi qoʻydi. Soʻng qarta chiylayotgandek aralashtirgach stol ustiga yoyib, bir narsa oʻqimoqchi boʻlayotgan folbinday tikilib oʻtirdi. Keyin Toshbolta zikr etilgan qogʻoz parchasini nari surdi. Dam oʻtmay Matlubaning ismi yozilgani ham chetga surildi. Shu oʻtirishida diqqati oshgandan oshib, toʻrtinchi qogʻoz parchasiga hisobsiz soʻroq belgilari chizib tashladi-da, chuqur «uf» tortdi. Ana shunday tarzda siqilib oʻtirgan chogʻida telefon jiringladi. Goʻshakni istamaygina quloqqa tutdi-yu, beixtiyor sapchib turib ketdi. Chetdan qaragan odam u telefon goʻshagini emas, adashib, qizib turgan dazmolni qulogʻiga tutdi-yu, kuydi, deb oʻylashi ham mumkin edi. Aslida esa Omonulloni sapchib turishga boshliqning xabari majbur etgan edi. Bir necha daqiqada suratchi, kriminalistlar guruhining boshqa yigitlari hovlida toʻplanishdi-yu, navbatchi mashinada Samandar Ochilovning uyiga yoʻl olishdi.

Uyning eshigi lang ochiq, qoʻllari kishanlangan Samandar mehmonxonadagi deraza yonida koʻchaga tikilganicha tek turardi. Qadam ovozlarini eshitib burilib qaradi-yu, Omonulloning nigohiga roʻpara boʻldi. Omonullo qoshu-kipriklarigacha malla boʻlgan bu odamga bir zum tikildi-da, soʻng uyda poyloqchilik qilgan hamkasbiga qaradi. Hamkasb yigit bu qarash zamiridagi savolni oʻqib qisqa tarzda axborot berdi:

- Xotirjam kelib qulfga kalit soldi. Eshikni ochib, ostonada bir pas qimirlamay turdi.
- Hech narsaga tegmadilaringmi? deb so'radi Omonullo atrofga bir razm solib.
- Yo'q.
- Qo'llarini bo'shat.

Samandar kishandan bo'shagan bilaklariga ma'yus tikilib qoldi.

— O'tiring, Ochilov, — Omonullo ikkita stulni bir-biriga qarama-qarshi qo'ydi-da, o'zi derazaga orqa qilib o'tirdi. Samandar otasidan tarsaki tushib qolishidan qo'rqqan boladay hadiksirab turdi.

To uyiga yetib kelguniga qadar Samandarning ruhi go'yo behisob chayonlar hukmida bo'ldi. Uyida qandaydir noxushlik kutayotganini yuragi sezib, ezilgan bo'lsa-da, «militsiya xodimiga duch kelarman, ostona hatlashim bilan qo'llarimga kishan solinar», deb o'ylamagan edi. Poyloqchi yigitga «Ochilov kelishi bilan qimirlatmaysan», deb buyurilgan, u Samandarning kimligidan bexabar bo'lgani sababli uni ashaddiy qotil gumon qilib, qo'lini kishanlab qo'ya qolgan edi. Samandar esa buni uzil-kesil hukm deb tushunib o'zidan ketayozdi.

O'tiring, — dedi Omonullo bu safar qat'iyroq tarzda.

Samandar stulning suyanchig'ini ushlab astalik bilan o'tirgach, Omonullo o'zini tanitdida, so'rog'ini boshladi:

- Moskvada hamisha koʻp qolib ketasizmi?
- Ishga qarab, dedi Samandar unga tik qaray olmay, ba'zan ertalab borib, kechqurun kelaman. Bu safar sal tobim qochdi...
 - Nima bo'ldi?
 - Yoqmaydigan narsa yeganman shekilli... sal zaharlanibman.
 - Sizni olim deyishdi... Nima bilan shug'ullanasiz?
 - Buni aniq aytishim mumkin emas.
 - Umumiy tarzda-chi?
 - Umumiy tarzda... zilzilaga oid desam ham bo'ladi.
 - Bu ishga chet elliklar ham qiziqsa kerak?
 - Bilmadim... balki qiziqar...
 - Sizga birov shu ish bo'yicha taklif qilganmi yo...
 - Yo'q. Nega so'rayapsiz?
 - Dushmaningiz yoʻqmi, demoqchiman.
 - Dushman... bilmadim... bo'lmasa kerak.
 - Nafisa Boltaeva sizning ikkinchi xotiningizmi?
 - Ha... Samandar shunday deb nigohini olib qochdi.
 - Hozir u gaerda?
 - Bilmayman... uyda bo'lishi kerak edi.
 - Oxirqi marta qachon, qaerda ko'rgansiz?
 - Esimda yoʻq...
- Qiziq... xotiningizni qachon koʻrganingizni ham eslolmasangiz... Bizni bu yerda koʻrib hayron boʻlmadingizmi?
 - Hayronman...
- Moskvaga ketishingizdan oldin bir polkovnik hamrohligida kelib uyingizga kirib chiqqansiz, qoʻlingiz nima uchun qon edi?

Bu savol Samandarning boshiga og'ir gurzi misol urilib, tovoniga qadar zirillatdi, hushini yo'qotib, aqldan ozgan devonaday baqrayib qoldi. Aftodavash bu odamning ko'zlariga Omonullo jon olg'uvchi Azroil bo'lib ko'rindi. O'shanda polkovnik so'raganida savol o'qidan «shisha tilib ketdi», deb qutulgan edi. Hozir tiliga shu javob ham kelmay, soqov holida turaverdi. Omonullo savolni yana qaytargach: «esimda yo'q, balki kesib olgandirman», deb g'o'dirandi.

— Chap qo'lingizni kesuvdingizmi yo o'nginimi?

Samandar ajablanib, qo'llariga qaradi: darvoqe, qaysi qo'li qon edi? Savol yana takrorlangach, «o'ng qo'lim», dedi.

- Yaxshi, buni hali mutaxassislarimiz aniqlab berishadi. Nima bilan, qanday kesganingizni ham eslab turing. Endi asosiy gapga o'taylik: uyga kirganingizda kim bor edi?
 - Bugunmi? deb so'radi Samandar.
 - Yoʻq, oʻsha kuni.
 - Hech... hech kim yoʻq edi.
 - Xotiningiz, men ikkinchisini nazarda tutyapman, hozir qaerda?
 - Bilmasam... uni toqqa olib ketsam, deb keluvdim.
 - Shu gapingizga oʻzingiz ishonasizmi?
 - Meni nima uchun bunday so'roq qilyapsiz? Aybim nima?
- Aybim, dedingizmi? Sizning tilingizda bu «ayb» deyilsa, bizningcha «jinoyat» deb yuritiladi, Omonullo shunday deb portfelidan murdalarning suratini olib koʻrsatdi. Samandar bir qaradi-yu, darrov koʻzlarini olib qochdi. Qarang, nima uchun qaragingiz kelmayapti? Nima uchun ularni oʻldirdingiz? Rashk qildingizmi yo boshqa sabab bormi?

Samandar bu savollarni eshitgach, koʻzlarini katta-katta ochib Omonulloga qaradi. Omonullo uni kuzatib, bamaylixotir oʻtiraverdi, boshqa soʻz aytmadi. Mana shu qisqa muddatli sukut Samandarga ajal oʻqining azoblaridan ham battar tuyuldi. U oʻshanda oʻliklardan qoʻrqib qochgan edi, bu qochqinligi, bu qoʻrqoqligi evaziga «qotil» degan nishonga erishuvini oʻylab koʻrmagandi. Boʻyniga sirtmoq osongina tusha qolishi yetti uxlab, bir tushiga kirmagan edi. «Nima uchun oʻldirdingiz?» degan savol uy devorlariga urilib aks-sado beraverdi.

- Nima deyapsiz?... Men.. oʻldirganim yoʻq, deb pichirlashi bilan dardini toʻsib turgan toʻgʻon buzilib, yigʻlay boshladi.
 - «Birinchi xotini to'g'ri aytgan ekan», deb o'yladi Omonullo.
 - Siz oʻldirmagan boʻlsangiz... kim qilishi mumkin bu ishni?
 - Bilmayman...
- Pichoq sopida barmoq izlaringiz bor, Omonullo buni taxminiga asoslanib aytdi. Pichoq sopi, eshik tutqichi, temir javon, yana ayrim buyumlardagi bir xil iz Ochilovga tegishli, deb gumon qilingan edi. Gumon haqiqatga aylanishi uchun bir necha daqiqadan soʻng Samandarning barmoq izlari olinadi. Unga qadar esa taxminga suyanib ish koʻrish ham mumkin.
 - Men o'ldirganim yo'q, ishoning. Men kirganimda ular...
 - O'lganmidi?

Samandar bosh irg'aganicha go'dak kabi yig'layverdi.

- Unda nima uchun «koʻrmadim» dedingiz?
- Oo'radim…
- Nimadan... yoki kimdan?
- O'likdan... o'likdan qo'rqaman.
- Qiziq... siz qoʻrqsangiz, men qoʻrqsam, murdani kimdir koʻmishi kerak-ku? Oʻlikni koʻra turib qochib qolganingiz aqlga sigʻmaydigan ish. Deylik, siz qotil emassiz. Lekin kirdingiz, koʻrdingiz, xotiningiz bu ahvolda, yonida esa bir erkak. Tanirmidingiz uni?
 - Yo'q, yo'q, tanimayman.
 - Xotinim bilan o'lib yotgan bu erkak kim ekan, deb qiziqib qaradingizmi o'zi?
 - Yo'q... ochiq'ini aytsam... qaradimu yuzini ko'rmadim. U... yuztuban yotgan ekan.
 - Nima? Yuztuban? Adashmayapsizmi?

Samandar bir oz o'ylanib, so'ng aytganini takrorladi. Omonullo esa ajablanib chalqancha yotgan murdaning suratiga qarab oldi. «Agar bu o'ldirmagan bo'lsa, demak, qotil uyda edimi, u chiqib ketganidan keyin murdani o'girib qo'ydimi?» Omonullo bu

masalada turli gumonlarga bordi. Biroq, bu ishni Toshbolta ham qilgan bo'lishi mumkin degan fikr unga xiyonat qil-di — gumonni oydinlashtirmadi.

- Demak, siz kirganda bular oʻlib yotishgan ekan. Eslangchi, pichoqdagi qon iliqmidi yo qotib qolganmidi?
 - Iliq edi... seskanib ketdim, qo'rqdim.
 - Barmoqlaridagi uzuklarni, quloqlaridagi ziraklarni nega olib qo'ydingiz?
 - Nima deyapsiz? O'likdan yechib olamanmi?!
 - Balki yechib olib seyfqa qo'yqandirsiz?
 - Siz... tuhmat qilyapsiz, meni kechiring...
 - Unda seyfni nima uchun ochdingiz?
- Moskvaga olib boradigan hisob-kitob hujjatlarim bor edi. Shuni deb atay keluvdim. Bo'lmasa to'g'ri uchaverar edim.
 - Seyfning kaliti xotiningizda ham bormidi?
 - Yo'q. U yerda faqat mening qoq'ozlarim turadi.
 - Oching.

Sarosima toʻridagi Samandar choʻntaklarini paypaslab kalitni qidirdi. Soʻng diplomatini ochib yoʻgʻon kalitni olgach temir javonni ochdi-da, oʻzi ikki qadam chekindi. Omonullo temir javon ichida titilgan qogʻozlarga diqqat bilan razm solib ayrim sahifalardagi qonli dogʻni koʻrdi. Javonda pul ham, qimmatbaho buyum ham yoʻq edi.

— Qarangchi, hech nimangiz yoʻqolmaganmi?

Samandar narsalarni koʻzdan kechirib «hammasi joyida» degach, Omonullo ekspertlarni chaqirib qon tekkan qogʻozlarni ajratib olib, ularga bermoqchi boʻldi. Samandar bunga e'tiroz bildirgach, qogʻozning dogʻ qismini qaychida ehtiyotlik bilan qirqib olishdi. Shundan soʻng Omonullo Samandarni dahlizga boshlab chiqdi.

- Endi shoshilmay, bir boshdan aytib, koʻrsatasiz. Aytadigan har bir soʻzingiz yo foyda beradi yoki aksincha, oʻzingizga zarar keltiradi. Olim odam ekansiz, mayli, suhbatimiz boshidagi dovdiraganingizni kechiray, ammo bundan buyogʻiga esingizni yigʻib oling. Sizni «qotil» degim kelmayotgan boʻlsa ham dalillar baribir sizga qarshi turibdi. Demak, siz zinadan koʻtarilib chiqdingiz. Yoʻlda kimni koʻrdingiz? Roʻparangizdan notanish odam oʻtmadimi?
 - Yo'q... to'xtang... ha, qo'shni xotinni ko'rdim shekilli?
 - Eshiqingiz qulf edimi, uni kalit bilan ochdingizmi?
- Qulf... Samandar shunday deb, xuddi qoʻlida kalit turganday kaftiga qarab oldi.
 Ochiq edi shekilli... Ha, aniq... ochiq edi. Eshikdan kirishim bilan dimogʻimga gaz hidi urildi. Nafisaxonning gʻalati odatlari bor edi. Ikkita-uchta chovgumni eritib, oʻzlarini Xudo bir asragan. Qishloqda gazga oʻrganmaganlarda, chovgumni olovga qoʻyib esdan chiqarib ketaverganlar. Yana shunaqa boʻptimikin, deb oʻylabman. Xayolim gazda boʻlib, xavotirda oyogʻim ostiga qaramabman. Oshxonaga oʻtaman, deb bu... oʻlikka qoqildim...
 - Yiaildinaizmi?
 - Yo'-o'q... yiqilmadimu... lekin Nafisaxonga ko'zim tushdi.

Samandar Omonulloning buyrug'iga itoat etib, murdalarning qay holatda yotganini ko'rsatib berayotganida suratchi chaqqonlik bilan suratga olib turdi.

- Xo'p, xotiningizni siz o'ldirmabsiz, lekin pichoq sopini nega ushladingiz?
- Sugʻurib olmoqchi boʻlgandirman... Ha... lekin ushladimu tortib olishga qoʻrqdim. Keyin... gaz na-fasimni boʻqʻib qoʻydi. Derazani ochib, gazni berkitdim.

Omonullo ochiq derazaga qaradi. Dastlab bu oshxonaga kirganida ham deraza tabaqalarining ochiqligiga e'tibor bergan edi, ammo murdalarning hididan behalovat bo'lgan hamkasblar xonani shamollatish uchun ochgandirlar, deb o'ylagandi. Omonullo

gaz plitasiga ham diqqat bilan qarab uchchala buragichning ochiq turganini koʻrdi. Samandar Omonulloning nazarini uqib, tezlik bilan izoh berdi:

— Men yuqoridan burab berkitdim. Oʻzimning odatim shu: uydan chiqadigan boʻlsam albatta yuqorisini burab oʻchiraman, shunisi ishonchliroq boʻladi. Nafisaxonga qapiraverib hech oʻrqatolmadim...

Chindan ham plita ulangan quvur belidagi buragich gaz yoʻlini toʻsgan edi. Bu Omonullo uchun katta jumboq boʻldi: «Nafisa Boltaeva ochsa bitta buragich buralardi. Bunda esa uchchalasi ochiq... Demak... toʻrtinchi odammi? Bu olim piqillab yigʻlayotgani bilan oʻz ishiga puxta boʻlsa-chi? Aybsizligini isbotlovchi dalillarni pishitib qoʻygandir balki?..»

Shu jumboq toʻriga oʻralayotgan damda Mels Xoʻjaev kirib keldi. Omonullo uni Samandarga tanishtirdi. Samandar beixtiyor tarzda «tanishganimdan xursandman», deb lutf qilib, qoʻl uzatdi. Faqat Mels Xoʻjaev emas, hatto Omonullo ham bunday tanishuvga endi duch kelishi edi. Jinoyatga aloqadorlikka gumon qilina-yotgan odamning prokuror bilan tanishgandan xursand-ligi bu soha odamlari uchun gʻalati tuyuluvchi hol edi. Yolgʻon manziratdan uzoq boʻlgan Samandar «tanishganidan xursandligini» chin dildan aytgan edi. Zero, u prokuratura vakili bilan jinoyatga oid qidiruv inspektorining vazifalarini aniq farqlay olmasdi. U olamga tatigulik olim martabasiga yetgani bilan huquq sohasida deyarli hech narsa bilmasdi. Hozir maxsus vakil emas, prokuratura bogʻboni yoki farroshi kelib siquvga olsa ham «menga savol berishga haqqingiz bormi?» deb oʻtirmay javob qaytaraverishi mumkin edi.

Samandarni oshxonada qoldirib, Omonullo Mels Xoʻjaevni mehmonxonaga boshlab oʻtdi-da, savol-javobning bayoni bilan tanishtirdi.

- Qoʻrqoqligi ayon, lekin qoʻrqoqning ham nayrangi boʻladi. Bu uyga begona odamning yashirincha kirishi mumkinmi? Harbiy sir hisoblangan ish bilan mash-gʻul odamni narigi idora nega qoʻriqlamas ekan? Bir surishtirib koʻrolmaysizmi?
- Soʻrab-surishtirdim, dedi Mels Xoʻjaev magʻrur ohangda. Faqat uning oʻzini poylasharkan.
 - Tushunmadim?
- Agar uyda bo'lsa, uy atrofida bo'lisharkan. Uyda yo'qligida kuzatishmas ekan.
 Tog'da bo'lgani uchun o'sha kunlari qarashmabdi.
 - Nima qildik? Hibsqa olsak, jinoiy ish ochsak...
- Hozircha boshqarmadagi vaqtincha hibsxonaga tashlang. Boshqa idora aralashsa, oʻzlari bilishadi. Bosh-qacha ehtiyot chorasini qoʻllash mumkin emas.

Samandarning gaplarini eshita turib «shahardan chiqmaslik haqida tilxat olib, uyida qoldiraveraylik» degan fikr kelgan, ammo bu fikr zaif tuyulib, qaror darajasiga yetmagan edi. Mels Xoʻjaevning gapidan soʻng, «ma'qul» deb bosh irgʻadi.

Mels Xo'jaev prokuraturada kutishayotganini aytib, iziga qaytgach, Omonullo deraza yoniga borib ko'chaga qaradi. Uning o'yga tolganini ko'rib, Samandar «mening ishim bitdi shekilli, bu jinoyatga aloqam yo'qligiga ishondi», degan xulosaga kelib:

Endi ketaveraymi? — deb so'radi.

Bu savoldan Omonullo ajablandi. «Esi joyidami bu odamning?» deb oʻylab unga tikilib qoldi.

- Qayogga ketmogchisiz?
- Toqqa... u yerda kutishyapti.
- Kutishyapti?.. Kuta turishadi.
- Bu nima deganingiz? koʻngli yomonlikni sezgan Samandarning ovozi titradi.
- Siz... masala oydinlashgunicha bizning... Omonullo «hibsxonada oʻtira turasiz», demoqchi boʻldi-yu, fikridan qaytib yumshoqroq ohangga koʻchdi: mehmonimizsiz...

- Qamaysizmi?
- Bizning vazifamiz qamash emas, jinoyatchini tutish. Sud degan idora bor, qamashadimi yo otishadimi, oʻshalar hukm chiqarishadi.
 - Haqqingiz yoʻq... men jinoyatchi emasman. Keyin afsuslanasiz!
- Toʻgʻri aytdingiz. Keyinroq afsuslanmaslik uchun biz bilan birga boʻlib turasiz. Aybingiz boʻlmasa sizni hech kim ushlab tura olmaydi. Gunohsiz ekaninigizni isbotlash uchun esa vaqt kerak.

Bu gaplarni eshitib, Samandarning lablari titradi, koʻzlari pirpiradi-yu, yigʻlamadi, oʻzini tutdi — taqdiriga tan berdi.

Olti kishiga moʻljallangan vaqtinchalik hibsxonadagi derazaga yaqin karavotda bir yigit chordana qurganicha ovqatlanib oʻtirardi. Yozugʻlik dasturxon ustidagi oshu kabob, somsayu olma-anor, pomidoru bodringga qaraganda uning maishati chakki emasdi. Dasturxonni kim kiritgan boʻlsa ham yigitning hamxonalari nafsini nazarda tutgan koʻrinadi. Yigit Samandarni koʻrib, oʻrnidan turib soʻrashdi-da, dasturxonga taklif qildi. Samandar bu xonaga bir zumgagina kirgan odamday karavot chetiga omonatgina oʻtirdi. Yigit sermanzirat ekan, «oling, oling» deb undayvergach, Samandar noiloj kabob goʻshtidan olib ogʻziga soldi. Qorin och boʻlsa-da, luqmaning tomogʻidan oʻtishi qiyin boʻldi. Shunda yigit yostiq ostidan shisha chiqardi-da:

— Qittak-qittakka tobingiz bormi?— deb soʻradi.

Moskvadagi harbiylar shifoxonasida Samandarga ichish qat'iyan mumkin emasligini aytishgan edi. Ular ogohlantirishmasa ham aroqni o'ylasa ko'ngli ayniydigan bo'lib qolgandi. Hozir esa yigitning taklifidan so'ng ichgisi keldi. Shisha ichida jilva qilayotgan suyuqlik uni darddan qutqaruvchi xaloskor bo'lib ko'rindi-da, «quying», dedi. Yigit piyolani to'ldirib uzatdi. Samandar ikki qultumdan ortiq icha olmay, qalqib ketdi. Piyolani dasturxon chekkasiga qo'yib yigitga uzrli nigohi bilan qaradi. Yigit uni hijolatdan qutqarish uchun yana taomga taklif qildi.

— Olim odamga oʻxshaysiz, aka, siqilavermang. Boshga tushganni koʻz koʻradi, — dedi kulimsirab.

Samandar bu gapdan ajablanib, yigitga qarab qoldi.

— Ha, akaxon, menga tikilib qoldingiz? Qaysi baloga uchrabdi, deyapsizmi? — yigit Samandarning fikrini oʻqiganday kuldi. — Yosh yigit tuhmatga uchragandir, deyapsizmi? Yoʻq, tuhmat boʻlmadi. Oʻzim ahmoqman. Garovda yutaman, deb qoʻlga tushib qoldim. Kechgacha chiqib ketaman. Nari borsa ertaga ertalab qoʻyib yuborishadi. Suyanadigan togʻimiz ja-a mustahkam, ha!

Samandar garov bogʻlab qamoqqa tushish mumkinligini sira eshitmagani uchun ajablandi. Yigit esa kulganicha izoh berdi:

— Mening gulday hunarim bor, aka, hech qachon xor boʻlmayman. Men mashina oʻgʻrisiman. Lekin siz mendan qoʻrqmang. Aslida men oʻgʻrimasman. Men qulfni ochib beraman, boshqalar oʻgʻirlaydi. Qulfning ming xili boʻlsa mingtasini, million xili boʻlsa milliontasini ochib tashlayman. Oʻtgan kuni «qittak-qittak»ning ustida ogʻaynim bilan bahslashib qoldik. Oling, akaxon, sovumasin, ichib qoʻying, dardingiz yengillashadi. Xafa boʻlavermang. Bu yerning nomi xunuk, oʻzi yomon joy emas, bir-ikki kun dam olsa boʻladi. Shunday qilib oʻsha ogʻaynim bilan garov oʻynadim. Garovga yangi, moyi qurimagan «Gaz-31» tikildi. Shunaqa mashinadan kechadigan ahmoqmasman-ku, toʻgʻrimi? Bir uyga bexitgina kirib, seyfni ochib, kalitni olib, mashinani ochib berishim kerak ekan. Ha, mashinaga ham, garajiga ham chet eldan olib kelgan allambalo qulf oʻrnatilgan ekan. Shu ham menga ish boʻlibdimi? Lekin ogʻaynim nomardlik qildi. Qorongʻida qaramagan edim, orqada ment yashirinib yotgan ekan. Gʻip tomogʻimdan

olib, shu yerga tashladi. Xuddi kinodagiga oʻxshaydi, toʻgʻrimi? Menga-ku baribir, oʻsha ogʻaynimga qiyin boʻldi-da. Oling, okaxon, oxirigacha ichib qoʻying, dunyoning tagiga yetasiz. Bir pasdan soʻng yana dasturxon kiradi, qarab turasiz. Oshna-ogʻaynilar omon boʻlishsin, meni xorlatib qoʻyishmaydi.

Bu gapni Samandar «sizda ham oshna-ogʻayni bormi?» degan savol ma'nosida tushundi. Ilgari xayoliga shunday savol kelmagan ekan. «Boshimga tashvish tushsa dalda beruvchi doʻstim bormi?» deb fikr qilgan Samandar hozir oʻzini sahro oʻrtasidagi yakka daraxt kabi his etdi. Endi bu daraxt suvsab, oftob nurida qovjiraydimi? Bu yigit bir necha soatdan soʻng chiqib ketishini bilyapti. Samandar esa hibsxonada necha kun yoki necha yil boʻlishidan bexabar. Bu yer bir necha kunlik qamoqxona ekanini, ayb sirtmogʻi boʻyniga astoydil solinadigan boʻlsa boshqa joyda alamlar tuzini totmogʻini ham bilmaydi. Uni hozir iztirobga tashlayotgan narsa — oʻn yil yotsa ham, hatto qotil deb otib tashlansa ham birov bilmay qolishi mumkin. Bilganda ham afsuslanmasligi, kuymasligi aniq. Opa-singillarining kelishi ham mahol. Ular oʻz oilalari, oʻz tashvishlari bilan band. Bu shaharga hali biron marta ham kelmagan toʻngʻich opasining turmush tashvishlaridan ortib, qamoqdagi ukasini yoʻqlashini tasavvur qilish qiyin. Qishloqqa ikki yildan beri bormayotgani inobatga olinsa, mehr-oqibat iplarining zaiflashib, balki chirib, uzilishga moyil boʻlib qolgani tabiiydir. Amakivachchalariyu xolavachchalari bilan qachondan beri bordi-keldi qilmasliqimni hatto eslay olmaydi.

Sermanzirat yigitning gaplaridan keyin xayolini oʻzidan uzoqlashgan doʻstlari, qarindoshlari toʻla egallamadi. Oʻzini yoʻqlovchi mehribon yoʻqligidan bir oz oʻksindi-yu, soʻng boʻlajak taqdirini oʻyladi. Yigitning manziratlari ham, ezmaligi ham yoqmay qoldi. Uzr aytdi-da, eshikka yaqin karavotga oʻtib, choʻzildi. Yigit ham nafsini qondirib boʻlgach, taomlarni dasturxonga oʻrab qoʻydi-da, boʻsh karavotga oʻtib yotdi. Yotgan joyida kerishib, rohatlandi. Dam oʻtmay yengil xurrak ota boshladi.

Samandar esa shu topda o'z siriga mahram bo'la olguvchi odamga hojat sezdi. Ahbobga muhtojlikning qamoq azoblaridan ham battarroq ekanini fahmladi. Odamning fojiasi o'lim emas, vohidlik ekanini anglab yetmoq mushkul. Odam bolasi istaydimi-yo'qmi, qochmaydimi yo qochadimi farqsiz — o'lim sharobini ichadi. Vohidlik esa o'zining ixtiyori bilan yuzaga keluvchi ofatdir. Hozir Samandar bu ofatning tariqday mevasini totdi. Bir necha soatdan so'ng tamaki hidiga to'lib ketgan bu dim xonani tark etib uchoqqa o'tirganida, Moskva sari uchganida esa bu azoblarni, bu fojialarni yana unuta boshlaydi.

Hozir esa hamqishloq do'sti Tursunali bilan shaharda uchrashib qolgan onlarini la'natlay boshladi. Moskvalik mehmonlar bilan restoranda o'tirganida maishat qilish maqsadida kirgan oshnasi bilan uchrashgan edi. Keyin sovxoziga taklif qildi. Bog'da maishat qilishdi. Choy ko'tarib kirayotgan Nafisaga suqlanib qaradi. Bu qarashning ma'nosini uqqan Tursunali shu tunning o'zidayoq kayfi oshgan do'stining nafsini qondirish choralarini qildi. Chora amal berdi-yu, o'sha tun bahonasida Samandar xotinlik bo'lib oldi. Endi esa... o'sha tunni ham la'natladi...

Umrining turli nuqtalariga la'nat toshlari otib o'tirganida eshik ochilib soqchi kirib keldi-da, yiqitni turtib uyg'otgach:

- Qoʻlingni orqaga qil! deb buyurdi.
- Nega endi okaxon? dedi yigit uyqusiragan holda.

Soqchi unga javob bermay qo'lini qayirib kishanladi-da:

- Endi uka, shahar turmasiga koʻchadigan boʻlding. Prokuror senga ish ochganga oʻxshaydi, deb afsusini bildirib qoʻydi.
 - Menga ish ochadimi, menga ish ochadigan prokuror hali onasining qornida yotibdi!
 - Bo'ldi, bagirma, yur, soqchi shunday deb uni yelkasiga turtib, olib chiqib ketdi.

Ozod bo'lishga ishonchi komil bo'lgan yigitning ahvoli shu bo'lganidan keyin Samandarning ahvoliga maymunlar yig'lamasmikin? Samandar shu fikrda ezilib yotganida yana eshik ochildi, ammo soqchi emas notanish bir yigit kirib salom berdi-da:

O'rtoq Ochilov, yuring, anglashilmovchilik bo'libdi, — dedi.

Shu anglashilmovchilik tufayli, Samandar kutganidek uning holiga maymunlar yigʻlamaydigan boʻlishdi.

Samandar hibsxonada ezilib oʻtirganida Omonullo Nafisa bilan Sanjar ishlagan kooperativga yana bordi. Bu korxona moliyaviy ahvolining tekshiriluvi Omonulloga zarar yetkazdi: xodimlar u bilan yanada choʻchibroq gaplashishdi. Oqibatda Nafisa bilan Sanjar munosabatlarini oydinlashtira olmadi. Nima uchun uyga borganlari u uchun mavhum boʻlib qolave-radi.

Ertalabdan beri quyosh bilan berkinmachoq oʻynayotgan oʻrkach-oʻrkach bulutlar osmonu zaminga hukmronlik oʻtkazish qasdida birlashmoqqa kirishgan edilar. Oftob nuridan bebahra yer yuzi momaqaldiroqlarni kutib dim boʻlib oldi. Azaldan dim havoga toqatsiz Omonulloni ter bosdi, nafas olishi esa ogʻirlashdi. Qoʻnalgʻadagi joyidan jilayotgan avtobusni koʻrib hushtak chalgan edi, haydovchi insof qilib toʻxtadi. Omonullo oldingi qatordagi boʻsh oʻrindiqqa oʻtirishdan oldin oynani yon tomonga surib, ochdi. Shabada iliq boʻlsa ham koʻkragiga rohat berdi. Boʻyniga oq chit roʻmol tashlab olgan haydovchi radio ovozini balandlatib, ashulaga mast boʻldi. Toʻylarni gullatayotgan bu qoʻshiq Omonulloga ham ma'qul kelib, xufton dili jindek yorishdi. Ashuladan soʻng bir shoir bosiq, dardli ovozda she'r oʻqiy boshladi:

— Qaytayapman, oʻzimni koʻmib...

She'rning birinchi satriyoq Omonulloning diqqatini o'ziga jalb qildi:

Tog'lar — g'arib, bog'lar — tashlandiq. Men ko'milgan tuproq it bo'lib Yuzlarimni yalay boshladi.

Bu satrlarni eshitib Omonulloning eti seskandi. Haydovchi radio ovozini pastlagan edi, «Ogʻayni, eshitaylik!» deb iltimos qildi.

Ey so'qir zot, ko'zlaringni och! Ko'zlarimda qonim qaynaydi. Qaro kiygan qaro qayrag'och Bu kun mendan tona olmaydi. ... Siynalari pajmurda, zahil Daraxtlarga termular ayol...

Tiriklik holida koʻrinmagan Nafisa nechundir Omonulloning nigohi oldida gavdalandi: oʻlik ayol emas, koʻzlari ochiq juvon koʻrindi. Dardli nigohi, savolli nazari bilan qaradi: Nafisaning koʻzlari «Meni kim oʻldirdi? Nima uchun oʻldirdi?» deb soʻrar, radioda esa shoir boʻgʻilib she'r oʻqirdi;

Odam — hissiz buyuk haqiqat,

Odam — go'rda tirilgan armon...

Odam — gatra zardobrang hasrat...

Odam — beun, besukun xayol...

Odam — boshi kesilgan bulut...

Odam — ogʻir oyoqli Ayol...

Odam — armon va...

Odam — umid...

Omonulloning koʻz oldida oʻsha savolli nigoh: «nima uchun meni oʻldirdilar? Gunohim nima edi?» Omonullo buni bilsa edi, aytardi. Holbuki bilmaydi, alhol uning asosiy vazifasi buni bilish ham emas. U eng avvalo «kim oʻldirdi?» degan savolga javob topishi zarur. «Gunohim nima edi?» degan savoliga esa Nafisa qiyomatda javob oladi... Hozir esa Omonulloning xayolini shoirning dardli ovozi band etgan:

... Xayr endi, mening xazonim,
Tanho goʻrga sigʻdik ikkimiz.
Yigʻlayotir, kuylayotir jim,
Joni kuzda chiqqan jismimiz.
Xayr endi, mening yaprogʻim,
Bir dunyoga sigʻdik hammamiz.
Yosh toʻkmasin biz uchun hech kim —
Biz qaytamiz,
Bir kun qaytamiz.
Xayr endi...²⁷

She'rdan so'ng dardli kuy berilib, Omonulloning ko'ngliga xazinlik ega chiqdi. Shu xazinlik hukmida ishxonasiga qaytdi. Navbatchi yigit uni kutilmagan noxush xabar bilan qarshi oldi: kimdir qora «Volga»da kelib, Samandarni olib ketibdi. Xo'jayin Omonulloni kutayotganmish...

Boshliq huzuriga kirmasidanoq Omonullo Samandar Ochilovni kim olib ketganini taxmin qildi. Shunday boʻlishini kutgan edi, ammo kutgani bu qadar tez amalga oshuvi uning aqlini shoshirdi. Boshliq Omonulloga hayratomuz yangilik aytmadi — uning gumonini tasdiqladi xalos. «Ishga tikib qoʻy», deb bir varaq qogʻoz uzatdi. Samandarning shahardan chetga chiqmay turishi haqidagi tilxatiga Omonullo e'tiborsiz qarab qoʻyib chiqib ketmoqchi edi. Boshliq toʻxtatib, soʻradi;

- Boshqalardan gumoning yoʻqmi?

Omonullo darrov javob qaytarmadi. Kooperativ boshlig'i bilan Matluba To'xtaevaga oid ojiz gumonlarini aytgisi kelmadi. Shu bois bir oz o'ylanib turib:

- Dalillar yetarli emas, deb qo'ydi.
- Ochilov ekanini isbot qilib bera olarmiding?

Begona uy ostonasiga qadam qo'yayotgan odam ichkaridagi jihozlarni ta'rifu tavsif qilishdan ojiz bo'lganidek, Omonullo bu savolga javob berishga qodir emasdi. Boshliq uning ahvolini sezib, javob talab qilmadi, aksincha dalda berdi:

— Boʻpti, ishingni davom ettiraver. Biror gap chiqsa, huzurimga kirarsan. Sen xafa boʻlaverma. Uni bir marta soʻroq qilishga ulguribsan, shu ham katta gap! Agar dalillar Ochilovga qadalib qolaversa... sen zoʻriqma... biz ilojsizmiz. Boraver...

Bir necha kun avval Samandarning ishxonasidagi suhbatda «qonun oldida hamma teng», deb katta ketgan Omonulloning quloqlari ostida tepakalning «hayotda esa, azizim, butunlay boshqa. Shuni hali ham tushunib yetmadingizmi?» degan gaplari jarangladi. Omonullo oʻzini ogʻzidagi luqmasini oldirib qoʻygan anqov holida deb hisoblamadi — oʻksinmadi.

Omonulloning ish uslubi hamkasblaridan ozgina farq qilardi: u biron jinoyatga aloqador deb ikki kishidan gumon qilsa, uchinchi, noma'lum odam uchun ham joy qoldirardi. Mazkur uslub foyda bergan damlar ham boʻlgan: gumondagilar ozod qilinib, moʻljalda yoʻq noma'lum odamning iziga tushilgan. Agar Samandarning gaz masalasidagi qaplari nayrang mahsuli boʻlmasa, Omonullo kalavaning bir uchini topdi, deyish mumkin.

-

²⁷ Nuktadon shoirimiz Asqar Mahkam she'rlaridan foydalandik. (T. M.)

Kimdir chindan ham gazni ochib qoʻygan boʻlsa, demak, oʻsha «kimdir»ni qidirish kerak. Samandar Ochilovga da'vo yoʻq — oʻlikni koʻrib qochgan odam jinoyatchi hisoblanmaydi. Xotinining oʻligini koʻmmasa ham, dafn etilgan yerini ziyorat qilmasa ham jamiyat ayblamaydi. Bularning ajri ham qiyomatda beriladi.

Omonullo xonasiga qaytib joyiga oʻtirdi-da, stol gʻaladonidan ismlar yozilgan qogʻoz parchalarini olib, yana folbin kabi yoydi. Keyin toʻrtinchi qogʻozdagi soʻroq belgilari yoniga undov belgilari qoʻygach, «Samandar Ochilov» deb yozilgan varaqni chizib-chizib tashladi-da, jahl bilan gʻijimlab, yelimtoʻrsavatga uloqtirdi. Koʻzlarini yumib, behol odam kabi harakatsiz oʻtirdi. Keyin oʻrnidan turib gʻijim qogʻozni olgach kaftlari bilan silab, tekislab joyiga qoʻydi.

Derazaga oʻrnatilgan sovutgichdan iliq havo ufurilayotganday nafasi boʻgʻilib, tashqariga chiqdi. Hovlida harakatsiz turishidan bir ma'no koʻrmagach, koʻchaga yoʻnaldi. Bozorga borib qogʻoz xaltani toʻldirdi-da, shifoxonaga qarab yoʻl oldi. Opasining ahvoli yaxshilangani uchun umumxonaga oʻtkazilgan ekan, kirib uni ziyorat qildiyu soʻng otasini, shu bahonada qaynona-qaynotasini ham yoʻqlashni maqsad qildi.

Hovliga suv sepib salqinlatgan Bobomurod Omonullo kirib kelganida boʻy choʻzib qolgan rayhonlarning gullarini chimdib uzayotgan edi. Tutingan oʻgʻlini koʻrib chehrasi ochildi. Bu dunyoda bir tutingan singlisiyu bir tutingan oʻgʻliga suyanib yashayotgan Bobomurodning quvonishi uchun koʻp narsa zarur emas: singlisining ochiq yuz bilan gaplashib oʻtirishi yoki Omonulloning eshikdan kirib kelishi uning uchun baxtli daqiqalar hisoblanardi.

Omonullo ichkari kirishga unamay ikki qulochli uzun taxtadan yasalgan o'rindiqqa o'tirdi. Bobomu- rod ichkari kirib likopchada gilos ko'tarib qaytdi-da, Omonulloning yoniga o'tirib, likopchani o'rtaga qo'y-di, Omonullo otasining ko'ngli uchun gilosdan totib ko'rdi.

- Opangni Xudo bir qaytib berdi, hozir tuzuk. Dardini ichiga yutaverib, yutaverib yuragini abjaq qilib tashlagan.
 - Kirib ko'rdim, ruhlari tetik.
 - Balki shu bahona bo'lib anavi kasallaridan ham qutulib ketar, a?
 - Kim biladi?..

Omonullo shunday deyishga dedi-yu, tilini tishladi. Otasi umid bilan soʻragan edi, «Ha, tuzalib ketadi», desa bu umid quvvat olardi. U esa mujmal javobi bilan oʻsha umidni ham boʻgʻa qoldi.

- Shunaqa hodisalar boʻlgan, eshitganman, dedi-yu, ammo fursat oʻtgan, umid chinnisi allaqachon yerga tushib, darz ketgan edi. Keyingi gap darzni chegalagani bilan izni yoʻqotmasdi.
 - O'zing qalaysan? Ishingning mazasi yo'q shekilli, a?
 - Ishlab yuribman...
 - Menga gara-chi? Bobomurod shunday deb uning koʻzlariga tikildi.

Yoʻq, Omonullo bu oʻtkir nigohga dosh berolmaydi. Dastlab uchrashganida ham qaray olmagan.

Oʻshanda ovozi rasta boʻlayotgan yoshda edi. Qoʻshni sinfdagi qizga koʻngil qoʻydi. Yursa ham, tursa ham faqat oʻsha qizni oʻylardi. Hatto ota-ona sogʻinchini ham unutgan edi. Qizlar bayrami yaqinlashib, uni sov-gʻa masalasi qiynab qoʻydi. Uning nazarida bayram sovgʻasi barcha muammolarni hal qilib berishi lozim edi. Yechilajak muammolardan biri — qizdan hech boʻlmaganda bittagina oʻpich olishga erishmoqlik edi. Aynan shu birinchi oʻpich umid daryosini toʻsib turgan toʻgʻonni buzar, visolning nurli choʻqqisini in'om etar edi. Ammo... ota-onasidan ajrab yetimxonaga tushgan oʻsmirda

pul nima qilsin? O'ylay-o'ylay chorasini topdi: umrida bir marta, ha, faqat bir martagina o'g'irlik qilish ahdi bilan avtobusga chiqdi. Qaysi cho'ntakda pul borligini aniqlash san'atidan mahrum bu bolaning o'sha kuniyoq qo'lga tushib, qamalib ketishi hech gap emas edi.

Oʻsha kuni, oʻsha daqiqada, xuddi oʻsha avtobusda Bobomurod ham bor edi. Uning ziyrak nigohi qoʻnalgʻada javdirab turgan Omonulloga tushganidayoq, bolaning shum niyatini payqadi. Shu sababli odamlar orasidan oʻtib, orqa eshikka yaqinlashdi-da bolaning yoniga turib oldi. Omonullo titroq qoʻllari bilan duch kelgan choʻntakka tushmoqchi boʻlganida bilagidan mahkam ushladi-da, avtobus toʻxtagunicha qoʻyib yubormadi. Avtobus toʻxtagach, «qani, yur», dedi-da, bolani qariyb sudrab tushdi. Qoʻrqib ketgan Omonullo qarshilik bildirolmadi. U «milisa ushlab oldi, tamom, endi qamaydi», deb oʻylagan, oʻgʻrining qoʻliga tushgani xayoliga ham kelmagan edi.

Bobomurod uni bog' tomon boshlab borib, o'zi o'rindiqqa o'tirdi-da, bolaning ko'ziga tikildi:

- Qani, menga qara-chi, faqat toʻgʻrisini ayt, nimaga oʻgʻirlik qilmoqchiyding?
 Omonullo piqillab yigʻlay boshladi.
- O'chir! Mishig'ingni art! deb do'q urdi Bobomurod. Soqol-mo'yloving chiqib qolibdi-ku, erkakmisan o'zing?! Nimaga yig'lyapsan?
 - Qoʻlimni qoʻyib yuboring...

Qo'yib yuborish o'rniga Bobomurod uning bilagini yanada gattigrog gisdi:

- Ayt, deyapman: nimaga birovning cho'ntagiga tushmoqchi bo'lding?
- Tushmoqchimasiydim.
- Sen oʻgʻil bola boʻlsang mard boʻl, toʻgʻri gapdan qochma. Toʻgʻrisini aytsang, qoʻyib yuboraman, aldamoqchi boʻlsang oʻzingga qiyin. Shu qoʻlingni avval kuydirib, keyin terisini shilib olaman. Kissavurning jazosi shu boʻladi. Aslida-ku, kesish kerak, mayli, yosh ekansan, ayayman, kuydirib qoʻyaqolaman.

Bobomurod xuddi shu ishga jazm qilganday ishonarli ohangda aytib, bolaning esxonasini chiqarib yubordi.

Omonullo bu odamdan osonlikcha qutula olmasligini anglab, yigʻlamsiragan holda:

- Oyim og'ir kasallar, doriga pul yo'g... dedi.
- U ham o'z xayolida bu gapni ishonarli ohangda aytgan bo'ldi. Titroq ovozi ishontirishga undasa-da, ko'zlari alday olmadi.
- Qani, menga qarachi, dedi Bobomurod, bolaning dahanini ushlab. Yana yolgʻon gapiryapsanmi? Mening koʻzlarimga bir qaragin: bular koʻz emas, rent-gen. Toʻgʻrisini aytsang, kerakli pulni oʻzim beraman. Oʻgʻil bola gap shu!

Omonullo yana bir marta aldagach, Bobomurod uning yuziga tarsaki tortib yubordi.

— Sen o'g'ri emassan, sen qo'rqoqsan, sen hezalaksan! O'g'irlik ham qo'lingdan kelmaydi!

Bu gaplar Omonulloning qo'rquvdan yarador qush kabi potrayotgan yuragiga dalda bo'ldi-da, to'g'risini ayta qoldi. Ammo shunda ham qo'li bo'shamadi.

- Endi qo'yvoring, dedi yalinib.
- Hali bizning savdomiz pishmadi, bola-paqir. Senga va'da berdimmi, demak, bajaraman. Qo'linga-ku, pul bermayman. Magazinga boramizu ko'nglingga yoqqan narsani ko'rsatasan, narxiga qaramaysan, million so'm bo'lsa ham olib beraman, o'g'il bola gap bitta bo'ladi! Ungacha bitta-ikkita narsani so'rayman, javob berasan: nima uchun otangga yo onangga aytmading, yo uyaldingmi, a?

Ota-onasiga doir har qanday savol Omonullo uchun g'oyat og'ir yuk edi. Yetti yoshida yetim qolganini aytish chog'ida go'yo uning yuragi to'xtab qolganday bo'laverardi. Otasi bilan onasi ishdan qaytayotganda tushgan avtobus muzlagan yo'lda tiyg'anib, chuqur

jarlik tubida oquvchi anhorga qulagan, ularning murdalari ertasiga chiqarib olingan, erxotinning jasadi uyda bir kecha «mehmon» boʻlib, tongda yerga qoʻyilgan edi. Beli bogʻlangan yetti yoshli Omonullo ikki tobut oldida boʻzlab borgandi.

Hozir notanish odamga shularni aytib berishi kerakmi? Ogʻir boʻlsa ham aytgisi keldi. «Rahmi kelib qoʻyib yuborar» degan niyatda uzuq-yuluq soʻzlar bilan holini bayon qildi. Amakisinikida yarim yil yashab, soʻng bolalar uyiga berilganini ham yashirmadi. Bu safar Omonullo adashmadi: chindan ham Bobomurodning unga rahmi keldi. Chap qoʻli bilan boshini siladi-da, yoniga oʻtirgʻizdi.

— Sen faqat qochib ketma, bola-paqir, — dedi horgʻin ovozda, — men milisa emasman. Teringni ham shilmayman. Shunchaki seni qoʻrqitish uchun aytgandim. Agar rost gapirayotgan boʻlsang, hayoting menikiga oʻxshab ketarkan. Men ham senga oʻxshab gʻirt yetimman. Sen bir pas qimirlamay oʻtir. — Bobomurod shunday deb sigaret tutatdi.

Dastlab «bola oʻzi istab shu koʻchaga kiryapti, shogirdlikka bop ekan», deb oʻyladi. Sigareta chekib boʻlgach, doʻkonga borib, sovgʻani olib berdi, soʻng Omonulloni bolalar uyiga kuzatib qoʻydi. Eshik ogʻ-zida:

— Biron nimaga muhtoj boʻlsang, menga ayt, — deb tayinladi. Keyin: — agar xohlasang, meni «amaki», de. Xohlasang, tarbiyachilaringdan soʻrab uyimga olib ketay, bugun mehmonim boʻl, — dedi.

Omonulloga bu taklif ma'qul keldi. Omonullo «bu odamning ota-onasi ham bir kunda halok bo'lishgan ekan», deb o'yladi. Bobomurodning o'smir chog'ida ilk marta qamalganida isnod o'tida kuygan ota-onaning bir yil ichida oldinma-keyin qaytish qilganini ancha keyin, aniqrog'i, Fotimaga uylangach, qaynotasidan eshitib bildi. Bobomurodning o'g'ri ekanini esa bu xonadonga ikkinchi marta kelgan tuni tasodifan bilib qoldi. Yarim tunda behos uyg'onib, sherigi bilan maslahatlashayotgan Bobomurodning gaplariga quloq tutdi. Avvaliga qo'rqdi. Ertalab nonushta ham qilmay qochvormoqchi edi, Bobomurod qo'lini ushlab, to'xtatdi:

- Hech qachon birovlarning gaplariga oʻgʻrincha quloq solma, xoʻpmi? dedi poʻpisa ohangida. Gap poylamasang ham kimligimni oʻzim aytardim. Men gʻirrom oʻynaydigan dayuslardan emasman.
 - Endi men ham o'g'ri bo'lamanmi?

Kechasi bilan oʻylab chiqqan shu gapini aytishi bilan yuziga zarbli tarsaki tushdi. Soʻng Bobomurod sochini changallab tortdi. Omonulloning koʻzlarida tirqirab yosh chiqdi.

— Kim aytdi buni senga, ahmoq! Bilib qo'y: sen o'g'ri bo'lmaysan, o'qiysan, sen odam bo'lasan!

Bobomurod shunday degach, Omonulloning sochini qo'yib yubordi. U «Sening odam bo'lishing uchun hamma narsadan voz kechaman, hatto hunarimni ham yig'ishtiraman», demoqchi bo'ldi-yu, «bola buni tushunmaydi», degan fikrda tilini tiydi-da, «O'tir, choyingni ich!» deb buyurdi.

Chindan ham Omonulloni deb oʻgʻirlikni tashlamoqchi edi. To qamalguniga qadar ahdida turolmadi. Qamalgach, ozodlikda qolgan sheriklariga xat chiqarib, Omonullodan xabar olib turishni tayinladi. Qamoqdan boshqa hunar qilish ahdi bilan chiqdi. Yoʻlda Ayolni uchratgach, bu ahdi qat'iylashdi.

Omonullo mustaqil ish boshlaganida Bobomurod unga maslahatlar berib turdi. «Tabib — tabib emas, boshidan oʻtgan — tabib», deganlaridek, jinoyat olamining nozik yerlarini Bobomurod yaxshi bilardi.

- Menga qara-chi, menga qara, deyapman, Bobomurod oʻng qoʻli bilan Omonulloning iyagini ushlab, koʻzlariga tikildi: Ishlaring «besh»ga oʻxshamayapti, bola-pagir?
 - «Besh» boʻlmasa, «toʻrt»dir-da, deb hazillashmoqchi boʻldi Omonullo.
 - «To'rt»ga ham tortmaydi. Qanaqa ish ko'ryap- san?
 - Qotillik. Ikki kishi oʻldirilgan.

Omonullo shunday deb ishning bayoni, gumonu taxminlarini ma'lum qildi.

- Hali ham xomsan, dedi Bobomurod bir-ikki savol berib, javob olgach. Sen, bola-paqir, oʻqishda yo yomon oʻqigansan, yo darslardan qochib yurgansan, yo eski pichoqqa sop ham boʻla olmaydigan domlalardan ilm olgansan. Har holda boʻsh kallang, boʻshligicha qolgan. Menga oʻsha uyni bir koʻrsatmaysanmi?
 - Mumkin emas.
- Men sendan «mumkinmi yo mumkin emasmi?» deb soʻraganim yoʻq. Odam boʻlaman desang, harakatingni oʻsha «mumkin boʻlmagan» ishlardan boshla. Sen menga uyni koʻrsat, men sening xomligingni isbotlab beraman. Tur, ketdik.

TUTQUNLIK

(Qotillikdan avvalroq sodir bo'lgan voqea)

Koshak Qo'tosga «xushxabar» yetkazgan, so'ng Nuriddinga hamla qilayotgan paytda Tengiz hibsxonada moskvalik yigit so'roqlariga javob berayotgan edi.

Ularning savol-javoblari dastlab samimiy suhbat tarzida boshlandi:

Ahvollar qalay, knyaz? — dedi yigit kulimsiragan holda. — «Knyaz» deb yanglishmadimmi?

Tengiz unga duch kelishi bilan boshdan-oyoq razm solib, kimligini aniqlamoqchi boʻldi: kiyinishidagi orastalik, oʻzini kibrli tutishi, ayniqsa qarashidagi bezovtalikdan bildiki, u jiddiyroq idoradan. Boshliqqa qarab, mensimagan holda «siz boʻshsiz», deb qoʻyishi taxminini tasdiqladi. «Suhbat»ning jiddiy boʻlishini fahmlagan Tengiz uning kulimsirashiga mos jilmayish bilan javob berdi:

- Yanglishmadingiz, knyazman.
- Bu sizning lagabingizmi?
- Yo'q, bu mening martabam, men knyazlar avlodidanman.
- Qiziq, Dog'iston tarixida knyaz Alievlar borligini olimlar bilishmas ekan-da?
- Men ona tomondan knyazman. Knyaz Ibrohimbekning avlodiman.
- Shundaymi? yigit bu yangilikdan ajablanmay, bamaylixotir ravishda sigaret tutatib, Tengizni ham lutfan siyladi. Siz sanqi oʻgʻrilardan emassiz, Aliev, oʻqigan odamsiz. Moddiyunchilik nuqtai nazaridan qarasak, tomiringizda knyazlar qonining oqishi sariq chaqalik gap. Aksilmoddiyunchilik nuqtai nazaridan qarasak esa, nasli toza odamning pastkash oʻgʻri boʻlishi aqlga toʻgʻri kelmaydi. Bu falsafaga nima deysiz?
- Kitobdagi falsafa hayot falsafasiga toʻgʻri kelavermaydi. Hayot qonunlarini falsafa vujudga keltirmagani qanchalik rost boʻlsa, falsafani odamlar yaratgani shunchalik haqiqatdir. Odamlar esa adashuvchilardir.
 - Hayot qonuni yanglishmaydimi?
 - Yo'q. «Biz olam kitobini yanglish o'qiymizda, «u bizni aldaydir», deymiz.
 - Shundaymi? Hali ham durust ekansiz falsafaga.
- Bu mening gapim emas, hindlarning Thakur degan yozuvchisi boʻlgan, eshitganmisiz?
- Bo'lsa bordir. Aytingchi, knyaz, tun bilan kun o'rnini almashtirish mumkinmi? Mumkin emas, a?

- Mumkin boʻlganda nima hodisa yuz beradi? dedi Tengiz. Yana oʻsha kun, yana oʻsha tun.
- Ha, ana endi o'zingizga keldingiz. Siz «olam kitobini yanglish o'qiymiz», deb turibsiz. Holbuki, aslida hammasi yanglish tuzilgan. Dunyo asli makr poydevoriga qurilgan imorat.
- Sizdan bunday gap eshitish menga gʻalati tuyul-yapti, dedi Tengiz. Biz, sharqliklarda makkor-lik ojizlar ishi, deyiladi. Siz dunyoni ojiz qilib qoʻyyapsiz.
 - Ha. Siz ana shu ojizlikdan foyda ko'rmaysizmi?
 - Men?
 - Ha, aynan siz va sizning hamtovoqlaringiz.
- Bizga xos olam bilan, siz yashayotgan olam bir xil falsafaga, bir xil hayot qonuniga boʻysunmaydi.
- Bilaman. Siz «insonlar taqdirini faqat biz hal etishga haqlimiz», deb da'vo qilasiz. Hech mahal itbaliq osmonga ustun boʻladimi? Hatto nahangning qoʻlidan kelmaydi bu ish. Fikrimga qoʻshilasizmi?
- Qoʻshilmasdan boʻlak ilojim yoʻq. Qoʻli kishanlangan odam bilan ozod odam teng emas-ku axir?
- Deylik, kishan mening qoʻlimda, siz esa ozodsiz. Hayot uchun nima oʻzgaradi? Xuddi kun bilan tun almashganday boʻlmaydimi? Shunday ekan, olam kitobi ustida bosh qotirib, bahslashmaylik. Nima deysiz?
- Toʻgʻri. Har holda bir oʻgʻri bilan falsafa bobida bahslashaman, deb kelmagandirsiz. Bu yerda gaplashayotganingizga qaraganda, jiddiy masala borga oʻxshaydi.
- Siz uchun jiddiy tuyulishi mumkin. Aslida esa unday emas. Biz sizga, yana yayrim doʻstlaringizga, yigitning bu safar «hamtovoqlaringiz» oʻrniga «doʻstlaringiz» deganiga Tengiz ahamiyat berib, yanada sergak tortdi, hamkorlikni taklif etmoqchimiz.
 - Oʻgʻrilarning qonuni hukumat bilan hamkorlikka yoʻl bermaydi, buni bilmaysizmi?
- Bu gaplarni qo'ying, knyaz. Qonunni o'zgartirish mumkin yoki umuman bo'ysunmaslik ham mumkin. Biz o'rtaga juda ko'p narsa tikkanmiz siz ozod bo'lasiz, boylikka erishasiz, istagan chet mamlakatga bemalol chiqib ketasiz.
 - Ha, koʻnga zoʻr narsalar tikdingiz. Yutib olish uchun nima qilishim kerak?
 - Siz avval roziligingizni bering. Qolganini keyin gaplashamiz.
 - Aytaylik, rozi bo'ldim...
 - Meni «aytaylik...» ganoatlantirmaydi. Menga mard o'g'rining gapi kerak.
- Mard oʻgʻrining... koʻzlari ochiq boʻladi. Baland minoraga chiqib olib koʻlmakka kalla tashlamaydi. Daryogami, dengizgami boshlab bormasangiz ham, hech boʻlmasa uzoqdan koʻrsating, ma'qul kelsa shoʻngʻishga tayyorlanaylik.
- Uzoqdanmi? Ha, uzoqdan koʻrsatishimiz mumkin. Sizning togʻliqlaringiz bir vaqtlar yoppasiga koʻchirilganlar. Oʻttiz besh yildan beri ezilib yashaydilar. Hozir ular yashayotgan yerning egalari ularga qarshi zulm tayyorlayaptilar. Siz sheriklaringiz bilan ularni himoya qilasiz.

Bu mavhum gapni eshitib Tengiz oʻylanib qoldi, «Murik»ning aytganlarini esladi. Yigit javob ber, deb shoshiltirmadi. Tengiz togʻliqlar kim ekanini, qaerda zulm tayyorlanayotganini fikran aniqladi. Zulm yerliklar tomonidan emas, boshqa tomondan hozirlanayotganini ham fahmladi-da:

- Hukumat himoya qila olmaydimi? deb soʻradi.
- Hukumat aralashgunicha sizlarning himoyangiz kerak boʻladi. Xalqaro vaziyat ogʻir hozir. Birdaniga biz aralashsak, katta milliy shov-shuv boʻladi. Darrov chet el burnini suqmoqchi boʻladi.
 - Shov-shuv deng? Men esa inglizlarning magolini esladim.

- Qani aytingchi? Aytavering, siz bilan suhbatlashish menga yoqyapti.
- Inglizlar aytisharkanki, agar itni bexos oʻldirib qoʻysangiz, uni quturgan, deb e'lon qiling, shunda unga hech kim achinmaydi.

Yigit bu gapni eshitib astoydil kuldi.

- Inglizlar balo xalq, dedi u. Ular kamdan kam hollarda adashishadi. Siz esa chuqurlashmang. Chuqurlashish halokat belgisi. Taklifimga hozirning oʻzida javob bering, demayman. Mayli, oʻylab koʻring. Xotirjam oʻylang, deb bu yerga taklif qildim. Sizga maslahatim: katta oʻgʻri boʻlsangiz ham katta ketmang. Eshitishimga qaraganda bu yerda «Bifshteks», «Choʻmich» laqabli oʻgʻrilar boʻlgan ekan. Ularni kimdir oʻldirganmish. Biz hozircha bunga ahamiyat bermayapmiz. Bitta-ikkita oʻgʻri oʻlsa oʻlibdida, nima dedingiz? Ammo siz yaxshi koʻruvchi sharqliklarning bitta gapi bor: aytadilarki, hokimlarning gʻazabi olovdek boʻlib, ozgina shamol tursa alanga olarkanu bu alangani minglab chelak suv bilan ham oʻchirib boʻlmas ekan. Siz shamoldan ehtiyot boʻling, knyaz.
- Maslahatingiz uchun tashakkur, lekin aytingchi, nima uchun bu ishga meni tanladingiz? Bunaqa taklifga jon-jon deb koʻnuvchi shaltoqlar koʻp-ku?
- Biz, knyaz, shaltoqlar bilan hamkorlik qiluvchilardanmasmiz. Shaltoq, deb toʻgʻri aytdingiz. Ish tugagandan keyin ularning shaltogʻini kim tozalaydi? Men sizga dengizni koʻrsatdim, siz esa kalla tashlab tubiga yetaman, deb ovora boʻlmang. Bir oz suzib rohatlaningu sohilga chiqib, soʻng istagan ishingizni qiling. Boshqa narsani oʻylamang.

Yigit shunday degach, yana lutf qilib unga sigaret tutdi. Tengiz bu karamdan minnatdor ekanini bildirib, kiborlarcha bosh egib qoʻydi.

Moskvalik yigit marhamat eshiklarini haddan ziyod katta ochdi: o'ylab ko'rmog uchun Tengizga keragidan ham ko'prog fursat berdi. Quyosh nuri tushmaydigan, uzunasiga uch, eniga ikki gadam keluvchi hibsxonada vagt o'lchovi yo'g edi. O'limtik chirog nuri bunda madfun odamga lahadda emas, yorug' dunyoning bir katalagida jonli holda yotganini dalolat qilar edi. Tengiz hibsxonaga kiritilayotgan ovqatlarning soniga qarab oradan ikki kun o'tyapti, deb chamaladi. Vaqt o'tayotgani uchun ko'p ham yuragi siqilmadi. Ikki-uch kun nima ekan, dastlabki qamalganida bundan torroq, zaxroq, sassiqroq hibsxonada o'n bir oy yotib ham sinma- gan — sheriklarini sotmagan edi. Mana shu kabi saboti uchun ham boshqalarga nisbatan ertaroq toj kiyish martabasiga yetgan edi. Hozirgi ahvoli o'shandagisiga taggoslansa, rohatlanib dam olish uchun yaratilgan sharoit deb ham atash mumkin. Tengiz ana shu sharoitda moskvalik yigitning har bir so'zini fikr chig'irig'idan o'tkazib tahlil qildi. Tog'liklarni himoya qilish haqidagi gaplari uni ko'p o'ylashga majburlamadi. Yigitning magsadni ishora bilan emas, balki yuzdan sakson foizini ochiq bayon qilishi uni sergaklantirdi. Qimorda «qartani ochib qo'yib o'ynash», degan gap bor. Zo'r kelganda, raqibga ruhiy ta'sir ko'rsatish uchun to'rt gartaning uchtasi, yoki uchning ikkisi yoki ikkining biri ochib qo'yiladi. Mardlar to'qnash kelgudek bo'lishsa barcha gartalarni ochib go'yishlari ham mumkin, kamdan kam hollarda sodir bo'luvchi bu vaziyatning oqibati ham mardona tugaydi: yo mol ketadi yo jon. Ba'zida esa... ikkalasi ham baravariga... Moskvalik yigit shunday o'yin gilib, javobni kutyapti.

Yigit kirib qolar, deb kutib yotganida eshik ochilib, Koshakning kuydirgan kallani eslatuvchi tirjaygan basharasi koʻrindi. Uning oʻng qoʻlida bir shisha aroq bilan istakon, chap qoʻlida esa qogʻozga oʻrogʻlik yeguliklar bor edi.

- Omonmisan, Knyaz, u shunday deb qoʻlidagilarni soʻri ustiga qoʻydi-da, Tengizni quchoqladi: Sogʻintirib yubording-ku, a?
- Sen sog'ingan bo'lsang, chakki odam emas ekanman,— dedi Tengiz uning ko'zlariga sinovchan tikilib. Koshak bu nigohga dosh berolmay ko'zlarini olib qochdi.

Sarosimasini yashirish maqsadida chaqqonlik bilan shisha ogʻzini ochib, istakonni yarimlatib quydida, «Sogʻ boʻl, Knyaz!» deb bir koʻtarishda boʻshatdi. Soʻng istakonni toʻldirib Tengizga uzatdi.

Tengiz uch qultum ichib, istakonni so'ri ustiga qo'ydi-da:

- Koshak, nimalar boʻlyapti, sen bilmaysanmi? deb soʻradi.
- Bilmadim, jinilari qoʻziganga oʻxshaydi. Meni ham «etap»ga tirkab qoʻyishibdi. Bugun-erta joʻnatvorishadi shekilli? «Murik»ning oʻlimidan baribir xitlanishgan. Hammamizni har tomonga otishsa kerak?
 - Xayrlashgani kirdingmi? dedi Tengiz undan nigohini uzmagan holda.
- Shunaqa desak ham bo'ladi. Knyaz, ikkovimiz hisob-kitobni to'g'irlab qo'yishimiz kerak. Sen Bifshteksni bekordan bekorga o'ldirtirib yubording.
 - O'ldirtirganim yo'q, o'zi lalaydi, uning o'limi bir tasodif.
- Tasodifmi, yoʻqmi baribir sening qoʻlingda oʻldi. Men u bilan katta ishlarni moʻljallab qoʻyuvdim. Biladiganlarini oʻzi bilan olib ketdi. Men koʻp narsa yoʻqotdim. Shuning tovonini toʻlashing kerak.
- Koshak, sen bu choʻpchagingni boshqa biror laqmaga borib aytgin. Bifshteks senga oʻxshagan ahmaq bilan sherik boʻladigan ahmaq emas edi. Gapni aylantirmaginda, maqsadingni ayt.
- Knyaz, sen uchun hamma ahmoq. Faqat sengina aqllisan. Xoʻp, agar chindan ham aqlli boʻlsang, men ahmoqqa anavi toʻnka chuchmekning boyligi qaerga berkitilganini aytasan.
 - Aytmasamchi?
 - Unda to'nkaga qiyin bo'ladi. Jonini sug'urib bo'lsa ham bilib olaman.
 - Unga tegma.
 - Aytasanmi?
 - O'ylab ko'raman.
 - Yaxshi. Shu aroqni quritgunimizcha o'yla.
- Koshak, sen «etap»ga tushdim, deyapsan. Agar Vorkutaga borib qolsang nima boʻladi? Axir boylik janubda-ku?

Koshak o'tirgan yerida bir qimirlab olib «ishing bo'lmasin», deb g'o'dirandi. Bo'lajak fitna qaerda tayyorlanayotganini aniqlash uchun Tengizga shuning o'zi kifoya qildi. «Demak, Koshakka ham aytishgan, u ahmaq jon-jon deb koʻngan. Unda nima uchun menga ham ay-tishyapti? Nima uchun bu yerga tigib qo'yishdi?» Bu savollariga ro'parasidagi Koshak ham javob berishi mumkin bo'lsa-da, «Bu yerga tushib qolishimda shu taviyaning xizmati bor», degan fikrdan Tengiz uzoq edi. Boltiq bo'ylaridan kelganlarni kaltaklash oddiy ig'vo emas, balki undanda zo'rroq fitna uchun «odam tanlash» marosimi yoki sinov-tajriba ham ekanini u bilmasdi. Ana shu marosimda o'zini ko'rsatgan Koshak sinovdan o'tib, kelgusi zulm uchun ayni mos deb topildi. Suhbatda Koshak ko'p ham tarang qilib o'tirmadi. «Qaerga? Nima uchun?» deb ham garang qilmadi. «Pul, ozodlik, chet el» uning uchun kifoya edi. Ammo o'ziga «ganjig» degan «unvon» tagalishini bilib, o'zini himoyalash uchun bir-ikki shart go'ydi: shartlardan biri — Knyazni yoʻq qilish yoki chet elga oʻtib ketgunicha hibsdami, «etap»dami saqlash edi. Shuning barobarinda yana bir-ikki zirapchalarning bahridan o'tishga izn so'radi. Ular ko'ndilar. Koshak «shartlarini to'la bajarishadi, Knyaz shu yerda chiriydi», deb o'ylab yanglishdi. Tengizga ham shunday taklif aytishlari, uning rozi bo'lishi mumkinligini u hisobga olmadi.

Aroq ichib bo'lingach, Koshak «Qani, ayt!» deb baqraydi. Tengiz gapni chalg'itishga urindi, «ertaga kel», deb ham ko'rdi. Koshak g'azablana boshlagach:

Aytaman, faqt men bilan teng bo`lishasan, — deb shart qo`ydi.

— Bekor aytibsan! Senga sariq chaqa ham bermayman, — dedi Koshak.

Shu tarzda savdolashib, boylikning toʻrtdan biri Tengizga beriladigan boʻlgach, sir oshkor etildi.

Koshak hibsxonadan quvongan holda chiqib, Tur-sunalini siquvga oldi: hali kaltak zarbalaridan toʻla tuzalmagan, bitta chertgulik holi bor odamni he yoʻq, be yoʻq boʻyniga chilvir tashlab boʻgʻdi. Tursunali bilan Tengizning gaplari bir yerdan chiqqach, Koshak mamnun jilmaydi.

Tengiz qachonlardir shunday boʻlishini bilgani uchun, boshqalarni chalgʻitish maqsadida Tursunalini pishitib qoʻygan edi. «Murik»ka aytilgan joyda boylik boʻlmasada, boylikka moʻljallangan oʻra mavjud edi. Keyin aytilgan yerda esa oʻshanday oʻra ham yoʻq edi.

Toʻgʻri yoʻldan borayotgan odam qoqilsa, nari borsa yiqilib, biron yeri lat yeydi. Ularning yoʻlidagi kimsa toygudek boʻlsa yiqilmaydi, peshonasi gʻurra boʻlmaydi — jonini berib qoʻya qoladi. Bu yoʻlda ochiq koʻz bilan, teran fikr bilan yurishga odatlangan Tengiz Koshakning qiligʻidan hayratga ham tushmadi, gʻazablanmadi ham. U chap kuragi ostiga pichoqni begona emas, oʻzining «birodar»²8laridan biri sanchishini kutib yashardi. Bir kunmas bir kun ramziy ma'nodami yoki chin ma'nodami shunday boʻlishiga ishonchi komil edi. Faqat aniq vaqtini bilmasdi. Koshakning hozirgi harakati oʻsha ramziy ma'nodagi pichoq sanchish edi. Ramziy ma'no bilan chin ma'no orasi esa uzoq emas—qilcha boʻlsa bordir. Roviylar derlarki, «Ollohning sherigi bor», deyishdan saqlanuvchilar hech qachon bir-birlariga dushman boʻlmaslar». Tangrini tanimagan inson doʻstni taniydi, deb ishonuvchi odam yerga ekilgan tosh yomgʻir yogʻishi natijasida koʻkarib chiqdi, degan gapga ham ishonishi kerak boʻladi. Birodarlik — bir-birlariga sadoqat asosiga qurilgani bilan, vaqti kelsa zulm oloviga koʻmishdan ham qaytilmasligini Tengiz bilmaydi, deysizmi?

Tengiz Koshakning pattasini qoʻliga berib yuborgach, oʻzining taqdirini oʻylay boshladi. Oʻgʻrilar qonuniga sodiq qolib moskvalik yigitga rad javobini aytsa boshi uzra toʻplanayotgan abri balo oʻt yogʻdirib uni mahv etmogʻi tayin. «Hech narsadan qoʻrqmayman», deb kerilib yuruvchi har bir birodari kabi Tengiz ham bir narsadan — oʻlimdan qoʻrqardi. Ular oʻlim ostonasidagi tan azoblaridan emas, dunyoni, uning ishvali hayotini erta tashlab ketayotganlaridan qoʻrqishardi. Doʻstlari kabi Tengiz ham «oʻlim — gʻam-tashvishli hodisa emas, oʻlim — nikoh kechasidir», deguvchi naqldan benasib edi. Oxirat va abadiy hayot nima ekanini bilgani bilan amal qilmovchi Tengiz uchun oʻlimning munis boʻlmogʻi amri mahol edi. «Oʻlim — Haqni sevganlar uchun toʻy va bayram, nafsni sevganlar uchun esa gʻam-alamdir», deyilganda Tengiz kabilar nazarda tutilganmikin? Oʻlimni beadad gʻam-alam deb fikr qiluvchi Tengiz hayotni arzon-garovga pullashni istamadi. Moskvalik yigit kirganida bir oz gapni chuvalagan boʻldi-da, bitta shart qoʻydi:

— Vazifani bajarganimdan keyin yana qamoqqa qaytarasiz. Muddatim oxirlab, ozodlikka chiqqanimdan keyin chet elga ketaman.

Yigit bu gapni eshitib, ma'noli jilmaydi:

- Knyazlarga xos fikr yuritdingiz, Knyaz. Men sizdan aynan shunday javob kutgan edim. Endi Knyaz, ishga dahlsiz bir savol soʻramoqchiman, oʻzim uchun bilishni istadim: nima uchun hamkorlikka rozi boʻldingiz? Qoʻrqdingizmi?
- Qoʻrqdim?.. Yoʻq. Savolingizga javob oddiy bu ishni men qilmasam boshqalar qilishadi. Men toʻgʻon emasman, oqar suv boʻlganim durust.

Bu yolg'on gap Tengizning o'ziga ham ma'qul kelib, jilmaydi.

-

²⁸ Ularning tilida «Bratva» deyish rasm boʻlgan.

Tengiz rozilik bergan boʻlsa-da, hibsxonadan ozod etilmadi. Moskvalik bu masalaga izoh bermadi. Tengiz qamoq lageri hibsxonasidan chiqqach, Koshak bilan yana ikki yigitning «etap»ga joʻnatilganini Qoʻtosdan eshitdi.

- Hamzatingga koʻp osildi. Ammo men yoʻl bermadim, dedi Qoʻtos. Sening ruxsatingsiz yana bir ish qildim: Koshakning qanjiqligini teletaypga qoʻydim.
- Boplapsiz. Endi «politbyuro»ni toʻplab unga hukm chiqarishimiz kerak. Hukmni balki oʻzim ijro qilarman.
 - Qanaqasiga?
- Agar ularning niyatlarini toʻgʻri payqagan boʻlsam, meni ham erta-indin «etap»ga qoʻyishadi. Balki u bilan uchrasharman. Agar men haqimda «qanjiq» degan gap koʻtarilib qolsa, ishonmang. Boshqalar ham ishonishmasin. Agar ularning shartiga koʻnsam, bu roziligim Koshak bilan uchrashib, hisob-kitobni toʻgʻrilash uchungina boʻladi.
 - Qanaqa shart?
 - Buni hisob-kitobdan keyin aytaman.
 - Koshakni borgan yerida saranjomlashadi, sen urinma, Knyaz.
- Yoʻq, u meni haqorat qildi. Qasos faqat mening qoʻlimda. Siz... Hamzatga koʻz-quloq boʻlib turing. Mehnatingizga achinmaysiz, undan zoʻr oʻgʻri chiqadi, bunga men kafilman.

Tengizning ishonchli ohangda aytgan gaplari Qo'tosda shubha uyg'otmadi.

- Chuchmekning boyligi nima bo'ladi? Koshak uning atrofida ham aylandi.
- Uning boyligi bizniki, oʻrtaniki. Unga hech kim ega chiqa olmaydi. Tengiz bu masalani maydalab tushuntirib oʻtirmadi. Qoʻtos ham «ochiq ayt» deb zoʻrlamadi.

QULFNING KALITI

Samandar Ochilov yashagan uyga yaqinlashishganda Bobomurod toʻxtab, atrofga sinchiklab razm soldi-da:

- Ko'cha gavjum emas ekan,
 deb qo'ydi. Zinadan ko'tarilayotganda esa yana takrorladi:
 Ko'cha qavjum emas ekan.
- Bunga o'sha kuniyoq e'tibor berganman. Begona odamni payqash oson, dedi
 Omonullo.
 - Durust, buni bilar ekansan.
- Bir-ikkita darsga kirib oʻqishga toʻgʻri kelgan,— deb javob berdi Omonullo piching bilan.

U eshik gulfiga kalit solayotganida Bobomurod har bir harakatini diggat bilan kuzatdi.

- Kalit kimniki? deb so'radi u, eshik ochilgach.
- Juvonning otasiniki. Birinchi kuni olgan- man.
- Otasi kelganda eshik ochiq ekanman yo qulfmi?

Omonullo bu savolni eshitib, peshonasiga bir shapaloq urgisi keldi: shu oddiy narsani Toshboltadan soʻramaganiga afsuslandi.

- Qulf bo'lgan, dedi Bobomurod xuddi o'ziga o'zi gapirayotganday. Ochiq bo'lganida o'liklarning sassig'i chiqishi bilan qo'shnilar bilishardi. Bobomurod shunday deb qulfni kuzatdi: odamlaring qulfni olib tekshirishmabdi-ku? Qulfni nimada ochib kirgan? O'zining kalitidami yo begona kalitdami yo mixochqichdami? Tekshirtirmaysanmi?
 - Tekshiringlar, devdim, deb oʻzini oqladi Omonullo.
- Sen deyaverasan. Ular esa o'z bilganlarini qilaveradi. Sen eng avvalo o'zing kriminalist bo'lishing kerak. Qara, kulfni mahkamlab turgan burama mixning ariqchasiga

bo'yoq to'lib qolgan. Buragich tegmagan. Demak, qulf olinmagan, tekshirilmagan. Qani, ichkari kir, ko'rsat.

Omonullo oshxona tomonga o'tib, o'liklar yotgan yerni ko'rsatdi. Bobomurod uning so'zlarini eshitayotgan bo'lsa ham, uncha e'tibor bermay, yuvinish xonasini qayta-qayta ko'zdan kechirdi-da:

- Bular kirishganida qotil shu yerda yashirinib turgan, eshikni avval erkak ochgan, dedi.
- Avval ayol ochgan boʻlishi ham mumkin. Qotilni koʻrib, dod deganicha qochgandir, keyin erkak qaraganu koʻkragidan pichoq yegan. Keyin ayol...
- Balki shundaydir. Har holda «oʻynashlar maishat qilib oʻtirishganda yoki yotishganda eri kirib qolganu...» degan taxminni bekor qilganing toʻgʻri. Bu yerga «oʻynash», «rashk» degan gap sigʻmaydi.

Bobomurod boshqa uylarni ham erinmay kuzatib chiqdi.

- Ayolning qulog'idan, barmog'idan taqinchoqlar olingan bo'lsa... o'g'rining ishi bo'ladi, Bobomurod shunday deb Toshboltaga ajratilgan xona ostonasida to'xtab qoldi. Deraza tomondagi javonga, uchi bir oz qayrilib qolgan qilamga tikildi:
 - Javonni senlar surdilaringmi?
 - Yoʻq, joyida qimirlamay turibdi.
- Xonada shuncha bo'sh joy turib, javon hech zamonda derazaga taqab qo'yiladimi? Bobomurod shunday deb «javon avval qaerda turgan bo'lishi mumkin?» deb chamaladi, so'ng devorga yaqinlashib jimir-jimir gulli qog'ozlarga bitilgan harflarni o'qimoqchi bo'layotganday tikildi: Javon uzoq vaqt mana bu yerda turgan. Yaxshiroq qaragin, chang izlarini ko'rasan. Endi pastga qara: gilamning chetlarini javon bosib turgan. Uni kim, qachon surgan?

Bobomurod savoliga javob kutmay gilamning bir uchini ehtiyotlik bilan tutdi-da, Omonulloga «bu uchini ushla», deb buyurdi. Ikkovlashib gilamni oʻrab, chetga surdilar. Uy oʻrtasidagi toʻrtta pol taxtaning koʻchirilganini aniqlash uchun kriminalist boʻlish shart emasdi. Bobomurod «Qalaysan endi?» degandek Omonulloga qarab qoʻydi-da:

— Hech mahal pol taxtaning buragich mixlar bilan qoqilganini koʻrganmisan? — deb soʻradi.

Omonullo undan ko'zlarini olib qochdi. Xuddi shu yerda o'sha kuni Toshboltaning jomadonlari turgan, shuning uchunmi, gilamni ko'tarib qarash hech kimning xayoliga kelmagan edi.

— Odamlaringni chaqir, tekshirishsin. Bu yerda nimadir boʻlgan, — dedi Bobomurod. Omonullo navbatchiga qoʻngʻiroq qilgach, «Anavi vunderkind bolangni bir koʻrmaymizmi?» — deb taklif qildi.

Omonulloga bu taklif ma'qul keldi. Aslida Samandar bilan bo'lgan uchrashuvdan so'ng yuqori qavatga ko'tarilmoqchi edi. Vaqt ziqligi uchun «bola yana ezmalanib, aql o'rgatishni boshlasa ishlarim qolib ketadi», deb uchrashuvni keyinroqqa surgan edi. «Hozir ayni payti» degan fikrda yuqoriga yo'l boshladi. Qo'ng'iroq tugmasiga qo'l yuborganida ichkaridan «kiravering, eshik ochiq» degan ovoz kutdi. Kutgan taklif eshitilmagach, ajablangan tarzda qo'ng'iroq tugmasini bosdi. Ikkinchi marta bosishga ulgurmay eshik ochilib, past bo'yli, ozg'in, rangpar ayol ko'rindi-da, «kelinglar», deb ularga xavotir bilan qaradi. Omonullo o'zini tanishtirgach, «Abduqayum bilan gaplashmoqchi edim», deb maqsadini aytdi. Ayol Bobomurodga bir oz tikilib qaradi-da, «kiringlar», deb ichkariga chekindi.

Omonullo ichkari kirib Abduqayumning bo'sh karavotiga ko'zi tushdi-yu, ko'ngliga noxushlik oraladi. Bo'sh karavot, ayolning horg'in ko'rinishidan xayoliga turli fikrlar yog'ila boshladi. Ayol ko'rsatgan joyga o'tirgach:

- Abduqayum qaerdalar? deb so'radi.
- Surat ishlayapti, hozir chiqadi. Uning ovunchog'i shu...
- Siz onalari bo'lsangiz kerak?
- Ha.
- Avval kelganimda yolg`iz ekan.
- Aytdi. Men ishda edim. Adamiz safardalar... Ayol nogiron bolasini yolgʻiz tashlab ketganidan oʻngʻaysizlanib izoh berdi: Yaqinda ishga kirdim. Avval uyda edim. Abduqayum «katta boʻlib qoldim, oʻzimni oʻzim eplayman», deb zoʻrladi. Hadeb atrofida parvona boʻlishim ham yoqmay qoldi shekilli. Shu bolamning koʻngliga qaraymanda. Nomigagina ishlayman. Uch-toʻrt soatga borib kelaman.

Ayol gaplarini tugatmay, ichkaridan Abduqayumning «Oyijon, men hozir tugataman, mehmonlarga choy berdingizmi?» degan ovozi keldi. Ayol «xoʻp, jonim», deb qoʻyib javon tortmasidan oq dasturxon olib stol ustiga yoydi. U oshxonaga chiqqach, Bobomurod oʻrnidan turib darazaga yaqinlashdi-da, koʻchaga qarab oldi.

Bir piyoladan choy ichishga ulgurishmay ichkari xonadan Abduqayumning «Oyijon, men boʻldim», degan ovozi eshitildi. Ayol oshxonadan qariyb yugurib chiqib eshikni ochdi-da, chiroqni yoqdi. Keyin ichkari kirib aravachada oʻtirgan oʻgʻlini olib chiqdi. Abduqayum ochiq chehra bilan salom berib, xuddi yosh boladek quvnab ketdi.

— Ertalab kelganingizda uchrasharmikinsiz, devdim. Chiqmaganingiz yaxshi boʻldi, hozir sizga «syur-priz» tayyorlab qoʻydim.

Abduqayum shunday deb «bu kishi kim?» degan ma'noda Bobomurodga qarab oldi.

- Ustozim... dedi Omonullo o'qay otasini tanishtirib.
- Siz Samandar akamni qamab qoʻymadingizmi ishqilib? dedi Abduqayum mugʻombirlik bilan jilmayib.
 - Yoʻq. Qamashim kerakmidi?
 - Shunaga xayolingiz boʻlgan-ku, toʻgʻrimi?
 - Toʻgʻri. Lekin menda xayol emas, gumon boʻlgan.
- Hammasidan ham ana shu gumon yomonda. Gumon bir tomondan haqiqatga qoʻshni, ikkinchi tomondan zulmga. Haqiqatning devori balandroq, darvozalari mustahkamroq boʻlarkan. Darvozani ochishga qiynalsangiz, baland devordan oshib tushishga erinsangiz devorining tayini yoʻq bu qoʻshninikiga kira qolasiz, toʻgʻrimi?
 - Unchalik toʻgʻri emas, gumon koʻchasidan oʻtmay, haqiqat saroyiga kirilmaydi.
- Lekin siz gumonga asoslanib ham qamaysiz-ku, toʻgʻrimi? Yana «qamoq» demaysiz, «ehtiyot chorasi», deysiz, a?

Omonullo «koʻrdingizmi bu bolani, «vunderkind» deb toʻgʻri aytdingiz», degan ma'noda Bobomurod bilan koʻz urishtirib oldi-da, oʻsmirning donoligi erish tuyulsa ham fikrlarini davom ettiraversin-chi, deb arqonni uzun tashlab, savollariga shoshilmay javob beraverdi:

- Ehtiyot chorasi ba'zan zarur bo'ladi.
- Qochib ketmasligi uchunmi?
- Ba'zan unday, ba'zan esa bir odamni sheriklarining hamlasidan asrash uchun ham shunday chora ko'riladi.
 - Samandar aka qaysi biriga kiradilar?
 - Samandar akangiz ayni paytda ozodlikdalar, tilxat olib, qo'yib yuborganmiz.
- Ie, bo'lar ekan-ku? Opoqim «qo'llarini kishanlab olib ketishdi», deganlariga siqilib o'tiruvdim. Sizlarga baribir-da, olim odamni ham kallakesarning yoniga qo'yib qamayverasizlar.

- Qamoqda olim odam uchun alohida imtiyozli xona boʻlmaydi. Bunaqa imtiyozlar, unvonlar, martabalar ozodlikda boʻladi. U yerda hamma teng. Martabalari ham, imtiyozlari ham bab-baravar.
- Kitobdagi gaplarni aytyapsiz menga. Birinchi marta oʻtirgan odam bilan uchinchi yo toʻrtinchi marta qamalgan odamning sharoiti bir xil boʻlmaydi-ku? Bizning bir qarindoshimiz borlar. Uch-toʻrt yil qamoqda oʻtirsalar, ozodlikda bir-ikki oygina yuradilar. Yana bir balo qilib qamaladilar. Oʻsha odam Samandar aka bilan oʻtirsa tenglik boʻlarmidi? Choyi boʻlsa choyini ichib qoʻyar, sigareti boʻlsa chekib qoʻyar... Menga oʻzlari aytib berdilar: odamlarni laqillatib qarta oʻynarkanlar. «Prosto tak, «durak» oʻynaymiz» derkanlar. Keyin «pro STO deganman», deb yuz soʻmni boʻyniga qoʻyarkanlar. Siz aytgan tenglik shumi? Nega kulyapsiz?

Bobomurod miyig'ida kulgan edi, yigitchaning ziyrak nigohi shuni ham ilg'ab, uni savolga tutdi:

- Men kulgili gap aytdimmi?
- Xuddi qamoqxonada yashab chiqqanday gapiryapsiz, uka, dedi Bobomurod.
- Gaplarim noto'g'rimi?
- Toʻgʻri. Lekin har bir joyning oʻz qonunlari boʻladi. Bu hayotda lalaygan odam ertami-kechmi qamoqqa tushishi mumkin. Qamoqda lalaygan odam esa lahadga tushadi. Hayot ham urushga oʻxshagan narsa, uka. Kim lalaysa yo tuhmat oʻqiga uchraydi, yo kambagʻallik toʻriga ilinadi, yo yana boshqa bir baloga uchraydi. Jang paytida kerishib, esnayotgan odamning miyasini oʻq oʻpirib yuboradimi? Hayotda ham shunday. Ziyrak odam yashab qoladi.
 - Sanjar aka lalaygan lagmamilar?
- Unaqa deganim yoʻq. Man u odamni tanimayman. Tanimagan odamimga esa baho bera olmayman.

Shu payt Abdugayum surat ishlab chiqqan xonada nimadir chirsilladi.

 Oyijon, suratlar guridi, guritgichni o'chirib go'ying, iltimos, — dedi Abdugayum oshxona tomonga qarab. Onasi darrov chiqib, aytilgan ishni bajardi.— Bugun qo'llarimga ancha jon kirib, suratlarni ishlab qoʻya qoldim, — Omonullo Abduqayumning panjalari bu safar yengilroq bogʻlanganiga e'tibor berdi.— Aka, siz ketganingizdan keyin men koʻp oʻylandim. Odamlar tugʻiladilar, yashaydilar, oʻladilar. Tugʻilsa — quvonamiz, oʻlsa xafa bo'lamiz. O'sha o'lgan odam tirikligida yaramas ishlarni ko'p gilganiga garamay achinaveramiz, afsuslanaveramiz. Men avval ko'rishganimizda ham aytuvdim: Nafisa opani siz qidirayotgan odam o'ldirmaganida ham baribir boshqa bahonai sabab bilan bu dunyoni tashlab ketardilar. Siz hozir qotilni emas, sababchini qidiryapsiz. Bilasizmi, men odamning o'lganiga achinmayman. Chunki o'lim hamma uchun atalgan ne'mat. Men imonsiz ketgan odamlarga achinaman. Imonsiz ketsa u dunyodagi ahvoli nochor bo'ladi, men shunga afsuslanaman. Nafisa opa ancha imonga kirib golay devdilar... savoljavoblari oson bo'lsin, ishqilib... Oyijonim ba'zan menga qarab turib ranjiydilar, mening bunagaligimdan eziladilar, o'zlarini aybdor deb hisoblaydilar. Do'xtirlar «sizga tug'ish mumkinmas», deyishgan ekan. Do'xtirning aytgani emas, Ollohning xohlagani bo'ladi. Olloh oyijonimga farzand berishni ixtiyor qildimi — do'xtiringiz nima deya oladi? Ko'p gapiryapti, deb g'ashingiz kelmasin. Shu gaplarni aytish uchun rosa o'yladim-da. Siz gotilnimi yo boshqa jinoyatchinimi izlaysiz, ushlaysiz, gamaysiz. Lekin birini gamasangiz ikkinchisi tayyor turadi. Sizdan oldingilar ham gamab tugatolmagan, sizlar ham tugatolmaysiz, keyingilar ham. Nima uchun, bilasizmi? Amaki, aytaveraymi, jahlingiz chiqmaydimi?

Bobomurodga bu yigitchaning yoshiga yarashmagan tarz-da aqlli gaplarni aytayotgani avvaliga sal erish tuyulgan boʻlsa-da, endi xush yoqayotgan edi. Shu bois Omonullo bilan koʻz urishtirib olib:

- Gapiravering, fikrlaringiz menga yoqyapti, deb toʻgʻrisini aytib qoʻya qoldi.
- Sizlarning ishingizda bitta xato bor: «shu odam nimaga qoʻliga pichoq oldi, nimaga oʻldirdi, nimaga oʻgʻirladi?» degan savolga javob qidirmaysiz. Siz uchun bu odamning jinoyatni boʻyniga olgani muhim. Sabab muhim emas. Siz oʻtni oʻrib olasiz. Ildizi esa qolaveradi. Men oʻylab-oʻylab shu ildizning nimaligini bilganga oʻxshayman. Toʻgʻrisi, bitta kitobni oʻqib turib shu fikrga keldim. Hamma jinoyatning bir qanoti NAFS, ikkinchi qanoti QALBning nursizligi, qalbning boʻshligi ekan. Oyijonim shu kitobdan bir necha satrni yozib berdilar, oʻqiysizmi?

Abduqayum shunday deb aravachasi yonidagi qopchiqdan toʻrtta buklangan bir varaq qogʻoz chiqarib, Omonulloga uzatdi. Omonullo qogʻozni ochib avval satrlarga shoshqich koʻz yugurtirdi-da, soʻng ovozini chiqarib oʻqib boshladi:

— «Qalbingizni oʻylang! Inson qalbi bir goʻsht parchasidan iborat emas. Qalbda ma'naviy haqiqat, Rabboniy latofat jo etilgan. Qalb ayni paytda inson koʻnglining eshigi, derazasidir. Derazadan tash-qariga qaraganingizda yerlarni, osmonni, yulduzlarni koʻrganingizdek, qalbingizga boqqaningizda ham koʻngil olamingizni mushohada qilasiz. Bu olam— nuroniy olam: tengsiz, keng, teran olam boʻlib, arshi a'loga qadar uzanib ketgan. Oʻzingizni ana shu olamga oʻtganingizni, har tarafingizning nurga toʻlibtoshganini his qiling...» — Omonullo xatni oʻqib boʻlib avval oʻgay otasiga soʻng jiddiy nigohini qadab oʻtirgan Abduqayumga qadadi: — Tayyorlab qoʻygan syurprizingiz shumi?

Omonullo shu savol bilan satrlar ma'nosini teran his etolmaganini oshkor qildi. Abduqayumning o'zi bu satrlardan g'oyat ta'sirlangan, boshqalar ham shu holatda bo'ladimi, deb fikr qilgan edi. Bu chaqiriqning Omonullo uchun oddiy gapday tuyulganidan ranjib, aftini oshkora burishtirdi.

- Bu Jo'shon hazratning gaplari. Syurpriz ke-yinroq bo'ladi. Siz avval so'raydiganingizni mendan so'rab oling.
- Bizni bir narsa qiziqtiryapti: pastdagi uyda taraqlagan ovoz eshitilmadimi? Masalan, mix qoqilganimi yo taxtaning taraqlaganimi? deb soʻradi Bobomurod.

Abduqayum bir oz o'ylab o'tirgach:

- Eshitildi, dedi. Lekin men slesarlar ishlayaptimikin, deb o'ylovdim.
- Qanaqa slesarlar? Qachon ishlashdi?
- Quvurlarni, isitgichlarni almashtiramiz, deb yurishgan ekan.
- Siz ularni ko'rdingizmi?
- Yoʻq, biznikiga kirishmadi. Avval pastki qavatdagilarnikini almashtirisharkan. Opoqimga uchrashibdi. Nafisa opam ishda ekanlar, «qachon keladi?» deb soʻrashibdi.
 - Opoqingiz aytdimi?
 - Ha.
- Omonullo, JEKka qoʻngʻiroq qil. Omonullo «kech boʻldi», degan ma'noda soatiga qaragan edi, izoh berdi: Navbatchi boʻladi.
- Ha, navbatchi boʻladi, deb quvvatladi Abduqayum, soʻng onasini chaqirdi: Oyijon, JEKning telefonini bering.

JEK deb atalmish idora navbatchisi telefon goʻshagini darrov koʻtara qolmadi. Omonullo toʻrtinchi marta raqam tergach, norozi ohangdagi «alyo» degan tovush eshitildi. Omonullo oʻzini tanitganidan soʻng «isitish quvurlarini qachon almashtirishga kirishasizlar?» deb soʻradi.

— Buni xoʻjayinlardan soʻrang. Bugun shanba, ertaga yakshanba. Indinga kelib soʻraysiz. Biz kichkina odammiz, — deb javob qaytardi navbatchi.

Xo'jayinning uylaridagi telefonni bering, — dedi Omonullo.

Navbatchi bir oz ikkilanib turgach, telefon raqamlarini aytdi. Boshliq uyida ekan. Omonulloning savoliga «1989 yilgi rejada bunday ish yoʻq», deb qisqa va loʻnda javob berdi. Omonullo uning gapini Bobomurodga aytgach, Abduqayum jonlandi:

— O'zim ham shundaydir, deb o'ylagan edim, — dedi quvonch bilan.

Undagi bu o'zgarish mehmonlarni ajablantirdi.

- Oyijon, iltimos, suratlarni olib chiqib bering, deb yalindi Abduqayum. Ayol turli hajmdagi oʻnga yaqin suratlarni olib chiqib bergach, Abduqayum ular orasidan ikkitasini ajratib, Omonulloga uzat-di: Qarang: mana shu odam bir kun oldin «slesarman» deb kelgan edi. Opoqim bilan shu gaplashgan boʻlishi kerak. Ertasiga ham kelgan. Men surat yaxshi chiqadimi yo yoʻqmi, deb gumonsirab, sizga aytmovdim.
 - Bu odamning kirganini koʻrgansiz, chiqqanini-chi?
 - Koʻrdim.
 - Qoʻlida tugunmi yo shunga oʻxshash narsami bormidi?
 - Yo'q.
 - Uyda taxminan qancha vaqt bo'ldi?
 - Bir soatchadir.
 - Samandar akangizdan oldin keldimi?
 - Ha. Nafisa opamlardan ham oldinroq kelgan.
 - Samandar akangizdan oldin chiqdimi yo keyinmi?
 - Keyin shekilli... Ha, keyinroq chiqdi.

Omonullo «uyda berkinib turganmi? Unda gazchi? Ochilov gazni oʻchirib, derazani ochgan ekan. U chiqib ketganda ham uyda qolgan boʻlsa nima uchun derazani berkitib, gazni yana ochmadi? Yoki... nima uchun Ochilovni ham oʻldirmadi?...» degan ma'noda Bobomurodga qarab qoldi. Bobomurod ham ayni shu xayolda edi.

— Toʻxtang... — dedi Abduqayum oʻylanib olib. — Samandar aka mashinadan tushganlarida kimdir yuqori qavatga koʻtarildi. Samandar aka qaytganlaridan ke-yin pastga tushdi. Keyin... shu odam koʻchaga chiqdi.

Omonulloning «zinada ro'para kelib qolishdan cho'chib yuqoriga ko'tarilganmi?» degan savol nazariga Bobomurod tasdiq ishorasini qildi.

- Bu suratni bizga berib tura olmaysizmi? deb soʻradi Omonullo.
- Marhamat, siz uchun atay ishladim...
- Lekin... biz haq to'lamaymiz-da? dedi Omonullo kulimsirab.

Abduqayum avvalgi uchrashuvdagi gapiga shama' qilinganini fahmlab kuldi-da:

Amerikaga borganimizda to'laysiz, — dedi.

Bobomurod bu hazilga tushunmay, bir tutingan oʻgʻliga, bir yigitchaga ajablanib qaradi. Abduqayum esa qolgan suratlarni ham Omonulloga uzatdi:

— O'sha kuni qo'lim shikastlangunicha olgan suratlarim: Samandar aka ham borlar.

Chindan ham mashinaga o'tirayotgan Samandar suratga tushib qolgan edi. O'rindiqqa o'tirayotib uy derazasiga o'girilib qaragan Samandarning ko'zlarida hadik muhrlangan edi. «Bechora er», deb o'yladi Omonullo uning javdiragan ko'zlariga qarab.

Uy bekasini «ovqat tayyor boʻlib qoldi, oʻtiringlar», deyishiga qaramay, xayrlashib, pastga tushdilar. Omonullo qoʻshni eshik qoʻngʻirogʻi tugmasini bosdi. Abduqayumning opoqisi slesar haqidagi gaplarni tasdiqlab, suratdagi odamni ham tanigach, Bobomurod «xomligingni isbot qildimmi?» degan ma'noda mugʻambirlik bilan kulimsiradi.

Bu orada yetib kelgan tekshiruvchilar guruhi Omonullodan topshiriq olib, betoʻxtov ravishda ishga kirishdilar. Omonullo Bobomurodni «vazirlikdagi ustozim», deb tanishtirgani uchun «ustoz» ularning ishlariga aralashdi. Koʻchirib, soʻng oʻrniga qoʻyilgan taxtalarni olish qiyin boʻlmadi. Bu yerdan nimadir qidirilgani aniq edi. Ammo

oʻsha «nimadir» topilganmi yo yoʻqmi — shu noma'lum edi. Bobomurod har bir nuqtani sinchiklab tekshirishni talab qildi. Oqibatda burab olinib soʻng joyiga qoqilmagan mixga qon tekkani aniqlandi. Shu mixqalpogʻida barmoq izlarining qolgani ular koʻngliga chiroq yoqdi. Barmoq izlari poltaxtalari ostida qolib ketgan qoʻlbola buragichda ham bor edi.

- Barmog'ini urib olgan yoki nimadir kesgan. Buragichni yo'qotib, topolmagan. Shubhasizki, shoshilgan. Agar izlaganini topolmagan bo'lsa, asabiylashgan, dedi Bobomurod.
 - Asabiylashsa taxtalarni joyiga qo'yib, gilamni yoparmidi?
- Hamma yoqni agʻdar-toʻntar qilib tashlab ketardi, demoqchimisan? Agar xom oʻgʻri boʻlsa, shunday qiladi. Durustroq narsaning isini olgan boʻlsa, darrov sir boy bermaydi. Bu yerdan boʻlmasa boshqa joydan chiqishini kutadi. Payt poylaydi. Har holda u uy egalarining kelib qolishlarini kutmagan. Agar ular hammomga moʻralab uni koʻrib qolishmaganda oʻlishmagan boʻlishardi.

... Shu kabi turli taxminlar bilan yarim kechada uylariga qaytishdi. Ertasiga barmoq izlari va surat boʻyicha tegishli soʻrov yuborildi. Javob uzoqmadi: «Pavel Onopko. Xersonda tugʻilgan. Laqabi — Koshak. Ukraina SSR jinoyat kodeksining (...) moddalari bilan ozodlikdan mahrum etilgan. Hozir Irkutskdagi (...) qamoq lagerida...»

Irkutsk? Omonullo Toshboltaning «Irkutskka boruvdim» degan gaplarini esladi. Esladi-yu, «Oʻsha yerda iziga tushdimi?» degan savol xayolini yoritdi. Keyin «Axir u qamoqda boʻlishi kerak-ku?» deb oʻylab, nav-batdagi soʻrovni yubordi. Bu orada Nafisaning oʻynashi yodiga tushib, tortmadagi qogʻozlar orasidan Matluba bergan xatlarni ajratdi-da, manziliga qaradi. Qaradi-yu, roʻparasidagi zimiston yorishgandek boʻldi. Eshik qulfining kalit bilan emas, yasama mixochqich bilan ochilganini dalillovchi xulosa esa unga endi ahamiyatsizdek tuyuldi.

Yakshanbani arxivga oid ma'lumotlarni o'rganish bilan o'tqazib, uyiga kech qaytdi. Uyquga to'yib ulgurmay telefon jiringi uyg'otdi...

Uchinchi bayon: OYDINLIK

NAFISA

Bu dunyodagi hayot qilkoʻprik emas, undanda xavfli, undanda battaroqdir. Balki ustara tigʻi ustida yalang-oyoq yurishga qiyoslash oʻrinlidir? Voqean shunday. Ustara tigʻi desakda, qilkoʻprik desakda farqsiz — Nafisa bu yoʻlda yura olmadi — toydi. Unga bu yoʻlda qanday yurmoq lozimligini oʻrgatmadilar. Zaharni «asal» dedilar — ishondi, zulmatni «oydinlik» dedilar — koʻndi, azobni «rohat» dedilar — ma'qulladi... Sassiq koʻlni mavjli dengiz deb xayol qilib adashganini, oydin yoʻl degani baxt saroyiga emas, doʻzax qopqasiga yetaklaganini kech angladi. Agar uyida oʻlim topmaganida balki «kech angladi» demogʻimiz oʻrinsiz boʻlardi. Harom-halolning farqiga endigina borayotgan juvon uchun pokiza dengiz yoʻllari ochilarmi endi?..

Bir kuni ishxonasidagi ayolning «Har bibi seshanba kuni osh damlab muhtojlarga chiqaraman, shuning uchun Xudo mushkullarimni oson qiladi», degan gapi Nafisaga ta'sir qildi. Farishtali oila deb atalmish baxtdan boshqa hamma narsasi bor Nafisa keyingi haftalarda oʻzi sezmagan, oʻzi istamagan holda ezila boshlagan edi. Tursunali akasi u yoqda, eri togʻda boʻlgan juvonning yolgʻiz qolishi azob edi. Yoʻq, Nafisa oʻgay onasi ta'rif etgan darajadagi toifadan emasdi. Ersirab qolgani ham yoʻq edi. Faqat ayollar

oilalaridan gapirishsa, hatto turmush qiyinchiliklaridan nolishsa ham ularga havasi keladigan boʻlgan edi. U er hukmron boʻlgan koʻp bolali oilaga ega boʻlish orzusida yashay boshlagan edi. Chiroyli yoki puldor er havasi shamolda qolgan shamchiroq singari umri poyoniga qarab borardi. Shinam oila orzusida u osh damladi. Ikki yon qoʻshnisinikiga bir kosadan chiqardi, bir kosani olib yuqori qavatga koʻtarildi. Abduqayum uyda yolgʻiz edi. Nafisa ochiq eshikdan kirib, kosani aravachaga moslangan stol ustiga qoʻydi. Nafisa qoʻshni ayollarning bu xonadonga kirib, gaplashib oʻtirishlarini bilardi, «bu bola koʻp kitob oʻqiydi, bola emas — balo!» degan ta'rifni ham eshitgan edi. Shu sababli Abduqayumning «Nafisa opa, bir pas gaplashib oʻtiring», degan taklifini rad etgisi kelmadi.

Shundan soʻng yolgʻizlik azobiga Abduqayumning suhbatlari malham boʻla boshladi. Shu yerda uning tosh yuragi yumshaganday boʻlib, zulmatdagi qalbiga iymon nuri asta moʻraladi.

Omonullo Nafisaning ishxonasiga borganida stoli tortmasidan oʻn ikki varaqli daftar olinganini bilmas edi. Nafisa bu daftarga nimalarnidir yozar, keyin uzoq tikilib oʻtirar edi. Bu holatga qiziqqan hamxona ayol uning oʻlimidan soʻng daftarni olib oʻqidi-yu, ammo joyiga vaqtida qoʻyishni unutdi. Omonullo kelganida esa daftarni uning qoʻliga tutqazishdan choʻchidi. Shu bois Nafisaning qalbidan oʻtganlari sir boʻlib qolaverdi.

Nafisa Abduqayumning kitoblardan o'qib berganlarini eslab, ayrim gaplarni esa yozib qo'yishni odat qilgan edi.

«Seni haqiqatdan uzoqlashtirib, yomon odatlarga yaqinlashtirgan kimsa eng iflos odamdir...» — Abduqayum shunday dedilar. Unda... Eng yaqin odamlarim... eng iflos odamlar ekan-da... Voy, Xudoyim, bu ne koʻrgulik...»

«Ey Odam farzandi! Dunyoga yomonlik tarqatganni aslo olqishlama! Bu olqishing seni zulmlarning eng dahshatlisiga olib boradi...» — Men shunday qildimmi? Endi zulmning eng dahshatlisiga uchraymanmi? Voy, Xudoyim, bu ne koʻrgulik...»

«Ey boyligi bilan mag'rur bo'lgan inson! «Falonchiman!» deb kibrlanma, balki «Asli o'zim kimman?...» deb fikrla. Bugun moliga maftun, avlodiga majnun bo'lgan ey inson! Ko'z yumgan kuning achchiq-achchiq haqiqatni ko'rgach tushunasan... Mol-dunyong ko'pligidan sevinma, halol qo'lga kiritganingdan sevin. Chunki harom daromad seni oqibat azobga duchor qiladi...» — Bu azoblar hali menga kammidi... Voy, Xudoyim, bu ne ko'rgulik...»

«Qalbida iymon nuri boʻlmagan inson — uyqudadir. Uni faqat oʻlim uygʻotadi. Shu sababli Rasulluloh «insonlar uyquda, oʻlganlarida uygʻonadilar», degan ekanlar...» — Men qanday uygʻonar ekanman, Voy Xudoyim...»

Hamxona ayol bu satrlarni oʻqib koʻp ham ta'sirlanmagan, «eskichaga oʻqiyotgan ekanda», deb qoʻya qolgan edi. «Qalbning nurlanishi» degan tushunchadan uzoq boʻlgani uchun ham Nafisaning satrlariga koʻchgan tuygʻulariga hamroz boʻla olmagandi. Daftarni Omonullo oʻqigan taqdirda ham «qotilni aniqlashga yordam beruvchi dalil yoʻq», deb qoʻya qolar edi.

Idora xo'jayini «milisaga «g'ing» desalaring onalaringni ko'rsataman», degani sababli hamxona ayol Omonulloga bor gapni aytishdan qo'rqdi.

... Nafisa oʻsha kuni ertalab bozorga kirib issiq non, qulupnay koʻtarib kelib idoradagilarni mehmon qildi. Mehnat ta'tilini togʻda, eri bilan oʻtkazajagini hamxona ayolga aytdi. Shunda «yo bugun, yo ertaga olib ketishlari kerak, hammomda kran oʻlgurdan suv oqyapti. Usta chaqirsam kelmayapti, yoʻgʻimda suv sharillab oqib ketsa qoʻshnilarimdan balolarga qolaman», deb nolidi. Shunda hamxona ayol: «Voy, Sanjarga ayta qolmaysizmi, menikini bir pasta tuzatib bergan, asli kasbi santexnik-ku, bilmasmidingiz?» dedi-da, chaqqonlik bilan turib yigitni chaqirib keldi.

— Ishdan keyin borolmayman. Agar «xoʻp» desangiz hozir borib tuzatib kela qolay...

Taklif ma'qul bo'lib yo'lga tushdilar...

Ularning birga kelayotganlarini Abdugayum ko'rdi...

Koʻrdi-yu, koʻngliga shubha oralamadi, yomon fikrga bormadi...

Uch kundan keyin Nafisani qarg'adilar:

- O'ynashi bilan yotgan ekan, sharmanda!
- ... Sharmanda... Sharmanda...

Uch kundan keyin Sanjarni la'natladilar:

- Suyuqoyoqqa ilakishgan ekan, yigit o'lgur!
- ... Yigit o'lgur... Yigit o'lgur...

Hamxona ayol ham bu gaplarga ishondi va aytdiki:

Ilgaritdan ko'z suzishib yurardi-da...

KOSHAK

Koshak necha marta «etap»ga qoʻyilgan boʻlsa ham bunchalik quvonmagan edi. Hali toj kiyish darajasiga yetmagan, ammo «Ot!» desa otishdan, «Os!» desa osishdan, «Boʻgʻib tashla!» desa boʻgʻib tashlashdan qaytmaydigan ikki yigitning ikki qanotiga kirishi unga baxt va omad darvozalarini lang ochib beradiganday boʻldi. U yoʻl-yoʻlakay «Parijda yashaganim yaxshimi yo Floridadami?» degan masalada ham bosh qotirishga ulgurdi. U oʻzi yoqqan zulm oʻtida oʻzining qovrilajagini bilmay xom xayollariga bandi boʻlib maza qildi.

Ularni shahar chetidagi toʻrt qavatli uyning uchinchi qavatidagi besh xonali uyga joylashtirdilar. Derazalariga oʻrnatilgan yangi panjaralarga qaraganda uy bularning tashrifi uchun maxsus «jihozlangan» edi. Ertasiga yana yetti kishi kelib, uy toʻlib qoldi. Koʻngil istagan barcha narsalar: aroq deyilsa — aroq, nasha deyilsa — nasha, qora dori deyilsa — qora dori muhayyo etib turildi. Koshak hatto «Boquv shunaqa boʻlsa, chet elga joʻnashning hojati ham yoʻq», degan xayolga bordi. Boʻlajak ish rejasi bilan tanishtirishga shoshilishmadi. Shunda Koshak ularni kuzatib turgan boshliqdan «bir uydagi omonatini olib kelish» uchun ruxsat soʻradi. Boshliq kattalari bilan maslahatlashib unga ikki kunga ijozat berdi. Koshak oʻzi bilan kelgan yigitlarning birini yoniga olib Samandarning uyini topdi. Kuzatdi. Ertasiga slesar qiyofasida kirdi. Kichik xona polining taxtalarini koʻchirdi. Koʻchirdi-yu, laqqa tushganiga amin boʻlib, gʻazab bilan mushtumini qisdi. Qoʻlida uchli burama mixni ushlab turganini ham unutdi. Mix barmogʻi uchiga sanchilgandan keyingina oʻziga keldi...

Jahl otiga minganicha chiqib ketmoqchi edi, ammo boshliqning «birorta iz qolsa, oʻzingdan koʻr, u yer sen oʻylagan onangning uyi emas», degan topshirigʻini eslab, taxtachalarni joyiga qoʻydi. Javonni oʻrniga surishga esa ulgurmadi. Eshikdan tashqarida ovozlar kelgach, oʻzini hammomga urdi...

Tugmali buklama pichoq bilan erkakni bir hamlada oʻldirdi.

Ayol dod solib oshxona tomonga qochdi. Chap qoʻli bilan ogʻzini yumib, oʻng qoʻlidagi pichoqni qovurgʻasi ostiga sanchdi. Ayol yiqilib tipirchilay boshladi. Uning qulogʻidagi zirak koʻzi yaltillab ketdi — ikkala zirakni shart quloqdan uzib ola qoldi. Soʻng barmoqdagi uzuklarni oldi — har holda quruq ketmayotganidan quvondi. Ayolning jon berishi ogʻir boʻldi. Unga rahmi keldi — stol ustidagi pichoqni olib, yuragiga sanchib, bu dunyo azoblaridan qutqardi. Pichoq sopini roʻmolchasi bilan artib qoʻyishni unutmadi. Boshliqning iz qoldirmaslik haqidagi topshirigʻini eslab, buning ham chorasini topdi — qaz yoʻllarini ochdi.

Shanba kuni ularning vazifalari ayon boʻldi. Shaharchadagi qaysi uylarda badavlatroq odamlar turishini alohida koʻrsatishdi. Guruh ikkiga boʻlindi. Birinchi guruh — keyin kelgan yetti yigit — uchragan odamlarni oʻldirib, uylarni yoqib ketishi kerak edi. Koshak esa ikki sherigi bilan badavlat xonadonlarni talab, soʻng oʻt qoʻyishni zimmasiga oldi. Qoʻlga kiritilgan boylik oʻn kishiga teppa-teng halol boʻlinishi qayd etildi. Vazifa yashin tezligida bajarilishi shart edi. Shanba kuni kechqurun ularni shu koʻchalardan ikki marta olib oʻtishdi. Ertasiga kun yoyilganda, uzoqda olomon koʻrinishi bilan ular vazifalarni bajarishga kirishdilar. Aldangani uchun gʻazab otiga mingan Koshak bu vazifalarni keragidan ortiqroq darajada bajarishga harakat qildi. Birinchi uyga bostirib kirganidayoq xonadon sohibi uning koʻziga dam Tursunali, dam Tengiz boʻlib koʻrinib pichogʻini sanchaverdi... sanchaverdi... Har tigʻ urganida koʻngli rohatdan yayrayverdi... yayrayverdi...

To'mtoq aqli esa hademay o'zining qoni ham oqajagini idrok etmadi.

Vazifalar ado etilib, hamma yuz bergan fojia haqida bosh qotirayotgan kunlarning birida Tengiz «oilasidan xabar olish» uchun ijozat soʻrab Tursun-alining ota uyiga bordi. Amakivachchalar «SSSR prokuraturasidan kelgan» Tengizga monelik qilishmadi. Bogʻoʻrtasi kavlanib, temir quticha olindi. «Akt» yozilib, amakivachchalar guvoh sifatida imzo chekdilar. Bir necha yil tuproq ostida «jon saqlagan» temir quticha ertasigayoq yana Tengiz uchun ishonchli boʻlgan joyga koʻmilib, egasi ozod boʻlib qaytguniga qadar kutdi...

TENGIZ

U hayoti yoʻlida tikanlar, toshlar borligini bilardi-yu, ammo olovlarga duch kelarman, deb oʻylamagan edi. Tengiz «Koshak bilan vazifamiz bir boʻlsa, u haromi bilan uchrashaman», deb yanglishdi. Vazifa oʻtaladigan joy bir boʻlgani bilan, bajariluvi lozim boʻlgan yumush boshqa-boshqa edi. Ta'bir joiz boʻlsa, xuddi bolalarning «Oq va Qizil» oʻyiniga oʻxshardi. Bir guruh bola Oq, bir guruhi Qizilga ayrilganidek, Koshak bilan Tengiz ham boʻlingan edilar. Koshak yerli xalq nomidan vahshiylikni boshlagach, Tengiz togʻliklar nomidan qarshi zulmni koʻtarishi lozim edi.

Tengiz oʻzining guruhi bilan shahar turmasida vazifa boshlanish onlarini kutdi. Ularni shanba kuni kechqurun shahar yonboshidagi togʻliklar zich yashaydigan mahallaga olib kelib, pastqamroq uyga joyladilar. Koshak guruhidan farqli oʻlaroq, ular makon topgan hovliga qurolli soqchilar qoʻydilar. Tengiz va uning sheriklari sodiq xizmat qilmoqqa va'da berganlari bilan, ularga toʻla ishonch yoʻq edi. Shanba oqshomida vazifa bilan tanishtirishgach, «agar bajarishdan bosh tortsangiz yoki qochmoqchi boʻlsangiz, jo-yida otib tashlaymiz», deb ogohlantirishdi.

Kechasi Tengiz uxlay olmadi. Chekish bahonasida hovliga chiqqanida bir odamning darvoza ustuniga mato bogʻlayotganini koʻrib soqchiga ajablanib qaradi. Soq-chi unga «ishing boʻlmasin!» deganday qoʻl siltab qoʻydi.

Kun yoyilganda boshlashdi.

Avval bir to'da o'tdi. Uylardan qora tutun o'rlay boshladi.

So'ng kichik to'da paydo bo'ldi. Oldindagi Koshakni ko'rib Tengiz darvozadan otilib chiqay dedi. Soqchi «hali vaqt bor», deb ko'kragidan itardi.

Ko'chaga qo'yilishi bilan Koshakni izladi. Topdi.

Sandiq kavlayotgan Koshak orqasida sharpa sezib oʻgirildi, ammo oʻzini himoya qila olmadi — Tengizning qoʻlidagi pichoq boʻgʻziga qadaldi-yu, tomogʻidan otilgan qon sandiq ichidagi pullarni qizilga boʻyadi. Dam oʻtmay uning jasadi oʻzi oʻldirgan uy egalarining murdalari bilan birga yona boshladi...

O'sha daqiqalardayoq mish-mishlar alangasi hamma yoqni qamrab oldi:

- Yerliklar togʻliklarni tiriklayin yondirishibdi...
- Togʻliklar avtomatlar bilan qurollanib katta kuch bilan shaharga yopirilishibdi...

Tahlika, vahimada qolgan aholi lochin changalidan qoʻrqqan polaponlarday najot tilab qaqshar edilar.

Televizorda esa mosh yutgan xo'rozday bo'lib olgan notiq kulimsiragan holda va'z aytardi:

— Hamma janjal qulupnoydan chiqibdi... Odamlar ham nodon...

OMONULLO

Ishxonada televizor tomosha qilib oʻtirgan Omonullo bu gaplarga ishondi. Ikki kundan soʻng u moskvalik tergovchilarga qoʻshilib fojia sodir boʻlgan shaharga uchdi. U ketgach, soʻroviga javob keldi: «Soʻrovingizga binoan shuni ma'lum qilamizki, Pavel Onopko (laqabi Koshak) qamoq lageridan qochishga uringanida 1989 yil 20 may kuni otib oʻldirilgan».

Uch oy davomida moskavaliklarga yordam bergan Omonullo ishxonaga qaytib bu javobni oʻqidiyu nimanidir sezganday boʻldi. Irkutskka borib kelishni iltimos qildi. Avval ijozat berishdi, keyin esa «ovora boʻlmay ishni yopib qoʻya qoling», degan maslahatda toʻxtashdi.

Shu toʻxtamga kelingan kuni oqshomda prokuraturadan Mels Xoʻjaev qoʻngʻiroq qilib «Aka, Irkutskka bormoqchi emishsiz, agar maslahatimga koʻnsangiz — bormang. Sababini keyinroq bafurja gaplasharmiz», dedi.

Bu orada Fotima Hindistondan gaytdi.

Va'dagi binoan bahorga chiqib o'g'il tug'ib berdi.

Dissertatsiyasini himoya qilayotganda Omonullo beshikdagi oʻgʻlini soʻrgʻichda ovqatlantirib oʻtirar edi. Boltaevaning oʻlimiga oid ishni toʻxtatishdan voz kecholmagani uchun iste'foga chiqishga majbur boʻlgan Omonullo uchun oʻgʻil boqib oʻtirish ulugʻ bir baxt boʻlib tuyular edi...

SO'NG...

Adolat Omonulloga qatnayverib, oxiri erining molini qoʻlga kiritdi. Omadini qarangki, yangi sov-xoz direktorini ham qoʻlga kiritishga erishdi — katta qizini unga qoʻshib qoʻya qoldi. Toshbolta olib kelgan boylikning bir ulushi sovxoz direktoriga tegishli edi. Adolat shu boylikni olib ketish uchun uni uyiga taklif etdi. Yedirdi, ichirdi, soʻng...

Ichkarida yangi direktor huzurlanar...

Bu yoqda Adolat quvnar, orzulardan tilla saroylar gurar...

Ayvonda esa jon berayotgan Toshboltaning lablari bir tomchi suvga zor...

VA NIHOYAT...

O'n yil ichida dunyo o'zgarib ketdi. Ko'p yurtlarni bosib yotgan qorong'ulik chekindi, balo bulutlari tarqaganday bo'ldi. Oftob charaqlagan kunlarning birida Omonulloni xizmatga qaytardilar. Uchinchi o'g'li tug'ilganida u polkovnik darajasiga yetgan edi.

Oftob nuridan gul ham, chaqir tikan ham bahramand boʻlganiday, oʻpkasini sovuqqa oldirgan Tursun-ali ham uyiga barvaqt qaytdi. Oʻzini tuhmat balosiga uchragan mazlum sifatida koʻrsatib, hech boʻlmaganda sovxoz direktorligini qaytarish ilinjida koʻp urindi. Ammo urinishlari zoe ketdi. Yaxshiki, shogirdiga insof kirib, uni qanotiga oldi. Tursunali buni shohsupa sari bosilgan birinchi qadam deb oʻyladi. Ammo nafs yana oʻz ishini qildi: bir vagon ma'dan oʻgʻitlarini pullayotgan paytda qoʻlga tushdi-yu, oʻzi bilan birga shogirdini ham chohga tortdi.

Ogibatda:

Adolatning qizi o'ynashsiz qoldi...

Matluba yana ersiz...

Matlubaning birinchi kelinini uy ostonasiga olib chiqib «qaynotasiga salom...» deyishayotganda salom egasi Uchquduqdagi qamoq lagerida oʻz taqdirini la'natlab oʻtirardi.

Nuriddin esa...

Qo'tosning saboqlari zoe ketdi. Uyiga qaytgach, Nuriddin ota kasbini qildi — odam o'ldirgan qo'llarning ketmon dastasiga ko'nikishi qiyin bo'lsa-da, baribir iziga qaytmadi.

Bir kuni shomda gʻoʻzalarga suv tarayotgan damda shiypon yaqinida mashina toʻxtab, undan bashang kiyingan odam tushdi. Brigada boshligʻi ham ketib boʻlgan, dalada Nuriddin yolgʻiz edi. «Xoʻjayinlardan biri keldi», deb oʻylab, shiyponga yaqinlashdi-yu, Tengizni koʻrdi. U bilan qanday koʻrishishni bilmay taraddudlanganida Tengiz quchoq ochdi:

Hamzat! Salomatmisan, birodarim! — deb quchoqlab oldi.

Nuriddin «meni yana oʻgʻirlikka tortgani kelgan», degan fikrda, rad javobini qanday qilib aytishni bilmay oʻtirganida Tengizning oʻzi mushkulini oson qildi:

- Seni olib ketgani kelganim yoʻq, qoʻrqma, dedi u. Sendan oʻgʻri chiqmasligini bilardim. Seni u tomonlarda saqlab qolishning boshqa yoʻli yoʻq edi. Men yurtingdan ozroq qarz boʻlib qolgan edim, toʻgʻrirogʻi, tovon toʻlashim kerak edi, shuni toʻlagani keldim. Ataganimni beramanu ketaman. Endi zamon bosh-qa, Hamzat, hayot ham boshqacha boʻladi. Sen bolalaringni oʻzingga oʻxshatib tarbiyalama. Tengiz shunday deb mashinadan ixcham jomadon olib ochdi. Uning ichidagi pulu javohirni koʻrib Nuriddin lol qoldi. Tengiz pullardan bir taxlamini olib Nuriddinga uzatdi:
 - To'yingga kelolmadim, bu senga to'yona.

Nuriddin olmayman, deb chekingan edi, Tengiz pulni uning qo'njiga solib qo'ydi.

— To'yonadan qaytmaydi, ahmaq! Sendan bitta iltimosim bor: o'g'illaringdan birining ismini Hamzat deb qo'y, maylimi? — U shunday deb jomadonni yop- di. — Bunisi yurtingga to'laydigan tovon...

Shunday deb ketdi...

Nuriddin uni boshqa koʻrmadi...

Tengiz uning uchun shirin xotira bo'lib goldi...

AYTAR SO'ZLARIM SHUKI:

Har bir narsaning ibtidosi boʻlgani kabi intihosi ham mavjuddir. Tangri-taoloning buyuk lutfi, karami va marhamati ila bayonimiz shu yerda nihoyasiga yetdi. Shoni Aziym boʻlgan Ollohga behad hamdu sanolar boʻlsin. Oʻqiganingiz mazkur bayonlarda yutuqqa arzirli jihatlar boʻlsa — Ollohning marhamatidandir. Sizni ishontirmagan, gʻashingizga tekkan, hafsalangizni pir qilgan yerlari bor ekan, bu qalamimiz ojizligi, e'tiborsizligimiz, loqaydligimiz va yana allaqancha ayblarimiz tufaylidir. Buning uchun siz, aziz kitobxonlardan uzr soʻrab, Yaratganning oldida tavbalar qilamizkim, shoyad tavbalarimiz qabul boʻlib, bunday keyingi bitiklarda Haq yoʻldan adashtirmasa.

Bayonlarda qora boʻyoqlar koʻproqmikin, deb ajablanarsiz balki? Ajablanmang, bu xato mahsuli emas. Atayin shunday qilindi. Zulmdan qochmoqlikning, zulmga nafrat qilmoqlikning yoʻllaridan biri — zulm aslan qanday ekanini yaxshiroq va aniqroq koʻrish, anglash, tahlil qilmoqlikdir. Nafsning kelajagi — zulmdir, zulmning kelajagi esa — xorlikdir. Biz ana shu oddiy haqiqatni bayon qilmoqchi boʻldik. Badan pokligi badanga, ruh pokligi ruhqa hayot bagʻishlaydi.

Olloh Taborak va Taolo «Mulk» surasining ikkinchi oyatida marhamat qilib aytadiki: «Bismillahir Rohmanir Rohim. Allaziy xolagol mavta val hayata liyabluvakum ayyukum ahsanu amalan. Va huval azizul g'ofur.» (s.a.) (Ma'nosi: Ey Odam farzandlari! U o'limni va hayotni sizlarning qaysi birlaringiz amalda yaxshiroq ekanliklaringizni sinash uchun yaratgandir. U barchadan g'olibdir va gunohlarni kechuvchidir.) Qarang, insonni sinash uchun o'lim va hayot yaratilgan ekan. Ajab, nima uchun bu oyati karimada avval «o'lim», so'ngra esa «hayot» kalimasi kelyapti? Ba'zi ulamolarning aytishlaricha, buning hikmati odamlarni yaxshi amallarga chorlash ekan. Boshqa ulamolar esa, «Tafsiri hilol»da ta'kid etilganidek, buning hikmatini «o'lim» kalimasining mazmuni «hayot» kalimasining ma'nosidan teranroq, qamrovliroq ekanida, deb biladilar. Ya'ni, hayot — bu o'tkinchi dunyoning qisqa davri, o'lim esa boqiy dunyodagi abadiy hayotning boshlanishini bildirar ekan. Demakki, o'lim — foniy dunyo intihosi va boqiy dunyo ibtidosidir. Shunga ko'ra, o'limni eslagan odam doimo unga tayyorgarlik ko'rishi va foniy dunyoni tark etgach, sharmanda bo'lmaslik uchun o'zini yaxshi ishlarga safarbar qilmog'i lozim ekan. Ammo, biz — ojiz, notavon, gunohkor bandalar bunga hamisha ham amal gilavermaymiz.

Bu dunyoni tashlab ketganlar gapira olsalar edi, biz bu gaplarni eshita olsak edik, g'aflatdagi yumuq ko'zlarimiz moshdek ochilarmi edi...

Biz «gapirmaydilar», deymiz, aslida ular gapiradilar, ammo biz eshitmaymiz, eshitsakmi edik, qalblarimiz poralanib ketarmi edi... ularning afsuslari, chekkan nolalaridan quloqlarimiz qomatga kelarmi edi...

Suyukli paygʻambarimiz Muhammad, sallallohu alayhi vasallam, shunday marhamat qilgan ekanlar: «Jonim qoʻlida boʻlgan zotga — Ollohga qasamki, sizlar mening soʻzlarimni ulardan (ya'ni oʻliklardan) yaxshiroq anglaguvchi zmassizlar, faqat ular javob qila olmaydilar xolos...»

Bu muborak oyatu hadislarning ma'nosiga yetmog'imizni Olloh barchalarimizga nasib etsin.

Necha kunlaringizni, tunlaringizni, soatlaringizni ayamay biz bilan hamsuhbat boʻlganingiz uchun sizlardan benihoya minnatdormiz. Olloh barchalaringizning xonadonlaringizga qut-barakot berib, kullu ofatlardan asrasin.

Barchalarimizga ruh pokligi nasib etsin! Omiyn ya Robbil-olamiyn!

1998 yil.

www.ziyouz.com 2007

@Badiiykitoblar